



BIBLIOTECANAZ.

XLII

A

67

NAPOLI

BIBLIOTECA NAZ.

Vittorio Emanuele III

XLII

A

67


NAPOLI














6.

EUPHORMIONIS  
Lulinini *sive*  
IOANNIS BARCLAI  
SATYRICON

Partes quinque  
cum Clavi.

Accessit  
Conspiratio Anglica  
na.

Amsterodami,  
Apud Guilhelm. Blaeuw.  
A<sup>o</sup> cl<sup>o</sup> 1634.







AVGVSTISSIMO REGI  
IACOBO PRIMO,

Britanniarum Monarchæ in-  
clyto, Euphormio S. D.

**N**on peccavi in virtutem tuam, invictissime Rex, dum terrarum scelus libello hoc acerbe ultus sum. In homines enim erupit hic impetus, non in Deos: quos etiam laudare pertimui, ne aut quæsisse curiosus crederer, aut sacrilegus dubitasse. Cæteros suscepi indignante stimulo perfodiendos. Et prope neminem esse dolui, cui in hanc diem prodeunti non astiterit Genita Mana, illa ad quam suscipiebatur votum, ne quis nasceretur domi probus. Quæ etiam timeo ne adfuerit hujus libri cunabulis, & ne ipse nihilo sit melior, quam quos arguit. Adoravi jam ante tamen genium tuum, ut crediderunt aliqui, non indigno plane donario, & erigitur etiamnum animus meus ad hæc studia felicius, quoniam vaticinantur sibi, hæc Majestatem tuam velut in transitu libaturam.

*Facundum faciebat amor.*

Cujus utinam amoris mei præmium mihi illud dii ferant, ut deteriso adulationum fuco intelligas, quam non fortunam in te tuam, sed te in fortuna tua veneror: cui cum infinitis nominibus omnia, tum etiam Musarum gratia debeo. Tu illas tam familiariter in secretum admittis, ut hoc studiorum temperamento jam minus Martem Gradivum refugiant. Tu I. Gordonium, hominem qui juxta literas & vir-

tutem colit, noluit in alio quam in tuo orbe  
vivere. Tu eximio hominum delectu, memo-  
riam ad ea tempora nostram excitas, quibus  
Regum animi non quam late, sed quibus im-  
perarent, sollicitabantur. Ego vero, Rex Au-  
gustissime, sive ens in stylos dividi, sive  
stylos in gladium porrigi jubes, præsto sum.  
Sive qua me fortuna sacrario tuo inducet, si-  
ve qua in aliis constituet terris, pergam He-  
phæstionem cum Cratere confundere, ut Ia-  
cobum, ut Regem, pari auspicio à me cultum  
saltem intelligant, qui me Iacobo, qui Regi  
omnia debere, omnia vovisse intelligunt.  
Vale, Rex Potentissime, & ab omni Satyræ  
morsu non fortuna quam ingenio, non impe-  
rio quam virtute securior.

CLAVIS



# CLAVIS

Nomina ignota passim in Euphormione  
occurrentia referans & exponens.

**A** *Cigni*, sive *Acigniani*, Iesuitæ.

*Adriana*, —

*Egorus*, Comes Egmondanus, seu Hornanus, Bru-  
xellis decollatus.

*Aelpis*, —

*Alexandria*, Barleduc Lotharingæ, seu Galliæ.

*Albagon*, Albanus, seu Dux de Alba.

*Ambrax*, —

*Amphirans*, Regis Angliæ Secretarius.

*Anemon*, Monsieur de Bonville, qui legatos recipit.

*Aquilus*, Rudolphus Imperator.

*Archoropus*, forte est Brandeburgicus.

*Arete*, —

*Argyrestriatus*, Ambrosius Spinola, propter sumptus  
belli nimios.

**B** *Asilius*, Iesuitarum fautor, Forte Willeron.

*Basilium*, Aurelia; sive potius Lutetia Parisio-  
rum, quod ibi sedes Regia. Atque hinc

*Basiliiani*, Parisienses, vel Aurelianenses.

*Boethia*, Germania.

*Brutus*, —

**C** *Allion*, Dux Lotharingæ Guisus.

*Casina*, uxor Comitum de Morot, deliciæ seu  
concubina Regis; Idem Hollandia, à caseis.

*Catharinus*, Puritanus, Minister quidem Sectæ Pu-  
ritanæ in Anglia.

*Charidotus*, Rhichardotus; Præses Consilii apud  
Albertum Austriacum, seu Consilii Regii Se-  
natus in Belgio cujus precibus & suadela Bata-  
vi potissimum permoti Inducias duo decennal-  
les pepigere.

*Chryans*, —

*Casar*, —

*Clofsandrius*, Britanniae Rex.

# CLAVIS.

*Cleoftrata*, la Marquise de Vernandi, amica seu concubina Henrici IV. Regis Galliae.

*Cavfor*, la Varene. seu Varennes, equorum cursoriorum magister, totius Galliae praecipuus, Henrici IV Leno.

**D** *Elphium*, seu *Delphinum*, Mussipontium Academia Galliae: sive. illustris Schola Iesuitarum, Academia Ponti-Mussana. Pont à Mousson.

*Despotikyrius*, servus heri sui dominus, Dux de Lerne, Hispaniae Thesaurarius.

*Deromifus*, osor munerum. Forte hoc nomine designatur Rhoni Dux de Rosinas, seu Iuliacensis, Galliae Thesaurarius.

**E** *Lentheria*, Francia, Gallia.

*Euphormio*, Iohannes Barclajus, auctor Satyrici.

*Eutychia*, Monachatus.

**F** *Ibullius*, Callionis sive Guisii amicus.

*Figulus*, Potier.

*Fortuna templum*, Larsenal, sive Armamentarium Regium.

**G** *Ephyrus*, Pontifex.

*Geragathus*, Dominus Villeroy.

*Glykire*, —

**H** *Ebraus*, Iudaeus *Mersel* vel *Wenzel* oder *Sene*, quem alii dictum volunt Philippum Lang.

*Hieromerimna*, —

*Hippophilus*, & *Hippoplutus*, Philippus II Potentiss. Rex Hispaniae. Idem *Liphippus*.

*Hypogaa*, Sagæ nomen.

**I** *Aniclaris*, Petrus Ianinus, Praeses in Senatu, & à consiliis Gallo.

*Icoleon*, Belgium confederatum, à leonina fortitudine.

# CLAVIS.

*Ilium* in { prima Ostenda.  
parte { secunda Lut. Paris.

*Julianus*, —  
*Iuno*, Regina Galliarum.

**L** *Abetrus*, Albertus Archidux Austriae.  
*Lapicia*, —

*Leucus*, Iehan Ney, vel Cotton Confessionarius Regis.

*Lencomus*, —

*Liphippus*, Philippus III Hisp. Rex. Idem *Hippophilus*.

*Lisippus*, Lipsius. Idem *Neopalaus*.

*Longinus*, Nicolaus Brulartus, Galliarum Cancellarius; ita dictus, quod res suas lente expediat;

*Tentulus*, Belli-Curius.

*Lucretius*, —

*Lusinia*, Lotharingia, alias Scotia; & melius; Patria auctoris. Hinc *Lusinini*, Scoti.

**M** *Auritus*, —  
*Marcia*, Venetiarum; à Marco Evangelista patrone ita dictæ.

*Melandria*, Hispania; & *Melandri*, Hispani.

**N** *Neapolitanus*, Monsieur de Neuf-ville, Ville-roy, Secretarius.

*Nearius*, Mauritius, Comes Nassovius, Princeps Aurangiarum.

*Neopalaus*, Lipsius.

*Nysaus*, Bacchus.

**O** *Lympis*, Comes de Morot.

**P** *Edaa*, Infanta Isabella, Alberti Archiducis conjux.

*Pido*, —



# CLAVIS.

*Penia*, —

*Percas*, Monsieur d'Arguien ( alias Arquien ) de  
Mets, Gubernator Metensis.

*Philosophi*, Monachi.

*Philotimia*, —

*Poimenarchus*, Cardinalis aut Episcopus.

*Protagon*, Henricus IV. Rex Galliae.

**S** *Celtimorrhodia*, Britannia, Anglia & Scotia, Ma-  
gna Britannia.

*Sibronius*, Brissonius, Praeses Parliamenti.

*Sophagon*, —

*Sivaton*, —

**T** *Essaranastus*, Iacobus I Magnae Britanniae  
Rex.

*Thebani*, Germani, Teutones,

*Themistius*, Iurisconsultus quidam; vel P. Grego-  
rius, Iurisconsultus Ponti-Mussanus: vel Gu-  
lielmus Barclajus, Pater nostri auctoris, Pro-  
fessor Regius in Ponti-Mussana Academia;  
qui scriptis gravissimis de Regno & Regis in-  
stitutione, de potestate Pontificis adversus  
Bellarminum, admodum inclaruit, & superio-  
re tempore Ducis Lotharingie consiliarius fuit.

*Theophrastus*, Perronius Cardinalis Ebroicensis, cu-  
jus solitudine in Gallia plures Scoti celebri  
nomine bonas artes professi sunt, quam in ipsa  
Scotia foveantur & aluntur à Rege.

*Torrentius*, Pricat, alias Brulard, Cancellarius, al-  
ter à cognomine sic dictus.

*Trifartius*, Georgius Dux Leuchtenbergius, Lant-  
gravius.

**V** *Erona*, —

*Vanarra*, Navarra,

*Vicula*, —

EUPHORMIONIS  
LUSININI  
SATYRICON.

P A R S I.



I nomen à me quæris, Euphormio  
sum: si patriam, Lusinia est: ubi  
nullæ unquam nubes cœlum aspe-  
rant, nulla bruma segetes extinguit,  
nulli æstus adurant: sed puro in-

corruptoque aëris tractu liquidi ac  
pellucidi fontes campos alluunt, patentesque hinc  
inde plagæ, & amœna, seu salubritate montium,  
seu planitierum æquabilitate, regio homines alit  
genio loci & fortuna sua dignos. Non illic in ho-  
nore supellex curiosa, non gemmæ, non impe-  
rium, non opes: non ea omnia quibus impotens  
hominum libido pretium fecit. Vt quisque ad  
virtutis studium maximè incensus est, ita prom-  
ptissimè veris suffragiis ad magistratum evectus,  
æmulos vitæ omnes, neminem dignitatis accen-  
dit. Illinc ego devolutus in hunc terrarum or-  
bem. O dolor! quæ non vidi, quæ non passus  
sum, indigna, Diiboni, & quæ cœlo teste fiant,  
& quæ posterorum memoriæ relinquantur; nisi  
ut in amentia & scelere nepotes progredi nolint,  
saltem paternis vitiis contenti. Date veniam, o  
depravati orbis incolæ, si justis querelis detonat  
animus incitatus atrocibus injuriis. Quid aspici-  
tis, Heri? quid hoc minarum est? jam non ego  
vester sum: jam liberalis animus ad originis in-  
genuæ decora provocavit: & ingentes literæ,  
quas fronti meæ applicuistis, injuriæ me admo-  
nent, non obsequi. Etiam judiciorum nomen in-  
vocat crudelitas vestra? etiam tribunalium in  
me majestatem implorat? Tandem aliquid inve-  
ni, quod à vobis imperatum esse gauderem. Quid  
indigesto per acervos auro, quid avaris fertilium  
annorum curis confiditis? exuam patriæ meæ  
candidos mores, & in oculis judicum sacramento,

A

& nun- 1-9

## 2 EUPHORM. SATYRICI

& nuncupatis votis impietati nomen dabo. Non hoc saltem ducent nefas, ut quibus terris virtus est in vinculis, ibi quoq; scelus serviat? Iam nunc vindiciis secundum libertatem datis utor; jam quod tergum crudeli supplicio lacerastis, vindicabit atrocior stylus, & effinget vestros mores velut in tabula, ad cuius deinde conspectum ipse horreat. Denique si sapere decrevistis, vobis scribo: si furere perseveratis, saltem volo Lufinif mei sciant devitare impuras terras: ut quicumque aditus regiones vestras aperit, seu questuum meorum veluti prærupto obice lasset transeuntes, seu lachrymarum torrentibus inundetur. Ego Curtius crudelitatis vestræ hiatus impleverim; Ego Sphyngem, ego Pœnam, ego Hydram expertus sum, tam felici exitio, ut territi gentiles in hæc amplius portēta non incurrant. Magis offendit graveolentia insuetos insalubribus cœnosisq; paludibus, nec tam acriter mordent ea mala quibus in lucem prodeuntes stipamur, tanquam naturali satellitio, quam quæ florentem intactamque vitam affligunt: Et ego vim doloris acrius percipio, & deploro dolentius, quem non ante calamitas perculit, quam adolescerent gentilia bona, quæ mecum pænē nata non antequam patriam exui: à qua quis discessus meus fuerit, quæ me inde rationes deturbarint, nihil dico: ferat hanc veniam in experta juvenus atque præceps; nec id lachrymarum exordium consumat iræ meæ impetum, quæque in aliorum mores jam diu tela libro, in meam amentiam retorqueat. Nam ut has primum terras attigi, & frequenti oppido exceptus sum, in forum me contuli; ratus nunquam defuturos, qui in celeberrimo humanæ gentis loco, ubi etiam multi hæreditario jure sapere jubebantur, erranti per ignotam urbem aperirent hospitalitios lares; cum subito ingens circa me hominum turba confluit, modo novitati cultus illudens, interdum etiam, quoniam erat ex tenuissima carbaso vestis, populari mussitatione stupefiscens. Ade-  
at eleganti juvenis vultu, cujus mirabile in co-  
mis



mis artificium Æthiopico pæne gyro cincinnos confuderat. Hic ansatam superbe dexteram subducta veste reteggit, & me, quis essem, & qua causa venissem, districte interrogat. Tum ego, peregrinum, inquam, esse satis prodit, quod in tanta solitarius frequentia expecto benignitatem hospitii, quod & nauseantem ex mari ventricum opportuna tranquillitate levet, & illuviem itinere contractam diluat. Viæ causa, mos humani ingenii. ea scire concupivi, quæ à meis finibus abesse natura voluisset. Quibus ille auditis humanissime in paternam domum invitat; simulque dextera ad opulentissimas ædes trahit, ubi strata triclinia, cibique capaces invidiæ, expectabant convivarum aut negotia, ut ferebant, aut dissipatorum manus. Igitur securus hospitii meo duci gratias ago, ignarus impendentis sævitæ, & ad novas spes credulus; quæ ideo magis placebant, quoniam externa nescio quo fucō se adornant, & plerumque notis patriæ rebus beatiora videntur. Tum in urbem etiam levato nonnihil corpore proruo, cœnæque moras, dato puero qui perlustrandæ urbi dux esset, ingenti lætitiâ fallo. Ille me in publicas primum porticus, in fana deinde ac theatrum perducit; postremo in amplissimam domum, ubi nihil magis timui, quam ne postes antiquitate corrupti cervices affligerent. Capacissimam sedem adolescentes aliquot per sedilia sparsi, magis strepitu, quam corporibus implebant, & si quando intermittebatur tumultus, audiebant declamantem ex eminenti loco senem, qui Romana jura interpretari dicebatur. Agebat autem de libertis ex lege Iunia Norbana Latinis, ac præterea de Dedititiis, quorum iniquissimam conditionem ne quidem severior antiquitas tulit. Verum hæc, inquiebat, omnia sic in desuetudinem abierunt, ut relictis tantum nominibus, jam qui illi fuerint, jam quibus legibus vixerint, disceptemus. Sed ignari non estis, Adolescentes, mutata hominum mente, plerumque velut tacitis abrogata suffragiis quæ majores nostri tanquam

mānsuris legibus commendabant. Hinc editus abrogatarum legum liber, præclarus hercule, si non eas leges omitteret, quas in eo primas esse oportuit. Non vero volumen erroris tam manifesti reum; & nisi haberet triste mortalitas privilegium, ut liceat aliquando peccare, librum mea sententia ad oleum piperque dimitterem. Etenim plurimas Iuris partes mutajam omnium voluntate deletas ita præteriit, ac si illæ hodie in antiquo suo regno consisterent. Si nisi exemplo non creditis, ecce legem olim sanctissime habitam: *Honeste vivere, alterum non ladere, jus suum cuique tribuere*; quam nunc prorsus moribus hominum sublatam indignor inter antiquatas in eo codice non referri.

Erat adhuc in loquentis ore dictio, cum effluentis mensura sabuli, ac elati præterea æris sonus, strepentibus subinde auditoribus, tantum hominum de suggesto non depulit. Ego vero perlustrata iterum urbe, cum me, utpote inusitatis indutum vestibus, puerorum agmina stiparent, in hospitium meum redeo, & quæcunque tota luce perspexeram obfirmandæ curiosus memoriæ diligenti cogitatione digero. Sed posteaquam convivæ destinatum ad epulas tempus collegit, passimque discubuimus, clam sugillantibus universis meos gestus, & peregrini oris lineamenta, confusus egensque consilii, non agnoscebam amplius aviditatem stomachi, tributum reparantis quod irato mari exolveram. Statimque crudelior fortuna deseviit, postquam non gratuitam nobis mensam liberalitate poni, sed mihi pro hospitio diversorium contigisse non sine magno horrore audiui. Nam ad patriū morem nec auro corpus in viam præceps tardaveram, nec in cibos pretium quæsieram quos gentis nostræ benignitas vendere nescit. Igitur inexpectatis moribus delusus, cæpi tum primum execrari harum regionum vilissimum genium, & sictacitus mecum loqui. Pisces à fontibus ad mare non inveniunt qui vivendi vectigal extorquent. Natura ubique pabulum feris posuit; & quamvis hirundines u-

trumque solem metiuntur, esca nunquam errantibus deest. Ergo soli homines non impune implebunt exhaustas jejunio vires? ergo in belluas pontus erit clementior, quam civilis ratio in mortales in eandem genitos sortem? nisi forte pretiosior aqua est in miliario quam in fonte, aut animantibus reliquis aliquid supra hominem natura debebat. O sordidum genus, barbarumque facinus! O feriores homines quam humanam olim Androdus feram invenit! Nec contentus hac objurgatione, palam excusare imprudentiam meam cœpi quod nummis destitutus cauponam intrassem, & totum in gentilitios mores transferre peccatum; Nam in vestris, inquam, moribus non minus quam in regione hospes id primum rogo, ut innocentibus erroribus venia detur. Quod hic religiosum est, alibi profanum esse nihil prohibet. Nempe quælibet regio non magis sua aëre aut terminis, quam suis moribus definitur: neque aliquid peccavi, nisi existimatis omnes homines sub eodem cælo nasci debere. Quamquam facio his excusationibus injuriam humanitati vestræ: à vobis nihil durum timeo. Severitatem, ut audio, his annis depulit de summa sede Clementia.

Videbam durare nemini risu erumpente constantiam, ut etiam miserrimam adhuc loquentis vocem cachinni petulantia confunderent; cum instaret precipue supra suam arrem improbus caupo, detractamque mihi vestem auferre pugnaret, ut (ne sine joco facinus iret) expeditus onere supervacuo, inquit, liberius revoles in amœnissimas terras, quarum nobis etiam pænè desiderium tua prædicatio admovit. Cohorruì ad hæc dicta, & Gallico gelu frigidior metus etiam intimum calorem tentavit.

*Sic ubi terra parens, Clymenae torrida partu,  
In Phaethonteam mittebat vota ruinam:  
Aspiciens juvenis nebulas ignescere, Olympumque  
Errantem sensit diem; cœu saxa moles  
Hæsit, & igni pedi permansit frana jugali.*

*Non Magis heu vivus, quam cum pia turba cadentem  
Cecidit Eridano, tumulumque cacumine texit.*

Trahebat interim vestem epularum suarum pretium, & fœdamavaritiam risu crudelissimo cumulabat. Et hoc est, cogitabam, quod promiserat liberalis vultus filii sui, & indigna fœdissimis moribus vestis? hocne quod mihi adulabar etiam infirmam conditionem in his terris aspirare ad virtutis nobilitatem? Iamjam callidum illustrium vestium intelligo munus: ut humilem animorum fœcem illustri fūco velent, & quod maximum debuerat esse familiarum discrimen, confundant atque permisceant. Ita profundissimum cœnū vestit fragilis indigna fronde cespes; ita fumum nives induunt. nec ipsis anguib; pulchrum veneni tegmē, versicolore tergo, & squamis fulgentibus deest. Misertum est querelarum mearum aliquod propitium numen, aut ut verius dicam, me pejus afflixit, & iniecit mentem Callioni splendidissimo homini (is negotiorum causa illo die in urbem venerat) ut me sibi exiguo ære addiceret. Qui postquam interrogavit, an ejus augere familiam vellem, quid facerem, nisi ut me omni libertatis dispendio eriperem ab instanti peste, & grassatore urbano? Discesserat in patriam navis, quæ me vexerat: longa erat redituro & inextricabilis via, per ambages, ac deserta, & extremum mundi lymitem. Quæ omnia ut diligenti sollicitudine vincā, qui me illuc sumptus deducerent, si vix unius horæ diversitorem vestis absolveret: Igitur cōditionem nihil cunctatus accipi, & qui modo comes assederam, consurgo de mensa ad obsequium, turgentesque oculos furtiva manu exfrico. Pudit Solem diutius hæc videre, & servitutem meam libera solutaque nocte occuluit: quæ cum radiis lunaribus illustris non omnino viæ discrimina cōfunderet, statim cursoriis equis contendimus in Callionis munitissimam arcem: cum mihi, exultantibus cæteris, non tam viderer in equum, quam in Salaminiam damnatus ascendere. Muris superbe eminentibus creberrimæ

turres.

turres, pinnæq; ad splendorem compositæ adorna-  
verant domum: fossæq; non latitudine magis no-  
tabiles, quam stagnantibus aquis, prodigiosè molis  
piscæ alebant. Ædificiū partim nobile antiquitatis  
vestigiiis, partim recenti artificio elegans. Nihil Cal-  
lion aut ad famam videbatur aut ad luxū omisisse.

Sed quod reliquum noctis fuit, cum non per  
somnum transigerem, & nunc intimis singulti-  
bus, nunc excitato per dolorem acerbo inanique  
risu, mihi desertæ patriæ imprudentiam imputa-  
rem, conservis amentiae speciem feci. Crudeles  
ac foedæ animæ, quas ultra Persicum scelus eun-  
tes jam non virilibus nervis fraudare naturam,  
sed animos exsecrare delectat, rem ad dominum  
detulerunt: cumque, proh facinus, placuissent  
auditi, figmentis etiam onerant calamitatē meam,  
& imponunt gemitibus, lachrymisque, ac risui  
meditatas voces affingunt. Hic Callion flagitioso  
digito superiorem explicans barbam, bene est,  
inquit, erit illi felix & vegeta servitus: & si ve-  
stis non mentietur valetudinem, ne queratur vi-  
tium mentis: juventute peracta læto etiam &  
viridi senio stabit. Vos tantum in insaniam im-  
pellite præcipitantem, & in Quirinalium Mystam  
attollite. Accipiunt imperium lubentibus ani-  
mis, & in me confestim toti telis ac machinis an-  
gustum profundunt omnem malitiam, quam ex  
sentina aulica impuris animis hauserant. Tribus  
mediastinis datur negotium, qui me tum primum  
in somnum labentem, postquam decoctum tota  
nocte dolorem prima lux sopiverat, supposito pe-  
tulanter fumo excitant: neque tardus urgentibus  
parebam, cum animadverto laqueis impeditos pe-  
des ægrius procedere, nec aliud festinatione pro-  
fici, quam ut laxiora vincula arctius in nodum  
jungerentur. Tum foedissimus mortalium Pedito,  
maligno risu dexteram, tanquam salutaret, porri-  
git. mihi vero jam non erat integrum, aut sapere,  
aut decipi nolle: manum itaque trado, &, Rogo,  
inquam, mi contubernalis, quid injicitis vincula  
jam etiam parum libero sine compedibus atque



nodis? Dum hoc blandius pronuncio, interim dexteram meam religaverat ad thorum, omni- que convicio male sanas ingenii reliquias cum so- ciis expugnare certabat. Itaque modo sinum ge- lida perfundunt, modo acuminibus latera perfo- diunt, nunc etiam titillationibus importunos ri- sus excitant; ut jam mihi malorum minimum servituseffet. His officiis longissimum diem, mi- hique instar æternitatis stantem, exigunt, & ad affectionem hilares, ipso risu, ipsaque lætitia me improbe oppugnant: sic ut ad plectra atque fides quondam Attica munimenta conciderunt.

Me autem cum sub noctem jejuni cerebro spi- ritus deficerent, nec tam in amentiam deflecterem quam in mortem, copiosus cibus ditibus allatus sportulis, & qui me ad vescendum hortaretur re- lictus est. Percas. Erat vir mitiori ingenio, natu- ramque suam parum in sceiera detorquens, nisi si plurimum expediebat. Ille me ut consalutavit, thoroq; meo reclinis remisit vincula, & oppeffila- tas fores diligentius muniit, cœpit uberius flere: necdum tamen sinceritatis fecerat fidem, novoq; cogitabam ludibrio suspectas sævire blanditias; cum prehensam manum tenerius concutiens, No- sti me, inquit, Euphormio? Ego sum qui heri domino Callioni persuasi, ut te in familiam ad- mitteret. Itane? inquam. tu quidem habes tri- stissimi beneficii reum. Sed quid in dominum o- mni ponto ac tempestate ferio rem admisi? aut quid deliqui tam atroci supplicio dignum? O si liberum saltem moriendi permittat arbitrium, aut quod annis pluribus ferre possum in atrocitatem diculæ inhumana miseratione componat. Illa- chrymatus est Percas, & digitos articulis inne- ctens, demisit ad umbilicum inversas cum lacer- tis manus, cumque aliquantum defleffet meam miseriam, ac multis gemitibus interpolaret ora- tionem; tandem veluti collecto spiritu animo- sius insurgens. Euphormio, inquit, & tu servus es, & ego. Quo tu jam loco es, possum deinde præceptum agi, si herus annuerit; in servitute præ-  
cario

cario sumus felices. Si mihi credis, propulsabimus communibus consiliis fortunę injuriam. Memento Pyladis & Orestis fidem Tomos etiam evasisse & Dianę crudelitatem, & Thebis cohortem amantium multis inexpugnabilem annis laurum sæpius quam apium decerpisse. Nec mirere, quod arcanas cogitationes effundo confidentius in sinum tuum: non videris mihi ignotus, tanto fortitudinis & constantiæ experimento. Te mihi primum conciliavit frons liberalis, & verecundi oris modestia, deinde servitus conjunxit; ad extremum ipsa miseria acrius commendavit. Secundum hæc jusjurandum adjecit, & omnia quibus fidem orationi quæreretur. Ego vero etiam ad sperandum tardior, quam si Aristodemus aliquis victoriam nunciaturus indigno vultu procederet, tamen allevari paullatim sinebam animum meum, sic ut aliquantulum revivisceret salutis jamdiu sepulta cogitatio.

*Notat ut ingenti puppis circumdata ponto,  
Quam tumidus nigro murmure ventus agit,  
Humida cum pictos lacerarunt aquora divos,  
Nec semel intrepidus insilvere viros;  
Quassaque caruleum passim intrromittere montem  
Occæpit pices tegmine nuda ratis:  
Si secura feri stant promontoria ponti,  
Aut procul è speculis commoda surgit humus,  
Iam prope non meminit peritura nauta carina,  
Quodque videt credit jam tenuisse solum.*

Tum ego amplexibus hominem arctius alligo, & non contubernalem meum, sed numen, sed genium ac tutelarem Deum appello. Et, Tunc agebam, solus es in hoc terrarum orbe, cujus spiritus nondum vitiorum contagione spurcatus sit? tunc solitarius homo inter tot millia hominum specie ficta? Silere me jussit Percas, & potius quod à re videretur in medium consulere. Mihi autem nullum erat remedium potius fuga, in quam jam animum intendebam, ratus socio tam detestabilis servitii pertæso nihil hætenus præter authorem ad ejusmodi consilium defuisse. At ille tristius

supercilium contraxit, &, Nescis, inquit, quibus te cruciatibus involvis. Iam huc illuc discurrent affeclarum turbæ; jam in aditu ac limine urbium stabit imago nostra, & custodia inexorabilis, quam ut mendaciis possimus fallere, vultu certe & fronte deprehendemur. Noli ad credulam spei perplexæ auram antennas solvere: Cum Stratonico dixerim, ex omnibus navigiis tutissima esse; quæ in terram nauta subduxit. Nescis apud quem servias. Callion est, non istius modo vicini quod incolit potentissimus, sed etiâ gratiosissimus apud Principem, à quo nummariam olim nobilitatem accepit. Neque hæc fugiendi audacia per tantum gentis ocium expediri, aut facile inulta esse potest. Is enim hodie Princeps est qui **REQUIEM** non tantum orbis sui medio, sed & Metis indulgit. Inhorruì è nova spe dejectus, & quæ, dicebā, igitur securitati via propior, quam ut laqueo jugulum frangam, si servienti mors lentior destinator, fugitivo crudelior? Vetuit Percas desperare, & cum dolori medicinam faceret initium verborum fomentis, cœpi diligentius percunctari de regione ac moribus hominum, & præcipue de Callione nostro. Tum ille; primum, inquit, te scire oportet, nihil tam sanctum esse quod non corrumpat diuturnitas temporis, multaue probe à majoribus instituta uno senectutis vitio deflexisse in turpissimos ritus. Ferunt olim nobilitatem à plebe non aliter quam virtutis nota discriminatam. Hinc Magnates constituti, hinc honores & cultus in ipsos delati ab iis qui ad tam sanctum splendorem obstupescebant. Hoc priscis temporibus unicum remedium erat emergendi è latebris vulgi, cum omnes initio pares esse natura jussisset. Si quis ingenio & prudentia pacaverat incitatæ multitudinis violentiam, si quis exteris gentibus suassisset aut societatem, si integræ, aut servitutem si non nihil attritis rebus affligebantur, illi statim meritæ nobilitatis insignia publici consensus deferebant. Illum disciplina militaris, illum machinarum peritia, virtus omnes provehebat.

bat. Inde etiam filiis nobilium honor habitus, primum à paternis clientibus, deinde ab omnibus qui inesse in iis semina paternæ claritudinis arbitrantur. Sed jam Homericis temporibus non erat novum, filios degenerare à paternis institutis. Cum abundarent opes in illustribus familiis, & luxuriantes copias avita industria peperisset, obstupuerunt paulatim virtutis stimuli, & aliquid remiserunt nepotes de paterna contentione ad gloriam: donec vertentibus aliquot seculis, vix aliud ad commendationem habuerunt, quam inanem probe fugitivam authorum suorum memoriam. Sed neque te secretiori veritatis parte fraudabo. Raræ sunt hac ætate primæ illius & synceræ nobilitatis reliquiæ. Dominorum ac bellorum vices, & adeo ipsa fors quæ familias extulerat, eas plerumque aut depressit, aut extinxit; Nascentur in dies cognomina, & statim primo ætatis die transcribuntur in senium:

— *qualesque premunt nunc sydera sylva*

*A prima venere die.*

Quotusquisque est, quem avi sui non pudeat? cui non est prope sutrina vel pedū? pace tua dixerō, sæpe de sterquilinio surgunt, & vix dum lotis manibus rerum publicarum negotia tractant. Rara sunt & valde incerta vestigia, quæ ducant ad venerabiles antiquitatis stirpes. Plerosque intrusit vel in familias casus vel error in cognomina: & si bene rationem ponis, virtutis jam opus agunt nummi. Vt quisque ad decies centena pervenit, facillime de plebistabula nomen suum eruit, & vel emptis fascibus colitur, vel indigno conjugio superbit, & illustrem sanguinem foeda rusticitate maculat. Iam hic noster Callion, si scires quibus initiis extruxit tantæ potentiae fastigium. Pudet me miserarum dignitatum, quæ tam foeda mercede veneunt. Parentem habuit æterna majorum vilitate, pæne etiam extra viciniam suam notum; qui prima ætatis elementa in anserum custodia posuit, deinde sebaceis componendis sustentavit jejunæ vitæ supplicium, credo, ne periret vestis olidæ

olidæ pinguis squalor. Postea vertentibus fortunam fortibus, ipsa armenta, pastoresque cum gregibus mercantem, & jam ægre sua prædia numerantem stupebant amici, pæne in vindictam erumpente vicinia. Nec enim aberat expilatæ hæreditatis suspicio, cum plurimum in domo felicitis ac nummatisenise gisset. Vxorem olim duxerat :

*Sed & hac de plebe, suoque*

*Æqua viro fuerat.*

ac filium sustulerat, qui Callionem præcedebat totis quatuor lustris. Quem ut mediocriter eruditum schola dimisit, statim venerabili pallio circumductum sedere inter Pontifices iussit : & in Antistitem ingenti pecunia evexit. O numen cœlitesque, quam est difficile male partis bene uti ! Licere Antistes credidit quod emerat vendere, & veluti licitatione facta aureis gradibus descendit de fastigio sanctissimæ dignitatis. Ac inter illos dies pulmonū dolore & cruenta tussi consumptus est. Bene actum videbatur cum Callione. Immensa vis erat pecuniæ, preciosissima suppellex, ædes quæ bonam fortunam cum comitatu caperent, denique infamis mercimonii splendidus & elegans quæstus. Quid quæris ? felix Callioni ac lætum funus contigisse non erat qui non prædicaret ; quod etiam in patre geminatum vix tantæ felicitatis capacem omnibus bonis prope obruit.

Effleruntur, pater & filius, pompa supra conditionem, pudendosque natales, & , quod palam deridere cœquales defuncto seni, mendacibus titulis scutatisque insignibus non caruit ludicræ terminus scenæ. Ipse Callion sensim in aulam intrusus est, multoque auro lubricum regię iter stravit. Elegans illi ingenium, manus prompta ; animus ut publice communis ac facilis, ita secretis abditisque prudentiæ artibus munitissimus : ut ab aliis nec timeatur ut cautus, & subornatas ad fallendum adulationes ipse naturali bono vitet. Quid hic aulicas artes, quid ingenii calliditatem explicem, qua etiam paulo ante domini sui favorem extorsit ? Etenim cum sermones maledici Principis gra-



piſgratiam avertiſſent, tanto aſtu fortunæ ſu-  
gam celavit, ut nec ipſe videretur ſenſiſſe. Nam  
aſſiduus in regia, quamvis occultis ludibriis quo-  
tidie ſæviebat inſenſus Princeps, tamen ferendi  
conſtantia iræ pertinaciam vicit.

Non tuli diutius tam magnifice de Callione de-  
clamantem; &, Non, inquam, meminifti, homi-  
nem illum, quem viſà Gratiis fictum, intolera-  
bili ſævitia facere, ut paterna in eo vitia deſidere-  
mus? Tum ille: Ne erres Euphormio, non in-  
geniū aut naturæ, ſed conditionis & temporum  
vitio peccat. Modestus ſua ſponſe animus, incli-  
natione ſeculi rapitur in ſolutiora conſilia. Quo-  
niam non eſt tutum, æquilibrium morum inte-  
gritatem afferre inter procereſ; quæ vel reliquo-  
rum vitam notet, vel ut inſolens & multis jam  
extenſa ſeculis notetur. Quocunque inter illos,  
velato etiam capite, produceris: ſyncera vatici-  
natione dices, non quod olim Citharæduſ cau-  
ponam eſſe, ſed larvam, prodigium, ſceluſ, perſi-  
diam, nefas Majorum virtus nihil ultra timuit,  
quam ne cœlum rueret: præſentis autem ævi  
impietas, niſi prorſuſ deſipſit, nihil amplius  
horret, quam hiatuſ dedignantis terræ ſui one-  
riſ improbitatem. Omnium ætatuſ crimina, o-  
mnium immanitaſ ſceleruſ in hæc tempora con-  
fluxit. Nunquam effuſior libido, ambituſ amen-  
tior, nunquam denique ſe latius effudit maledi-  
cendi licentia. Non impudens calumnia, non are-  
na crudeliſ, niſi hæc tenebris, illa nomine diſſimu-  
lata ceſſavit.

Dum hæc proloqueretur, interim perſiti lixæ  
applicuerant ſe ad laxiorem oſtioli rimam, &  
quoniam erat ejuſmodi murmur noſtrum, quod  
etiam attentiffimas aures falleret, continebant  
diligentiſſime ſpirituſ, qui in nequiſſimo Pedone  
diutius collectuſ, tandem cum aſpera ſonoraque  
tuſſi ſeipſuſ vehementiſſe excuſſit. Perturbatuſ  
igitur Percuſ, qui rem altiſſe erat exorſuſ quam ut  
paucis totam contexeret, compendioſa me do-  
ctrina præcipitanti ruinæ ſubtraxit. Magna, in-  
quit,

quit, est sapientia interdum decedere, vel per speciem, de recto sapientiæ cursu: tibi vero etiam necessitatem fortuna imponit. Finge ad tempus amentiam; prudentior cum voles recesseris de concepto per simulationem morbo. Illud enim Callion his tormentis, & omni scelerum subtilitate molitur, ut per insomnium & contumelias in insaniam transeas; illinc assiduos sibi iocos, & domesticum ludibrium sperans. Tu everſæ mentis vitium callide simula, & ut consentias in artem miserrimam, indignanti animo promitte salutem. Multis profuit, commento versatili omnem speciem induisse. Non Paridi nocuit Idæum pascuum, & Deos Ægyptus humilibus formis abscondit.

*Nec magnum ambigui fregerunt Canēa sexus.*

Tum ne communicati consilii aliis suspicionem faceret, dimovet ocyus claustra, admissamque familiam gaudere jubet: excidisse de mente Euphormionem, & per mille inanium rerum species quæsitam sibi ridendi voluptatem. Mox illi circumſistere thorum frequentes, & quærere fidem dictorum Percantis, cum supercilium sustuli, & veluti longa cogitatione defixus, agitare dixi quem ex iis ærario, quem supellectili præficerem; proclamantibus illis, vocem altius sustuli, & in crastinum abire jussi: noctem deliberant pro consilio fore. Adjuvit rem Percas, & cum se thalamo meo præfectum jucunda asseveratione diceret, omnes velut per officium extra cubiculum deducit.

Mihi vero casus meos tota nocte reputanti, jam minor quam antea sollicitudo & anxietas animum perfodiebat. Est enim, ubi ingenti malo fessi atque victi non disputamus amplius cum miseriis nostris: tristis illa quidem & solitaria voluptas; sed quæ non minus animos permulceat, quam aridentis fortunæ irrequietus & exultans impetus. Deinde in lachrymas effusus majorem doloris partem consumpsi, & sollicitavi animum ut cum fortunæ violentia, prudentia magis quam  
questi-

questibus & lamentis certaret. Igitur tanquam ex Spartano Cothone miseras haurirem, illas erectior animus mitiori specie tegebat, & quodam modo fastidiosum colorem celabat, sic tamen ut, abjecta spe, hoc me unum solaretur, quod ad meas miseras nihil jam Dii possent addere.

*Exedit penitus corda latentia,*

*Et semper vigili spes stimulo furit.*

*Spem de sollicitis tollite mentibus,*

*O quos implacidis juvat*

*In fatis animi quies.*

*Si non arboreis obvia fontibus,*

*Si non ora forent obvia fontibus,*

*Qui cursu refugo decipiunt sitim,*

*Pars de Tantaleis malis,*

*O pars quanta recederet ?*

*Spes implet tumidum naufragiis mare,*

*Spes captis onerat retia piscibus.*

*Hac Bellona ferox usa satellite.*

*Mortalem quoties solo*

*Fudit prodiga sanguinem :*

*Stat cursus rapidi lentior atheris,*

*Cum longos animum spes trahit in dies.*

*Non est ponderibus victa necessitas :*

*Quod speras onus exenti,*

*Hoc hoc seivus opprimet.*

Nec expectata luce erupi è strato, & ad Callionem admissus peto, ut dissolvat nomen quo mihi in mille sestertium tenebatur. cum rideret Pedito, insilui in oculos, & non perfunctorie cedere cœpi, tutamque vindictam, omnibus pæne spiritum risu excludentibus, exercens, Funestum, inquam, mancipium, etiam ultro me laceسسis, qui meo beneficio vivis ? Si pergis maledicere, exigam à te animam, quam nuper in prælio cum Arachosii mea virtute sum largitus. Igitur Callionem ambiens, & caute dispensans amentiam meam, intra brevissimum tempus in potentissimum familiarum evasi : utique postquam illi supplice & assiduo cultu persuasi, solum esse quem excisa ratione adorarem, veluti jubente natura, Interdum  
etiam

etiam metuebam, ne importunius emergens veritas deprehensam calliditatem in supplicium mitteret. Itaque commentis omnibus astruebam fallaciam: & nunc inanimes tabulas affabar, nunc caninis assidens Præstitibus admovebam sollicitas aures, & videbar loquentes audire. Neque verba tantum & incertos gressus componebam ad mendacium, sed commodabat etiam vultus aliquod amentię specimen: quippe cum omnes motus, qui vel à tædio erant vel à metu, in argumentum violati traherentur iudicii.

Tardius tamen parebant oculi, nec amoliri poteram constantiam sereni placidique luminis. Est enim in vagis & cursim errantibus oculis irrequietæ indicium mentis: nec ulla pars est in homine, quæ magis cum arcanis affectibus consentiat. Amplam & quodammodo vegetam aciem non nisi magni & vividi spiritus alunt. Blandior ac veluti illecebrosa, faciles, nec omnium hostes voluptatum, notat. Sic angustus oculus, & in imum carcerem defugiens, animum nunquam assurgentem sublimibus consiliis, & cōgitationum magnitudine, prodit. At vero cum aliqua perturbatio attonitos capitis spiritus confudit, ut jam omnium membrorum nexus & vincula ægre sustineant, tum nervi præcipue, qui ex altissimo capite transversim in oculos descendunt, viciniore malo laborant, & crebrius micantibus oculis occultum animi morbum livido ac truci aspectu pingunt. Quis crederet? etiam interdum prudentibus verbis alebam amentię famam: quoniam nihil est tam fatuum, quod ubique desipiat. Piscem natura vocalem esse noluit, & tamen in Ladone non est mutus.

Sed pigebat tamdiu rationem in vinculis habere, & artis tam contumeliosæ nausea quotidie magis afficiebat indignantem stomachum. Iamque instar vulpeculę Laconis vitalia aperientis festinabat prodi tranquillior animi status, & rejiciebat dementię vestem, cum ea se occasio dedit, ut crederes ipsos deos ad remedium invitare. Nota-

veram

veram in domini sacrario reponi medicamentum multo Agarico imbutum: præterea Betonicæ, credo, & Eufragii succo abundans, & temperata herba qua Chrysippus ter mentem repurgavit. Recentioris Casiæ & sinceri Balsami suavitas leniebat Therebinthinum saporem, & severioribus plantis obstabat ad ignem durata Indicæ cannæ medulla. Huic tam multiplici remedio accedebat unionum liquor; dilutumque singulari artificio smaragdum puto non tam ad valetudinem fecisse quam ad pompam.

Hoc medicamenti genus, quod Callion à fratre acceptum propria vanitate auxerat, religiose servabatur, tanquam indubitatum deficienti naturæ auxilium, etiam vetustate potentiores vires trahens, & ipsius temporis, à quo cætera destruuntur, alumnum. Nec aliud ultra Callionem delectabat, quam de preciosissimo poculo vel audire, vel loqui; illud Menecrates si haberet, supra Iovem iturum: illud invidi cœli flammam provocare ultra quam vitales Æsculapii manus: hoc sanguinem sistere, hoc restituere pulmonibus libertatem, afflare jecoris ignem, venasque ipsas & nobiles cordis motus salubri temperamento mulcere. Dii boni quam est ingeniosa & solers necessitas; mihi Callionis quæsi gratiam ab effuso tam charo præstantique remedio; utique cum asservatam negligentius arcam furtim iniissem, vividum liquorem sparsim in terram deturbo, multoque pulvere obducens intercipio suavitatem odoris, & excludo ab advenientium sensu. Deinde tanquam direptum avide medicamentum exhausissem, languidus in terram procumbo; si cogitata fraus non procederet, certus profecto laturam impune amentiam tam audax & grande facinus. Quærebatur interim Euphormio, & destituta assuetis salibus domini mensa videbatur marcescere, cum ille meus Percas, cujus etiam conscientiam in hoc consilio exhorrueram, animadvertit procumbentem, & extinctum ratus omni celeritate familiam advocat. At Callion

vacuam in mea manu pateram conspiciatus, non potuit in tanto dispendio risum tenere; & , O miseram, inquit, simplicitatem ! existimavit deliciarum, non salubritatis poculum commendari.

Videbar interim obluctari meo malo, & vis totis concepta meatibus majore nisu sanitatem moliri, quam ut natura ferret, cum olei jam ante ex composito sumpti levis moles stomachum exoneravit, & marcescentem vultum non nihil restituit. Iamque omnes conclamaverant, tanquam ad exeuntis spiritus fugam, cum ego veluti revocatis sensibus, mihi melius esse dixi. Mirabiles tamen capiti tumultus obversari. & petendam quiete medicinam. Admiratus Callion novam in me loquendi prudentiam, infestis grabbato jussit, & silentium etiam superstitiosum circa me esse. Ibi reliquum diem, & quæ sequuta est, noctem placidius; orto quædemum sole cum omnes officiose convenirent, veluti ex altissimo somno animum & oculos eruens, inquirere cœpi quid mihi insolens contigisset: namque tota nocte delusam falsis imaginibus mentem, quibus videbar, inusitata veste per ædes licentissime vagari, & omnium salibus appetitus, nunc diceris, nunc verberibus referire. (Nam quicquid temporis amentiae simulatione consumpseram, ita videbar omittere, tanquam illa primum nocte Callionis domum intrasset.) Tum injeci oculos in Callionis vultum, & veluti fessum caput allevato cubito fulsi, nec ille cunctatus, ô miras in medicamine vires ! inquit: non modo corporis morbis imperat, sed & fauciae mentis vulnus etiam sine cicatrice obducit. Nihil vanitati tribuo; sed tam præstanti potione Melampus Argivum diadema non emit. Neque enim dubito miseri hujus mentem esse epoti medicaminis virtute restitutam.

Pervaserat omnes ingens stupor, & tanquam Eleusinii sacri participes mutis obtutibus in me contuebantur. Præcipue Percas vix credebat oculis suis, astumque tam inexpectatum (nam quid egissem facile conjectabat) callido ipse animo re-

putans.



putans, adorabat solertiam meam, & quod solum poterat, interdum vibrantibus oculis egregio commento subscribebat. Igitur cum processissent aliquot dies, & magis Æsculapio magisque viderer obnoxius, neque ulla superessent prioris amentiae vestigia, mihi Callion litteras ad Fibullium amicum ex calculo ægrum tradit, in hæc verba conscriptas. Quod amantium spiritus alieno ore trahantur, non alienis potius exemplis didici, quam ipse exemplum esse possum. Quamdiu valebas incolumis, in te vixi: afflictata tua valetudine eo etiam plus dolui, quod tui corporis ægritudo mentem meam sauciabat. Nunc oro obtestorque, vel propter me restituas animi elegantissimi domicilium; corpori, inquam, aliquantulum vaca. Præsto est sanitas, si admittis, tantum mihi curationis onus impone. Si non fidis, nescio quibus carminibus desisti esse Fibullius. Si experimentum desideras, hominem ad te mitto, cujus everfam mentem unius poculi haustu composui. Iam quoties febrium æstus levavi? quoties dissipavi coeuntem sanguinem, aut cibum sicut erat ingestus fugientem stiti? Adeo vis nulla est mali, quam non facile amoliat medicamenti salubritas, cujus apud te laudes à me sæpe jactatas memini: nihil sane mihi preciosius frater decedens reliquit. Percas, quem ex omnibus meis potissimum diligis, tanti miraculi testis fuit. Illi imperavi, ut rem illustrius tibi exponat & eorum examina computet, quibus mea misericordia saluti fuit. Fidem meam ex illius constantia, & ex omnibus veracis animi indiciis metiare. Ad extremum rogo te, ne tam penitus salutem medicis credas, ut nisi eorum opera sanus esse non velis. Cave homines feros, cave Scythas magistra Medea dignos. Nisi quod peiores isti non unum Peliam exhauriunt: nec tam Iasonis gratia quam aureæ pecudis furunt. Evitabis tot veneficorum sortes, si, quod tibi medicamentum paro, intrepidus hauseris. Scio repugnaturus istos Machaones, & intempestivis scrupulis oneratos animum

jam satis morbo debilem. Sed memineris plus iis ex cruciatibus tuis venire, quam ex fide sua; & eos abominari conatum meum, quo doceo aliam posse reperiri sanitatem, quam quæ apud eos venalis est. Vale. Deinde tot nos mandatis onerat, ut jam non dubitarem, majus ipsi beneficium fore, si quis sua opera ad sanitatem uteretur, quam ei quem ægritudine levaret.

Sed hoc mihi videbatur inhumanum; sub vesperam dimitti incertos hospitii, nisi quod longe esse diversoria sciebamus. Pernoctandum erat in campis, & quod ego durissimum putabam, erat inter etiam luce commeantibus grave. Etenim pendebamus in arcto limite, hinc premente sylva, virgultis passim ac fruticibus impedita, illinc præcipit riparum voragine, quæ, si errasset vestigium, nihil mitius promittebat, quam vorticosum amnem, etiam tum superbius decurrentem, quod largior imber nubibus excidisset, quas annibus in pabulum æstivum Natura immittit. Nec oppidum in propinquo erat, neque fumus domiciliorum index villæ alicujus humanitatē pollicebatur.

Sed, ne viderentur in nos casus & domini crudelitas conspirasse, prout declinabat in vesperam dies, aperiebant se viarum angustiae, & aspera locorum difficultas velut levigato itinere mitescebat, cum tandem producto in noctem labore Solis radii errantes destituunt. Cæterum nihil obstabat syderum luci nisi splendidioris Lunæ fulgor, quæ nullis impedita nubibus pulcherrime ardebat, & noctis initium cessantibus subinde rerum omnium motibus nescio qua novitate non ingratum videbatur. Sed postquam conticinium omnes ita tumultus composuit, ut quodammodo ventus etiam quieturis frondibus paceret, tum paulatim insinuare se animo horror, & ipsi poplites naturali formidine labascere. Exaudiebatur apertius decurrentium undarum fremitus, quoniam rebus aliis nox quietem indixerat, & liber alveus non mitius quam si ubique obices morarentur, sese spumanti impetu effundebat,

cum

cum improvise amnis, tanquam & ipse nocti cederet, obmutuit, facesque aliquot ex stratis fluctibus emerferunt; & voces, tanquam viarum indices, nos ad se non obscuro clamore vocabant. Tot miracula an vero metus prudentiam meam interceperit, haud facile judicari: certe jam à via dessectebam, iterque ad ignem illum destinaveram, cum Percas lacertum meum tenuit, & à mortis limine revocavit ad vitam. Quo te, inquit, agis, Euphormio? quid te miserabili letho involvis fluctibus, tanquam in terra mori non possis? Irascebar, primo hærenti mihi fortissime, & amentiam meam suo pondere continent. Sed tandem cum hæ faces non uno loco fulgerent, & nunc secundo, nunc adverso amne decurrerent, hinc extinctæ alibi nascerentur, modo infrequenti igne & maligno lucerent, cæpi ipse damnare impetum meum, & Percantem interrogare, quis illius flammæ author, quæ alimenta igni in tanto undarum cursu, quis ille denique qui nos ad se tanquam errantes benignius evocasset? Tum ille, Spectra, inquit, & infelices spiritus, quibus nihil est hominum ruina potius, non in hoc modo gurgite, sed in omnibus probe fluminibus nocturna hæc incendia excitant: Incauti viatores dum his utuntur ducibus, se plerumque vel nodosis vorticibus implicant, vel si meliori genio ducuntur, cœnosis paludibus impediti longissimam noctem inter preces & vota consumunt.

Adhuc loquebatur Percas, cum ingentis viri species exeruit ex fluctibus primum caput comis undique ac barba contextum, latissimum deinde pectus lacertosque loris, ut ad Lunam judicari poterat, viriliter nodatos: cumque paulo infra umbilicum aperuisset corpus, statim clunibus ad nostrum latus versis, eas utraque manu diu ac fortiter increpuit, risuique barbaro inconditum clamorem admiscens, sese iterum in flumen immisit. Innitebar ego Percanti deficientibus viribus, cum me ille forti animo esse iussit, Tritones illos aut Proteos nihil ultra metam sævire, nihil

illis virium extra latitudinem amnis esse. Sed quid si nuper, inquit, in hujus regionis quadā civitate fuisses, ubi memorabile spectrum modo ludicra, modo formidabili forma domum nobilitavit? quā fortis miles strinxisses gladium, & sub infami tecto pernoctare quæsisse? Quanquam mihi Tritonis illius timor pene non reliquerat sanguinem, tamen Percantem rogabam, ut exsequeretur ordinem formidabilis casus: ita decipi posse longiores noctis moras, & animum meum audito graviore periculo facile leviores formidines excussurum.

Erat, inquit, ingens militum copia, quæ Gallicam urbem præsidii causa intraverat. Angustior domorum quam militum numerus detraxerat civibus capaciorē ædium partem. Nec id efficere potuit, quin milites, aliquot incommodissime habitarent. Sæpe ingentium animorum comes est inopia, siue aliquid fortuna singulis datum voluit, ut aliquos divitiis, alios præstantiori munere & excelso animo cumlaret: siue quod fucis patrandus erat pastus, quem ignavi consumerent. Apes vero in ipsis parentum operibus natæ, gaudent parto per laborem melle vesci. Sic etiam tum erat quidam majoribus animis quam opibus miles, cui fors vilissimam delegaverat domum, quæ & sordibus, & odore paupertatis indice, generosum hominem totos dies in foro tenebat. Is cum perambulare urbem, & passim domorum tectorumque minas curiosis oculis perlustraret, incidit in elegantem domum, binis turribus, & variis statuarum molibus exornatam. Sed omnia velut in pestilentia conticebant, fores pluribus astrictæ vinculis, fenestræ aliquot negligenter apertæ, & omnia desertarum ædium signa. Cum indignaretur miles vacare pulcherrimam domum, & eos qui pro salute civium vitæ curam projicerent, in pessimas sedes conjici, admonuit sodalis, infestam spectris domum, cum assiduis tumultibus familiam lassavisset, tandem dominum coegisse, ut alio commigraret. Nullum aditu prohiberi, si cui audacia, nisi verius temeritatem dixerim, inquit,

in infā-

in infami sede pernoctare suggesserit. sed neminem in illum diem repertum, qui periculo nihil utilitatis afferenti vitam tradere voluisset. Hæc postrema oratio militem stimulavit. Exarsit animo cupiditas, ut princeps scrutaretur hoc malum. Quoniam ante omnes aut ausum aliquid aut inventum, veluti primitiæ quædam gloriæ animos efferunt, nihil præter laudem eximiam in vita ducentes. Itaque ad Magistratum primo, ad dominum deinde ædium contendit, pollicetur, si quid fuci in his timoribus, si quid viciniæ, si quid servitium fallaciæ committat, se impigre scrutaturum. Lychnis modo & lignorum copia instrueretur domus. Si hæc humana fraude contingerent, ferro se improbos ulturum: si majore vi excitaretur Tragœdia, non invitum pro laude & publicis commodis moriturum.

Nemo erat quem non caperet tam generosus impetus, cum famulus præterea militis promitteret ad omnia manus, firmaretque non fore aliquod discrimen domino, quod ipse non adiret. Conveniebat ad militem viciniæ, tanquam si Hercules stetisset ad Tænarum, pugnaturus in mortis imperium, & inferorum pacem. Sed ille cum omnes arceri jussisset, ensen curiose detergit; si quid eo die rubiginis humenti vagina contraxerat, sedulo artificio delet, ac sub vesperam animis mediocri cœna relictis in desertas ædes intrat: erat unicus comes famulus, quem etiam communicæ gloriæ invidus arcuisset, nisi notæ fidelitatis homo jurasset, aut ea sibi nocte moriendum, aut cum domino esse vivendum. Igitur appetente jam nocte, cum nescio quis tremor invitos occuparet, ignem in amplissimo triclinio excitant, passim lychnos suspendunt, ac obfirmatis longa cogitatione animis, à se tandem impetrant, ut minimum in illa luce præsidii esse putent, magnos homines à seipsis auxilium petere oportere, se ipsos obfirmare, nihil sua virtute præstantius ducere, unde aut disciplinæ sanctitatem, aut pugnandi magnanimitatem hauriant. In solutiores de-

inde sermones lapsi jocis etiam, & forte non vero risu, primam vigiliam consumpserunt; cum in superiore triclinii parte visus est lacertus hominis seipsum inmodice quatiens, sic ut in pavimentum decideret. Dubitantibus illis ex alia sese parte crus humanum exseruit, ac deinde omnes passim corporis partes, ita sanguine fluentes, ac si recenti cæde cadaver supplicium immane lacerasset. innox in media sede visum est truncum caput velut sese ex tabulato expediens, quod etiam ex alto deinceps ruptas humeris cervices aptavit: inde artus inter se coire, colligari membra, visa omnia convenire, ac ingentis staturæ homo velut ex Cadmi semine procreari; qui ferociter enssem quatiens, Tu vero, inquit, quisquis in meam temerarius domum irrumpis, eia, mecum de imperio ædium certa, nisi forte inultus cadere malis. Nec militi consilium in tantis monstris, nec audacia defuit. ultro ad provocantem advolat. Non impetus ut præcipitaret temere corpus, non timor ut fœde ageret, evincebat. Tanquam in medialuce dimicaret in hostem, modo promovebat gradum, modo cum artificio succedebat in latus. Tandem videbatur respexisse fortuna: enssem pæne ad capulum intra corpus inimici condidit. Expectabat ut rueret truculentæ molis homo. Sed nec cruor ex vulnere sequebatur, neque titubabant vestigia, neque vultus quicquam ex purpura remittebat. Hæc militem incautius admirantem ferro inimicus excepit, neque tamen segnius depugnabat miles, aut aliquod ferri frigus in visceribus sentiebat. Cum deinde inimicum uterque pluries confodisset, horis plus minus duabus exactis, velut signo dato in capulum recumbunt, sudorem exfricant, & arcte meantem spiritum tanquam per inducias extendunt.

Excitabat lychnos militis servus; pugneque paratus, si dominus cecidisset, succedere locum, & mortem ulcisci destinabat; cum Athletæ collecto satis spiritu sæviori odio incurrunt. Miles nunc succi-



succidere poplitem hostis, nunc visus ferrum transegisse per latera, & ipse modo lacertum sibi eripicredebatur, modo cervicem decidere, modo transfixo corpore sanguinem emicare: cum nulla interim vulnerum vestigia libarent integerrimum corpus. Sed major animo labor deficientem paulatim militem jam ad ultima deduxerat. cassi ictus, tarda vestigia, motus languidi, anhelitus crebrior; & incensi pæne vultus quicquid erat in corpore humoris exhauserant: cum ab hoste aversus, ac veluti datis manibus, se in lectulum, quem dominus ædium sterni curaverat, pæne ultimis viribus præcipitavit, & famulo pugnae cupidine flagranti, quod dominum ex vulneribus extinctum crederet, locum amoris exercendi concessit. Ibi brevior pugna minori utriusque discrimine finita est. Etenim collectus ex frustulis homo servum tam immaniter in vultum percussit, ut ille confuso spiritu in pavimento procumberet. Ac deinde ad lectulum venit, urget decumbentem ut surgat ad pugnam: utrumque offenso corpore, utrumque parem esse; nec duobus victoriam posse concedi. Cum miles debilibus verbis à se juberet discedere; non posse post tanti temporis certamen aut sicam aut enssem tollere: Te veropatior, inquit alter, ea conditione quiescere, si vanissimam superstitionem ejuras, & quod Numen fictæ anicularum fabulæ tibi à cunis colendum insinuarunt, sanioribus consiliis detestaris. Cum se miles ante ultima passurum supra vires vociferaretur, cum ad enssem excitatus respiceret, inanis spectri imago in aërem soluta discessit. Lapsus deinde in somnum miles, cum non ante altissimam lucem evigilasset, stertentem famulum eodem quo decidebat loco excitat: quem perturbata diu mente jacentem ante sopor oppresserat, quam aut de se, aut de domino cogitaret. Sed ecce postremum nocturnæ Tragoediæ actum: non agnoscebat dominus servum, ea vultus parte qua ictum acceperat, supra omnes Æthiopes atram. Donec

errore cognito fores laxant, expectanti populo sui copiam faciunt, omnium fidem decolor servi vultus faciebat. Exitus lætior, quod, & exemptæ his incommodis ædes, neque miles modica mercede donatus, cum tota regione diffusus præterea rumor amplissimum homini præmium daret, quod illius laudes ac fortitudinem omnia loquerentur.

Hæc ego, non ut animum tuum vana superstitione implem, quæ plerique decepti si quid novum aut insolens sive audiunt, sive vident, se Manibus infestatos puerili formidine credunt. Pleraque arcanis Naturæ referenda sunt, ut putrescentis ligni, ut vermium fulgor, ut pinguioris æris monstra quæ diversas animantium imagines exprimunt, pleraque casui assignanda; multa ægrotanti cerebro, & hæc sibi prodigia effingenti, etiam quædam impiorum hominum fraudi imputanda sunt. Et nisi me fallit exacti mensura itineris, prope sumus ab oppido, ubi larvarum imagines ajunt ab impuro furcifero excitari: persuaderi deinde rudibus oppidanis ac mulierculis, majorum spiritus ad petendam opem in hunc orbem esse regressos. Ipse, utpote pietatis fictæ homo, pecuniam levandis Manibus petit. provinciam suscipit, aut in sacra aut in opes aut in vias per vota susceptas, ita nummos erogat, ut dolis interim furtisq; ditiescat. Et jam præterit lustrum, ex quo Plutonis nummis vivit. Inter hæc verba intrabamus oppidum, adhuc obscurissima nocte, & in hospitium quieturi tendebamus, cum in aperto campo, quo mortuorum cadavera efferuntur visum est ingens monstrum, & omni Tritone deformius, huc illuc agitari. Caput erat, ut per tenebras videbamus, humanum, per cujus oculos emicabat ingens ignis, ut horribilis fulgor etiam extra orbem vacuos spargeretur. Dentes longi, & omni candidiores nive, certis inter se interstitiis disponebantur. effossæ genæ. eminentia ossa, rara coma, ac velut tormentorum magnitudine sese in altum vibrans, nihil unquam damnatorum à Minos supplicia expressit. Hoc tam elegans caput à mole

mole quadam candida undique per campum ferebatur, cum indignabundus Percas substitit, & vides, inquit, verborum meorum fidem? vel ego sum omni Thersite timidior, vel excutiam inanem impostoris fraudem, & tot oppidanorum spoliatas ædes ulciscar. Ego furere hominem credebam, & rependere datæ salutis vicem aggressus, tenebam laciniam vestis, negabamque me passurum, ut in illam furiam insanus excurreret. At ille vestem ex humeris rejecit, & ut fustem manu tenebat, evasit in Chimæram illam, ac tam certis ictibus cervicem elisit, ut collaberetur in partes, & majore meatu lucens ignis hominem proderet, qui in candida veste fictilem larvam turpissima fraude gestabat. Non pepercit improbis viri cervicibus Percas, sed gravissimis afflicta ictibus deduxit in terram, cumque me advocasset, intentavit in jacentis jugulum enses, interminatus mortem, nisi fraudis consilium fateretur. Cum ille omnia velut in equuleo proderet, flens adjecit, fictile vase, quod rupisset Percas, se talentum ab hinc biennio aucupatum. Tum oranti veniam pepercimus, & juramentum extorsimus, nunquam fucis illis oppidanorum pietati illusurum, & in diversorium deinde recepti, nobis ad decimam diei horam indulximus.

Cum deinde facilior via pridianas difficultates mulceret, visum quoque est cælum consentire felicitati nostræ. Solem leviores nebulae temperabant, ac ventus præterea mediocri susurro delectabat euntes, & extremis alis afflabat. sed hoc mihi plurimū succedebat ex voto, posse in ipsa via cum Percante liberius agere, & nullo arbitrorum metu effutire dictæ in Callionis ineptias. Quod cum fecissem hilarius, mutuumque risum extorsissem, tandem honesta adulatione dixi, fortunæ decretum aliquo pestilenti fato esse turbatum. Illam enim instituisse ut Percantis domino Callion cederet. Manifestum illinc indicium, quod hujus animum ad maxima sustulisset; liberalem, sedulum, fortem genuisset: At vero Cal-

lionis ingenium (quidquid in contrarium Percas sentiret) servilibus vitiis esse corruptum Paternam humilitatem cum infamibus aulæ vitiis obtendisse nebulas sapientiæ, ne sordidæ menti illucesceret. Tum illum denique in eo judicio supra Percantem fore, cum angustæ Laconia Princeps Orientis domino non abnuerit Magni nomen: nempe si iustitia, si virtute vicisset. Id me profecto sedulo comperisse, nihil hoc hominum genere stolidius esse, qui se Proceres appellitari jubent; si modo sunt omnes Callioni similes, aut iis qui passim in ejus domum familiaritatis jure divertunt. Nam corporis gestus prope ad mimicam gravitatem componere, nutus omnes veluti pumice expolire, quid hoc supra simias, quas etiam longæ doctrinæ institutio bipedes facit? At enim in magnatum coetus, in nobilium scæminarum greges, tranquillos & inturbatos vultus afferunt: dignum hercule illis diis miraculum. Date mihi splendidum familiæ gregem: vestium artificium cum materiâ certet: præterea seu generis, seu dignitatis, decora species fronti majestatem inducat; jamque hoc imbecillitatis vitium, cujus infamia humiliorum conditionem aspergunt, intelligetis posse cum sordida veste excuti, nectam esse animi, quam fortunæ. Præterea quod assiduis salibus student, emissosque jocos interdum non incommode refellunt, id quidem mihi maxime sapuisse videntur, quod rudiores animos honesto fuce adornare quæsierint. Verum exigantur è quotidiani sermonis limitibus, & in apertum eloquentiæ campum protrahantur, velim mihi fidem æternum abesse, si ultra quam Apolloniensis Satyrus perturbato & incondito murmure audientium aures hinniendo perfodiant. Exactissime canum victorias solertiamque computant; nec ingeniosior ad parendum equus, quam illi ad prædicandum disertus. Illud nemus generosissimas avas alere: hujus campi extenso spatio inæquales lepores fatigari. Interdum etiam

in tha-

in thalamis disertis, comptos & vocales stimulos suggerente libidine. Sed quam hæc omnia non à vera facundia? quam non adimunt eam cujus nomen extimescunt vecordiam?

Hæc tam præcipiti & calido impetu profunde-  
debam, ut non notarem coëuntium nubium  
horrorem & obducti cœli caliginosum murmur;  
donec laciniam vestis corripuit Percas, &, Tu  
vero prospice, inquit, ne furorem suum tempe-  
stas proceribus commodet, & quot maledictis  
lacerasti, tot ultoribus rivis inundet. Videbatur  
imber violentius erupturus, & verberata ven-  
to pluvia quicquid deprehenderet oppressura,  
cum tot cœli minis perterriti secessimus in vici-  
næ speluncæ secretum, & naturali munimen-  
to iratis nubibus terga subduximus. Ingentes  
vacui soli recessus fertilem agrum suspendebant,  
multæque latebræ passim cœco specu fefellis-  
sent errantes, ni lustrata multoties sede Per-  
cas discriminum errores & perplexum velut Dæ-  
dali callem diligenter tenuisset. Igitur perductus  
in interiora admirabar, Naturam, quæ ingenio suo  
artis mentiebatur industriam, & si quando judi-  
cio meo relinquebar, repetebam visticgia quæ ante  
triveram, & fallentibus gyris reditum meum non  
sine proprio risu turbabam: cum in aditu spelun-  
cæ duas virgines notavimus, quæ si non perti-  
nuissent intrare tenebras secreti horribilis, cre-  
dipoterant Nymphæ præsides loci. Revelave-  
rant honestissimas frontes, & micantibus genis  
internitebat suavitas purpuræ, apertiq; ad delide-  
riū sinus plus etiam quod latebat commendabant.

Dum hoc taciti contueremur, anus decrepito  
squalore inculta processit, manuque virgines du-  
cens, in antrum audacissime penetravit. Pæne erat  
ut rogarem, num Cumas nos delati, num ille es-  
set insanientis Sibyllæ vultus, num in spelun-  
cam nos sævior Apollinis flatus egisset. Nam &  
antrum non erat indignum Phœbo, & erat ejus-  
modi anus, quæ etiam Ænææ temporibus vixis-  
se potuisset. Perculerat animos nostros insolentis rei

tis reinovitas : cumque rem ad exitum contueri  
 placeret, concessimus in angustæ latebræ noctem,  
 & humilitate sedis corporum magnitudinem cor-  
 reximus : cum anus è sinu tenue cornu profert,  
 quale extuberantem agnorum frontem perfodit ;  
 atrumque inde pulverem vehementi spiritu vi-  
 brans in speluncæ aditum, exclusit penitus diem,  
 & omnia densissimis tenebris permiscuit. Etenim  
 pulvis, ut è cornu erumpebat, videbatur exiguam  
 nubem componere, auctoque paulatim volumine  
 huc illuc circumferri, donec tristissima nocte opa-  
 cus antriluminibus insedit. Tum vero quam in  
 nobis antea vocem curiosa sedulitas tenebat, eam  
 timor eripuit. Morti jam traditi videbamur, &  
 omnia exspectabamus consentanea funestissimæ  
 nocti ; cum subito eadem anus excussa è silice  
 flamma lampadem excitat, quæ maligne lucens  
 magis vetabat noctē esse, quam lucem inferebat.  
 Iam ipsæ virgines, nisi affusus splendor fallebat o-  
 culos, gravissime inhorruerant, cum Hypogæa (id  
 erat sagæ nomen) bono eas animo esse iussit. Vo-  
 bis, inquit, hortantibus periculosissimum sacrum  
 exorsa sum, & quod multis petentibus negave-  
 ram, indoli vestræ concessi. Este modo tam for-  
 tes ad suscipiendum munus, quam ad impetran-  
 dum felices fuistis. Quid hic pavor, quid inanis  
 membrorum trepidatio loquitur? quid denique  
 frigidus mortis color vitale pulcherrimi oris de-  
 cus extinguens? Vobis jam in aperto erunt decre-  
 ta fatorum, & quod tantopere vultis, certa futu-  
 rorum conjugum species curam, quæ suspensos  
 animos exedit, diluet. Videbantur ad tam sanctam  
 pollicitationem respirare ; sed O mater, inquiunt,  
 etiam nobis promissorum hic ingentium successus  
 sine infamiæ timore procedet, nec à nobis sollici-  
 tatam infernorum fidem ulla fama vulgabit? Tum  
 illa fluentes senio genas turpissimo risu contra-  
 xit, nec videtis, inquit, quam liminibus custodiam  
 apposui? citius tellus hiantibus rimis inferos pro-  
 det, quam ut ullus in hanc sedem me invita pro-  
 rumpat ; neque illa quam cernitis lampas quic-  
 quam



quam Celei facibus, aut Eleusinio silentio debet. Quæ tamen si palam efferentur, quæ inde nomini vestro labes? O miseram juventutem, quam hominum potius sermo quam vita instruit? Quotusquisque est, qui nostris artibus aliquid non debeat? quem non aut acre ingenium invitat ad mystas nostros, aut necessitatis acerbitas ad hoc per-  
fugium cogit? ita me ametis, ultra quinquaginta hominum millia nocturnis sacris hic annus initavit. Iam vero quæ licentius publicum aspiciunt, characteres, & ceremoniæ, & fasciolæ, & torques, & inclusa ignotis verbis sanitas, nonne è nostris scholis prodeunt? nonne omnes prope homines una regione tenent? Quid ultra vobis referam artis nostræ præstantiam? quid incredibilem vim, ac pæne divinam?

*Nunc adimit vauis, geminat nunc sibila ventis,  
Nunc aufert terrasque polis & sidera mundo  
Nub superjecta. Dat vincula ferre Leoni,  
Dat Dams savire, & inertì albescere vultu;  
Aut trahit attonitam laxis radicibus alnum,  
Montesque, sinuosque, & tecta sequentia mutat.  
O quoties sola noctis pallentibus umbris,  
Effigies diras, mæstorumque ora parentum,  
Traxit avernali ripa, seroque sepulchris  
Reddidit, Eoam jam forte morantia lucem.*

Igitur de infamia nolite esse sollicitæ, id à vobis esse factum negabunt vestri mores; quod tamen si confiteri malitis, possitis defendere. Cum hæc pronunciaffet, statim tanquam in diversas curas distracta, huc illuc cœpit circumferre cervicem, & mox in terram obtutu nihil variante defixo consulere vires suas, & ipsam artem interrogare. Iam aliquis mortalitate major spiritus vultum videbatur corrumpere, ac tumultus intra membra concipi, quantum ipsa non caperet, cum tres circulos humili radio designat, seque in eorum medio collocat, virgines ab utroque latere constituit, ac tum ore manifesta sæviante insania, crinibusque solutis, Audite, inquit, puellulæ, non est amplius vobis cum Hypogæa negotium :  
vatem

vatem atque antistitem Deorum infernorum cernitis; spatium quod radio definivi non potestis, vivæ transilire. Tum subito graveolenti ruta, verbenaque, quam flaventi filo in coronam texuerat, frontem cingit, ac deinde cultello pulverem è solo eruit, & in humilem cuinulum tollens tremulis deinde manibus quadrat, literasque F. S. P. satisartificiose acu comatoria scribit. Tum virginis, quæ ad dexteram erat, sinistrum pollicem albo stamine stringit, & acu subtilissima educit provocatum sanguinem, salivaque, qua ipsa palmam perfuderat, miscet. Mox leviter oculos & jugulum puellæ intingit, aures præterea, & proximos fronti crines: reliquum cruentatæ salivæ in cremam quam cumulaverat effundit, tremula horribilique voce identidem intonans, **HOC LIBAMVS.**

Eadem ceremonia in altera virgine perpetrata, tenui primum murmure, mox apertis clamoribus, canem suum adesse jussit. Expectabamus ingentem molossum, & Cerbero parem: mihi jam ad capulum erat manus, & educere ferrum cum vaginæ ac rubiginis tenacitate pugnabat, cum exhalante primum nebulas humo, glis tandem prodigiosæ magnitudinis è terra prorupit. Diceret in semisopito animali productum tota hyeme somnum pæne adhuc cum vernantis cœli benignitate luctari. Cauda pro onere magis quam pro parte sequebatur euntem, & pigerrimæ alvi moles titubantia vestigia confundebat. Hic tam elegans canis dominæ pedes mirabili cultu permulsi: donec jussus accedere ad secretum, aliquid insusurravit in mulieris aurem, & ipse, ut videbatur, imperium accepit, majoremque quam pro mole sonum edens, in obscurissimam nubem abscessit. Nobis ultra non erat animus, & tam inexpectatis monstris non constantia magis quam spiritus excidebat, cum illa rabidis & minantibus oculis efferata, ferales suas preces certis numeris astrinxit.

DI, quos profundo gurgite ac flamma ambiunt  
 Iurata cælo flumina, inferni Dii,  
 Aperite manes, paudite immensum chaos,  
 Laxate fines rerum, & infestas polo  
 Committite umbras. Vatis horrenda sono  
 Attonita Regis urna Dictæ vacet,  
 Fatale cesset pensum, & hic Perceas dies  
 Saltem quictas videat, ut nostra hauriat  
 Imperia, sternat mutus Acherontem pavor,  
 Silere jubeat tristis Aleæ comas,  
 Stygemque nullo portitor conto eruat.

Quos certa geminis fata virginibus parant.  
 Induite vultu conjuges: trepidis tamen  
 Ignoscite animis: demite infernas minas,  
 Et placida nullus sacra concutiat tremor.  
 Venisse jam vos decuit. O segnes moras!  
 Iam jam atra frangam Tartara, & pacem impia  
 Turbabo noctis. Sava, si cogi placet,  
 Sunt sava nobis arma, queis vinci quoque  
 Voluistis, atris verba pejora inferis.  
 Et postquam athena falce cubuerunt solo.  
 Ter passa Lunam germina. Hoc istis sat est,  
 Nimumque sacris. Plura si quærit furor,  
 Funestus atris cespes à tumulis adest.  
 Quem fulmen illa nube sopitum ambiat,  
 Qua me per omnes vexit incertam polos.  
 Hic hic in ista veste servatur cinis,  
 Pejusque quiddam. Diræ sunt, Manes, loqui  
 Qua timeo diræ Terga nascenti modo  
 Detracta puero, cujus elisa mea  
 Gemuere fauces dextera, in medium dabo.

Dum hæc proloqueretur voce gestuque ad ter-  
 rorem composito, lux paulo nitidior speluncæ  
 infulsit, magisque ac magis juxta lumen ventus-  
 que increscebant; ut jam priores tenebras furto  
 nostro desideraremus. Etenim cum anus miraretur  
 quid votis suis moram faceret, forte in no-  
 stram latebram contemplationem iniecit, & ra-  
 bido clamore incitata, At vos, inquit, dii perdant  
 nefarii homines, quorum me prophanus jam aspe-  
 ctus indigne trucidat. Tum contempta circuli sui

religione ad nos ultro advolabat, vel truculenta erecti oculi acie confectura jacentes, cum ingens simiarum numerus iter opportune intercipit; & hæ quidem in mulierculæ caput insiliūt, hæ argutis stridoribus ad limen fugientem persequuntur. Nobis autem ideo reddita videbatur audacia, quia fugere poteramus. Etenim ut mediocris terror animum naturali constantia exarmat: ita cum violentius sævit, interdum desperationem ad ultimos impetus trahit. Igitur consurreximus, ac veluti convenisset, in nos virgines, nos in earum sinum mutuo terrore irruimus; cumque oboriretur sævissimus veluti collisatū nubium fragor, brachiis arctissime constricti in terram procumbimus.

*O dulcis fragor, O beatus imber,*

*O solatia plus emenda nobis!*

*Hoc semper pretio laboret ingens*

*Fulmen cedere Mulciber Tonanti;*

*Et nos in similes bonus revolvat*

*Minantis pluvia timor cavernas,*

*Hoc semper pretio, dii deaque,*

*Pejus Thessalico furore carmen*

*Pulset Tartara pallidamque noctem.*

Præcipue Percas muliebrium astuum nequaquam inexpertus, tot blanditiis mulierem onerat, ut non ante consurrexit, quam solidam voluptatem ferret. Ego rudior, ut bis terque virguncula mea verbis inter risum iramque timentibus desæviit, tristem pudibundus victoriam invitæ concessi. Iam desierat fulminis horror, jam repens cessantibus ventis tranquillitas magis formidabile antrum faciebat cum se Percas itineris ducem præbuit, & speluncæ anfractus subtilissime distinguens tandem in aditum perduxit, ubi postquam mulieres valere jussimus, quoniam timebant ne deprehensæ facerent suspicioni locum, non impigre divertimus in aliam partem.

Mihi autem suffusus rubor, sudorq; toto passim vultu deciderat; quem verecundia extortum, cum alia ratione exprimi Percas crederet: se vero fortitudinem meam laudare dixit, suadere tamen ut  
alias

alias parcerem insueto his officiis corpori. Quid enim si novus, inquit, imber nos in similem speluncam detruderet? quid si rursus ineunda cum integris & valentibus pugna? Pudebat probitatem meam traducere, sed & remedium in similes casus quæri placebat. Itaque nescio, inquam, quid existimes de mea fortitudine: sed importunæ fœminæ plusquam muliebris pertinacia ita meos conatus infregit, ut virum me non potuerim ostendere? Non persuadebam Percanti pudoris mei modestiâ; ac postquam religiose jurando fidem feci, dixisses iterum in speluncam descendisse, & Hypogææ sacris conterritum pæne effluenti animo linqui. Deinde ut admirationem in risum vertit: mihi vero, inquit, quid accidit semihomo bellissime? non eædem arces fuerunt expugnandæ? non extorquendum ab invita, quod sibi non eripi doluisset? Flectebam in terram oculos erroris stultissimi poenitens, & ad proximam aram Veneris indignationem deprecaturus; cum Percantem miseratio mei subiit, &, parco, inquit, adolescentiæ tuæ: nemo præstantior artifex, quam qui per errores suos doctus ante, quod caveret, quam quod faceret, vidit. Tu modo intellige, nullum vatem extitisse diviniorem, quam qui de puellis hoc oraculum cecinit:

*Aspera si visa est vigila, quæ imitata Sabinas,*

*Veke, sed ex alto dissimulare puta.*

Quo propius expugnasses, eo segnior torpuisset defensio. Non audis urbes obsidionum initio civium diligentia muniri: captas non hostium sæpius quam suorum manibus concidisse?

Audiebam avidissime perquam utilia docentem, & quotidianis præceptis rudem animum poliebam. Sed instabat parum opportunus viator, qui diligentius viam præcipitabat, credo, quod cum solitudinis hominem tæderet, nobis oneri quam sibi esse maluerat. Igitur ut commode potuit exaudiri, Heus inquit, juvenes, hæc via Basilium ducit? Certe, inquit Percas. Et vos in oppidum illud usque ad invidiam felix? Cum idem Percas

respondisset; Quid igitur impedit, inquit, quominus viæ tædium mutua humanitate fallamus? Nam & illuc non spectator tantum novæ felicitatis, verum etiam futurus particeps vado. Erexerat animos nostros incertæ rei novitas, impetumque speluncæ moras redimentem suppresserat. Itaque in medium receptus, veluti ne iret sine sermonibus via, perplexe rogabatur de Basilianis, deque eorum ingenti fortuna. Non oportuit ulterius stimulos admoveere homini in hoc sponte jam imminenti, ut, quoties sermo defecisset, illa semper materia faceret eloquentem, Nam & quod summum est loquendi incitamentum, amabat, & humilioris vitio mentis, cum omnia in miraculum traheret, quæcunque animum affectu diducerent, his alios etiam delactari credebatur. Est, inquit, ut audisse vos arbitror, Acignius, vir integritate vitæ mirabili, cujus animus ad sublimia quæque natus, rerum quas in usu quotidiano habemus humilitatem despiciens, iis solis acquievit, quorum magnitudo vix ipso cælo caperetur. Tum is non animum modo imbuere vastis cogitationibus, sed & familiam his artibus præstantissimis erudire cœpit, nihil ineptius quam primam ætatem voluptatibus dedere, laboriosis exercitationibus natam. Vanum esse, earum rerum cupiditate torqueri quæ possint aut non haberi, aut, cum habeantur, effluere. Magnificentius atque illustrius contemni voluptates, quam admitti. His præceptis, & quod ipsius mores severius etiam quam verba familiam ad occultum recti tramitem ducerent, effecit ut apud se virtus domicilium constituisse crederetur. Tum omnes se in disciplinam dare, omnes certatim aut opibus conatus optimos, aut consilio, aut gratia, provehere. Quid multis? in tantum potentiæ fastigium evectus est; utiisdem modis deprimi non posset, quibus erat elatus. Populum sacrorum & religionum terrore devinxerat. Juventutis, quam ipse expoliverat, studiis ardentissimis efferebatur. Principes populi metu; Magnates Principum ficta benevolen-



nevolentia tenebat. Denique omnium ordinum vires, privatæ domus limine concluderat. Describebat civitatum gubernationes, magistratus, provincias, imperia, omni gravitate & sapientia mandabat: domesticas etiam privatorum controversias singulari artificio componens. Etenim nihil tam sancte custodiebat parietum fides, quod non sanctioris mulierculæ efferrent in Acignii domum: aut servuli, quorum taciturnitatem pietas expugnauerat: ipsi denique liberi, cum eorum inobservata diligentia latebræ omnes secretum proderent. Itaque nunc comiter, nunc astute, modo paterna lenitate, modo majestate censoris, sequester erat conjugum dissidiis, deponendis inimicitiiis author, societatum, nuptiarum, fœderum, pietatis, scientiæ, justitiæ, virtutis omnis & religionis arbiter. Ex hoc oraculo, quem quisque quo tempore sermonem habuisset, quibus moribus esset, quibus opibus, quo etiam inter pœnates genio, qua temperantia, qua libertate, noscitur. Denique poterat orbis sub hac disciplina ad futurorum seculorum invidiam florescere, nisi ipse suæ felicitati invidisset: itaque ubi quam ipsi extruxerant potentiam magnates timuerunt, omnia criminari, & in invidiam trahere, etiam benefactis criminum speciem obtendere, exterminare denique præcipitem Acignium velle.

*Sed videt hoc, videt ille Deum regnator, & ausis,*

*Sera quidem, manet ira tamen.*

Imo statim manifesta ultione numen desæviisset, statim liberales disciplinæ rudi situ & inculto inhorruissent. Nulla literis majestas, nulla hominum animis fides diutius stetit: videbatur probitas exulatura cum Acignio, & jamjam uno tantî facinoris metu in jejunam sterilitatem fœcunda ingenia degenerare. Itaque necessitas Acignium in gratiam reduxit. Amplissimo decreto iussus est non fuisse nocens. O non amoris magis quam veritatis vis ignea, ubique se prodens atque emicans! Cessit Acignio in gloriam maledicis sermonibus fuisse violatum. Lana sordissimis squaloribus in-

quinatur, antequam purpuræ fulgor eam imbuat. Nec prius aquila foetum agnoscit, quam dubitaverit agnoscere.

Delectaverat animos nostros libera pariter, & simplex oratio. Nam & nihil in Acignio non amabat, nec aliquid quod amaret, celabat animus, ipsius primum affectu, deinde nostra patientia incitatus. Igitur in tantam familiam asscitus, quem, inquam nomine Acignii non terrueris? quem non libera & potens servitus tanget? Hic ille, quassatis aliquantulum cervicibus, nihil me, inquit, ista moverunt. Aliis gradibus in tantæ sublimitatis cogitationem ascendi. Nihil ultra mihi à puero placuit, quam eruditionis nomen. Elementa didicisse non memini: nec pœnitēdi successus ætatis initio acuerunt animum ad laborem. Quid verear confiteri jam in humilitatis disciplinam me traditurus? ad annorum numerum decrevit ingenii vigor, ac ut ex Ammonis fonte prognatum diceres, cum maxime deberet calescere, rudis animi impetus obstupuit. Quam non huic malo quæsiui medicinam? vota non suscepi? Sed ô Numen non audiendis interdum precibus, quam differendis benignius! Hanc votorum frequentiam noluit nisi geminata felicitate donari. Animadverti nihil in Acignii familia honestis disciplinis non excultum esse. Et primo in eam admitti nullos credidi, nisi quos jam ante illa bona ornassent. Tandem curiosus spectator notavi domus illum esse genium, ut inquilinos extemporaneæ doctrinæ spiritu afflet: vestem illic dari non colore magis pullo, quam monstis ac miraculis tinctam: ea vix ut temet incluseris, eloquentia mentem elaborari, judicium industria. Denique quos ut despectissimo ingenio etiam infra me habui, jam in Acignii comitatum recepti celebrantur sermonibus sociorum omnium. Iis negant quicquam esse subtilius. Hæc, ne quid dissimulem, stimulabant cupidum sciendi, sed incitavit vehementius res magno mihi nuper secreto credita. Hic cum moraretur, cœpimus familiarius instare, & prope velut

eodem

eodem studio tacti. Tum ille, non modo, inquit, promittebatur eruditio huic militiæ nomē danti, sed mihi in ignorantia consensendum ferebatur, si tam egregiam conditionem temnerem. Dii multī nolunt sibi sacra fieri, nisi destinatis à se locis. Non in quolibet antro invenies Trophonii spiracula, neque barbarus ignis deos Græciæ delectat, & ipsa Ceres quamvis omnia suis muneribus vellet, angustas sedes religionibus occupavit. Musis jam non est aliud sacrarium, præter Acignii domum. Nec se modo intra illam semper ædem produnt, sed & me hercle tantum, ibi Oracula, ibi Themis, ibi Pegasi liquor.

*Vates ubi factus Apollo.*

Quis alibi doctus? quis limata veraque elegantia cultus? Dicerēs barbariē ubiq; extra Acignii pomœria esse, & incestare magis Musas quam colere. Iam ipsi prioris ævi scriptores, ut submittūt victa domita capita? nullibi medius fidiū locum invenient, nisi cum pipere, aut ficu, aut passis in Martium uvis. Prodeunt disciplinæ omnes meliore cultu, & seu politicæ, seu rusticæ rei, seu patrum memoria & factis è pulvere excitandis, seu cœlestis, seu terrena seu aquatilis doctrina sit, non erit aliud quam delicata ferant ingenia, præter Acignii vernas, etiam literaria bella tanta constantia gerentes, ut & veneficas tenebras sola face & stylo armati intrent, & Romanas acies in ordinem ac veterem disciplinam religiosa scrupulositate digerant. Cum excidisset imprudentius mihi risus, timeremque ne quid in me odii conciperet ad Acignium iturus; *Quis mortalis*, inquam, non rideat oblata felicitate non utentes, nec magis fortuna propria lætos, quam irata severaque tristes? quotus enim quisque est quem hæc moveant? quis transit in familiam tantæ spei, & in qua non modo docti omnes, sed extra quam nulli? Tum ille, fatum, inquit, illud est ætatis nostræ luctuosissimum. Sed pomaria vides non sua magis pulchritudine capere transeuntium mentes, quam artificioso rubi examine tuta spem fru-

Etuum domino conservare. Laboribus, divitiis, pene libertate emenda est illa quā poscimus felicitas.

Dum hæc proloqueretur, jam se aperuerant Basilii fastigia, & ipse sublatiis manibus hospes adoraverat locum, faciebatque quod expeditissimi curis elegantibus jocos traducerent. Sed notaverat Percas afflictum me novis curis, quas necdum ego adverteram. Nam & pallebam interdum, & improvisa suspiria laborantem animum prodebant, nec jam semel imprudenti vultus exciderat. Itaque sollicitavit pollicem meum, ac ut sibi constare venam sensit, & mentem arcano morbo quati, me hilarius interrogavit, vellemne etiam ad Acignium secedere? Cum ego subriderem; immo, inquit, eremum, ut existimo, malis, & speluncam duobus internitentem astris, quorum pulchritudine jam in limine fati hærentes ad jucunditatem vivendi redimus: His dictis, suspendit animum, fecitque, ut longa cogitatione morbum meum quærerem, qui fallebat adhuc inexpertum, & perplexis se tegebat ambagibus.

Etenim virginis illius species, quæ mihi pæne sortito in spelunca obtigerat, perambulabat animum meum, & imbuebat affectu tenerrimo. Nec aliud tamē suggerebatur incertissimæ menti, quam quod humanissimam puellam offendissem. Nunc licentius egisse metuebam, nunc subrusticū meum pudorem accusabam, nutus denique omnes atque vultus, tanquam iratæ mihi mulieris longa æstimatione pensabam. Hæc assidue anxio morfu me carpebant, & lancinabatur animus inutili poenitentia. Igitur postquam in urbem pervenimus, vix etiam Percantis colloquiū ferens, quærebam miseræ meæ secretum, quo me affari, & objurgare dolorem liceret. Itaq; dum cultum nostrū in stabulū reponit, furtim subduxi me, & in proximam latibram conjeci, cœpique gravissime accusare perturbationem jam se magis magisq; prodentem, nec silebat intra me discors affectus, & prope vocalis Tragoedia se quærentis, nec invenientis animi submovebat erumpentes singultus, & in hunc modum

dum eloquebatur : Quam antea non videras , cuius etiam te nefanda curiositas offendere debuit , ut te sic imbecillum torqueat ? esto , sit irata , sit averſa ; conqueratur de injuria , ſi quam merito ſuo accepit : cur hoc ægre fers ? quare indignum maceras ? Itane parricida ! quanta timiditate peccaſti , tanta nunc audacia excuſas ineptiſſimum ſcelus ? His dictis attentius hæſi , mihi que videbar intueri , ſi quid turbatæ mentis confuſio ſuſcepiſſet . Actandem id placere viſum eſt , quoniam ad ſumma & improba vota non erat aditus , in ſecundis hærendum . Satis fore ſi ignoſceret errori meo , ſi illi cogitationes meæ palam eſſent , denique ſi amaret , licet fortasſe nunquam ad oculos & aſpectum reditura .

*Eia tollite perfidum , rebellem ,  
Eia tollite perfidum puellum ,  
De matris nivea ſinu puellum ,  
De matris nivea oſculis amorem .  
Eia liſtor ades , ferox ſevera  
Venalis jaceat puer ſub haſta ,  
Cui ſimul fuit & diem bibiſſe ,  
Et noſtras arvide obibiſſe venas .  
Si quiſquam Scythicis adeſt ab oris .  
Si quis Mygdonias reliquit undas ,  
Aut de litore venit Occidenti  
Mercator rate vectus huc avara ,  
His brevi pretio relinque , liſtor ,  
Illum , quem pretium putabo grande ,  
Si noſtris procul amoveant ob oris ,  
Emant infidias tyrannulumque ,  
Et quotquot mala trux , ferox , ſceleſtus ,  
Sua continet ampliora mole .  
Nam quid ( Numina ) ſi Cupido noſtris ,  
Si noſtris adolet Cupido terris ,  
Et prima modo tam potens ſagitta  
Dehinc cuspide ſaviet virili ?  
Ibis per Scythiam ferox Cupido ,  
Aut per Mygdonias ligatus undas ,  
Aut in litore ſervies cadenti .  
Ecce ut ejulat , ut latuſ tenellum*

*Suspirans quatit. Audist minantem :*

*Puer, parce tibi. & timere cessa :*

*Puer, parce mihi, Deos deasque*

*Iuro, jam mea jam resedit ira,*

*Nec te frigida jam tenebit Arctos :*

*Nec Tartesia te videbit unda,*

*Pulchro vulnere languidos ocellos*

*Pejus vespere deprimens propinquo,*

*Aut te vix propria facis capacem,*

*Eos positum nimis sub axe*

*Vret publica sentietve flamma.*

*Has una redimes, proterve, panas,*

*Has una redimes, puer, sagitta ;*

*Si pectus Domina mea tenellum*

*Prorsus cuspide scindis incruenta.*

*Tum qui me modo sauciavit ictum ;*

*Tum dextram venerabor, & secundo*

*Optabo nimium perire telo.*

Post hæc veluti læsæ mentis insomnia confur-  
rexi, & Percantem quærere cœpi. at ille jam in  
diversam partem abierat, & cursim per urbem  
delatus, interrogabat omnes ex vestium mearum  
notis, si quis errantem conspexisset. Tandem ad A-  
cignii domum venit, ibique præclusis foribus diu-  
tius hæsit, donec ostiarius, qui jam cellam desti-  
tuerat, multis clamoribus & importuno pulsu ar-  
cessitus, quadratum in medio ostio cancellum la-  
xat, ferreisque maculis intendens oculos, negavit  
fas esse quemquam admitti post vigesimam pri-  
mam diei horam, præcipue, inquit, nostris hodie-  
no apparatu fessis, quippe qui in crastinum solem-  
ne ludicrum meditati, somnio intermiscere labo-  
rem. Hac repulsa accensus Percas, ut non erat ira-  
cundiæ bene potens, nescio, quibus verbis ultus  
est abeuntem, & in stabulum se recepit.

Interim cum cænulæ officium ancilla strenue  
exequuta thoros & mensam sterneret, profuso  
sudore madidus, & parum composito spiritu do-  
mum redii. Quippe quem lapidibus tota urbe ex-  
ceperat petulans lascivia quorundam adolescen-  
tum, qui excoli ab Acignio ferebantur. Illi primo

contu-

contumeliose peregrinum cultum irriferant, ac cum ædiculam quandam prætermitterem velato capite, jam non contenti perstringere advenam maledictis, tanquam intrassem in Lycei Arcadici penetrale, desævierunt lacertis excussissimis, & lapidum veluti nimbo aërem condiderunt: At ego libertatis etiam memor, quam mihi olim dementiæ species dederat, è fuga in prælium conversus, remisi gravissimam molem, & antesignani caput fregi. Ea res impetum furentium stitit, cum omnes in jacentem intenti, pars tollerent, pars sisterent sanguinem, plures turbarent. Ego interim delapsus ad stabulum devolo, & laudatas insigni fortitudine manus, cum adhuc ex pugna caderent, gelida perluo, non sine Percantis risu, qui lepide interrogabat, an in rivales meos incidissem?

At vero cum defessi concessissemus in tricliniū, redeuntibus subinde curis angebar, & amore animum in spes vanas erigente, vagis & inanibus commentis producebam sollicitudinem. Itaque nullius rei diu patiens perambulabam cubiculum, & cruda vulnera causabar, quia pluribus locis occipitium saxi pueri pertuderant, cum interim ad ostiolum nostrū muliebri insonuit murmur: egoque audaciam fingere cœpi, si, quod omnino sperari non poterat, mihi dominam & pœnitentię locum misericors fortuna reddidisset. Etenim quo ab illo discrimine magis aberā, eo superbius secunda gliscebatur audacia. ac ut Homericus canis, fugientem fortunam latrabam, & venientis imagine terrebar. Sed postquam laxatis foribus evalit in cubiculum mulier quædam cultu mediocri, unoque comitata puero, tum soluti poplites corpus exanimum demississent in terram, ni mature velut intermissam cœnam repetens, pulvino demersissem timidissimum caput. At illa, demisso ante puero, salvere nos jussit, nec mirari quod intrasset ad nos audacius: ab iis se mitti, quæ amore ac benevolentia jus familiaritatis meruissent. Hæc non ipse Percas immotus audiverat, & nostrum jam iter pluribus credebat monstris quam lapidibus notari, cum  
mulier



mulier soluto sinu exilitatis exquisitissimæ pixidem mihi ad miraculum surgenti admovet, & rogo, inquit, non es Euphormio? Cum me esse non satis constantibus verbis retulissem, timuit falli, & trepidantem iterum confessionem extorsit. Sericum erat tenuissimum, purpura recoctum, quo pixis revincta aureæ cælaturæ rubeum fulgorem admiserat. Artificium autem mirabile, ut, quocunque illam verteres, eadem oculis species subjicerentur. In ea emendatissima Cupidinis imago Apollinis contumaciam duplici telo ulciscabatur. Hinc aureus Phœbus, isthinc plumbata Daphne, omne præsidium collocaverant in pedibus, & ipse gemmeos vultus Amor contrahens, matri suam victoriam puerili simplicitate narrabat. Illud præcipue stupebam, quod per rarum sericum facillime admitteretur acies, ut ubique tecta pixis videretur, & ubique nuda. Circulus præterea superioris partis eminebat tam commode, ut imaginum gratiam divideret magis quam frangeret. Quodque rarissimum est, elegantis domni moles maturæ avellanæ mensuram non implebat. Tum mulier frangere sericum iussit, & interiora scrutari. Erat autem vasculum è mortuis formicis, & jam ad foetorem solutis plenum. Quod non magis admiratus sum, quam effusam in risum eam, quæ dederat, pæne oblivisci modestiæ, & complosis manibus non semel repetere, *Illic te leges*. Tum Percanti litteras tradit, quarum ejusmodi erat exemplum. Necessitudinis mutux credidit, ne te mirabili nuncio fraudarem, quod est ejusmodi, ut non nisi mea fide tibi credibile esse possit. Nondum erepti è conspectu nostro amantes oculos fallebatis, cum ingens stupor nos avertit à contemplatione tam jucunda. Quippe laceratum cadaver, & in hoc vix integrum ut fuisse corpus noscitemus, sparsis huc illuc frustis semel atque iterum lubrica vestigia everterat, cum cruentum solum notavimus, quaq; deficiebat sanguis, omnia velut recenti incendio tegi: trabem etiam, cujus fastigium curiose acuminatum detruncatis Hypo-

gææ veneficæ cervicibus premebatur. Frons incultissimis sulcis minax nihil omiserat de viventis feritate, nec facile dixisses, an plus truculentia in viva fuisset, quam horroris in mortua. Ideo veliam meam, fidelissimam mulierem ad te mitto, quæ oret ut in speluncam reditu maturato divertas. Ibi consilio tuo & industria utar. Soror mea lepidissimum munus contubernali tuo misit, & fortunæ suæ conveniens. Vale. Erat autem subscripta Epistola tribus litteris inter se prope confusis. *I. L. A.* nec aliud in cera, quam monetæ publicæ forma.

Perlectas ille cum ostentatione affectus litteras mihi in manus dat, cœpitque à muliere quærere communis dominæ nomen. At illa hominem elegantissime risit, & , nescis, inquit, cæcum esse in his regionibus Cupidinem? Restitue imprudenti oculos: docebis alis uti, & profugendi libertatem. Quid amicam optimo gaudio spolias, & quod est in voluptate potissimum, noctem atque furtum ingratissima mente detrectas? Tam audacter prolocutam, & jam rarioribus velis obducen-tem nequitiam, intenti, aspiciebamus, cum illa repente leves & nitidos vultus in laxissimam senectutem vertit. Crederes Menelaum sciscitari à Proteo iras cœlitum & tempestatum vices; tam repente nova frons loquētem immutavit. Nec expectavit stupentium voces, sed trementibus, & ad supplicationem componentibus timidissimos vultus, me, inquit, me ipsam possētis agnoscere? Aut putatis, eadem ruina quæ Hypogæam abstulit, omne illius artificium cecidisse? Et animis novas species inducimus, & frontibus; nec felicius investigabitis dominæ meæ limen, quam aut Ceres, aut Inachus, amissos liberos quæli- verunt. Si tamen homines estis, id est, si agnoscitis suavis- simæ mulieris imperium, date fidem in con- sciæ speluncæ secretum post diem septimum re- dituros. Cum ita quassarentur capita nostra ut annueremus, egreditur cubiculum, & inequum qui ad hoc pro foribus stabat, attollitur,

Nobis

Nobis autem excitus à muliercula terror cum profusum sudorem passim movisset, tamen posteaquam diceffit, & soli constitimus in acie, crescentibus subinde animis in profusissimum risum cecidit. Sed præcipuus erat sermo de mea pixide, quid hoc callidæ puellæ commentum designaret. Cumque multa invicem disputassemus, tandem in Percantem consensi. Volebat autem speciem meam, quæ non ingrata virgini fuisset, per cælaturam amatoris imaginis pingi. At quoniam eidem ineptia mea persuaseram, effœtas intus & funeratas vires esse, ideo plenam emortuis formicis pixidem Naturæ mendacium arguere, quæ interna vitia tanta subtilitate texisset.

Sed omnia trahebam in alimentum flammæ, & prope irascebar socio meo, qui tam docili febricula exæstuebat, ut sive tepescere morbus juberetur, sive mori, audire posset imperium. Diceres nos è navicula recens egressos, & illum qui mari paruisset, durius torquenti ventriculum, compositos humores in littus extulisse: qui autem repugnassem eicienti pelago, demum in arenam dimissum, gravi capite, lassique vestigiis, reddi aquam, mihi petere, ut ibi medicinam quærerem, unde morbum haussem. Verum hanc inter nos seditionem gravior tumultus compescuit. Quippe furentium hominum armato concursu ædes inhorruerant. Passim audiebantur dissilientium portarum casus, & asperæ minantium voces, & ipsa nox per se formidabilis inanibus omnia terroribus auxerat. Igitur expectabamus venientis procellæ sævitiam: certi, quoniam nos in theatrum suum fortuna produxerat; nostras etiam esse in illa fabula partes. Ego vero totius mimi argumentum eram, qui puerorum lapidationem remisso saxo compresseram. Inciderat enim moles in nobilem puerum, & timebatur vulnus altius intromissum, quam ut solæ carnes fauciatae essent. Iam Acignius apud Dictatorem municipii intervenerat, & religionum auctoritate civilem armaverat vindictam. jam irruperat Dictator in triclinium nostrum, ubi omnibus ad furo-

furorem tumultuantibus, Tunc es, inquit, litterarum prædo, qui omnes deos & homines uno facinore violasti? Nisi litteras nominasset, crededissem etiam à virgine missum. Sed posteaquam invidiam intellexi, non sustinui dimittere supercilium, quod erexerat conscientia laudatissimi facti: cujus rationem cum cœpissem reddere, barbara heu inimicorum rabies non potuit innocentiam audire. Præcipitem exturbant de thoro, manusque vinculis stringunt, nec proficiebam justissimo planctu, cum provocatum ac invitum in pugnam descendisse clamarem. Me quoque vulneribus affectum, & utrinque vindicandam pari severitate audaciam. Sed causa esse non potuit, ut in patricium juvenem, & Acignii studiosum, insurgerem. Præcipue Dictator officiosam iram egregie fingeat; & se vero sceleris mei vindicem, se alumnum & cultorem justitiæ affirmabat.

At Percantem primo rei novitas posuerat extra se, ut interdum tacite quæreretur, veris ne casibus, an per insomnium ageremur: interdum contumacius insurgeret in publicos servos, & sublatis in meam perniciem manus sui capitis periculo averteret. Mox ut fustium acerbitas sanitatem mentis revocavit, & sibi quoque intellexit parari vincula, non inultum hoc erit, inquit, domino meo Callioni. Putares revelatam Persei parmam, & omnes plusquam lapideo frigore obriguisse. Ita cunctis & animi, & manus ad Callionis nomen ceciderant. Quod ut sensit callidissimus Percas, manicas meas feriens, eas etiam jurabat Callioni impositas esse. Iam ministri lentius ducere, jam mitius imperare Dictator cœperat, & ego aperto circumstantium murmure probus esse, cum Acignio nunciatum est Callionis esse servum, quem autoritate sua læserat.

*O qua sacrilegas, prius relicta.*

*Terras filia deseris Tonantis.*

*Nunc, Astræa, feros remitte vultus,*

*Nunc lenis magis, & magis serena,*

*Iam te protinus, O potens virago,*

*Iussis omnia cultibus reducens.*

*Nunc*

*Nunc est dignus honos, tuoque dignos,  
 Diva, numine nunc habes parentes :  
 Nunc ortam sacra fama confitetur  
 Regum sanguine, divitumque testis.  
 Et penetibus inserit potentum,  
 Et ne non pia jam colas parentes.  
 Quod diti placet, aut placet potenti,  
 Astraam loquimur jubere factum.*

Tum Acignius ad me summa celeritate contendere, tum aspergere accusationi fucum callidissimis excusationibus coepit. At magistratum major inceserat perturbatio, cum & sermones hominum timeret, si tam facilis machina evertisset sententiæ robur, & si perstitisset, Callionis potentiam. Sed assuetudine peccandi succrescunt ipsis sceleribus excusationes, & animus in flagitia promptus in expedito commenta, velut sceleratæ vitæ custodiam, habet. Itaque non multum moratus, neque, inquit, justitiæ quicquam nego, neque Callioni aliquid dabo, quod vir integerrimus sibi datum possit irasci. Utinam non audissemus tantum nomen; ut sponte liceret esse justis. Nihil fallo; sed nisi provocatus pugnavisses, nisi tuam causam vulnera perorassent, non impune tulisses hanc ferendi licentiam. Sed audi, fortunam in te habetenus, non scelus, punii. Non oportuit populum levare fortuitorum terroribus, ne grandis licentiam inulti prætextus ostenderent. Itaque habet à me Callion neque neglectam judicandi consuetudinem, & gaudere me nullum fuisse ex ipsius familia, ira Domini, meaque severitate dignum.

Sed jam in familiaritatē descenderat Acignius, & mira humanitate invitabat in crastinum ad publici celebritatem spectaculi. Iam etiam ex vulneribus ægrum ad thorum deduxerat, ac blanditiis omnibus obstinatum animum expugnabat: pepercissimque forsitan, nisi cervicibus in spondam inflictiis vulnera recruidissent. Præterea sero consenserat in iram animus, & in sylvis, quo difficilius molitur imber ramorum textiles nexu, eo pigrius admixtæ aquæ stagnant.

At

At vero postquam tempestas in serenum transiit, & defatigatas mentes densior somnus obsedit: terribilem fortunæ lusum, qui nos tota die versaverat, nocturnæ imagines reddebant; ut infestior sibi esset ipse animus per miras cogitationes se terrens, quam fuissent externæ formidines: donec tympanorū ac tubarum clangor sub rubentis Auroræ fugam inquietum soporem excussit, meque ad paratam ab Acignio scenam cum Percante adduxit. Sedebat mihi proxime modestissimus senex, cujus cum humanitatem libassem, ingemui, fortunam ejusmodi moribus meam patriam invidisse. Nec difficilis fuit similium morum conciliatio, nam & secretus impetus invitabat ad amicitiam, & orationi nescio quis genius insinuaverat fidem. Igitur nondum composito aulæi tumultu ludimagistrum spectabamus, qui nudis fere ad cubitum lacertis nunc firmabat orchestram, modo scenam, & verbis ad anhelitum expressis, hortabatur actores, hic regiæ meminisset gravitatis, ille muliebris pertinaciæ: risum, lachrymas tenerent, & impositos mentirentur affectus. Interim optimum senem rogabam: num ut audiveram in Acignium consensisset omnis virtutum familia; num in verticem integritatis hominem Gratiæ manu duxissent? Hic ille

*Suspirans, imoque trahens a pectore vocem.*

Et vero, inquit, ducebant. Quodque justius indigneris, non inviæ rupes, non aspera cautium malignitas, auspicata compressit vestigia; sed exiles stipulæ sustinuerunt personam robustissimę molis. Diceres domiti exercitus inanem umbram victorem animum terruisse. Ita fuso vitiorum examine non potuit suspicionem vitiorum fugere. Vanitatis, ambitus, aviditatis in republica, in re litteraria reprehenditur. Cur non tollit suspicionem? cur non extinguit incendium, quod illius famam invidiosis criminibus urit? Denique cur non mulcet, aut cur homo videri timet, & interdum errasse? Crederes cum illius actis cælitum decreta convelli, neque se quicquam à Numinis

causasse se junctum. Mirandum porro est infestam Acignii, (injuria credo) sed infestam superbæ crimine famam, qui discipulum pæne nunquam dimisit non superbissimum, aut qui aliquem ultra se, magistrumque laudaret? Quanquam & illius gloriam plerumque corrumpunt, qui omnia ejus dicta factaque in miraculum trahunt: quoniam hac ætate sic vivimus, ut quem factiose laudaveris, huic seu invidia, seu contra sentiendi ambitione sis iniquior. Ac ne sit aliquid in Acignio non insolens, quam amici famam evertunt, imprudens inimicorum furor alit, dum calumniandi licentia justiores querelas enervant, & ineptis criminationibus veriora indicia destruunt.

Dum hæc proloqueretur, tantum silentium totam domū occupaverat, ut altiore Sigalion excipi nunquam possit. Itaque ad scenam oculos convertimus, quam decorus adolescens perambulabat, qui fabellæ argumentum pandere cœpit, versu non multum delicato. Fingebatur autem juvenis, fortuna & ingenio illustris, paternis bonis solitarium deserti prætulisse silentium, nec sanctissimas matris lachrymas, nec Principis auctoritatem religiosi cœpti fregisse constantiam. Nihil illo venustius, si fabula Roscios invenisset: sed omnes ad pedum numerum humeros torquebant, omnes fictitiis vocibus corrumpebant naturalem gratiam, & trita sæpe barba insolentiam testabantur ascititiæ majestatis.

In illis deliciis optimam lucis partem consumpsimus; tandemque digressus ex molestissima schola, viam ad Fibullium cum Percante exorsus sum. Ac ubi extra Basilii munimenta constitimus, tum solutiore gaudio ridebamus pridianæ lucis prodigia, & memorabiles tot molestiis casus, ex quibus nihil præter paucula in occipitio meo vulnera duraverat. At vero nihil est diuturnum, quod sit extra fortunæ consilium. Etenim Fibullius ad interitum æger marcentem familiam ad postremam sollicitudinem deduxerat, nosque ab ipso gaudii limine tristitia veluti fugitivos revocavit,

Sed



Sed mirabar hominum genus totis Fibullii ædibus conversari. imperiosum, triste, severum. qui nec ingemiscebant ad familiæ planctum, & frontes ad tristitiam arte magis quam sponte contraxerant. Quos ut Medicos sæpius appellari audivi, non prius interrogare Percantem desii, quam intelligerem omnem religionum differentiam in tres partes esse distinctam. Hos appellari Priscos, illos Novates, tertium genus Medicorum esse. sed potentissimam factionem Medicorum jam latissime dominari: ut quod Spartacus regnum concupiverit, isti servi occuparint. Iam procerum partem, jam Magistratum, eruditorum etiam greges totos consensisse in Medicorum scholam, hæc & talia sentientem: Aut Numen solis terroribus fingi, aut si est aliquod, omnia permisisse dispensatrici naturæ: animum ita corporis domicilio insinuatum, ut extra illum carcerem non daret: denique religionibus sicut vestibus utendū, de quibus & consuetudo & ipsa vulgi inconstantia iudices sedent. His institutis docti facillime peccant in hominum vitam, & novis experimentis radices omnes ac metalla tentant, nec perniciem hominum æstimantes, nec numinis iram.

Igitur & Fibulliam clades eadem afflixerat, cui ad vulgarem morbum insolentia remedia quæsierant. Etenim quos emulserat humores vena ad sinistrum renem pertinens, vis lienis ignea paulatim addensaverat, ut omnem renis latebram coctilis & acuminati lapidis rigiditate compleret. Nec acerbos dolores ante crudelis foetus moverat, quam exercitationis vehementia è naturali recessu excuteretur in ureteri angustias, nunquam hiatu tam immani sua sponte patentēs. Tum autem sævissimi mali atrocitas tam ventriculum superne exonerabat, quam alvi libertatem compresserat. Cumque ad vesicam carneæ fibræ cum expellente natura pugnarent, illa in concepti flatus suspicionem veniebant. Igitur medicamen infusum est inferius, & omnia in alium forte morbum valitura tentabantur.

At præcipue nefarius Ambrax oppugnabat adhuc vitalem Fibullii naturam, qui præceptrices Medicorum chartulas, temere in eorum officinis dissipatas qui diluendis medicamentis præfunt, vigili ad scelus cura coegerat, ac in secretam deinde merferat urnam, paternæque artis temptor medicinæ scientiam mentiebatur. Tum ut interrogabatur de morbo, munitis diligenter foribus, versabat manu vasculum, & Este, inquiebat, sortes nusquam Prænestinæ, vel Lyciæ; ac præscriptum, quod volventem manum primum impleffet, ægris etiam formidolosius, quam est periculum fontibus, ad pharmacorum magistros mandabat. Sic ut interdum nefarias manus atroci cæde pollueret, interdum fortunæ temeritas pro prudenti consilio esset. Sed non litaverat Fibullius imprudentiæ. Nam Ambracis chartula dictavit ova ad ignem bis cocta, & veterrimi pisi eliquatam viscositatem. Præterea deambulationes raras jusserat, & oscitantem ignaviam molli thoro fovere. Quæ omnia nascentem in Fibullio lapidicinam ita duraverant, ut assidui cruciatus moriendi solatium quærent: quod procul dubio solvisset hominem tantis malis, si aliquid gustasset de Callionis potu.

Non tenuit lacrymas mitissimus Percas, & miserissimam domum sublevavit gemituum societate. Sed mea sors erat durissima: quoniam certam opem negare Fibullio videbatur à mea humanitate alienum: & si remedium, quod in illum morbum strenuum noveram, tentassem, timebam Medicos tum etiam Callionem, denique ne non haberetur fides ignoto. Tandem vicit misericordia nimis prudentes metus, propiusque ad stratum accedens, O vir, inquam, propensiore fortuna digne, quam nunc aversa est, aude sanari. Da remedio quod asfero triduum, & si ad votum meum sanitas non responderit, illius iracundiam meo capite depreceris. Mola vittisque victima mactari non abnuam. Exhorruit ad hæc dicta Percas, & de Callionis poculo ratus loqui, meo capiti, quod ego in succidancum

cīdaneum dabam, justissima suspiciōe timebat. Sed Fibullius, quam non, inquit, hæc promissa nova sunt? Apage hæc secreta naturæ, & tot modo nati medici, vanam spem, ac inania verba, æternis miserorum cruciatibus, & indigna mercede vendentes. At ego, crede, inquam, domine, amplissima erit merces homini tanto benefecisse, neque solum pro tua mihi valetudine, sed pro mea etiam salute laborandum est. Si fallo, nec possum declinare familiæ tuæ impetum, nec domini mei iram. Tum illè, postquam aliquantulum dubitavit, interrogato etiam de meis moribus Percante, ut acerbitas mali cogebat, tentare igitur remedium jussit, quod vel ipsius corporis ruina morbi pertinaciam expugnaret.

Hac facta potestate in proximum montem secedo, illamque partem, quæ tum imminentis jugi vertice, tum virgultorum & fruticum humili fastigio, maturius umbrabatur, curiosa sedulitate lustro Respiciebat locus aquilonem, & ut erat declivis, fluente passim per imbres humo aridis tantum lapidibus sternebatur. Hic terna geniculatione Æsculapio votum feci, si sanaretur Fibullius, barbam auream ex proximo restitutum peculio, qualem Dionysius ademit. Crederes deorum etiā suffragia emi. Nam statim notissimam herbam oculis meis subjecit Æsculapius, quæ calculo bellum indixit multo felicius, quam aut Veratrum amentię, aut vulneribus Asciros. Hæc lanceatis foliis, piloque ita brevi, ut pæne curiosos oculos fallat, crenis denique tenuibus, & sæpe in obtusam speciem oras secantibus, mediocriter assurgit Radix caulisque lignea, subtiliorem succum in herbam transferunt. Planta ad ingenium terræ nunc cubitalis, plerumque eminentior, insigne fastigium floribus ad examen turgentibus cingit, & Virgæ aureæ est nomen, sive quoniam aureæ ac pæne divinæ virtutis est, sive quod præstantis metalli colorem exigui floris venustas æmulatur. Cæterum contusum in renibus calculum in innoxium pulverem solvit. Non in latere, non in ve-

fica dolor: adeo ut tam facili remedio pudeat calculum timuisse. Etenim in hyemem siccatur æstivis umbris planta, & ubi gravitas lateris coeuntem morbum præfagit, aureus pulvis ad drachmam mero delibutus sumitur, sive ovo levissime cocto permixtus.

Sed mihi non erat ad manū tam pretiosus pulvis. Itaque recentem adhuc herbam jubeo Fibullium mandere. Nihil eo die visum est ad morbum fecisse medicamentum: sed biduo deinde repetitum, supra fidem est quam egregie refellerit acerbissimum morbum: sordidus pulvis abunde vesicam exonerabat, cœnosumque saccharum pæne sanguinis imagine pingebat.

Iam ventriculo robur redierat, jam corpori toti vigor, & mihi ad perfectionem artis medicæ sola deerat laurea, & emptitii testimonii liber, cum à Callione redduntur Percanti litteræ, se à Principe ad Labetrum mitti, ea pompa quæ utrumque deceret. Nos quamprimum sequeremur, vel ad Fibullium, si consensisset, laturo poculum, vel ad ornaturi magnificæ domus superbiam. Tum à Fibullio epistolam ad Callionem impetro, quæ se ingenti miraculo sanatum confirmabat, & quoniam semel Numina curam egissent suæ valetudinis, nolle ea offendere alieni auxilii mixtura. Igitur gratiam habere oblatis medicamenti, & ipsi præsentis aliquando pleniores habiturum. Timebam enim, ne Callioni, si rescisceret Fibullium mihi sanitatem debere, videretur indignum, prælatas meas artes illi medicamini, cui commendando etiam me misisset.

Me autem cum in secretiorem thalamum Fibullius evocasset, semovit arbitros, & Euphormio, inquit, nec tu ignoras quid tibi debeam, nec meriti tui magis quam ego es conscius. Itaq; diu deliberavi, quo me dono exsolvere: nec præstantius inveni munus, quam simillimam tui partem. Tum mulierē advocat supra politissimas imagines cultam, quodque auxerat formam, tenera ut videbatur verecundia & pudore confusam. Et, si mihi, inquit,

inquit, credis, Euphormio, uteris beneficio & voluntate mea. Puellam hanc, cui dudum persuasi ne injussu meo nuberet, trado. Integerrimam mentem, & suo corpore dignam, honestæ frontis timiditas spondet. Ego vero dotem dicam, quantam capere aut agnoscere tuæ conditionis homo possit. Hic ego non nihil tam eleganti formamotus, tamē insidiosum munus timebam. Et si abest, cogitabam, fallendianimus, cur hæc secreto peraguntur? Deinde quam ad manum hæc puella de occultissimo thalamo producta est? quam insolens, ut sine flammeo, sine aqua, sine solenni igne, absque vittis denique & matronis verecundiam mulcentibus transeat in alienam familiam virgo? Hæc molestissimis cogitationibus scindebant animum, & præterea quod consilio tempus non permittebatur. Erat etiam mensis Majus, quo tempore nuptiarum omen perhorrescebam. Igitur ambiguo assensu cogitabam sic hominem non lædere, ut neque me laqueis, si qui essent, impediendum producerem. Certe, inquam, domine, parum anias puellam, quam pro nuptiis in contubernium mittis, Quid amplius irata Omphale à Lydis exegit, quam ut servis ingenuæ miscerentur? Itane, inquit, nescis splendidissimam libertatē in virtute positam esse? ac præterea jam ut conjugio emancipari liberos, ita servos in societatem juris Quiritum mitti? His dictis erigebatur animus meus in spem optimæ sortis, & jam ad novaculam videbar libertus respicere, cum Fibullium credere cœpi ex magnatum more facere: si nolis ut per illum tibi bene sit, conaturum ut sit male. Nec amplius cunctatus, in uxorem consentio, & præeunte religiones Fibullio, ac præterea osculo bis terque repetito, firmavimus fidem: ac tum in publicum progredior, & sponsus, &, quod nesciebam, pater. Iam septimus dies illuxerat, quo tempore promiseramus reditum in speluncam, sed memoria non illubenti omisimus suavissimum ad mulieres iter: quoniam jam ad Labetrum adventabat Callion, & urgebant assiduæ litteræ, ne ejus

comitatum deficeremus, cum Percantis sedulitatem, meque prodigiose sanatum, instar ingentis familiæ reputaret. Itaque expedito progressi itinere, antevenimus etiam Callionis cursus, & magnificam præmissi agminis tarditatem.

Præludebat autem Labetrus ostentationi suæ, & pretiosissimam supellectilem pandebat in Callionis adventum. Machinæ per mœnia dispositæ præbebant speciem formidolosi belli, & moniti cives, ut ad tubam in arinis essent, pacificos cultus militari diligentia instruxerant. Iuventus præterea nobilis arcessita ad Labetrum, splendidis collucebat vestibus, & exarata puellari manu pallia tota pensione redemerant: ut quoties mensa in illum annum posita esset, Callionis meminissent. Sed maxime obstupesceram ad principalis ædificii luxum. Thori ubique purpura strati erant, stragula bysso duplici insignia notabantur, & aureis filis sericum intertextum plus artificio debebat, quam naturæ.

Præterea cultu mirabili stabant dispositæ per cubicula imagines, quæ mihi videbantur sudantium vultus exprimere. Admiratus ego ingeniosam statuarum novitatem, propius accessi, & materiam audaci digito scrutatus sum. Sed profundius quam vellem fragilis materia manum admisit. Perturbatus igitur imaginis cicatrice, fugæ consilium cepi, cum ad latus se applicuit sedulus minister, spumantemq; hordeaceo potu scyphum humanissime obtulit; cumque incerti formidine vultus variis coloribus æstuarent, putavit tantis conventibus insuetum numerosæ domus frequentia perterreri. Itaque vanitatem timoris mei stultissima consolatione permulsit. Quid exhorrescis, hospes, inquit, ad regalem strepitum? quid existimas triumphum quotidianæ familiæ rationem? Scio nescire dominos vestros tam prope ad cœlum deosque accedere. Sed neque instar numinum provulgaverunt orbes alios, neque tam syn-cera nobilitate incorruptam seriem ad ter mille annos servant. Tu vero in aliud tempus stuporem

rem differ, dum Labetri gentiles videas majestatem nutantium cervicum circumferre, velut ad numeros; & audaci ponderosæ orationis fiducia non tam ventos onerare, quam superare aurium fidem. Iam vero, si tumultum ebriæ domus audiveris, putes ad Orgia Thyoneum descendisse. Crede mihi, natitabunt pavimenta hoc quem te neo liquore, & plus bibent thori mensæque, quam homines. Sed tu interim Labetri bonis utere, & audaci manu frange statuzæ buty raceæ auriculam: Præsto sum, qui saturatis suavissimam potionem affundam. Cum ego negarem deformari statuam oportere, ultro irrisit pinguissimus servus, & cervicem imaginis amputavit brevi gladio, qui ad hoc ex catenis argenteis de cingulo pendeat; & non dum scis, inquit, septendecim esse cubilia, in quibus ejusmodi quatuor imagines ex marmore angulos adornant, præcisæ cervicibus, quæ quotidie recentissimo butyro reparantur; tum ut populus in jentaculum destruxit extemporaneos vultus, frons subinde alia reponitur, & in diem septies ac decies renovatur delicatissimum munus. Nondum hora diei nona est, & jam centies quadraginta butyri pondo hoc palatium absumpsit. His atrienfis dictis audaciam sumpseram destruendi formosum artificium, cum tubarum ingens murmur personuit, & desolatum palatium nihil ex tanto populo servavit, nisi spem redituræ frequentiæ. Ego quoque tam cupidus invisior quam novus regionis incola, despecto jentaculo in publicum descendendi, & quanta pertinacia viam turba negabat, tanto impetu compositos in orbem lacertos rotabam; & per dissectum inæqualitate itineris agmen immittebam robustissimum corpus. Deinde ut in obvium tumulum ascendi, res expectatione gratior oculos meos delectavit. Erat enim Callion non mediocri stipatus manu, ad quem confluxerant ex sacra Labetri domo, Cubicularius, Dispensator, Ædituus, & magnatum ingens numerus, qui ficta humanitate quem timebam venerabantur. Ego quoque viam mihi cum Percante ad do-



minum feci, & strato in supplicem cultum corpore, à transeunte veluti nutum extorsi: cum in elegantissimam perductus domum, & orationibus in atrio ad fastidium longis exceptus, ipse naturali eloquentia vividum ingenium prompsit. At ego tot nugis fatigatus, in Labetri domum redeo, potioribus miraculis pasturus curiositatem sedulæ mentis.

Erat autem in interiori palatio non tam hominum infrequentia, quam silentium: omnes veluti stupore contracti modestissimam vocem ad vicinas aures anxie trans mittebant, & oculi non temere vagi in animum meum pietatis induxerant sensum. Igitur contemplatus ubique, num vel ara vel deorum imagines religiosos homines moverent: nihil advertere potui præter tunicam purpuream, quæ ex tholo catenis aureis pendeat, & capitis tegmen sericis ad utrumque latus nodis insigne; quæ & gestasse juvenem Labetrum dicebatur, & in nescio cujus senectutem asservari.

Sed cum promoverem inconsultos gradus in secretiorem thalamum, corripuit laciniam vestis vir, si bene conjiciebam ex colore & turgentibus labris, Afer, & quid in loco tam illustri facerem rogavit. Commotus ego strictorum in me oculorum majestate, nihil habui quod opponerem tam vibrantibus telis, nisi Callionis potentiam: cujus ille nomine, tanquam fulmine prostratus, nihil, inquit, impedio. Tam gratiosa servitus omnia hujus familiæ secreta tibi facile producet. Hac venia factus audacior in proximam sedem irrumpo, ubi etiam pauciores stabant, & plerique fusco vultu horribiles. Diceres illos regium Cyneæ senatum truci vultu fingere, ad cujus gravitatis imaginem Præfectus Prætorione nescio cujus gentis maxime formaverat vultum, qui trecentis nuper mulis advenerat, ut doceret & fugere se scire, & his magis formidabilem esse qui à tergo, quam qui à fronte consisterent. Tum ego applicitus ad parietem, lustrare cœpi omnium incessus, & superbam ad fastidium frontem, cum  
subito

subito meatus intercluduntur suavissimæ luci, & densa nox, fenestris curiose junctis, totam domum insedit. Igitur metuens ne me in custodiam publicam misissem, errantibus vestigiis repetere cubiculum cœpi, & in aditum, qua me confusa memoria ducebat, tendere: cum ex altera parte dimota sunt adversæ januæ claustra, diductisque peristromatis tot cereos decori adolescentes intulerunt, ut timerem ne tenellum aliquod funus producerent ad numerosissimum lumen. Sequebatur autem mulier aurea præsignis tunica, quæ sublimi crine turres prope in occipitio excitaverat, deinde vir, ipsa muliere brevior, ad cuius prolixum latus stabat. Tum quotquot in triclinio erant, libratis velut impetu corporibus longæ veneratione jacuerunt. Ego autem altissime

*Obstupni, steteruntque coma, & vox faucibus hæsit.*

Tantus enim pæne cultus Iovem Iunonemque adesse persuaferat: sed ita ut mutatis honoribus, hæc annis, ille mensibus præsideret. Interim mulier ad mensam gradu satis composito festinavit, meusque deinde Iupiter inferiori lectulo confedit. Sed inanis videbatur mihi pompa: nihil enim ultra panem in cœnam importatum cernebam, cum in genua procidit assueta his officiis Nympha, & humentem mappam purgandis manibus dedit. Tum diutius ignorare non potui, quæ Numina delectarentur ejusmodi sacris, & hominem, cui stabam proxime, interrogare cœpi de iis quos videbam. At ille, nec te, inquit, majestas loci, nec ceremoniæ, & ritus ab ultimo ducti Oceano, monuerunt Labetri sacrarium esse?

Adoravi ego Numina; ac deinde in diversam cœnaculi partem furtivis gressibus tendens, in amplissimam porticum descendi, quæ & ipsa solis facibus erat illustris. Circum autem elegantissimis imaginibus Labetri vitam ingeniosus pictor reddiderat. Quod ut intellexi ex versibus, qui ad singulæ oram tabulæ legebantur, nolui tantæ fidei historiam ignorare. Nobilitatem Labetri modestus artifex non altius erat exorsus,

quam

quam ab Æneæ erroribus. Nam & Mnstheum affinxerat, & Capyn, & Anicium, qui contis infestas undas retundebant. Ac ut Labetro prænunciaretur jam tam armati maris injuria, ipsa tempestas prope sorbebat majores suos. Deinde consulatus ac triumphi longa serie parietem adornabant. Sed hominem, ut eram, illiteratum non multum delectavit evolvere, quæ vetustas multis seculis obtexerat. Itaque ad recentia rudem oculum converti. Erat autem effictus Labetrus in lucem prodiens, quem Aquila excipiebat ea purpura, quæ est triplicis prærogativa coronæ. Deinde adultus cognati Principis vicem magnifice sustinebat,

*Rex Anius, Rex idem hominum, Phæbique sacerdos.*

Nec omiserat artifex splendidi rationem conjugii. Stabat Labetrus novo insignis cultu, ac in Veneris legem transiturus, Martis primum sacris initiaverat latus, insolenti ferro grave. Deinde nūbebat amplissimæ virgini dotis. Postremo erat effigies sedentis ad Ilium, & tot molientis machinas, quot destruxit sævitia maris, & callidi hostis importuna sedulitas. Super hæc erat picta Discordia ex Averno prorumpens, quæ ante aliquot lustra quietas Labetri gentes sollicitaverat ad bellū, & hi versus pæne in vertice imaginis legebantur.

*Est locus Ausonias inter notissimus undas,  
Euboici colere viri, cui nomen Averno  
Dicitur. Hic dira tristis reverentia ripa,  
Hic campo crudelis honos. Nox impia pigros  
Inspirat cælo ventos, & nubila ducit:  
Cuncta silent circum, si non in sibila crines  
Ferales movere dea. Non gramina ripis,  
Torpet iners tellus, Phæbumque aeterna recentem:  
Nescit hyemis mutare domos. Tantum improba late  
Signa canis surgunt, spumaque infecta cruenta  
Lurida Cerbereos scribunt Aconita timores.*

*Hoc, ut fama, specus, crudelis janua functi  
Orbis, & immensi panduntur limina fati.  
Attoniti horrescunt manes, umbraque recenti  
Hæc panas intrasse via, pars maxima pœna est.*

*Ille & gemino quondam Discordia curvus  
 Extulit ad superos dubium caput Omnia retro  
 Abstulit astra timor, totusque expalluit aether.  
 Ipsa velut tristes ducentia nubila gyros:  
 Velavitque diem, terrisque exclusit Olympum.  
 Tela manu, geminaque faces, vultuque severo  
 Ira rubet, pallentque metus; mutatque foveatque  
 Consilium, pugnatque sua Discordia menti.  
 Quam circum rapidusque furor, luctusque scelusque  
 Iraque, insidiaque volant. Sedes axe superbo,  
 Infelix Bellum, motisque accenditur armis,  
 Hac simul ut nostris crudelis constitit oris,  
 Erexitque genas, metuendaque tela sonanti  
 Incussit clypeo, & rapidi ter voce flagelli  
 Increpuit pacem, ter protulit impia cades;  
 Tum primum excita studia in Mavortia gentes,  
 Tum mors properatus amor, tum semina belli,  
 Nondum bella tamen. Qualis certamine primo  
 Ventorum, minus aura furit, seseque moveri  
 Indignantur aquae, nec promptus surgere Nereus  
 Adubitat paulum, & cunctantes consulit undas.*

Deinde describebatur Tempesta quæ se ab Occidente in illas terras infuderat, & quodammodo debili Discordiæ sociaverat manum. Quibus tabulis non indelectatus transeo in proximum thalamum, & deinde cum in penitiores intrarem recessus, obrui memoriam labyrinthis amplissimæ sedis. Nam & implicatæ in sese cameræ, & multiplici aditu aperta cubilia, auferebāt viæ discrimina redeunti per inanes porticus, & magnifica spatia nobilissimæ domus, donec in secretum delapsus cubiculum, notavi ad dexteram litteris aureis scriptum: *Nemo in hanc sedem injussus admittitur.* Et ad lævam auro item fusili: *Isdem sanctus est panis sacri thalami aditus, quibus Romana olim transitus fossa.* Quibus ego diligentissime perlectis, toto impetu foras prorueri cœperam, cum ingens strepitus timidissimas aures perculit. Erat enim muliebre agmen jam incubilis gradibus, ut earum oculis meam fugam suffurari non possem. Igitur mutato consilio in thalamum redeo, & cum stragula in terram

ram prolixè defluerent, ocului noxium caput sub aurei recessibus thori. Et jam noctis silentium strepentem concursantium tumultum suppresserat, cum mihi tum periculosissimus carcer, tum inanis ventriculus somni copiam non facerent. Vnde remotissimos canum latratus audiebam, & tenuissimæ auræ murmur non fugiebat vigilis sensus subtilitatem. Tum mulier, quæ supra me in lectulo decubuerat, exigua tussî excitavit matronam in alio thoro jacentem, quæ ocyus surrexit in pedes, pervasitque ad vicini ostium cubi- culi, ac bis terque inflexi digiti articulo fores pul- sâns, in aliam ipsa deinde sedem regreditur. Hic ego curiositati tantû imperare non potui, ut stra- gula non dimoverem. quantum ad oculi liberta- tem satis erat. Neque multo post laxatis foribus intravit mirabilis viri species, cujus ego cultu ex- territus nihil abfuit quin proclamarem. Erat enim linea solum veste instructus, manuque illa matu- lam argenteam ac facem, hac clavem auream, gla- diumque gestabat. His ille ornamentis insignis ac- cessit ad thorum, & Domina, inquit, ad imperium tuum veni. Sed ego extra me positus tam inso- lentibus, animadverti ostium, quod in inferiores gradus tendebat, referatum esse ab ea matrona, quæ hominem advocaverat: igitur utendum op- portunitate ratus, quam potui celerrime me ip- sum de latebra eduxi, & ab utroque amantium conspectus evasi. At illi portentum rati, frigidis amplexibus, tanquam vino quod mullum suffo- casset hausto, omne robur amiserant: cum ego ad Callionis fores elapsus, expectarem venturæ lu- cis solatium, gelidis interim postibus humidi astri malignitatem ut licebat declinans.

Cum deinde crepusculo discussa nox spissior pallenti adhuc Sole rarefceret, advenit is quem rei domesticæ Labetrus præfecerat, & ad Callio- nem jam in atrio ambulantem tendens, festinatio- nem salutandi iis negotiis excusavit, quæ totum diem Callionem tenerent. Ac deinde per varios sermones in id lapsus, quod maxime quærebat,

Est,

Est, inquit, nobilissima porticus, & omni antiquitatum referta genere, quam ex media Italia pæne curribus junctis sublimem transtulit in has terras Labetrus. Ea non est magis auro conspicua, quam non adulteratis antiquitatis notis; neque studiosius illam juvenes perambulant, quam scholastici atque senes, qui omnia prisci moris vestigia in argumentum eruditæ disputationis trahunt. Non erit indigna, nisi me fallit novitas, elegantis tuo ingenio, & invenies, quod non oculos magis quam ingenium delectet. Si non molestum est ire, & vicinia invitat, & quoniam mea est custodia, non admittetur hodie aliquis præter amicos tuos. Non abnuitt Callion, non tam antiquitatis cupidus, quam captator communis auræ, & super omnia illud spectans, ut litteras non tam nescire videretur, quam temnere.

Igitur in publicum egressus, Præfecti ductu in porticum venit, ad cujus magnificas fores stabat Apollo laurea redimitus corona, & novem Musæ, quælibet suo insignis artificio. Mox, ut intravimus, miræ species objectæ sunt oculis nostris. Hercules, qualis primum servierat Eurystheo, ad interius limen stabat, velut ad custodiam, nec procul infelix Laocoon violati equi solvebat Palladi pœnas, & ejusdem Divæ fulmen detrudebat de scopulo temerariam Ajacis fiduciam. ibierat & aspera velut naturali scabitudine rupes, & tam artificiosi fluctus, ut timuerim calceos inundare. Erat etiam antiquissimæ aræ species, quam agebant Musis cum Hercule fuisse communem. Deinde ulterius progressis historiam parum vulgatam ostendit noster index, quæ tabulis pœne totum parietem impleverat. Erat autem exercituum species acriter dimicantium, quorum furor etiam in imaginibus legebatur, ac deinde Solem obducebant caliginosæ nubes, & fulminis violentia obruebat alterius partium ducem. Mox velut aperti campi vorago continuo flagrabat incendio, & qui modo victoria exultaverant, demittebant in terram languidos vultus, ac ipse Rex,  
instar

instar Agamemnonis, Iphigeniam lugentis, tristissimam frontem coccineo pallio obduxerat. Non temere omisit Callion rogare nostrum ducem, quorum illæ imagines essent. Sed ille, non aliud, inquit, asseverare possum, quam quod vetustissimi versus produnt, qui tabellarum margines implent. Sed truncata erat carminis series, ac imprimis exordium victoriæ vetustatis situs deleverat. Nondum tamen aboleverant vestigia, quibus litteras fuisse aureas deprehenderemus; nec tam vetustas exederat versus, quanquam erant supra omnem fidem antiqui, quam muliebres facies, quibus quotidie parentabatur optimo poetæ, cum aliud ejus monumentum ignoraretur. At Callion cum porticum oculis perlustrasset; eruditum hominem, cui Lucretio nomen, &, quod rarum est, simul in hac communi vita politum, ad se vocat, &, O mi, inquit, litterarum antistes, cur hos versus non tollis ex hac porticu, & vetustati tantum jus in ingenia negas: nempe potiora sunt Quiritum rudera, & inutilis effossi æris inscriptio delicatissimis carminibus præstat. Hæc cum festivius arridens dixisset, aditum fecit homini doctissimo disputandi de litteris, & pestilenti novitiorum genio, qui reviviscentem doctrinam immanifato sustulerunt. Itane inquit, vir maxime; nostra etiam amentia scholarum muris contineri non potuit, sed loquaci rumore pervasit ad magnatum domos, & litteratos omnes sub eodem crimine infamavit? absit hoc ab Apollinis familia, ut nemo Æsculapium norit. Quanquam hoc nec invitatus fateor: scholæ nostræ periculosis plenæ sunt scopulis; qui adolescentulorum industriam quotidie naufragio subvertunt. Et nisi multi genio meliori salutem deberent, etiam optimæ mentes incurrerent in illa vada, quæ insignis magistrorum imprudentia collegit. Tum Callion aperire tam funesti mali originem rogat, & authores perniciosissimæ sectæ, qui Musis, inquit, dedi ad omne supplicium debent. Mox ille, ut neminem de artificio suo loqui piguit, fusissime cœpit exponere.



Ponere initia pestilentissimi morbi, qui litteras pæne ad mortis necessitatem adigit.

Primum, inquit, barbaria patrum nostrorum temporibus omnem Musarum suavitatem excluderat. Non illi modo humaniores litteras neglexerant, sed etiam cum severior doctrina non credebant delicato sermoni convenire posse. Hinc peregrina dictio in Latinas invec̃ta scientias, & eloquentiæ inductū exilium, ut mirum sit, præstantia ingenia, quæ illis ætatibus floruerunt, optimorū lectione librorum temperare non potuisse hoc veluti odium in ingenuas politasque disciplinas. Nullibi carmen suis constabat partibus, nisi quod bisterq; in eandem syllabam caderet. Orationum periodos vel absona verborum geminatio vel inepta subtilitas implebat, & si qua occurrebant vel ex antiquis moribus, vel ex prisce ævi memoria, rebusque gestis, ea nunc omittebant fœdissima ignoratione, nunc ad sui seculi rationem detorta fictitiis sensibus corrumpebant. Hic Pyrrhum Achillis filium dicebat post expugnatum Ilium etiam Romana mœnia obsedisse: ille Scipionum & Censorinorum nomina ad dignitates referebat. Hic Falcidiam legem, quod instar falcis legata rescinderet, volebat appellatam. Alius Gentiles, quia nullis ceremoniis vero numini sacri, sic (ajebat) remanent, ut sunt geniti; aut Ethnicos dici, quia per Æthnam montem ferunt aditum patere ad subterranea supplicia, stultissima asseveratione scribebat. Nullus erat, quem vitia temporum non traherent, ut Ephesi natos diceres, ubi oportuit neminem excellere. Pueri his magistris usi nihil aliud discebant, quam non sapere. Nam & Græcis elementis ne quidem tenuiter imbuti, ut verborum monstra, quæ nova Philosophia invenit, capere poterant. statim ad insanas & æternas argumentationes traducti, omittebant omnem doctæ eloquentiæ curam.

Sed non potuit diutius teneri solertia humani ingenii, novandis rebus nata. Itaque initio hujus seculi emerferunt homines aliquot ex tantæ

noctis immanitate, pœne non alio quam naturæ suæ auspicio, statimque authores aliis extiterunt, ut foedissimam imperitiam è Repub. litteraria tollerent. Verum ingentium malorum remedia nunquam suis periculis carent. Orbem, qui suo malo obdormiverat, ipsa medicina pœne obruit. Etenim homines supra cæteros docti, quamvis erant hujusmodi, ut multa non viderent, velut in ipso scientiæ orientis diluculo, tamen ambitione cœci, nominis famam petierunt ab indignis & inanibus rebus. Igitur hi deridenda cæterorum barbarie volumina implebant, illi novandis omnibus exercebant impigras mentes, & ut aliquid sapuisse dicerentur, vertebant scientiarum partes, quæcumque rudi patrum seculo placuissent: adeo ut disciplinarum ratio diversissimas in partes distincta sit, & ubique male sentientium sectas infelix seculi genius induxerit.

Successit huic malo crudelior pestis, & luctuosa ingeniorum funera edidit. Iacebant passim libri squalidissimo situ, & ipse pulvis meliorum authorum partem exederat. Itaque necessarium videbatur, ut homines docti tollerent maculas, quas vel librarii, vel tempora inusserant, tum diversorum voluminum lectione, tum antiquitatis peritia, etiam interdum divinando. Quis deinde ad hoc studium se non accinxit? quis provinciam, quam permitti non oportuit, nisi summa auctoritate viris, privatis auspiciis non suscepit? Quis se in virum non evasisse credit, quis non æternitati litasse, cui stylus hæc vocabula permiserit, *deleo, interpungo, corrigo, manuscripti sic habent, hoc ab antiquo ritu, & cætera ineptissimæ ambitionis verba?* Cum tamen hos etiam qui plus in litteris sapiunt, sæpe justissimus æmulum risus suspenderit. Quam invisis moribus, qui ubique pœne *invisitata* in *invisitata* permutat, qui non fert volumina, si curari, & non durari vestes dicant; *Nam ducunt taceas.* Quorum ille ad Prætorem curare, non curare, legit; alter, quamvis profundissimæ doctrinæ, tamen non credit putea dici. Hic est ille scopolus,

pulus, quem vel curiosi homines vel incauti, raro illæsis navibus prætermittunt; seu mavis, hoc pestiferum sydus illuxit, quo surgentes litteræ nondum adulta stirpe exaruerunt. Etenim ingenia ubi sese applicuerunt huic studio, spe maxima hanc Rempub. fraudant, & inutili labore pallida, neque veræ unquam gloriæ, neque suavioris litteraturæ gustum sentiunt. O miseram juventutem, quæ vanis exercita laboribus, id tantum apud doctores consequeris, ut ne quidem latine dicentem intelligat senex Numa, nisi divinantis Egeriæ vaticinia consulat. Nam qui antiquitatem è tenebris eruunt, ipsi tantis tenebris onerant stultissimam orationem, ut id unum quæsiisse videantur, Pithia vate, aut Carmenta, obscurius loqui. Neque aliud jam in scholis detonant, quam num in urbe iustitia, vel extra pomœria humanitas, olim carnificibus habitationes decerneret? Quis meretriciis titulis color, quæ fornicibus angustiae essent? Vbi sacrum urinarium, quo patres conscripti vesicam exonerarent? denique quot fibulis staret vestis, quot gradibus tutelæ conscenderent? In his nugis non modo ipsi consumunt optimos dies, sed commissos etiam industriæ suæ adolescentes versant. Quis ad politum versum auditorem accendit? Quis sæpius orationem acrioris animi impetu exaratam reposcit, quam incertum & inutilem Italiæ morem, tam extra videndi consuetudinem hodie positum, quam à loquendi usu ac ratione semotum? Etenim si delicati sermonis formula, si tenera & auribus apta oratio, ipsis legentibus occurrit, id faciunt quod ægri, qui corruptis sensibus epularum suavitatem averfantur. Quæ antiqua, quæ solis tenebris nobilea, miserrimis laboribus colligunt, quæ subinde redeunt in animum, ac veluti stitilum trahunt, cum ipsi ad scribendi studium effertur. Irasci etiam superbe nugatores audeant, & qui scriptiones eorum vix capiunt, è doctis eximere: quasi vitio legentium fiat, ut qui Marones, Statios, Lucanos capiunt, ii ex eorum chartis nihil amplius, quàm ex dissipatis Sybillæ foliis discant.

At vero tam subtiles prisci ævi indagatores, ut quotidianum vitæ ac judiciorum morem, dii boni, ignorant! ut in hominum exercitatorum cœtu foede obmutescunt, qui cum solis priscis & sapere didicerunt, & loqui. Sedenim, inquiunt, qui hæc nesciet, hærebit ubique in meliorum authorum scriptis, ubique illi oborientur tenebræ, velut erranti per ignotam regionem. Ego vero nihil damno curiosum studium, ac quantum vultis utile, dummodo hæc sobrie in altioris usum scientiæ assumas, neque te senium in sternenda ad scientias via occupet.

Certe si in authorum scriptis, per tot diffusis volumina, est aliquid ignorandum, malo pauculos mores negligere, & verba pæne cum hoc orbe nata: quam ut consumpto in iis sæculo amœnissimos vel sermonis vel doctrinæ fontes omittam.

Sed ne omnes pro Catilina steterint, & Consuli Tullio bellum indixerint, reperti sunt, qui contrariis machinis Rempublicam nostram evertant. Iis nihil purum aut syncerum, quod ex Cicerone non hauserint, nulla periodus proba, quæ numerosa verborum non tumeat; digni mediis-fidiis homines, qui semper in Tulliano vivant. Hi ut sunt plerumque eruditionis reconditæ expertes, vel lectione Poëtarum, quos tamen interius nunquam gustant, auditores detinent; vel immanibus Rhetoricorum præceptis obruunt, quibus nec uti juvenus possit, nec ipse unquam Tullius magis ad usum invenit, quam ad celebritatem nominis, ac posterorum famam. Stilus plerumque in hominibus illis non gravis ac nervosus, sed vanus & inanis, nullum in verbis iudicium; nullum in oratione acumen. Æternæ figuræ altis & turgidis dictionibus nixæ. Nunquam simplex oratio & verba in suum sensum eleganter fluentia, veluti errarent in montibus, ab elata Metaphora in aliam saltitant. Ubique fulmini, tempestati, fluctibus inveniunt locum. Picas diceret, quibus planum vestigium Natura interdixit: ita nunquam suis & æqualibus verbis loquentes ad  
diversa

diversa dictionum prodigia volitant, quo illos institutio, & inopis ingenii sterilitas cogit.

Quid igitur? quæritis quibus præceptis imbui adolescentes velim? Non sum tanti, ut Apollinis familia ad præscriptum meum vivat. Sed tamen si fidei meæ committeretur disciplina tyronum. primum prætextatæ pueritiæ non pateret virilis noster campus: deinde delectum ingeniorum haberem, ut, quoniam non omnibus eandem vim natura insevit, quam cuique partem studiosus impetus deligeret, ad hanc non horrerer modo propensam juventutem, sed curiose adigerem. Pueros, inquam, non admitterem ad seria, neque misceri nucum putamina paterer cum laureis bacis. Quoniam intempestiva in ea ætate studia crescentes primum vires, & vixdum coagulati cerebri robur solvunt, ut juvenus deinde proVectior nec integram valetudinem ad litteras afferat, nec vividi acumen ingenii præmaturis olim laboribus vigiliisque retusum. Nam quos ante ætatem viros cernimus, & scientias ad suorum mensium calculum numerantes, ii vel cito maturi occidant necesse est, vel ut in eam stultitiam quam infantes declinarunt, senes incurrant. Sed ut illis qui ad fidicinam designantur, jam in ipsis cunis datur plectrū, & laceratæ citharæ nondum prorsus soluta compages: ut infantibus ipsa lux non sit antiquior, quam paternæ artis rudimentum: ita nec pueris, quos parentum vota sacrario litterarum destinant, jam à prima ætate chartas ac libros aufero, ea tamen cautione, ut ætatulæ tam debili consentanea discant, nec urgeantur severa magistrorum castigatione, vel ipsi sua sponte ad studia incitati noxiæ temeritati permittantur. Nam & alternis jocis, & omni exercitatione, quæ illos annos capit, refrænandus est nocentissimus cursus; ac omnia maxime præmiorum fucō tegenda sunt, ne initiorum acerbitas desiccata ingenia deterreat. In primis historiæ inserantur etiam dormientium manibus, & quoniam vel inanes fabulæ infantium animos capiunt, assidue imbuantur moni-

mentis antiqui seculi ; ut memoria , quæ in illis est constantissima, crescentibus subinde annis pulcherrimam rerum variarum cognitionem emergenti iudicio tradat.

Hic elementis instructus adolescens, ut primum ingrata Romanæ linguæ initia evasit, statim ad amœnitatem Ciceronis traducendus est. Selecti quotidie varietatem sermonis præceptoribus reddat ; stilum vix dimittat è manibus , & scribendi assiduitate rem omnium difficillimam in mitiorem cogat naturam: veluti feras cernimus sæpius manu plausas saltus & nemora dediscere. Mox in omnes passim authores evagetur licentius liberum studium : nec Petronium , Livium, Sallustium, Cæsarem, Terentium, Curtium pudeat miscuisse Ciceronianæ dictioni; Tum etiam Plautus, Varro, Lucretius , & ejusmodi doctrinæ notabiles assumantur ; & è novis hominibus ii tantum, qui hos antiquitatis principes Pallade magis propitia coluerunt. Nec difficilis est delectus. Vix quatuor hoc seculo supra invidiam scripsere, quos adolescenti ipsa facile fama, & omnium commendatio prodeat.

Sed expectatis fortasse ut Poëtam instruam. Næ ego tam male de juventute mereri nolo , ut illis sternam iter ad immane præcipitium, & notabilem multorum funere voraginem. Pauci enim hoc Parnassi iter ingressi sunt, qui ex alterutro montis vertice non deciderent, nunc in humillimos contemptus , aut foedam amentię famam. Parcite, Pierides ; non vos laceſso ; nec vestra injuria tam miseri casus affligunt inconsultos. Sibi quisque debet hanc calamitatem , & dum ab Apolline accessi credit in præſagum montem , non advertit pro deo, vesanam esse libidinem, & imprudentis adolescentię æstum, quem intemperanter exaudit. Etenim quoniam hoc est inutile studium, & ad solam delicati animi voluptatem faciens , non potest non explodi è doctorum cœtibus, nisi quando artificii elegantia artis vanitatem excusat. Scilicet velut extrema convivia bellariorum ap-

positu

positu luxuriant, & suaviora condimenta reparant famem absumptam; ita solidioribus scientiis saturati non capientur hoc quantum vultis divino Poëtarum cibo, nisi gustum jam languentem excellens voluptas excitet. Ut non tam artem mihi mutasse videatur, quam artis materiam, is qui à culina prodiens primus Olympica versibus extulit. Certe si quis in Parnassi verticem incolumis ascendit, non nego, quin ut meditullium terrarum obtinet, ita illustri fama cognoscatur ab omnibus gentibus humanitate aliqua politis. Sed quam hoc rarum fuit, non dicam in una ætate aut populo, verum in omni memoria atque gente! Mihi profecto nunquam tot Poëtas dabit, quot seculis latinitas floruit. Etenim tantis difficultatibus horret hæc semita, ut faciliore studio vel Iuris prudentiam, vel Eloquentiam demereatur adolescens, quam Nympham versuum præsidem, quæ ut sit faventissima, plerumque gloriam æterna mendicitate vendit.

Verum in hac parte præceptores peccant, qui velut æquali studio utrumq; campum adolescentibus proponunt, ut & insudent versibus, & solutiores periodos libero spiritu quadrent. Nimirum quoniam diversis motibus agitur animus, vel ab Eloquentia inspiratus, vel à Poësi, non est possibile, tantam fieri mentis immutationem, ut statim abeat in diversos habitus, & ad voluntatis nutum dissimillimis caloribus æstuet. Nam in insaniam versuum aptanti strictæ mentis aciem, deponendus est prius Orator, & cum studio exuendus habitus eloquentiæ, quem aliquot paulo ante vigiliis emerat: & rursus omittenda est Cithara ingredienti Rhetoricam, & sedandus tanto labore furor, quanto quæsitus ac expressus præfagientem animam afflaverat. Sic in utroque studio assiduus transfuga, non jam procos instar Ithacæ mulieris orsa destructaque in singulos diestela, sed fortunam tuam geniumque fraudabis. Quis majestatem eloquentiæ tam magnifice sustinuit, quam qui arma togæ cedere jussit; quis porro ine-



ptior Poëta, aut quis asperius syllabas in numeros coëgit? Nec meliori genio ad forum usus Virgilius, quam Tullius ad carmen, invenisset mehercule qui postremæ voluntati paruisent officiosos amicos, nisi Æneam suam non magis navibus aut castris, quam verborum numeris includens, Romanapæne ad lyram mœnia novus Amphion condidisset.

Igitur duo sunt tantū, quæ Poëtarum exilium à scholis, quæ effingo, deprecantur. Primum, ut animus insolentium avidus aliquando recedat à quotidiano pastu, ac veluti in Hybla, aut vernantibus Ætnæ vallibus, mirabili flosculorum varietate fatigatos spiritus levet. Deinde, ut Poëtæ, qui quam rari sunt, tam magnis viguerunt ingeniis, attollant sensuum subtilitatem, & acuminibus innumeris, tanquam telorum impetu, legentem sic feriant, ut excitatus animus se sentiat.

Sed ne illos, qui primi dicendi artifices fuerunt, omittam, nolo squalere Græciam situ barbaro, vel ad pompam subornari animum aliquot sententiarum jactatione atque fucō, qui in hujus calliditate seculi nisi rudibus ac imperitis hominibus non imponet. Sed artes illæ hominum, qui non præclarius vixere quam loquuti sunt, tum informabunt ad eloquentiam animum mille orationum flosculis, tum abundantem rerum copiam suggerent, ne sola verborum majestate fulta oratio, tanquam destitutum nervis corpus, concidat.

Verum his querelis præceptisque fortassis erat tempus paulo supra hanc ætatem. Nunc inani spe fallo justissimos metus, & veluti nondum fractis tabulis de litterarum salute disputo. Quid autem apud vos loqui timeam, qui certe non estis Musarum hæredes? Iam in extremis scientiæ agunt, & cogitant de discessu. Ætas jam grandior verendæ illarum senectuti terminos scripsit. Etenim hoc omni seculo, quamvis per diversas injurias, floruerunt disciplinæ, & per omnes veluti ætates actæ processerunt in ultimam senectutem. Habent enim suos dies non literæ tantum, sed & mores, & lin-  
guæ,

guæ, definiuntur suis temporibus, & quod est amplius, regna ipsa & civitates non effugiunt mortalitatem. Nihil detrahendum est summorum viro-  
rum gloriæ. Quamquam plerumque in docendo peccatum sit, tamen extiterunt hæc ætate passim clarissima lumina quæ omnem scientiarum partem exactissime eruerunt de miserrima nocte. Nunc illa ingeniorum fertilitas paulatim excidit, neque ulla virgulta surgunt, quæ decidentium truncorū majestatem sustineant. Quis ad Themidem familiaris admittitur? cui hodie juniorum Sophia, cui Cælestis scientia, cui ipsa Eloquentia, cui Poësis, spes suas demandavit? Qui literarum famam pondusque sustinent, præter pauculos senes, qui velut familiaræ extremi Musarum nomina atque insignia in tumulos trahent? Nihil erat, cur tam modo acriter avocarem à Poësi juventutem, jam satis humilis nihil spirat excelsum. Ac præterea nec laboriosæ arti honos est, nec ulli prope genti cum ulla scientia, ac præcipue cum Parnasso, convenit. Nam & callida Ausonicæ gentis crudelitas ex suis finibus exterminavit Apollinem, ubi stylus non tam rubigine maculosus, quam sanguine sævius hostes perfodit, quam omnis veterum oratorum acerbitas. Neque Ibericæ dictionis tardum pondus, neque dura Germanorum asperitas Musis apud se locum fecit. Tentaverant etiam Sauromatas & Polonos; sed in ipso limine tenellæ virgines secularibus nivibus inhorruerunt. Nam quid de Gallia dicam, quæ optimum Poëtarum vix tenui pulvere semisepultum non erubescit; quæ inter tot substructionum minas, & vastissimas templorum moles, non magis suo quam Apollinis alumno rudem lapidem negat.

Cum hæc tristissima voce pronunciaffet, cœpit intueri, num aliquis in Musarum funere lachrymas mitteret. Cumque aliquantum, longæ orationis tædio, frontes nostræ horruissent, existimavit tanta declamandi peritia moveri. Cæterum & ipse, inquit, aliquando Musis grande votum feci, si aspirassent tendenti ad carminis gravitatem, mihi-

que necessitatem attulerunt sua benignitate exsolvendipromissi. Nam plantarum ingenia & virtutes exorsus sum, stilo, nisi me fallebant amicorum suffragia, ut non altissimo, ita ad materiam non inepto, & aliquantum æquabili. Hic non nihil cunctatus. ut rogaretur aliquos versus expromere; cum nemo id faceret, ipse sua sponte poemata in hunc modum recitavit.

**G**Ermina, qua late, primum surgentibus arvis,  
 Vndantem vestitis humum, cum pallida colo  
 Cedit hyems, fessaque inspirant mollius aura,  
 Vos mihi, qua primis tellus alimenta ministrat  
 Imbribus, unde novo latentur jugera vere,  
 Dicite, qua succis felicibus augeat annos,  
 Qua fera tartareas virtus animaverit herbas.  
 Vos mihi natura penetralia pandite vestra.  
 Et quo quisque modo divumque, hominumque recentes  
 Induerit truncos; quis origine truncus ab ipsa  
 Mitibus aternas reparavit solibus umbras.  
 Sic vos humenti sic aureus evocet aura  
 Dux Amphionidum: nec vos aut Seirius urat.  
 Aut Nothus, & fragiles rumpant mala nubila cunimos  
 Viderat athereos late gemmantibus ignes  
 Collucere polis; & toto sydera mundo,  
 Alma parens tellus, tum qua curvamina flectis  
 Solis iter, totum distinguens circulus annum,  
 Tum qua fixa sibi posuere cubilia stella,  
 Et qua multiplici properant, unaque recedunt  
 Astra via, semperque suis sibi cur sibus obstant.  
 Ipsa sinus vacuos, & inertisqualida cultu  
 Brachia protendens nudosque ad sydera vultus,  
 Naturam alloquitur supplex. Quid me optima, dixit,  
 Æternum cessare jubes, & in ocia solvi?  
 En forer assiduis evolvere monstra laborat  
 Fluctibus, & tantos numerat jam Thethys alumnos,  
 Najadaque, Glaucumque vehens, divosque bisformes,  
 Ipsa, pudet, vidi liquidum per inane volucres  
 Deferri, & nullos desertos aere calles,  
 Ecce sui caelo factus, & nocte cornusca  
 Tot voluisse faces, tot lumina ferre superbit.  
 Sola vaco. Mæstis meditantem plura querellis

*Respicit,*

*Respicit, & blando vultu Natura serenat.*  
*Tunc erat hyberno qualis sub frigore nimbus*  
*Cogitur, & nivea candescit mole pruina.*  
*Talis humus; sic illa rigens sic orbe nivali*  
*Pendebat, gelido nonnunquam interluta Nereus.*  
*Hic primum ingentes aperit Natura recessus*  
*Visceraque, arentesque sinus, venaque capaces.*  
*Atque illi tacitum lambendo serpere pantum*  
*Imperat, inde aliis iterum prorumpere terris.*  
*Iam sale mutato, ripisque minoribus actum.*  
*Illic & totoliquidum mox aera cælo*  
*Ire jubet, gelidaque domus umbrante caverna*  
*Iam fieri fontes, purisque excurrere campis.*  
*Vtque satis pingui maduerunt jugera limo,*  
*Nec latebris hiat ulla sitis, tum pectore toto*  
*Incubuit Titan, facundaque limina misit.*  
*Protinus innumero tenues examine vulmi*  
*Prorupere solo. Pars mollibus humida ripis*  
*Tollitur, illa jugis, hac valles induit imas*  
*Qualis inest cælo facies, cum luce corusca.*  
*Pallida purpureos succendunt sydera vultus.*  
*Primus ab Eois, gelida mox alter ab Arcto,*  
*Vnus ab Occiduis, alter micat: ignis ab Austris.*  
*Sic fæta telluris honos, nunc pectora cernit:*  
*Nunc virides crevisse humeros, sætisque recenti*  
*Exultat, lateque suos miratur honores.*

Hæc ego cum scripsssem, opusque universum  
 digererem in aliquot libellos, matura pœnitentia  
 conatum prævertit, & aliquid ultra lyram sapere  
 iussit.

Diu erat quod mirabar Callioni patientiam du-  
 rare cum molestissimo præceptore. Nam & audi-  
 tores aliquot, qui paulatim accesserant ad loquen-  
 tis tergum, tandem se ab infinita oratione subdu-  
 xerant: cum opportune nunciatur Callioni, in-  
 structos ad limen procures stare, quibus ipse ad  
 Labetrum duceretur. Igitur valedixit magistro,  
 doctrinæ utilitatem auditorum tædio corrumpen-  
 ti, juravitque sibi nunquam suavius fuisse.

At ego, dum Callion in interiori Labetri sacra-  
 rio penetrat, notavi forte duos vicinæ gentis ho-  
 mines

mines inter se satis acriter disputantes; quibus auditorem me præbui, ratus illos de Illo nuper expugnato, aut de ingenti miraculo loqui: quod diversarum gentium studia sic à Neptuno conciliata sint, ut Iupiter expugnantibus cœlorum motibus conspirantem ordinem & concentus pæne musicos instruxerit: quodque Iuvernæ lyra, ubi leopardis & leonibus convenit, augustissimum ejusdem Neptuni numen securo carmine adoravit. Erat autem inter ipsos quæstio de quercinis & faginis tabulis, utra materies esset ad quadra præstantior: neque agrestes interim avellanas dentibus ad hoc exercitatis segnius moliebantur. Sequutus deinde intrantes cœnaculum, ructibus quater afflatus, excepi prope redeuntem jentaculi cibum, & nescio quo fumo perstrictus, parum fuit ut olidi convivii conspectum sustinere non possem. Igitur ægra corpora medicamentis levare credebam: quod amplius mihi persuasit panis tam modicus illatus in mensam, ut ad uncias crederem datum, cum subito pelvis assa bubula cumulata, sic ut quatuor ferentes deprimeret, ipsam pæne mensam fregit. Et ne esset Libero Vulcanoque rixandum, quis diluendis poculis invocaretur, non ea lymphæ mixtura temperabant, sed Indicæ cannæ succum infundebant in merum, & vacuata ad umbilicum pocula sic agebant, ut semper grandior latage expectaret secundam affusionem. Interim plaudebat Labetri familia, stupebatque hanc veluti magnanimitatem edendi: gens plerumque magnorum non capax, & velut patria gravitate depressa in humilitatem cogitationum: cum tamen exurgit, nulli cedens capacitate magnæ mentis. Quoniam ingentibus vitiis magnæ virtutes parum absunt.

Dum hæc agerentur, interim improvise ad latus accessit suavissimus Percas, & Quamdiu est, inquit, quod te quæro; non fuit locus in hac domo, quem bis omiserim scrutari. Nam sub hoc medicaminum fumo non credebam delicatum hominem vivere posse. Cum quærerem quid novi contigisset;

tigisset? æquissimus, inquit, conditioni tuæ dominus te in vicarium suæ dignitatis assumit. Mox ut iussi missos assuetos sales faceret, ipse protractum extra coenaculum manuprehendit: & scis, inquit, quo dominus viam destinaverit? Certe, inquam ego, ultra terminos montium, qui festinatis nivibus æternitatem hyemis continuant. Tum ille, tibi vero munus, inquit, præeundi decrevit, tam ut rustica diversoria genius humanitatis tuæ mitiget, tum ut municipia moneantur, ne illustri concursu tanti hominis fraudent adventum. Nam de tuis moribus tam apte ad fidem dixi, ut te nihil jam credat esse prudentius. His dictis ad Callionem perduxit, qui quam plurimis oneratum mandatis dimittit in proximam urbem iussitque ut expedito progressus itinere diversitores instruerem in nostræ humanitatis leges; cum ecce molienti mihi per compositos sedilium gradus adscensum in prægrandem equum, attulit rusticus quidam à Fibullio literas quibus urgebat ut definirem pactis nuptiis certum diem: quoniam, inquebat, multis in eandem spem erectis præmia meæ sanitatis in securo tibi esse ardentissime volo.

Interrogavi nuncium de Fibullii valetudine, ac deinde de muliere nostra: quam cum illi descripsissem, sic ut internosceret laudatissimos vultus: bene, inquit, & illa habet, nisi quod alvi pondus excrescens, marcidi oris purpuram, aliquantulum extinxit. Tum ego, cuius assueta cubili fastidiosum morbum contraxisset, interrogo. Certe, inquit rusticus, ferunt jam sextum ex Fibullio peperisse, pudicitia tamen tam notabili, ut nullis pervulgaverit corpus, nisi magnis hominibus, secreto etiam sua furta celantibus. Non potui erumpentem impetum premere, quin animum in Fibullii poenas elatum in epistolam effunderem. Itaque bisterque dissectam pedibus in terram deprimo, illud intra me repetens, magis optabile esse, ut ex Libitinæ templo mihi funeris apparatus prodeat quam turpissima conjux, & cum iracundia prudentiam extinxisset, ne relato quidem verbo ad-

missis

missis frænis in provinciam meam iter cepi, quod non potuit tam funesto exordio non luctuosissimum esse.

Nam cum octiduum consumpsissem inter gentes utcunque non barbaras, tandem confragosis exceptus montibus adverti feros homines cum locorum difficultate consentire. Etenim cum errores viarum timerem, vel malitioso silentio negligebant orantem, vel ipsa vocis petulantia non tam expediebant ignorantiam, quam perfidiosus ambagibus laceffebant. Deinde in hospitium perductus, cum fames urgeret, quanta non vindicavit excisam Cereris quercum, & cænulam meam diligentius curarem, rogo, inquam, amici, cur ignis non excitatur? jam nox appetit, & nondum culinæ fumus dissipavit coëuntis aquæ gelu. Num hodie cibi in hac urbe ferias agunt? Provocati illi inassueta libertate iniquis oculis aspexerunt, risuque inter sese excitato inconditum sustulere clamorem. Tum anus fœdissimo squalore inculta processit, vestemque altius præcingens, postquam lippitudinem oculorum multoties manu permulsi, ad cameræ altitudinem exiguæ sellæ ascensu admota est: ac laridum spississimo vestitum fumo, ense qui nisi duabus manibus non rotatur, artificiose præcidit. Prunis deinde, quas subinde folles excitaverant, imponit, & ut syncerum cibum daret, nihil ex eo vel radentis cultelli acie, vel aqua mundatrice deterfit. Non ferebat stomachus nondum ingesti cibi tam deformem aspectum. Itaque panem pænelapideum, & qui incorruptus navigaret, in manus sumo: ac ne urgeret ad cœnam, tanquam videndæ urbis avidus, ad exterius limen consisto.

*Hic aliud majus misero, multoque tremendum*

*Objicitur magis, atque improvida pectora turbat.*

Stabat enim ad vicini ostiolum bos, tum diffusa cornuum proceritate, tum eximia corporis magnitudine præstans, quam ipse dominus in tripodem sedens fœdissime emulgebat, cantu etiam quodammodo triti uberis liberalitatem provo-

cans.



cans. Erat illius nepos, quem tam magnifice suo pridem Mausolæo ajunt Lusitaniam condidisse. Non tuli hanc virilis conditionis infamiam, & velut Basiliana lapidatio mea bene cessisset, raptim exiguam molem in spurcissimum caput misi. Sed incidit lapis in articulum bovis, qui cum tibia superiorem partem tenacitate nervi ligat; & animal cæstri suspicione motum emulgentis pectus excussissimo calce pertudit, ac per totam urbem disjecta cervice decurrit; sicut Ium credimus admoto Iunonis stimulo non reliquisse in orbe partem, quam furiosa præcipitatione non adiret. Recipiebam me timidissimis passibus in interiorum domum, cum ipsa familia jacentis hominis clamorem exaudit, concursuque viciniae facto unus alium, ut quisque postremus advenerat; de facinoris authore rogabant. Iamque omnibus in eam mentem versis, ut mero casu lascivientem vaccam crederent calcem in dominum rejecisse, nequissimus puer, qui me forte notaverat cum saxum emitterem, peregrinus, inquit, quid ad liliū hospitatur, mansuetum animal emisso saxo concitavit. Tum omnes impetu facto me jam in mortem intentum diripiunt. Et quanquam puerilis imbecillitas testimonio fidem tollebat, tamen apud barbaros tantierat externum hominem laceßere, ut etiam timerent, ne innocentia susciperet defensionem meam. Nec diu luctatus cum furentium vocibus, quia proponebantur tormenta, id facinus, nequaquam ut arbitrabar in expiabile, confessus sum: ratus nihil severius decreturos in vulnere bovis, quam quod in Cygni cædem Britannia servat; ubi expiatur nocens tanto frumenti cumulo, quanto appensam avem condat. At illi propria voce damnatum, quoniam ad supplicii spectaculum lux jam in tenebris vergens erat angustior, in carcerem ipsa cruce deteriorem mittunt. Vbi tamen somni necessitas gravitatem malorum obruit, & lento sopore non tam solvit solitudinē, quam ad alias curas transtulit: seu me quietum esse nulla fata volebant, sive meam contumaciam,

quod

quod in speluncam non redissem, Dione ulcisceretur, quam etiam recentissimo exemplo sævire videmus, ut qui aliorum matrimoniis moram fecerint, ipsi se intempestivo conjugio implicant. Videbatur enim mihi adstare mulier illa quæ in spelunca suo pudore impetum meum vicerat, & trucibus oculis inspectare jacentē; cumque severissimis verbis diu detonasset, tandem in hæc verba perorare: Sed ne quid dubites de Numinum ira, illas poenas dabis, quas ego, quæ tuo sum scelere violata, non exultem magis quam horream, tu exilio, tu cruci, tu ferro destinatus es, tu amicissimorum odio flagrabis, tua denique supplicia nihil morabitur, nisi forte ut in poenam diutius dures. Nec me ut veneficam aut profligati pudoris foeminam maledicas. Non enim te arcessissem per Veliam, nisi amarem verecundiam pudoris tui, nec anus quam vidisti me unquam maleficis immiscuit sacris; sed ut ferme mos est nobilium puellarum, in fontibus tantum sortibus, & ut appellamus, albis, instruxit. Et tamen traduxisti apud familiares tuos meū nomē: tu me inter veneficas, nequissimē, tu me inter solutiores numerasti.

Cum hæc dixisset, tanto metu cohorrui, ut ipsa membrorum tripidatio soporem discusserit: Et quoniam somnii piaculum gelida lustrare non poteram, oculos saliva linii, cum nocturni horrore prodigii fascinationis periculum expavescerem.

Quid interim facerem? quæ me artes hoc specu eximerent? Non erat culina, quæ me vimine ac cratibus velut antiquo clypeo circumtectum celatumque reciperet; non saltatrix custodia, quam per lulum fallerem: non etiam Medicus, cujus olidum medicamentum sic efferrem, ut ipse protecta fronte naribusque obductis, aliorum etiam à me vultus arcerem. Lux deinde illustrior cum nocturnæ imaginis terrorem diluisset, carceris mei fores tumultus formidabilis fregit, & intromissi satellites ipsa barba sine armis horribiles moriendi necessitatem denunciant: simulque de funesta domo erutum in vastam ac inanem aream pro-  
ducunt.

ducunt. Tum apppositi custodes etiam diurna officia non omittebant. Hic reclinata ad parietem hasta centonem multiplici colore ornabat: ille muliebre cingulum corio nondum abrasis pilis bene lævo aptabat, & gemino plumbatorum clavorum ordine distinguebat: pars denique filum picis tenacitate induebant, pars calceis prope cubitalibus densissimam ferri seriem supponebant: cum interim mihi succurrit meo elypeo, id est, Callionis nomine, uti. Sed nullus, opinor, deorum extra cœlum suum regnat. Id ipsum tumultuantes acius incitavit, & impune proclamant, licebit uni genti apud nos esse injuriæ? & alienam timebimus nobilitatem, qui gentilem projecimus? nam quid apud nos ille populus regnabit, qui extra patrios fines ubi pedem in suo ponat non habet? num temeraria juvenus atque levis, quæ ineptis clamoribus, quæ affectata tripudiorum lascivia, ubique insolentem audaciam pro vivida indole jactat, erit potior severitate nostrarum legum, & imperii majestate?

Inter has tumultuantium voces alius subinde clamor exortus est. Nam adducebatur famosissimus latro, qui pressi lactis mensuras aliquot demerserat in profundæ cellæ noctem, & capellam foetu ac ubere notabilem in solitarie rupis secretum abvexerat. Igitur adhuc incertus ad laqueum, an ad ignem damnaretur, ad meum latus sese applicuit; cum ex alia parte mantilia extensissimam instruxerant mensam, & piperatus panis, vitellis artificiose mixtis, abunde allatus est, ac deinde bubula ad fumum cocta, piscisque non garo vel gutta notabilis, sed creberrimum zinziber cum mixtura salis condiebat humiditatem aquaticæ naturæ, & ad genium regionis acuebat inexpugnabilem sitim. Tum capacissimæ amphoræ sexdecim velut in convivii præsidium constitutæ, utramque mensæ oram æquali pondere librabant. Erat dignum Bromio sacrum, quem rerum suarum auspici venerantur, non juvenē tantum sed qualem patris foemina reddidit: credo quia nunquam  
F apud

apud illos Nymphis ac fontibus nutriciis crevit.

Cum hæc omnia mirarer, liCTOR ejus manus jam spectabat jugulum meum, me ad postremas dapes invitat. Ego vero dum inutilem in damnatos humanitatem sperno, video supplicii mei socium jam honoratissimo loco sedisse, ac plurimis passim ineuntibus convivium, mihi tamen in secundis servatam esse sedem. Igitur velut in Thraciam devenissem, ubi convivarum aliquis cæterorum risum suo suspendio excitat, ad mensam moriturus accessi, longoq; defixus obtutu illud tandem mecum cogitare cœpi, si præteritæ noctis somnium non imprudens casus, sed vel iratæ mulieris sortes, vel præfagientis animi divina vis obtulisset, non posse tam celeri fato mea exire supplicia. Vbi enim exilium, ubi amicorum odia, ubi minæ omnes, quæ vix possint tanto tempore recitari, quanto ad destinatam hodie mortem satis esset?

His argumentis, & quodammodo spe futurorum suppliciorum refectus, ac præterea quod nebulosus horror, qui plerumque morituros terret, animum non obtenebrabat, concipiebam secretissima vota, & ab irata fortuna provocabam. At vero poenæ meæ miserrimus comes, qui Mycerini æmulus vitam in mortis decretæ solatium oblectabat, cum jam duodecies propinantibus mirabili fortitudine respondisset, tandem querelis, mox fletibus prosequabatur suam calamitatem, & alternis admittebat miserantium voces. Cumque identidem profuso fletu repeteret, id se unum mirari, quod recentis triumphi memoria non obstitisset severitati judicantium, ausus sum ab eo petere qui mihi proximus confederat, quo ille prælio triumphare meruisset? nuper, inquit, cum aliis missus, qui renovarent clarissimum foedus, certantibus de bibendi peritia populis, ipse tres congios præter omnes exhausit; cottabeque accepto illustrem familiam ditavit. Iuvit me quod tam funesto loco eram: alioqui risum nunquam tenuissem in tam elegantis certaminis memoria,

& ul-

& ulciscenda severius culpa obligassem ignorantem animum, quam si bovem iterum ad insaniam provocassem.

Iam erat in extremo convivium, cum iterum ad intempestiva pocula provocati, tandem ad magistratum ducimur, qui parum, ut in reprovisa, moratus, utrumque ad laqueum damnat; conversusque ad participem meæ sortis, tu, inquit, solis expiabile flammis nefas admiseras: Sed quoniam crux huic misero fuit erigenda, malui utrumque brevi compendio puniri, quam in totum diem tenere lictores. Tum injecta manibus vincula; collo etiam circumdati funes, & utrique sacerorum minister datus, qui æternitatis admone-ret. Si mihi creditis, non gravius dolebam quam vel Pedonis ludibrio fatigatus, vel iniquo Basilianorum judicio pressus. Non enim lætitiā haurimus aut mærorem ad successus vel miseriæ modum, sed angustię pectoris nostri sæpe minoribus malis sic implentur, ut ad sævissima fortunæ tela graviolem sensum non admittant. Eram etiam, nisi me fallo, vultu gravi, neque malis dejecto, cum saltem in extremis constantiæ laudem quærerem.

*Assyrius veluti red vivo funere Phœnix*

*Hæres ipse sui, cum jam natalia busta*

*Conglomerans carpit postremo nobilia cursu,*

*Magnanima stipantur aves, Regemque verendum*

*Sollicita observant, & fati in limine credunt*

*Altius ire sibi. Collo jam pulchrius aurum,*

*Et mox arsuris stat major gratia pennis.*

Interim ad infaustam arborem celeberrimo conventu producti, & infamibus appliciti scalis, reputabamus proximæ mortis horrorem, cum tacitis mecum votis sic loquerer; O si istæ minæ sanctissimam Neptuni iram imitentur, quem ovatio supra triumphum delectat! qui & justitiæ dedit capitales scenas erigi, & eas incruentas esse suæ naturæ concessit. Tum lictores gentilem primo suum supplicio admovent, & in tantam altitudinem provectum, ut vertice tangeret fastigium

investus est. Et quoniam viles erant, & inculti, cogitabat severe agere, ac orationi auctoritatem per audaciam facere. Sed reputato dedecore, si exitum conatus non haberet, suppressit erumpentem impetum, & peto, inquit, ne sanctissimū fœdus in vilis persona mancipii cadat. Quæ ista vis, cives optimi? Quo abiit ingenerata his terris benignitas? Neque innocentem esse quem damnavistis, prædico. Absit judiciis vestris detraham integritatis famam. At certe reservare potuistis famuli pœnam in adventum domini jam stantis ad mœnia vestra.

Tum oravit, ut dilato supplicio una ad Magistratum irent. Nec Fibullum interim adverterat, præcipitantis negotii caligine cæcus, aut salutationis blanditia superbiam ferocis animi nulla dedecora præ contemptu æstimantis permulserat. At Dictator postquam diurna publici officii munera impleverat, ad domesticas statim curas traduxerat impigrum corpus. Igitur diutius in limine cunctatus Callion, tandem assiduis pulsibus lassavit audientem, qui uxore jussa aperire urgentibus, ipse non segnius juvenco ex scalis appenso detrahebat viscerum molem; cruentis adhuc manibus quibus paulo ante illius jugulum resolverat. Sed ut insuetum intrantium splendorem advertit, cultellum in referatos inserit dentes, manusque in præcinctam pellem tergens, nocturnum capitistegmen extremis aliquantulum digitis movit: Ac ut Callion per Principis sui reverentiam, & per eorum manes oravit qui primi fœdus ini-verant, ut juventuti meæ parceret, nec in crucem mitteret temeritatem, risu potius aut datis ad numerum verbis dignam, cum metueret Dictator, ne male purgata sanies juvencom corrumpere, bene est, inquit; agat auctoritati tuæ gratias, ac illud meminerit, non potuisse nos salutem dare, nisi mori meruisset. Procidi ego ad pedes, & cum Dictatorem, ac deinde dominum adorassem, excessi eadem lætitia ab ædibus, qua Theseus Plutonis exutus vinculis primum solem aspexit.

At Fibullius, ut accepta iniuria ferox, tum quod fraudabatur spe nostri supplicii, tum quod salutationis officium Callionem neglexisse credebat, concoquebat dolorem mutum, & in vindictam erectum, cum ex improvviso Callion advertebat hominem, & in amplexum decurrens, O mi, inquit, Fibulli, quis Deus ex voto hunc suavissimum occursum obtulit, & barbaræ feritatem regionis humanitate amicitiae nostræ lenivit? Cum tanta verborum blanditia extorsisset ab irato ut orationem non severam, ita parum priscæ benevolentiae memorem, uterque in diversa hospitia pervolvat, curatisque illa nocte corporibus, ut incommodæ ædiculae ferebant, prima luce Fibullius ad Callionem adhuc thoro inhærentem intravit, & blandissimo vultu salvere mulierculam iussit, quæ frigoris metu strata servaret. Arrisit ad hunc salem Callion, & Fibullium ad sedem pulvinis oneratam invitabat, cum ille secretissimo murmure aliquid in aurem Callioni dixit. Et quoniam gestus erat supplicantis, deprecari credebamus pridianam severitatem. Erat autem, ut postea intelleximus, modesta excusatio ad certamen singula reprovocantis. Neque, inquit, ullus est, cui plura quam tibi debere confitear, aut amicitiam tuam ullo magis tempore colui. Sed scis, te illo seculo vivere, ubi minima infamiae suspicio paternam charitatem vincat. Non possum integra fama hesterni contemptus imaginem pati, quod nec verbo excusasti, cum tantopere meis votis obstares, & Euphormioni salus me invito data est: quod utinam in contumeliam utriusque familiae non vertisset.

Non defuit Callioni apertissimus ad excusandum campus, sed timiditatis opinionem facere noluit, tanquam invasores nocturni, qui ad maiorem vim foede planorum imaginem sumunt. Itaque bene sensit Fibullium affirmat, ac ne impetum molesta sedulitate domestici turbent, suffragandae eorum oculis generositatem tam inexpectaticonatus. Igitur omnes in diversam curam intendere



tendere animos iussit, ac præcipue jentaculi munus officiocissimum mandat, dum, inquit, in proximum hortum Fibullium abduco, libertate ætæ positurus fastidium cibi. Tum vestem quam mox abjiceret, parum composuit, gladioque veluti pro more sumpto, pervadit in hortum. Nec omisere huic amentię familiares nugas. Iunxere strictis amplexibus pectora quæ mox confoderent, & inanem veniæ fucum crudeli piaculo præmiserunt; scrutatique patentes ferro sinus, mox quisque suam, quisque alienam aciem intuebatur. Sed facinus differente fortuna avertere bis elusos iactus, semel brevior sica, iterum obliqua fugæ petoris in latus averfit tandem Callion, ut irajustior obfirmaverat manum, adversum violentius enssem repulit, gladiumq; in crus inimicum altius imprimens, firmitatem subcidit vestigii. Ille corpus ægrum in terram deducens non omiserat enssem, sed animo supra vires fortis Callionem iterum vocabat in pugnam, & ferrum debili manu rotans fortunæ iniquioris imperium negabat admittere. Contra victor, ne fortitudinem suam in odium vocaret, negabat se adjuturum urgentia Fibullium fata; clementiamque fovebat nulla ignaviæ suspicione damnatam.

Igitur postquam Fibullium exoravit, ne vinci ulterius vellet, reducit in domum, ac mirantibus nobis infirmitatem cruris, in culcitram dextra ad scrupulū parcente reponit. Deinde valvis diligentius munitis redeunt in gratiam, crebris amplexibus ejurantes memoriam certaminis. Nihil eo fœdere integrius si hoc alia victima quam meo capite sanxissent. Nam dum amabili colloquio periculi causas repetunt, nec de se amplius, sed de fortuna queruntur: quid autem, inquit, Callion, in te miser Euphormio peccaverat, quem etiam tuis olim literis mihi chariorem esse volebas? Hic Fibullius, ut acerbitatē vulneris meo veluti fato leniret, docet à me oblatum remedium, quod, inquit, morbi mei atrocitatem, ne quid mentiar, distulit. Tuum autem, quod tantopere commendaveras, ultro ir-

risit nequissimus servus, neque à te prius literas tradidit, quam suæ perfidiæ meam valetudinem permisisset. Cumque aliquantulum levata mali violentia inducias mecum faceret, hanc epistolam, quam tibi à me reddidit (fateor) ut scriberem, ingenti sanitatis promisso compulit. Quid audacia verba referam; quid subtiles sceleris artes, talentumque velut coëmendis mendicamentis emundum? Miraris igitur me illius pœna gavisum, à quo fœdissime delusus sum, sic jam ut me crudelitatis meæ pudeat? Nam redeuntibus subinde tormentis, graviori metu pendo, ne infelix laterum fertilitas longe funestissimos partus creet.

Videbam diligentiori cura per rimam ostii colloquentium frontes. Cumque formidolosa mihi esset reconciliatio tam familiaris, diffusa temere familia stabam solus ad valvas, & alternas aures laxis opponens compagibus, tum etiam interdum oculorum iudicio metiebar salutem meam; gnarus furiosa magnatum odia illorum sanguine placari, qui controversias seu forte seu malitia incenderunt. Veluti arborum fissuræ, quas ictu sonanti distendit agricola, non nisi fracto aut expulso cuneo redeunt. Tum Callion, ut obtutum in terram defixit, trucique vultu minax immanissimi in me odii acerbitem concepit, percunctabatur de Percante, an illi quoque consilium meum placuisset. Sed non erat Fibullio animus, gratuita injuria in se Percantem concitare, tum ut illo teste meam mutaret perniciem, tum ne sales aperiret quibus ipse accusator in Callionem luserat.

*O Di, si vestras tangunt mortalia curas,  
Di, quibus imperium cali, qui nigra tenetis  
Tartara, & undosi queis sava potentia ponti.  
Aspicite hac, tuque O victor, quicumque deorum es,  
Cui labor infelix, & noxia munera surgunt,  
Res turbare hominum, non hac tibi mole severa  
Tempestatis opus. Iacuissem vulnere parvo,  
Semianimis parvo cecidisset vulnere cervix.  
Non pietas! annuam ignota occumbere dextra*

*Infelix potui, tantosque evadere laetus,  
Nec saltem cecidisse nocens? proh impia fata,  
Crudelesque deos! Illum illum reddite campum,  
Reddite? funereasque cruces, & vincula collo.  
Hac tantum mihi morte salus. Sat funera vivus  
Excepi, atque uno repetitas corpore mortes.*

Etenim Callion furore sævissimo ardens ad ostium procurrit, ac Euphormionem Percantemque turbata voce appellans, non tam cædis metum, quam desiderium attulit. Sed cum intrassemus in thalamum, statim Percantem à me Fibulius seduxit, arcessitumque ad colloquium, dum in me atrocissimis verbis Callion desævire, pestilenti imbuere fraude. Sic ut in illa tempestate nonnunquam animus procellis excelsior consideraret versatilem hominum mentem, à virtute & amicitiae charitate tam facile in perfidiam ac scelus degenerantem. Nam urgebat etiam ultra imperium domini paulo ante fidelissimus comes: quoniam ejusdem particeps culpæ sic amoliebatur omnem criminis suspicionem.

Tum jussus accipere plagas sexaginta, ac præterea serviles in fronte literas, quas adhuc omiserat qualiscunque domini clementia. Percanti tantumquam acerbissimo vindici trador; cum hæc mecum cogitare cœpi, tolerabilem Percantis esse larvam, qua dominum palam demereri studuisset. Jam ut secreto licuerit amicitiae sacramentum servare, haud dubie pietate ac misericordia meritum, ut dissimulationis offendiculum ex animo delerem. Sed ille nequaquam mitigatus domini absentia, tam immaniter supplicem contempsit, ut inciperem oculorum fidei timere, & notissimæ frontis vestigia perscrutari. Charissimi sodalis tergum mille verberibus distinguebat, etiam ultra imperatæ numerum pænæ: Et literis deinde crudeliter inustis, non altissimam modo consumpsit frontem, sed indicium servitutis pæne ad oculos ipsos deduxit.

Igitur jam Pedit, jam cæteri notæ nequitiae servi, conceptam in me iram in misericordiam vert-

rant. Ac præcipue Percantis superbia excitabat invidos animos, qui præmio suæ proditiōis potens non libertatem modo, sed vicarium in nos imperium erat adeptus: docebatque nullos deterius dominari, quam quos ad serviendum Natura creavit. Videbam conciliabula conspirantis familiæ, & aspernantis secundum hoc servitutis miserissimæ jugum; poteramque fortassis adjuvare mussantes, ni timuisssem pænas consilii solus dare, quod mihi soli non quæsissem. At præterea legeram Epitaphium Sibronii Consulis, quod in quodam libello in hæc verba conceptum est. *Deposito Sibronii Consulis, qui Lulentium bono acerrimam consecraverat mentem, domi forisque clarissimus, omnium in juvenanda patria princeps. Quem amplissimis in Rempublic. meritis clarum populus interfecit, ne dissimilem exitum fortiretur priscais Rerumpublicarum patribus, quorum semper exemplo vixerat.*

Tutius ergo ratus Percantis gratiam machinis omnibus adoriri, illo curas omnes intenderam, ne quod officii genus omitterem. Sed jam noster Athenion philosophiam projecerat, & in hæc vitia ut primum potuit lapsus, quæ quondam in aliis tam severus censor notaverat, aspernabatur affectatum obsequium, totius familiæ adulationibus lassus. Et præterea si me humanius appellasset, timebat, ne homines meminissent communis nostræ sortis.

Mihi tamen aliquantum profuit tam inexpectata fastidii atrocitas, & documento fuit, quam multis cautionibus intima familiaritas ineunda sit cum ignoto. Etenim quam excellens est veræ consensus amicitiae, tam est difficilis atque rara connexio animorum, ita divina atque præstans. Nam ut radii horarum indices, quot rotis & ponderibus aguntur in destinatos cursus, tot aberrantibus instrumentis mēdaci monstratiōe fallunt: Ita si ex infinitis rebus, quæ synceram charitatem componunt aliqua se conditio subtraxerit, laudata amicitiae forma degenerabit in turpissimum monstrū. Primum amplissima virtus non ubique sui capaces

animos

animos invenit; & magnas deinde mentes plerumque occupant ejusmodi vitia, quibus nullum est cum hac diva commercium. Igitur cum maximam mortalium partem (fas sit loqui) aut parum supra pecudes, aut certe infra magnitudinem quam requirimus, fata posuerint; ac deinde ratum sit magnis hominibus, ut similem alterius indolem, quam ament, nanciscantur plura sunt ad amicitiae aram donaria nuncupantium vota, quam exsolventium. Illud autem in amicitia praecipua religione custodiendum est; ut quemcunque exitum habuerint amici negotia, eundem tuis esse statuas. Ne illi obsignata arca, ne clausa mens, ne corpus ad laborem tardum elangueat, ut mutuo solatio (qui maximus est amicitiae fructus) penitiores audeas curas in fidos sinu effundere. Ut joculari, & animum laetius diffundere, irascietiam interdum possis, & exerentes sese impetus non celare: quoniam neminem suis vitiis carere Natura voluit.

His necessitatibus, quibus finem nulla lex praescripsit, positurus charissimam libertatem, diu ante videndum est, cui te navi credas. Num in eam pervadere poenitentia possit, ut, quam felicitatis sedem duxeras, ea te molestissimo carcere teneat. Quanquam illa spes puerorum deponenda est, quibus nihil promptum est aggredi, nisi jucunditatem assiduam stulta mens fingit. Asperi saepe casus incurrunt in amicitiam, & tam affligere potest ruina sodalium, quam felicitas mulcere. Itaque nec amicitia turpibus niti fundamentis potest, ut lucri cupiditas induat praestantissimos vultus; nec impetui, cui nescio quod inveniam nomen, ex templo parendum est, qui non saepe nullo rationis auspicio ad amandum impellit. Alioqui sera poenitentia reflectet in tergum stultissimam cervicem, ut saltem oculis repetat portum, quem egressa est; & cessantibus illis motibus, qui velut melle conditi ad amandi suavitatem egerant, destituetur praecipuis solatiis amicitia. & in illa morabitur esca, cujus nausea assidue fastidientem stomachum premet.

Cæterum quibus opes charitate potiores sunt, ii sese ultro excluderunt ab amicitiae limine, & quanquam dissimillimo vitio, ii quorum luxuries nullo patrimonio impletur. Præterea qui linguæ modum nesciunt, aut qui vana facillique indole, diversis occupati amicitiiis, & futili initio amorem ordiuntur, & inepte deponunt. Nam in eorum animis ita trudit pridianam familiaritatem enascens hodie affectus, ut qui jamjam exuberantem pluviam alius imber obruit. Duorum autem trium conspirans benevolentia illam felicitatem componet, quam Dionysius auro gravis, & ægre sustinens potentiae suæ molem, non invenit. Nam si pluribus potestatem animi facis, sacrilego furto detrahendum est prioribus tempus, & affectus quem in novos impendas. Præterea conditionem disparitas sæpe nascentem in cunis amicitiam jugulat. Quoniam ut diuturnus non est amor, qui sola jurgandi ac feriendi licentia (velut æqualitatis indiciis) constat; ita familiaritate alitur, & quodammodo mutuos sales jocosque velut ad quotidianum pastum quærit.

Sed & funestissimo didici experimento, amantium vota in hoc esse arctanda, ne nimium sodales evehi cupiant. Quamdiu Percas meam parum sortem excessit, tamdiu hæsit charitatis constantia. Deinde ut in altum evehctus cœpit despicere humilitatem meam, sic egit, ut non hominem, sed divitias peccasse arbitrer.

Dum hæc diligentius pensabam, & quærebam à sapientia auxilium, intravit domum nostram mulier, ut videbatur, nobilis, magnoque comitatu tenuissimæ vestis modestiam excusans. Nulla erant circa collum vincula, quæ morarentur transfuentium mentem. Non stalagmium erat, non spinther, non spathalion, non purpura aureis clavis fulgens. Notabiles erant bullæ varia magnitudine distinctæ, quibus onustum cingulum non nihil deflexerat. Illa ut ad Fibullium ex vulnere ægrum admissa est, & notissimam frontem eruit defluentibus velis, hominem admiratione prope

prope ad stuporem deduxit. Erat enim Lapicia, Fibullii ex Vocula fratre neptis, mulier genere ac divitiis, sed præcipue fama præstans, quæ adhuc adolescens, cum illi juvenem maritum moribus abstulisset, iterum nubere seu constans seu pertinax abnuebat. Insiluit Callion in cervicem, longa necessitudine familiaris, & rogo, inquit, domina, quæ te in has terras fortuna deduxit? amœnitas, puto, regionis, & suavior populi cultus. Aut si hæc non sunt, numquid te tua venatrix cœlebs Diana compulit in hos montes, & nemora, pæne qualia circa Stygem pinguntur? Tum illa, ut se templum religionis miræ, quod ultra Alpium claustra colitur, invisisse docuit, quod bis ab hostibus petatum, bis divino volatu eluserit furentium manus, cœpit rogare quod vulnus Fibullium afflixisset. Vtque per ambages intellexit pugnæ dementiam, tanquam sola peccare nesciret, mille gestibus averfata est improbiissimum scelus. Ridebam ego pietatis superbiam, cum illa homines arcessiri jussit, quos habuerat viæ comites, ac severioris disciplinæ magistros, quorum certe tumulis, si morientur, saltem exemplo Metelli, corvum debebit.

Horum unus, quoniam bonæ fortis ac ominis erat, intrepido vultu præcessit. Alter semicandida veste, nec cavare manicata, sequebatur: Qui ut intraverunt thalamum, ea salutatione, quæ professionem proderet studiosorum, pæne risum expressere spectantibus. Ac deinde magna volubilitate sermonis, omnes sibi vices tradidere loquendi. Non Callioni, non Fibullio, non ipsi Lapiciæ permissa vox: sed illi, velut theatrum ascendissent, aut ineptiæ suspicionem per audaciam loquendi tollerent, varia Sanctorum dicta factaque nimis oppido tenaci memoria recensebant. Quanquam, nisi fallebar, ita apposite, ut sæpius Cadmus, quam Harmonia canere videretur. Ac dum modo in scientias ludunt humani iudices recti, modo conjugium frigidissimo sale proscribunt, paulatim ad differendum lapsi tam acriter coepe-



runt contendere, ut res meo iudicio ad manus pugnamque spectaret. Vix restabant sedilia lacertis pulsantibus, & ipse manus vehementius productæ ærem pæne in sibilum cogeabant. Cohorruere omnes ad divini strepitus miraculum, & nobis, quotquot Romani sermonis expertes non eramus, audiendi curiositas altissimum silentiū indixit. Sed illi, quæ confusa & indigesta mente conceperant, tanta intelligendi difficultate fundebant, ut non modo non Latine, sed nec humane loqui crederem. Iam non inter se ipsi, jam se quisque non intelligebat, cum uterque vinci arbitrio spectantium nolleret, & in hoc victoriam poneret, si prior non destitisset loqui. Igitur horas pæne quatuor præliantium æstus absumsit, cum id unum quærerent, *num ad syllogismum sit necessaria conclusio*. Cumque cresceret difficultas per obscurissimæ disputationis noctem, tandem erupit ille qui semicandidam vestem pæne sudanti fumo fucaverat, & consumptis subtilitatibus provocavit ad injurias, ut qui attrito ense fractove destitutus gladiator, ad luctam, velut ad compendium pugnæ, æmulum strictis amplexibus cogit. Tu vero, inquit, ineptissime, mihi etiam controversiam moves tanquam in meo regno non essem, id est, tanquam aliud id, de quo agimus, aut laboriosius quæsitivisset, aut felicius invenisset? Testes sanctissimæ domus nostræ parietes, qui toties ad laterum meorum vires obstupuerunt, dum non minus menses

4. adolescentes nostros declamando & scribendo exerceo, ne hac semel quæstione ut oportuit excussa, quid de ea amplius à quoquam discere possent. Vix ducentis horis legas, quæ in hanc materiam ex pluribus authorum millibus solita brevitate decerpsi. Neque est aliud, quod te jam in disputationem trahat; nisi quod ut testes in nostram dicaces familiam, id demum existimatis ad gloriam vestram facere, si aliquid ex nostris moribus doctrinaque carpetis. Vos, quod ab antiquitatis austeritate nostra paulatim vivendi consuetudo deflexerit, quod opulentior cultus, quam

quem

quem authores dictaverint nostri, privata nonnunquam cubilia instruit; quod in necessarios quisque sumptus pecuniam, quod in hyemem vestes, in exercitationem libros, extra cæterorum communionem prospicit, ingentibus monstis effertis, totamque proscribitis domum. Si ex æmulatione, indignor. Si ex vero dolore, misereor medius-fidius stuporis vestri, quos plus aliena mala cruciant, quam quæ vestra præcordia foedissima tabe consumunt. Vtrum est enim deterius, fruticum instar omni vento permittere fragilitatem suam; an pertinaci ad obfistendum trunco concitare flaminum superbiam, quæ radicem vim concitatio æris despicientem evertant? Nos ut prisca seculi ratio tulit, selegimus abhorrentem ab ea, quæ jam in usu est vitam. Mutatione deinde temporum facta, & vertentibus omnium cum ætate ac sæculo moribus, non abnuimus his tempestatibus agi, diversisque præceptis familiam imbueri, ut ramis ac frondibus sese ad fortunæ nutum torquentibus clementior ventus, & ipsa victoria facilis, radicibus parcat. Vos autem imaginem antiquitatis scrupulosissime conservâtes, quæ non, dii boni, ludibria, qui non meliorum mentium sales & joci consequuntur? Quid prima scholam vestram ineuntium pugna; cum solus tyro apud rudem ignarumque satellitē desolato claustro declamat, & aliquot sententiolis solitariam domum affatus, sibi auditor, sibi testis, sibi iudex, interdum etiam petulantissimus irrisor existit? Huic rei non invenio nomen, si non est indigna affectatæ antiquitatis vanitas, vel stulta religio, excindere horrentium, quod jam ipsi authores tollerent, si eorū manes consuleretis. Quid deinde convivialis inter vos laudatio? quid à nobis sumptus extorti, quos egenos non esse damnavitis? quid ille vester ductor non nisi quaternis in diem epulis satur? quid ejusdem vespertina cum tyronibus repetitio, cui statim epulæ, veluti mercede constituta succedunt?

Iam vero de pietate vestra nihil disputo; modo  
illam

illam scrutari omiseris partem in nobis. Alioqui non quæ latebræ celant excutiam, aut in re dubia quæram facinoris suspicionem: Quæ vulgo, quæ palam in famam vestram tela jaciuntur, assumam, Ambitus, ac perjurii crimen. Infremuit Callion tam inexpectato commotus judicio. Iam Fibulius, jam Lapicia, velut miraculum, vocem non inveniebant, ac ipse præcipue vates, cujus domus tam foeda spargebatur infamia, ad insaniam rabiemque properabat, cum alter, utinam, inquit, tantam ad peccandum verecundiam attulisses, quantum ad excusationem audaciæ. Non magnifico per urbem equo delatus potentiorum foribus toties affedisses. Non interdum amicos ac socios, noctu animum ad fraudem & injuriam acuisse, ut illis ad vestrum ordinem ascendentibus, qui quadrienni rudimento meruissent, is princeps non esset, quem & eruditionis suffragium, & populi expectatio in hunc locum manu ducebant. Et solennibus tamen verbis promissistis, nec ambitu nec favore passuros corrumpi judicia vestra, ut cuiquam ad hunc honorem aditus, nisi à virtutis ac meriti templo, patefeat.

Videbatur nobis omnibus ipsum facinus suo nomine lenius, & quos atrocitas vocabuli ad horrorem egerat, exiguæ rei momentum rapiebat in risus. Cum acrius institit declamator, Eruditionis vero, inquit, certamen non in eo, quoniam vinci vobis esset honestius, quam nostræ familiæ certavisse. Ridete barbariem sermonis inculti, quæ in majorum nostrorum libris nihil simplicibus animis inhæsisse fuci demonstrat. Certe vos sinceram doctrinam è nostris hauritis fontibus: vos scientiam veluti è sancta rusticitate avocatis, ac figmentis orationum pictam jam id primum docetis fallere, quod se pro vestra gerat. Tum alter, ut omnem audiendi patientiam consumpserat, O mi, inquit, homo, collige paululum redeuntem animum, ut cæca maledicendi licentia, si desit quod in externos jactetis, etiam discat, quid in vobis damnare possitis, Eruditionem à vestris ali-

quam accepisse non pudebit confiteri, si vos in solam barbarici hæreditatem admissos ingenua professione firmatis. Sed agam lenius, & refutandi modestia tuam convitiandi libertatem opprimam. Vitam, existimationem, instituta, non perstringam. Illud unum interrogo, cur legibus vestris varia interpretatione distractis, ut hi nomen, illi vestem, plerique ceremonias ad discrimen induxerint, nondum reperti sint qui Latium vetent pronuntiatione barbara violari, nondum qui indicare Tullio bellum? Quamquam quid frustra in arcana vestra intueor, vobis omnibus solitariis æstimationibus cuncta reputare consuetis: unde tuta cubiliorum secreta, unde horribilis in iuniores sanctio, ne improvisi in seniorum sedes irrumpant.

Cum alia his similia, vel etiam frigidiora pararet, venit ab Archoropo nuncius, & diremit sterilissimam litem. Qui ut audiverat in Italiam properare Fibullium, ultorem injuriæ quam minus bonis temporibus acceperat, cum ipse Archoropus domesticis implicato negotiis insultasset, direptis aliquot sarcinis, cum curribus, quibus ipsæ vehebantur, primo nuncium occurrere jusserrat, ipse deinde quam maximis sequebatur itineribus, nulla damna præ Fibullii odio æstimans. Igitur postridie, quam attulerat nuncius literas, Archoropus advenit, tam magnifico cultu, ut illum vix animo, nedum oculis capere possem. Auri argenteque omni fide copia major, equorum nobilissimi greges, ingens servorum numerus, & omnia velut ad pompam fastumque subornata. Tum ad deprecationem versus, ut sibi Fibullius satis fieri fineret, ideo exorare non poterat, quod inanis pompæ ordo in supplice pro contumacia reputabatur: & hæc secum Fibullius longa cogitatione pensabat, Quid hic tantæ numerus familiæ? quid sumptus in luxuriam vergens? Num assimulatione vanissima supra se magnoseffingit? Num mei raritatem ministerii spernit; & sibi admirationem quærere, & meorum fidem corrumpere hac arte.

quæfivit? Auxit hanc in Fibullio suspensionem ambitiosa in nos Archoropi liberalitas, & pæne ipsis accipientibus gravis. Nam ut illuxit dies alia, nescio quot ex Fibullii & Callionis domo salutatum introivimus, & Archoropi somnum exultantibus tympanis, tubisque perfregimus: qui dispensatore qua nos cum sportula dimitteret interrogante, tantam effundi pecuniam jussit, quantam non caperet aviditas nostra. Nec humiliter quam erat loquutus expediri munus jussit. Quippe productus est sacculus ingens, numis argenteis plenus; permissusque diripientibus nobis, nunc onerantes sinum, nunc deprimentes laciniam vestis, tandem gratissima fecunditate lassavit. Nihil unquam eo munere plenius. Nam sumendi cupiditatem muneris amplitudo exhausserat.

Ego præcipue, jam spe animum in diversas curas intendente, ad solam onusti corporis debilitatem argenti pondus æstimans, ab Archoropi beato limine postremus excessi, sociisque nunc pondere, nunc gaudio æstuantibus facinus ingens ausus, ad vendentem fucos intravi, & mutatis modico pretio vultibus, factoque mihi Gelonis nominæ, à miserabili servitio fugere cœpi. Ac cum dies aliquot locorum ignarus aberrassem, tandem in eam regionem veni: ubi sævum & insanum mare conjuges consultissimos habet. Hi privignam jam olim Venerem admirati, se suamque Cyprum barbaro permisisse imperio, matronarum pectora nudant, & illius sacra operosius colunt, ut eximii lepores deam ad reditum invitent. Nec jam Verona longe aberam, cum cuidam Apulo ex Gallia redeunti conjungor. Ille se Cæsarem vocari dicebat: cui ego, utpote & itinerum docto, & in urbem aliquam tendenti, quam ego studiosissime perquirebam, persuasi fœdus faceremus neutrum à socio nisi perfecto demum itinere recessurum. Quod cum plusquam militari sacramento firmassemus, Veronam pervenimus incipiente primum nocte, & ad Antonium Cæsaris familiarem divertimus, Is ea primum cœna la-

tucis,

Ætucis, nasturtio, columbisque lectissimis excepit, & ne, si solitarii dormiremus, nocturna prodigia mentem diducerent, gratissima benignitate providit. At vero qui sequebatur dies, jam non vulgari mensa, sed epulo pæne cultus est. Transalpinae ovis particula, & galli spadones plurimi visabantur. Pavonum columbarumque numerus, Turdorum etiam & Coturnicum pæne examina; juvenæ præterea aliquot adventum nostrum sua morte luerant; hortum despoliati amiserant flores, & omnis ædium decor in triclinium nostrum confluxerat. Cum deinde consideremus ad mensam, pocillator singulis astitit, minaci fronte, vultu terribili, custodiæ proprius quam convivii satelles. Detraxerant illi galeam, quam continuo instar Vulcanum fugientis Palladis gestant; parmamque aliquantum in latus deflexerant, ut in quietâ pace pugnae memoriam spargerent. Credebam æmulari Antonium Domitianam mensam, ad quam olim proceres, cum omnia pulvis color indueret, urgerentque sepulchrorum imagines, pæne lethalis horror afflxit.

Celabam tam invisum fastidium moris, fucumque timori prætendens, sollicitabam Cæsarem, ut explicato convivii ordine, & deficiente jam fame, hospitem relinqueret. Nobis esse viam etiam præcipitantibus longam, & infestum, ut ajebant, latronibus iter non ostendere spem veniæ errantibus, si noctu nos in ejusmodi plagas nostra temeritas detulisset. Igitur Sole jam ultra altitudinem mediæ lucis producto Verona exivimus, & passibus ter mille confectis, ruentem admissis frænis equum, ex attritu solidi primum campi, & ex concrepantibus deinde lupatis audimus. Erat equus Cygnorum nivi æmulus, nisi crus alterum & apertissimum pectus subcineritii pili fucarent. insidebat autem homo, ille scilicet, qui ad mensam astiterat mihi, vinum, & quæ illius artis sunt, serio cuncta dispensans. Agnovi ego irruentem, Cæsarique monstravi, & cœpi vereri, nequid ignorantes ab hospite tol-

leremus. Nec dubitavi quærere, quæ illum præcipitatio, vel quo gentium ferret; cum ille turpissimi nihil pudore facinoris tactus, ultro docuit, domini se jussu in medio foro primarii juvenis cæde imbuisse manus. Jam in alterius ditionem urbis contendere, & tum ad salutem perventurum, cum exisset Veronæ suæ fines. Perceperam toto corpore horrorem frigidissimum, & velut inaudito scelere perturbatus, cum jam hominem equi fuga pæne à conspectu nostro tolleret: O memorabilem, inquam, Cæsar, audaciam! quid unquam ex omni memoria tam atrox & luctuosum referas, ut publice sicarii non expectent equuleum, sed velut gloriosum facinus sponte confessi, omnes timere jubeant, quoniam ipsi de se nihil timēt? quid, inquam, simile omnibus monumentis, accepimus præter Fimbriæ factum? quem non credo protervius vulnerato Scævola insultasse. Excusare se Cæsar errorem meum dixit, quod ad frequentissimum crimen obstupescerem ignarus sævissimi moris, qui in illa regione pæne omnium capita proscripsit. Equus, ait, celeritate notus, & modici æris liberalitas, præmium erit homicidæ, qui vel lares domestico sanguine contaminabit, vel publico barbaræ feritatis exemplo desæviet. Venalis hominum vita est, & licitatores capitum nostrorum publice regnant: etiam pæne infamiam consuetudo sustulit. Ac ne quidem tutæ amicitiae, aut necessitudines periculo carent. Locus forte, aut imprudens in fenestram aspectus, secretissimo scelere vindicatur. Sæpe in ferrum cautos venena sustulerunt, aut facis illitæ fumus, aut corrupta floris suavitas, aut fatalis cultelli acies, qui eodem tempore & intactam liberis dapem diffecat, & adversario mortem. Æterna sunt semel læsæ mentis vulnera; & plures reconciliatio, quam professum odium extinxit. Hæc ipsa quam modo reliquimus civitas, quale sævitiae nuper exemplum prodidit, cum illustri familia, sublati tribus fratribus, miserabili ruina decessit. At ego dum flagitiorum frequentiam nego mihi quicquam

ex stu-



ex stupore subducere, video agrestes aliquot ad angustissimas sylvæ fauces, veluti ad consilium, conisse. Inter illos viragines duæ lacertos extulerant, & videbantur ad pugnam promittere manus. Nec dubitavit Cæsar, quin latronum insidiæ in illa sylva frequentes illam pavidorum manum cogerent, qui tunc adventu nostro recreati, quoniam accincti ferro eramus, una sylvam transmissuri prorumpunt, Cæsaremque, utpote gentilem hominem, &, ut aiebat, eorum fortissimum, qui nuper ex illis regionibus Gallias infestassent, sibi ducem faciunt, haud dubie in omnia pericula audaces, si quis esset qui suo exemplo fortitudinis admoneret. Cum igitur poneremus consilium, num quadrato agmine famosissimam viam inire, num una, num diversis cohortibus præstaret: ecce tibi occurrit aliorum hominum agmen, & irato fremitu ita militarem viam implet, ut circumstantis sylvæ confraga tumultu formidabili exsonarent. Nulli prælium minus quam Cæsari placebat, quem ego ut timidissima fronte vidi prensare digitorum suorum articulos, metumque pallore confiteri, vicimus, inquam, Cæsar, si audemus non fugere. Latrones sunt, & si mihi credis, plus timori nostro quam suæ virtuti nituntur. Non negabat Cæsar vera esse, quæ dicerem, tamen consulendum liberis clamabat, & propinquorum pietas tenerrimam perfuderat mentem. Iam dispersi hostes occupaverant viam, jam distrinxerant ferrum, aut præustas in humerum extulerant sudes, cum repetito clamore incitati procurrimus. Ego digladiabar acutissimo fuste. Paucis rusticorum ferrum erat, sed obvio quisque telo armaverat manum, & ipse Cæsar frigidior quam Demosthenes ignavia non projecerat parvam, sed omnium vestibis amictus, quos expediti nostri projece- rant, negabat esse fas in primis ordinibus consistere ducem. Non ferendum, ut fortunæ liceat unius casu affligere universos. Sibi curæ fore, ne possint circumveniri nostræ alæ. Incitaturum ad pugnam, ordinaturum aciem, deinde incor-

rupto iudicio de singulorum virtute dicturum.

*Bellum, O Endecasyllabi, cruentum.*

*O bellum numeris referte dignis;*

*Quali Thyades insonant cruenta,*

*Cum jam Nebridibus graves lacerti*

*Huc thyrsos virides regunt & illuc.*

*Non hic Mæonio exsonet tumultus*

*Iratistuba dignior catervis.*

*Adsit tibia, vel forata buxus,*

*Sacrorum Phrygiam admonens Cybelen,*

*Aut qua tympana mollibus ministras*

*Mitras frontibus imperant recingi,*

*Nusquam hic vulnera, purpureæ tristi*

*Vndabat tepidus cruore campus.*

*Solus precipitat timer cadentes,*

*Solus corpora sauciabat horror.*

*Sed tandem geminas rotare gyro*

*Iam forti mihi jam manus placebat,*

*Iam concurrere, jam probare dextram,*

*Cum sparsis ululans comis virago*

*Audacem ferit, excutitque telum.*

*Quali Thyades insonant tumultus,*

*Cum jam Nebridibus graves lacerti*

*Huc thyrsos virides redunt, & illuc,*

*O bellum numeris referte dignis.*

*Bellum, O Endecasyllabi, cruentum.*

Sublato tandem errore omisimus bellum; quoniam hæc erat virorum & muliercularum acies collecta ex vicinis mapalibus qui & ipsi prædonibus bellum illaturi convenerant. Omnes vulneribus intacti prælio excefferant, nisi quæ sævissimo fuste mulier lacertum meum oneraverat, & Cæsar præterea noster, cum retro cæcis vestigiis iret, incurrerat in vepres, perfossisq; spina clunibus tam miserabiliter exclamaverat, ut gravissimo telo idum crederemus hanc postremam vocem edere. Igitur compositis præliantium mimis qui hostilibus modo armis concurrerant, etiam ad nos venire Medicum jubent, lacerti que mei vulnus perfundere unguentis, & omni artis suæ benignitate mulcere. At Cæsar foedissimæ per campum volutatus,

tus, quæso, inquit, Gelon : scito me agere in viciniâ mortis, nec tantorum vulnerum hiatus ulla medicina coituros. Grande tamen perituro solatium relinques, si permittis ut intelligam prius quam alta morte peream. Ego, quamquã marcentes nervi destituerant lacertum, & omnis spes in festinatione medicaminis erat, tamen flebili lamentatione victus, confestim Medicum rogo, ut ad Cæsarem transeat, & exploret desperatæ latebras plagæ. Tum vulneris locum iussus Cæsar ostendere, dimisit in clunem manus, & mox dispoliatus nos odore tam pestifero sparsit, ut crederemus illas partes non tantum emortuas esse, sed in fœtorem etiam pæne solutas labi. Neque aliud erat vulneris vestigium, quam exilissimæ spinæ via, quæ exiguo sanguine maculaverat cutem.

Tarde persuasum est Cæsari, se valere; nec quamdiu blande est habitus, succidiis & titubantibus vestigiis innitebatur. Sed postquam teneiora Medicus virgulta succidit, & aliquot plagis medicamentum opparientem excepit, nunquam magis alacer Cæsar etiam præcipitantiis, quam si adhuc starent hostes, effugit. Ac tandem mora simul pudoreque victus, fortioribus consiliis locum dedit.

Iam evaseramus formidabilis sylvæ noctem, jam dierum aliquot iter emensi per confragosos plerumque saltus & importuna montium juga, emerferamus ad amplissimam urbem, in quam meum cum Cæsare fœdus erat compositum. Ac cum ad Mauritii domum (is erat Cæsaris necessarius) tenderemus, occurrit nota jam olim Cæsari mulier, quam ille parcissime salutatam me advertere iussit, & omnia diligentius intueri. Auream vestem aliquot insuper gemmæ aut colebant, aut ipsæ ornabantur, decentissimi colloques, crinis theatri pæne gradu conscendens cothurni omni tragœdia altiores fœminam extulerant, levia vestigia omittebant intactam pæne terram; eaque reclinata molliter in humerum adolescentuli dextra tollebantur. Gradus

tamen ipsa testudine tardior differebat huc illuc lascivienti modestia vultus, tardeque ob oculis obviatorum trāseuntem rapiebat. Interrogavit Cæsar, qualem ego mulierem crederem, quæ tam prodigo cultu, tanta frontis tranquillitate procederet? Ego Dynastæ alicujus conjugem cum dixissem, tanto risu ilia commovit, ut etiam manus ad lateris subsidium adduceret, & certe, inquit, sutoris conjux est, ut intelligas in hac urbe regnare judicium Paridis, & Minervam, Iunonemque minori fastu quam Venerem ire. Ac ne quid tibi ad miraculum desit, scribendis olim matrimonii legibus adfui, tabulis etiam subscriptis, in quibus dos hæc erat scripta: *stanni pondo novem, & mantilia singula in omnes anni menses*. Sed longe maritus largior, etiam ultra morem effuderat liberalitatem suam. Is donabat patrimonii partem, & præterea veniam, ut hilari licentia utrique consuleret. Cæterum alterna est hæc pompa, & quam publice decora est hæc mulier, tam domesticis sordibus est infamis. Nihil illa foedius cum absunt amatores, nihil magis neglectum. Victus, pace tua dixero, qualem vel Erisichthonis fames refugiat: Vestis tam squalida, ut aut ream esse, aut elatum maritum deslere existimes.

Hæc Cæsarem familiariter exequentem, jam Mauritiï domus acceperat: nec audebam ignotæ domui succedere, antequam Cæsar humanitate mirabili à domesticis cultus me etiam per familiares arcesseret, occurreretque Mauritius, & per amplissima deducens triclinia, passim aureos ostentaret parietes, nobilesque cameras novarum indices opum, ubi multa priscae urbis vestigia extabant, & celeberrimæ tabulæ ex everisæ urbis incendio non semel conservatæ. Multa Gallico auro cælata fulgebant: sive Brennus fugiens reliquerat, sive ipsi per publicos tumultus avexerant. Præcipua deorum cura fuerat. Stabat Iovis Iunonisque species supra homines venerabilis: Deinde spirans ubique Ganymedes, & Æneæ mater Venus posteros suæ originis admonebat.

*Hec nihil invitis fas quemquam fidere divis !*

Cum omnia diligentius perlustrassem, & truncos majorum vultus, semesasque imagines contemplarer, nescio quis me Deus funestissima Mauritii voce obruit, qui Cæsari prædicabat, illam domum Fibullio transalpino homini tantum sacram dicatamque non esse, se illius nomini omnia debere, expectare etiam postridie ab illo nuncium, qui frequentissimis literis & colebat amicitiam, & sua beneficia tuebatur. His ego perculsus vocibus, tantum non amiseram spiritum, sed pallorem, qui subinde membris suffusus est, excusavi extemporaneo morbo, quasi omnes corporis articulos febris subito tremore tentasset. Cæterum nihil opportunius succurrebat, quam fugere, ne me illic à Fibullio nuncius deprehenderet. Igitur nec expectata cœna, quasi perlustraturus urbem, effugi suspectam Mauritii domum, votoque ad fortunam facto, ut aliquando satiaretur meis malis, non civitatem modo, sed provinciam reliqui, & miserabili locorum imperitia, cum totius orbis exul huc illuc fugæ meæ notas spargerem, tandem in ipsa Callionis patria, in ipsis hostium penatibus ad populosissimam urbem veni, in qua tanta erat frequentia, ad negotia discurrentium, ut aliquandiu crederem seminarium esse, ex quo mortales Iupiter in orbem emittit, vel quo fatis vocantibus homines coeunt, ad vitam iterum solemque redituri.

*Quicquid Arabs, quicquid dubiis Nasamones arenis,*

*Aut lasciva tenent effusi littora Lydi,*

*Invenias : illic etiam Mavortia Thræe*

*Quicquid alit, quicquid Scythici trux incola Ponti,*

*Quicquid in immenso late pulcherrimus orbe*

*Aut facit, aut alio spectat Sol numine factum.*

Etiam omnigenæ fructus, etiam inala Cotonia, prope regiæ culinæ fores exurgunt. Illic virtutum, illic vitiorum collegia, & ne parum dixerim, coelum cum tartaro mixtum. Urbem autem aiebant de Priamidis nomine Alexandriam appellari. Nec longius quæsi vi latebras meæ fugæ. Nam

velut in solitudine errarem, in quot incurreram homines, in tot incidisse simulachra fingebam. Ac mihi præterea persuaferam, tarde crediturum Callionem, me ad regionis caput fugere, cuius ipse corporis pars pæne maxima credebatur.

Erat ædes laxissima, ad quam multis gradibus surgebat ascensus. Celebres circum porticus, & venalitiis rebus plenæ morabantur euntes. Ibi nobilium foeminarum ingens numerus, pennata procerum vanitas, litigantium quoque vigiles turbæ, furum etiam, & eorum qui fortunam, ubicunque inveniunt, amant. Cum illic animum in tot miracula dividerem, vir quidam ut videbatur modestissimus, paulatim accedens, ultra loci genium salutavit ignotum, & an vellem emere profundam auri massam quæsit, vili etiam addictam, & quod est miserrimum, cui præter invidiam nihil pretium minuebat. Cum omnino non respuerem, seduxit à turba, & non nihil modesto gemitu cunctatus, quam est durum, inquit, bonis mentibus, vel infamia seculi, vel hominum criminationibus inundari! Aurum, quod Naturæ genium exprimens solerti industria conflavi, palam efferre timeo, ne iudicium, quod in omnes artis nostræ homines jam olim rumortulit, me sub communi causa obruat. Cæterum si populo non omnia credis, servasque iudicandi arbitrium, potes hic per compendium properare ad amplissimas opes. Aurum exiguo pretio permittam. Tu auctione certissima dives, non ad optimam semel prædam, felicemque mercatum redibis. Et ne me putes fallendi animo hæc facere, si placet, hodie una cœnabimus, ut familiare super mensam colloquium, tum fidem tibi meam, tum veritatem, certius insinuet.

Tam erat apposita oratio, tam vultus ad lenitatem compositus, ut nefas crederem, si mihi tam sanctus homo in suspicionem venisset; cum etiam, instar Antistitis summi Iovis, videretur ab omni iuramenti atrocitate simplex animus refugisse. Itaque facilis, & nondum satis Fibullii donis edoctus,

doctus, ut extemporanea beneficia vitarem, promisi ad coenam, & etiam condicto maturius adfui, ubi meus ille planus accensum modice ignem, & nisi fallebat, æternum, follibus ad mensuram turgentibus alebat, & prunas scrupulose excitans, Mercurium suum humido, ut loquebatur, ac quodammodo pingui calore fovebat, ut, inquit, felicissimus pulvis, per tot artes tantamque solertiam natus, id mortalibus innoxie tribuat, quod ne quidem dii Midæ sine damno dederunt, & metalla omnia in altiore transferens ordinem, doceat Naturæ industriam humana sedulitate vinci. Etenim ubi tellus, optima morientium omnium parens, aurisemina in abditissimo sinu concepit, & inspirantem benignius Solem admisit, humillimo primum initio tam chari ac præstantis foetus elementum orditur. Nam Mercurius ille, ex quo quicquid metallorum est componitur, veluti certis gradibus sese in præstantiorem naturam adaptat, donec volventibus jam præne seculis in hunc fulgorem evadit, qui omnium oculos tam ambitiose delectat. Nos autem lenta corrigentes incrementa Naturæ, primum Mercurium masculum è montium medullis excipimus, lentoque ac vitali calore imitantes ingenium Solis, ad altiore sphæram agimus, ut à Mercurio ad Venerem, inde ad sublimitatem Solis ascendat, id est, ut per omnes velut ordines actus, ea sede consistat, à qua si metalla deflexerint, quacunque velint parte, descendant; idque tantum mensibus novem, nempe justo tempore, quo se foetus humanus ad vivendi dignitatem instruit.

Sed est fortunæ rarissimæ, & in quam nec temeritas, nec casus incurrat, ita digerere nascentis auri cunabula, ne vel immodico æstu consumptum, vel lento nimium igne torpescens, spem hominum & industriam fraudet. Multi nondum solverunt de littore ratem, cum jam naufragium sentiunt: alii in ipso cursu, & spe jam adulta, etiam aliquando in portu, tam mirabilem & lueri & famæ fortunam de manibus amittunt.

Sæpe



Sæpe fornaculum serius ad ignem positum, sæpe vitrea vasculorum fragilitas elatam expectationem eludit, & si verum fateri audeo, plerisque sui cultoribus hæc scientia nihil relinquit, præter inanissimam spem emendandi, quod prioribus experimentis peccaverint. Desidit interim quantumcumque profundus patrimoniorum alveus, nudaque spe ac sterili his ignibus carpitur, unica curiosi animi voluptate tot dispendia, tot maledicæ plebis contumelias repensante. Sed generosis mentibus, & nihil præ mirabili arte æstimantibus, est etiam quædam paupertatis in hoc studio suavitas, ne gratis in Naturæ secreta pervaserint. Nec ullus est in egestatem tam magnificam actus, cui plus aliquid doleat, quam quod cessantibus opibus, sacer ignis, & Phrygio Romanoque diviniore cadit. Populus autem, & qui obstinato pectore sinceræ voluptatis gustum non sentiunt, execrantur hanc bonorum voraginem, & modestissimi quidem risu, petulantiores maledictis insectantur, severissimi pœnis. Inde monetarum adulterationes, inde fraudes & latrocinia esse clamantes, & quæcunque exhausta patrimonia per injuriam implent. Nec illustrium hominum splendor, nec Aquila nostrarum jam partium facta, amplitudine sua humilium vitiorum, & quæ angustis tantum capiuntur pectoribus, infamiam à nobis detergit. Quotquot in id studium tendimus, si ex optimatibus, fatui; si ex tenuioribus, impostores audimus. Iniquissima tamen æde pol condicione, & quæ facile populum judicasse commonstret. Etenim ne me jam aliorum oneret defensio, id cœlo teste ac interrita fronte prædico, me à puero incubuisse in hanc artem, me quicquid est secreti atque abditum indefessis laboribus quæsisse; meam tamen fidem aut integritatem nullo propterea esse scelere violatam. Jam vero & humilia in aurum trāsferre metalla, & vilioribus saxis gemmeam inducere dignitatem, mihi tam promptum est, ut non sociorum magis, quàm ipsius Naturæ invidiam pertimescam.

Omnia

Omnia Neptuno littora gemmas concipiunt, omnia afferunt. Iam sacrarium illius dei pæne tot radiis est illustre, quot animus virtutibus dives. Etiam talentis nuper pluribus principem lapillum emit : sed nulla illius fortuna mea felicitate non est minor. Cum hæc dixisset, solvit sacculum satis grandem, meque introspicere iussit. erat autem partim laminis aureis plenus, partim splendētibz gemmis, & oculos ipsa luce fallentibus: & quanti omnia æstimarem, vultu ad blanditiæm deflexo quæsivit. Ego, quem inopinato radii tam illustres ceperant, tribus talentis æstimavi, id etiam, quod plerumque lenēs homines solemus, timens, ne humiliori pretio, tanquam mercium contemptu rogantem offēderem. At ille, sic me nunquam educandi metalli solertia fallat, inquit, ut tam illustres gemmæ septem facile talentis veniant. Tibi tamen hoc erit orientis amicitia pignus, quod destinata tuo iudicio pecunia, tribus inquam talentis, sacculum auferes.

Nihil ineptius, quam apud inverecundos latrones pudore teneri. Ego ne viderer homini diffidere tam doctē blandienti, cœpi vestium nodos solvere, eductamque de variis pecuniam recessibus numerare: hoc uno sapiens, quod particulam, quæ in summa veste prope humerum latebat, intactam omisi. Igitur cum sesquitalentum promisssem, negaremque alios mihi esse in præsentia nummos, sceleratissimus carnifex primo sacculum suum recludere cœpit; mox ut etiam à me reponi pecuniam vidit, inquit, quicquid gemmarum est, potius sorte fidelissima partiamur. Ego in duas partes quam potero iustissime distinguam; tu sesquitalento quam voles partem optabis. Placuit etiam amentia meæ conditio. Itaque divisis exquisitissima ut videbatur diligentia gemmis, cum expenderet pretia, & videretur optima fide sollicitari, omnem ex animo meo suspicionem abstulit. Laminæ etiam aureæ in distributionem venerunt; ut felicissimo mercatu crederem à me exisse pecuniam. Cum igitur, tanquam

tanquam ille quondam Philosophus, pro Punicis malis ceram tenerem, hilares ad cœnam concessimus, & suavissima remissione animi condivimus epulas ad fastidium pompamque venientes.

Ac posteaquam in dômum meam redii, nunquam mihi suavius fuit, cum animus lucri confidentia plenus etiam in medio sopore non cessaret, & inani cogitatione delusus, gemeret tantum temporis suis quæstibus interesse, quantum moræ lenta nox opponeret.

Pons in illa urbe celebris lignea radice confurgit, & trabibus artificiose compactis non tam undis transeuntibus obstare laborat, quam auri argentique ponderibus anhelans sub pretiosa mole deficit. Hinc & illinc aurificum domus & officinæ quasi continuo splendore lucentes, unionum quoque gemmarumque supra felicitatem Indilittoris copia, quo etiam meas merces cum tulissem, senex quidam, inspectis diligenter gemmis, & me, inquit, deridere credis, jam à cunis inter gemmas educatum, qui vitreæ fractæ particulas pro lapillis rarioribus objicis? Ego indignans, velut à cauto sene deluderer, maledixi tabernæ tam insigniter mentienti, & in aliam me contuli: ubi me pæne totum crudelior fortuna evertit. Nam cum Hyacinthinam in aurem fabro traderem, pretiumque velut ab alio empturus roga-rem; quanti, inquit, crystallum emeris ineptis ac rusticis fucis imbutum? Tum ego smaragdum porrigere, ac pellucidam unionem, quantam Ægyptia mulier non diluisset Antonio. Sed cum omnia ejusdem notæ essent, non averti tantum artifex aut spernere; sed convitiari ac palam non impostorem modo, sed furem dicere cœpit. Quotquot vero permeabant per sublicium pontem: cum teneri furem crederent, sic restabant ante ædiculæ limen, ut liberæ undæ ad subditi obicis retinacula colliguntur. At ego non alias minus vivus omnem doloris sensum amiseram; nec advertebam hominem omnes vestium mearum recessus importune scrutantem, palamque effere-tem

tem saxa gemmarum colore tecta, laminas æneas, quæ auri speciem tenui cælatura traxerant. Igitur non amplius audiebam ut latro, sed ut adulterator monetæ & publicæ vindictæ servandus, cum subinde redeuntibus nervis in hoc saltem miseri sensus patuerunt, ne ignorarem me miserimum esse. Tum profusis lachrymis, vultuque qui non tantum à me nefas commissum esse diceret, jam silentem populum & audiendi avidum affatus sum. Si non omnis miseris fides cum calamitate decedit, illud juro, non scelere meo, nec fraude, id quicquid est concitum turbæ: Virtus, & credulitas fidei meæ testis, in has me angustias conjecerunt, malitiæ dolique rudem; de quo id hætenus sensi, primum esse nefas in se admittere, secundum in alio suspicari. Itaque cum heri bonæ fidei integritatem, seu verbis, seu incessu, seu etiam aliquo gestu, incautus prodidissem, visus sum præstigiatori turpissimo facilis præda, & quæ maculas magis pondere, quam exeundi subtilitate turbarem. Nec illum fefellit opinio. Nam hæc pæne inania gemmarum simulachra sesquitalento permutavit.

Cum non solum lamentabili fletu sermones meos, sed omni etiam execratione firmarem, circumstantis populi impetum statim fregi. Itaque aliis ad risum, pluribus ad commiserationem versis, peto rogoque, ne mihi nullo merito calamitoso desint: eant una in sycophantæ domum, & sceleristam atrocis præmium ex facinorosis manibus extorqueant. Id saltem solatium paupertatis fore, si non inimicum ditavissem. Assentantibus cunctis, seu qui odio in scelus ducerentur, seu quos in miserabilem pietas excitaret, seu denique qui turbas ad flagitia peterent, ducem me præbui; cum subito lictores publici astiterunt ad latus, molestissimo satellitio, & aut in meam, aut in æmuli pecuniam intenti, quorum paulo ante aliquot nobile suæ artis facinus ediderant. Nobilem fœminam de curru detraxerant. Flagitabant nummos, quos nescio  
quis

nus cogitasset, sed etiam prædæ participem, per indignam advenæ calamitatem augeri. Receptatorem latronum, & ipsis pejorem aggressoribus ad publicum exemplum castigari debere. Nihil mihi unquam illo jucundius extitit: quoniam non deerant, qui vincendum cauponem, ac servandum dicerent. Sed nihil fiebat tardius, quam quod omnes imperabant. Nullus injiciebat manum, aut pro imperio in custodiam sequi jubebat. Nam lictores, ut qui lucrum captarent, nec hominem tenebant, quoniam postea dimitti non poterat; nec abituri erant, nisi sceleris pretium supra debitam justî officii mercedem duplicaretur. At diversitor, seducto ex lictoribus principe, quadraginta denarios in singulos lictorum, qui adessent, erogaturum promisit tanta subtilitate, ut nemo adverterit, nisi per similem malitiam doctus. Incipiebat mihi esse suspecta lenti supplicii mora, cum lictor, cujus venalis fides conductam operam præstabat, vanum esse de quo disputaremus ait: id solum quæri, num adesset qui me adulteratis geminis deluserat. Scrutanda penitus omnia, nec abditissimis domus latebris esse parcendum. Tum irrupit in ædes, & stabulario nequissimo (id quod moliebatur) effugienti locum fecit. Interim ad negotia populus deflexerat, & ut in tumultibus solet, omnium impetus in turpissimum languorem desinebat: cum solus, & invisus, ad sceleratum limen adstarem, & lictores omnia permiscerent in ædibus affectata diligentia, quæ quo erat falsior, eo struebatur solertius. Cumque inanem diu laborem finxissent, tandem nunciant abesse hominem, & si quid in cauponem haberem, magistratus jussu ad judicium evocandum: se non posse indemnatum, & cujus flagitium erat ita obscurum ut posset negari, in custodiam trahere. Id restare, ut largius laboris mercedem numerarem: quoniam bona fide me sequuti tres pæne horas consumserant. At ego tanta improborum contumacia excitatus, negavi aliquid proditoribus daturum, præter pre-

ces, ut evenirent quæcunque publicum in illos odium quotidie concipiebat.

Nec jam languide iratus ad Prætoris urbani tribunal devolo, scelus cauponis & liكتورum perfidiam veris indiciis delaturus. Erat autem in Arcula (ita Prætorium appellant) tam frequens concio, ut instar unius molis aut corporis coiret arcta & congesta frequentia. Simul movebantur, una cessabant, & quod est rarissimum, uno veluti ore nunc fiebant, nunc in risum effusissime concitabantur. Cum jucundum remissumq; tribunal admirarer, adverto judicem indignissimum qui inter mala verba habitat, sublimi sede, vultu gravi, ore ad antiquorum majestatem composito, pæne ad ridiculam controversiam moveri, ut severitatem judicantis non servaret. Stabat enim ludicro amictu reus, ore purpureo, viridi cucullo, cur cum fatuorum principatum aliquot jam annos tenuisset, repente æmulus tantæ fortunæ controversiam faciebat. Nec deerat patronus magnificæ causæ, qui principem numerosissimæ gentis de statu dimicantem tueretur. Illum patre, avo, majoribus fatuis ortum prædicabat; matris familiam nunquam sapuisse, nec pium filium degenerasse à gentilitia mente. Meminissent magistratus, in quanta causa judices sederent. Concuti rempubl. si bene animati in Principem fatui ducis injuriam persequerentur; qui me hercle, inquit, si omnes ad arma properabunt, non inveniet sapientia defensores. Quot enim vel ex istis, qui me nunc audiunt, taciti, & velut in partes non abstracti, si semel Moris vexillum effulserit, pro stoliditate pugnabunt? Non hoc seculo Clazomeniis solis infanire publico decreto concessum est. Nihil tutum nihil syncerum relinquetur; nec aliud pugnam cædemque prohibebit, nisi si forte in quos sæviant non habebunt. Magna imperia nec apud prudentes sine formidabili concussione mutantur. Verendum est, ne, si tantæ multitudinis jam placida tranquillaque moles excitabitur, non magis de imponendo duce, quam de sedando exercitu

exercitu quærendum sit. Patiamur fatuos conditionem suam ignorare. Sint suo iudicio prudentes, nec cogamus & vitium eos & vires agnoscere. Adjuvabat omnia princeps fatuus, ridentibus lachrymis, nutuque, si vinceret, singulis apud se dignitates destinans.

Videbam non vacare miseriis meis iudicem, neque potius per me quam per disertos patroni questus rem publice deferendam. Itaque cum hora pæne duodecimalitem jucundissimam dimisisset, admiratus tot causidicos è subsellis surgentes, quot olim causæ non erant, omnium ora vultusque pensabam. Illius torvum supercilium horrebam, illius explicatam lascivamque barbam oderam: nec erat quem non aut reverentia aut fastidium prohiberet adiri. Cum jam omnes dilaberentur, seu fato, seu fortuna, postremus excessit vir censorii vultus, ore, incessu, modestia Cato: *Quem* ego tandem audacior cum submissione vilissima salutassem, si es, inquam, quod te hominum existimatio, quod te probitas, quod ipsa iustitia prædicat, conditionis miserorum columen, afflictæ virtutis patronus, noli contemnere benefaciendi materiam, quam heu! meo tibi damno fortuna suggestit; quem ex florenti statu facilitas astutis prædonibus patens in indignam calamitatem misit. Tum prolixam mali seriem dolentibus verbis, & ipsis pæne gemitibus in conspectum dedi. Nec pro re moveri videbatur. Sed postquam medium ejus, quod ex lite consequeretur, promisi; tunc allevare oculos cœpit, tunc mulcere animum meum, dolorisque ultionem promittere. Igitur postero die ad tribunal adesse iussit, vultu quantum possem funebri, liberali tamen veste, fictaque constantia, ut viderer iudicibus & bono loco esse, & solo adversarii scelere miserabilis, cætera suæ fidei concrederem. Cum sic ab eo discessissem, ut omnia optimo statu esse putarē, liberius totum diem variis cogitationibus impendi; nunc Callionem æ Fibullium in meum supplicium incensos,



nunc crudelem Percantis adulationem reputans, si qui me casus ad immite servitium retraxissent : & frontiliteras esse, quas crinis utcumque celabat, velo ut in obvios nec cogitantes fideli, ita in curiosos & scrutantes imbecillo : & me testibus, si negarem, posse convinci, & ipsam domini potentiam mihi copiam defensorum non facturam. Contra obstabat regium Gelonis nomen animusque supra servum erectus, & nullum de ignota stirpe præjudicium, nisi quod de externis præclarius sentimus.

Cum hæc sollicitudo animum in crastinum protraxisset, iremque ad Prætorium, occurrit in ipso aditu vir, qui magnificus videri poterat, si quod inter illustres vestis discrimen faceret, meque nec cogitantem benignissime salutavit. Incipiebam timere, ne venales etiam gemmas afferret, cum ille habere sedixit quæ è re mea forent audire : commodarem aliquantulum aurem, neque si me aliqui circumvenissent, ex alieno scelere suam fidem metirer. Quamquam omnibus diffidebam, non videbam tamen quæ fraus timeri ejusmodi colloquio posset. Itaque humanissime, & tempus, & secretum, si res postularet, promitto; simulque in oblongam porticum descendens, cœpi expectare sermones hominis longa cogitatione ac veluti suspiriis sibi præfantis. Non alias, inquit, durior natura extitit, quam cum levare mala voluit atrocibus remediis, ut interdum morbo sævior medicina valetudinis desiderium tollat. Multi dolores non leniuntur, nisi membra quæ dolent excutes, & interdum est levius ægotare quam sanari. Id ipsum quoniam deteriora Naturæ imitatur, humana disciplina decrevit. Etenim lædi, spoliari, contumelia violari, magnum malum, & seu famæ nostræ, seu fortunis acerrimus morbus: sed remedium diluit tam amarum consuetudo nostra, ut non tam invitare videatur ad sanitatem ægros, quam sanos prohibere ne doleant. Iudicia dico, & crudelissimos Advocatorum astus; quos, si litigare persistis, intelliges nihil minus quam prædo-

prædones sævire, nisi quod lentius cædunt. Ille diversitor per quem damnum te fecisse clamitas, ecce tibi omnibus modis purgaturus crimen est, etiam sponte pecuniam refusus, quantam nulla tibi judicum sententia dari imperet. Conscium fuisse scelesti consilii, quo te fucatis gemmis vir nefarius delusit, negat. Sed cum noller domum suam infamia laborare; te prohibuit cū liCTORIBUS irrumpentem in ædes. Et jam anxias litium curas, jam avaras patronorum artes omni pretio redimit, me legatum ad te misit, utpote qui mutui commodi admonerem. Tuo bono reduces vestigia, dum adhuc in limine hæres, nec dum interior tractum adducto velut ostio incluserunt Patroni iniquissimo labyrintho: ubi te calumnia atque mora, omni Mæandro pigrius stante, ludificantur. Semel mihi controversia fuit, quam componi per Iudices vellem, cum omnes interpellerent stultitiam meam, &, quod nunc tibi vaticinor, mihi plerumque minitarentur. Audies, hospes, rem admirabilem, & quæ te non alio stupore circumfundat, quam ut quæras, num eo usque pertigerit mortalium scelus. Eram passus atrocem ab amico injuriam, qui epulis obrutus, postquam appellavit contumeliose, etiam graviter multaverat, immisso in me servitio, dentemque, ne nullum esset sceleris vestigium, ab ore excusserat. Quid multis? conveni in judicio: elegi patronum qui cum disertissimis certabat, nec corpori parcebam, nec pecuniæ. Sed hoc mihi nocuit, quod incideram in opulentum hostem, qui prævaricatorem turpissimum (illum, inquam, qui mihi Advocatus erat) duobus talentis emit; ut non amplius nisi sua voce loqueretur. Languebat Oratoris mei facundia, quoties jubebatur pro me loqui, nec sententiæ sequebantur, nec pæne cohærebant verba: ut Iudices eloquentem hominem crederent non naturali vitio, sed causæ infirmitate labascere.

Cum igitur spem meam multis dilationibus frustraretur, tandem exactis aliquot annis resta-

bat, ut quæsit or aliquis pronunciaret. At ille nefarius, suspectos mihi plurimos ex iis qui sedebant in causa iudices proclamat: ac ut in me moveret odium, quanto non laborant nocentissimi rei, petit ut sancti quique Iudices nominatim excedant; id à me mandatum iniquissima vociferatione firmabat. Aberam unius diei itinere, cum hoc per amicum literas nunciatum reditum meum in urbem tantum non præcipitavit. Nihil expeditius videbatur, quam ut hunc probare possem dolo malo intervertisse causæ meæ famam; ac cum deinde sequester, de cuius manu talenta duo ab adversario meo sumpserat, interpositis inimicitiiis, rem ad me detulisset, in jus vocare hominem, & prævaricationis accusare ausus sum. Exitum meæ miseriæ sic comprehendam, ut & intelligas nefarium scelus, nec mihi molesta sit fusa calamitatis narratio. Tot artibus agit, tot fucis circumamictum crimen suum velavit, ut immineret periculum, ne in me velut laceffitæ innocentiae temeritatem vindicaret. Vicisse mihi visus sum, quia non perii, nec aliquid amplius impetrarunt amici mei, quam ut integra fama possem à lite discedere.

Non nego sanctitatem Iudicum hæc mala mulcere, non patronorum sanctitatem (eorum qui à communi facinorum orbita deflectunt) publicam aliorum infamiam velut abstergere. Sed notum naufragiis mare non salute aliquot navium amittit crudelitatis nomen; nec proba est Sirenium vicina, quoniam transeuntem Ithacum non evertit.

Iam vero quibus pœnis digni sunt, qui hos homines propellunt in forum, qui, inquam, nihil minus quam peritos æquitatis humanæ ad Oratorum subsellia trudent? Sacerdotes & Antistites Themidis dico, quorum è scholis inexpertè adolescentuli cum empto testimento ad clientum ruinam ac pæne fatum proruant; ut, quod olim ferebant: *asinus ad lyram*, id oraculum putem in hæc tempora destinatum. Quid ille qui nuper cum inter patronos referri quæreret, protulit testimonii libellum, quem non magis quam Iurispruden-

tiaꝝ codices lectum, etiam sibi absens procuraverat? Credebat contineri, se civilis scientiæ studiis meruisse quem omnia tribunalia audirent. Erat autem scriptum, illum medicinæ peritum cooptandum in numeros eorum, qui præcocia fata saluberrima ratione morarentur. Hinc risus ab iis plurimum editi, qui tantum eruditius peccaverāt. Videbatur haud spernenda monuisse, volebamque ulterius audire suadentem, cum Percas ad me vestigandum missus, nescio qua fortuna in eandem porticum se conjecit, meq; nec opinantem sævisissima oratione perstrinxit, & teneo te, inquit, Euphormio, teneo fugitivum, teneo ea cruce dignū, quæ etiam ultra mortem desæviat. Cum assuevissem esse miser, & pallidi vultus nullo metu ultra possent albescere, intentavi in irruentem manus, & constanti lumine tantum non transfixi minantem: ac deinde cum asperrimis vocibus detonaremus, & ille veluti pro præda, ego pro salute dimicarem, jam ad volaverat ad nos populus, quantus pridie ad cauponem non iverat, & tanquam in arena luctantes etiam pæne hortabantur ad pugnam. Sed cum ille me servum vocaret, ego impostorem dicerem; cum ille Callionem, ego libertatem, inclamaremus, alius minis, alius fletu ageret; uterq; veluti per compendium confluentes ad spectaculum homines suæ causæ admonet. Ille Callionis servum, Callionis fugitivum dicebat; Ego contra liberis parentibus ortum, unaque cœna improbe emptum referebam. Visa res multitudini digna, quam non aliis mandaret. Statim obtinet miseræ favor, statim vindicias secundum libertatem dandas censet; Percantem importunius obstantem expellit. Ego vero per Curiaꝝ veluti posticum egressus mox Alexandria me proripiens, & in tutiorem urbem discessi; & quoniam res ad populum traducta est, vos qui hæc auditis, qui legitis, quamquam estis omnes improbi iudices, non recuso.

## P A R S S E C U N D A.

Illustrissimo &amp; Nobilissimo Heroi,

R O B E R T O C E C I L L I O.

Comiti Sarum, Summo Quæstori, &amp; Regionum Secretorum Præfecto, Nobilissimi Ordinis Periscelidis Equiti, Sanctioris Consilii Senatori Sanctissimo, &amp;c. Euphormio S. D.

**N**ihil mihi debes, sed virtuti tua (Inclyte Heros) quod hic liber honori tuo datur. Neminem oportuit omnino in publico questu, & qui in vitia non patebas, saltem nimia virtutis debuisti accusari. Durum enim impetisti mortalitatis onus, quam posse ad tantum fastigium pervenire docuisti, pane ad Superos virtutis consortio proventus, sicut nemo humana Natura imbecillitate jam aut humilitatē suā ignaviā excuset. Et hanc accusationis tua laudē quicquid hodie est eruditorū ad Nepotes mecum deferent, eritq; mirabilius, quod jam Orbe senescente repertus sis, qui omnibus fama magnitudine umbram feceris, quorum fidem vel industriam antiquitas laudavit, licet ad omnium seculorum interitum scelera morientibus virtutibus succedant, neque Cronus magis veritatis quam vitiorum pater sit. Ego sane tibi hoc libello, veluti longo plausu gratulor, cujus sonus in omnem ætatem durabit. Et quidem tua gloria meos & meorum enses vorari, nec interim credidi inutile munus, si te quoque exermis colerem, & tuum nomen legeretur in hac charta, quam publici favores tam benigne suscipiunt. Magni homines scribingentium pennis ab invidia nubibus ad aternitatis sudum feruntur, & quantum ad posteros nihil amplius Achilles fecit, quam placuit benevolentia Homeri. Et nunc quidem satis erit te Quæstorem isti judicio fecisse, ut omnia facinora tua voce damnentur, quæ in hac Satyra velut ad tribunal tuum coegi. Caterum hoc deinceps vigilantissima devotione enitar, ne quid ex tuis virtutibus posteritatem lateat, & tanto latiori volumine, quam quod hic vitia castigat, tuas laudes implebo quanto est humanius gratulari dotibus natura, quam flagitiis irasci. Vale.

**I**O nunc exilia atque luctus, io mortalium scelus & fraudes, & quicquid in Euphormionem crudelius Numen invenit; io nunc cessistis triumph-

triumphanti ! ego te, quicumque Euphormionem Deus urgebas, ego te pertinax fortuna lassavi. Iam de fluctibus extuli pedem, jam evasi de naufragate, & arenulam securis osculis adoravi. Et nunc de littore Oceanum lustro, cautesque & vada, quibus me iniquior tempestas illisit, gratissimo horrore contemno. Iuvat ô Lufiniam reliquisse, juvat per errores meos, & Callionis injurias, fraudesque sodalium, hanc conditionem emisse, quæ me hodie florentem contumacibus fatis ostendit. Sine causa irascebar meis malis : & me cum Themistocle calamitas felix in altiore extulit sortem. Ecce jam effugi fortunæ imperia, ecce jam in Scolimorrhodiam perveni, regionem felicissimam, meaque Lufinia meliorem. Illic me miseriarum pelago vagum humanior portus accipit : illic tranquillior aura demulcet, & jam Parcæ iuribus decretis suum in me crimen excusant. Hac mercede calamitas placet, & quam antea miserabili stilo depinxi, ea quoque jucundissima serie hanc chartam implebit. O sordidi amatores terrarum, ô capaces scelerum mentes, neque vos peccandi libidinem explevistis, & ego maledicta non consumsi. Iam in Scolimorrhodiæ littore tutus insisto, jam donaria templis appendi, & in ipsa residens ara ex qua diis æquoris libavi, vestra flagitia atque nefas liberrima exprobratione promulgo.

Cum Alexandria discessissem, & crudelitatem Percantis fugiens, & Callionis potentiam, ipsa malorum consuetudine robustus, per varias gentes fluviorumque discrimina instar Æneæ aut Vlyssis diu exilium meum circumtulit, donec in amoenissimam civitatem descendentem ex vicinis montibus ædificiorum cultus, & camporum pulchritudo, aliquam quietem persuasit. Flamen satis capaci alveo planiciem, quæ inter montes extenditur, percurrit ; & humore æqualitatem camporum colliumque radices subeunte, liberalis gleba rerum omnium culturam admittit, summi montium vertices lætissimis sylvis æsta-

tis voluptatem, & hyemis subsidium alunt: vi-  
tes deinde atque horti continua serie ad planiciem  
extenduntur, quæ in pascua & fruges distributa  
innumerabiles vicos pæne in civitatis majesta-  
tem conjungit. Circa urbem hinc felicissimum  
olus, hinc aperta ambulanti- bus spatia visuntur,  
præcipue qua fluvius exceptum convallibus mon-  
tium calorem lenissimo tepore perfundit. Urbs  
ad utramque ripam posita satis operoso jungitur  
ponte, habetque non superbæ molis domos, sed  
lapidibus optimis & elegantissima arte porrectas.  
Delphium urbi nomen est. ibi plures externi  
quam cives, propter commercium literarum vi-  
vunt: quippe disciplinarum studia non alibi il-  
lustriora habentur, & Acignianorum fama velu-  
ti ad orbis supplementum æternam ibi juventu-  
tem conservat.

Ego vero posteaquam intellexi, quam multi se  
literis ex paupertate vindicassent, etiam ignoran-  
tiæ pertæsus, quæ mihi rerum antiquarum noti-  
tiam auferebat, ut neq; veterum miseriis ad sola-  
tium uti possem, constitui me in eruditorum disci-  
plinam dare. Iam grandior adolescentia, & pæne  
in maturam virilitatem declinans abhorrebat à  
puerorum consortio, quibus me elementalitera-  
rum miscebant: sed non fui sub pudore, & meta  
itineris, quod intrabam, omnem saxorum scabri-  
tudinem, spe dulcissima lævigavit. Etiam persuasi  
iracundiæ meæ, ne repudiaret beneficia, quæ ab  
Acignio offerebantur, id est, ne injurias, quibus  
olim innocentiam laceraverat meam, in me ipsum  
stultissimo furore punirem.

Igitur angusta habitatione contentus, mihi de  
quibusdam libellis qui ibi optime emuntur, provi-  
di, & ad gymnasiarcham Acignii ministrum veni.  
Ille tum terribili gravitate in nescio quam puero-  
rum levitatem sæviebat, & pæne me ipso superci-  
lio instar simulati Saureæ abegit. At vero postea-  
quam animum explicui meum, excusaviq; annos  
quibus iniquior fortuna inviderat mansuetudi-  
nem studiorum, sane visus est misereri meæ sor-  
tis,



tis, quæ mihi pueritiæ labores in illam ætatem servaverat: & aliquantulum hortatus, ne pulcherrimum cursum finerem contrariis ventis perverti, me ad infimi ordinis Scholasticum manu duxit, & in auditorum numerum redegit.

*O pater, Aonia moderator maxime turba,  
Qui Xanthum Lyciamque colis. Delonque vagantem,  
Et Clavon, & Delphis, famam vocalibus addis:  
Da faciles vultus, meque ad tua limina deduc.  
Non ego Bacchaos insana per avia thyrsos,  
Non buxos Phrygias, aut sancta silentia posco,  
Queis Cæla domus, queis se bona jactat Elenfis.  
Tū tantum mihi Numen eris: te præside terras.  
Phæbe pater, totumque licet contemnere calum.  
Te, cum dispositis imponis carmina nervis  
Mirantur laudantque dii, vincique fatentur:  
Et qui certa fero molitur fulmina jactu:  
Et qui Bistonis acer dens imperat oris.  
Nec minor in terris regnans, pater: Orphen nigri  
Victorem sensere Dii, tecumque loquutus  
Horriferum Ajacem timidus confecit Vlysses.*

Cæterum quod in pueris est severitas parentū, aut supplicii timor, illud mihi erat pertinacia virilis, & proprii consilii decretum; ut improbo labore ætatis dispendium redimerem. Et qui quondam tam severus alienos pensaveram mores, tandem eruditis cogitationibus intentus supervacuas omiseram curas; cum Acignianorum discordia, quæ illos in Delphio cum quibusdam etiam literatis committebat, me ad pristinam indignationem reduxit. Proh cæca vitiorum libido! proh rerum minimarum in ingentia crimina sat patentes angustię! Non leviori collidebantur certamine, non minus atroci ambitu pugnabant, quam si diadematæ fortunam tam ludicra promississet victoria. Qui aliis imperarent in angusta urbe, inter homines liberales quidem, sed obscuros, pertinaci æmulatione quærebant, sufficebant odiis inania dignitatis nomina, fascesque sine securibus puerorum tergis hærentes. Nulli interim severius in ambitum dicebant, nulli frequentius numerabant  
super-

superbiæ mala: & dum parvis occupati nesciunt se gloriæ impendere miserrimam mentem, in illustrem ambitum magnatum, in sollicitas Principum curas ridiculi declamatores inquirunt quasi intersit inter sordidâ & magnificam vanitatē, nisi quod hæc peccandi impotentiam ostendit, illa autem splendidis velis saltem mortalium crimen excusat. Nam ut optime messes fortiore nutu ventis resistunt, & inanum segetum cassi vertices nullis auris obluantur; ita capacibus honorum non nisi digna gloria imperat, immerentes autem solum dignitatis nomen corrumpit. Romani Bletonesios publico iudicio postularunt, quod hominem Diis immolavissent; cum ipsi duos Græcos, totidemque ex Gallia mulieres in foro Boario etiam per sacrorum superstitionem viventes defodissent. Adeo malignum est de alienis iudicium, & multi cum Acignianorum turba irascuntur illis vitiis, quibus ipsimet suam famam indignissime maculant.

Hæc sæpius reputabam inter Musarum otia, cum interim aliquantulum deflexit meæ fortunæ malignitas, & quietem ad colligendum spiritum concessit. Erat in Delphio vir externus, omnium suffragiis ad probitatis famam provectus; Themistius appellabatur. Is cum modicas opes sua industria quæsisset, neque genuisset liberos, se nonnunquam fortunatum prædicabat, cui arbitrium hæredis natura concessisset. Ego me in illius familiaritatem non altiori spe, quam jucundissimæ consuetudinis, immersi: cum nescio quo Deorum beneficio mei mores & ipsa cupiditas sciendi optimo seni placuisset. Forte per auditorum ordines promotus exordiebar sapientiæ studium, cum me Themistius in proprios penates recepit, & cum tempore convictuque fatalis amicitia crevisset, nec repugnante conjuge, quæ jam anus non cogitabat de liberis, in bonorum hæredem adoptavit. Cæterum aversatus improbitatem mortaliū, non minus sæpe querebatur quam ego, quod olim florētissimam patriam incautus juvenis reliquis-

liquisset, quippe se in Scolimorrhodia natum esse, felicissima regione; ubi cælum optimos campos continuo tepore perfundit, & tardissima senectus resolvit expectantes; illic autem homines vivere, non quales in aliis regionibus videbam, sed synceris animis innoxios, & qui à Deorum vita sola mortalitate discreparent. Sed dum in exteris regionibus, inquit, adolescens vagarer, forte incidi in amorem, qui me veluti per Calypsus aut Circes blandimenta perpetuo exilio damnavit. Nam cum istam conjugem duxissem, elegantia morum & formæ pulchritudine mihi conciliatam, nunquam aut illi persuasi commigrare in patriam tam felicem, aut mihi, ut relicta charissima parte solus tantis bonis incumberem. Tu vero Euphormio, quem mihi jam præcipitanti in tumultum velut ad extremum solatium fortuna perduxit, si fides amoris meo, cui ad orbitatis levamen sufficisti, vide ne, cum extremum mihi diem numeraverint fata, hæreas in istis regionibus, ubi nihil invenies aut Scolimorrhodia mea, aut Lufinia dignum. Sed in patriæ meæ humanitatem concede: de qua tantum timeo, ne tibi omnium charitatem admiranti etiam in contemptum mea benignitas veniat. His ille & similibus verbis sæpe apud me extollebat Scolimorrhodiam; ut jam nec dubia mihi esset profectio, si tam bono parenti superviverem. Sed discedere à latere spirantis neque ego voluissem, neque ipse nisi molestissime laturus videbatur.

Ecce autem dum in hac felicitate saginor, & pæne errorum memoriam tam commodi penates obruunt, jam in alia terrarum parte mihi nova malorum semina fortuna quærebat. Quippe florebam in alia civitate, fama que pulcherrima ubique efferebar, quod veluti secretus cum Themistio vivebam; neque Iupercalium videbam lasciviam, & cum sibi dissimilis Saturnus gaubebat, publicam licentiam mea absentia damnavam. Jam me modestiores ambiebant, neque erat parum ad laudem, si quem frequenti consortio dignabar.

gnabar. Forte accidit ut inter Themistii cultores juvenis quidam optimæ frontis, quodque maxime amabam, pæne nimia modestia lenis, meam familiaritatem pertinacius quæreret. Nec contentus communi benevolentia, quam facile in omnes expromebam, ad arctioris amicitiae sacramentum incitavit. Non potui diu negare tam officiosum munus, præsertim cum pignora haberem animi non languide ad virtutis difficultatem exsurgentis. Itaque paulatim ad extremam charitatem deducti sumus; restabatque arctissimæ necessitudini, ut illi prioris vitæ miserrimam seriem narrarem: ego vicissim, quis esset, & ex qua gente aut parentibus cognoscerem. Hæc diutissime non sine pertinacia celavimus: nam & ego contemptum ex tot fortunæ ludibriis timebam, & ille altioribus causis deterrebat aut patriam aut genus confiteri.

Forte in Themistii umbraculis eramus, & post suavissimos sermones, ego vero inquam, Anemon, si tantum mihi virtutibus notus esses, tamen rogarem cui arbori preciosum surculum orbis deberet: nunc vero quoniam intima vitæ consuetudine permixti in eandem felicitatem eodemque juravimus casus, noli admirari, si vehementius exopto, & parentum fortunam, & rationes tuas, nihil dissimulata oratione audire. Ille corpus meum amabili brachio incinxit, oculisque mœrore blandissimo in me defixis: Vides me Euphormio? inquit; mihi crede, & hic cultus & vivendi ratio meæ gentis dignitatem subtilissima ratione mentitur. Quippe magnis parentibus natus in hanc communis vitæ simplicitatem, mea sponte, & clandestinis consiliis descendi. Jam illud à pueritia cognovi, quantis casibus humana omnia vertantur, & nihil tam securis radicibus niti, in quod violentia fatorum non valeat. Nam ut pater in altiorem conscenderat locum, eo apertior tempestatibus fortunæ, nullas rerum vicissitudines, & inconstantiam Principum intacto remigio evasit. Quis ægritudines  
animi,

animi, quis spem implacidam, aut pervigiles curas, nunc metuentis ruinam, nunc aliis imminuentis exponat? Et hæc mihi videbam instare, si in parentis vestigiis hærerem: vitam sollicitudinibus veluti assiduis sentibus horrentem: ut ambitioni, & curis & nunquam voluptati sinceræ sic vacarem, ut mihi impendere diem non possem: successuram interim mortem, quæ in ultima scena aulæum tolleret, & veluti puerorum lusum finiret. Audiebam quæ multi de æternitate loquebantur, & illius cupiditas mihi turbam, aulasque & negotiorum nomina invisa faciebat. Neque languide ambitionis & potentiæ supplicia effugi. Nam cum me destinatum audirem ad artes theatro arenæque simillimas, ut gladiatoriam facerem, neque aliud ex prisca doctorum hæreditate quam citharam haberem, primo impetrare veniam tentavi; ut ad serium animi otium mihi literarum studia darentur; & posteaquam obstinatum parentem minime inflexi, communicavi audaciæ consilium cum uno Acignianorum, qui mihi primus hunc syderium amorem iniecit, & exiguo comiteatu in hanc urbem furtivis itineribus prorepsti: ubi si me scholasticorum industria produxerit ad consuetudinem Musarum, statim in arcanam Philosophorum disciplinam me dedam, illorum quibus unica est sollicitudo, per molestias corporis laceffitamque paupertatem synceros animos syderibus transfundere. Et nunc parentes mei desolatæ senectutis orbitatem queruntur, mihi que per lamenta & miserrimos planctus certiorum ad Numina viam sanciant. Quod si me audis, Euphormio, & potes felicitatem levissimo impendio emergere, tu quoque Themistium relinques, abdicatisque mortalitatis commodis te in clientelam syderum committes.

Post hanc orationem etiam vehementius Anemonem amavi, & exosculatus sum impetum animam aversum ab humilitate voluptatum. At cum indies inter nos musitaremus de Philosophorum

rum vita, ad quos ipse properabat, tandem ego non conscius tantum consilii, verum etiam particeps evasi. Ipsum conspirationis secretum, quod inter nos fidelissimum erat, & præterea quod amicos ab hac mente aversos sciebamus, utriusque pertiniaciam maligna voluptate acuebat.

Cæterum cum consuetudinem meam tristiori severitate horrentem Themistius miraretur, diligentiusque ponderaret sermonum meorum sanctitatem, non potuit amplius decipi, & pæne mecum orationem habuit, quæ Æneam Carthagini stitisset. Sed non profuit apud obstinatam mentem, cum etiam crudelitatem in pietatis parte ponerem; illudque omnino respondi: apud me quidem omnia quæ sunt in humanis rebus Themistio cedere, Themistium autem cælo. Ille post iracundiam, & lachrymas, & cætera quæ in me valitura arbitrabantur, cum aliquando manus dedisset; si fata, inquit, voluissent, Euphormio, ut pios digitos meis luminibus ad extremum officium admovisses, neque ego me sensissem mori inter tuos amplexus, & has opes, quibus senectutem meam oblecto, etiam post interitum servare credidissem. Sed quoniam fata inviderunt miserrimo seni, & te fortasse malignior fortuna exagitat, ego quidem longo luctu tuæ familiaritatis pœnas luam, te vero & consiliis informare antequam discedis exopto; & quoniam ad tua in Italiam vota contendis, honesto cultu instruere, ne te Philosophi ad se egestate compulsum arbitrentur. Cæterum ne pelagus ignores, quod audacissima nave ingrederis, tibi ego tempestates, ego fluctus, & fortasse pœnitentiam prædico, & si te humana consilia in illos cursus egerunt, nihil de naufragio dubito. Me quoque dum primam adolescentiam ex aliorum consiliis regebam, pæne eadem procella evertit, cum blanditiis invitater ad laborem, & pæne hamum sub spe dulcissima non sentirem. Quid infestis vocibus planorum audaciam ad publicas deposcimus pœnas: aut quid illi tam triste merentur, qui cædibus iracundiam satiant?

tiant? cum inter nos impune versentur grassatores urbani, qui familiastotas excidunt, & quod de Sirenibus loquuntur, audientes per saxa & naufragium ad imaginem voluptatis invitant. Hæc est illa dissimulata Iuno, quæ tot Semelas hodie prætextu syderum pervertit, hæc crudelissima pestis, quæ orbitatem clarissimis gentibus & solitudinem fere reipub. implacabili furore minatur. Nam ut feræ quæ semel maculas ruperunt, magis indomitanatura se sylvestribus damis abscondunt; ita quicunq; delinitiblandimentis se in sanctitatem illius Philosophiæ dederunt, posteaquam male fundatos conatus aut constantia aut robur destituit, pudorem voluntaria solitudine intra penates suos damnant, vel licentius libidinibus indulgent, ut sincere videantur priorem consuetudinem ejurasse. Neque Philosophi post tot familiarum incommoda, post omnium publicos questus, à damnatis criminibus recedunt: sed imprudenti ætate abusi ita de æternitate loquuntur, ita flammæ & supplicia, & severitatem Numinum inclamant, ut juvenes nondum satis adulto robore ingenii obstupescant ad tot monstra, nec aliter se declinaturos scopulum existiment, quam si in eorum nave trajiciant. Quod si ea mente agerentur, cujus nomen inanibus larvis præfigunt, si vero Numinum & adolescentiæ amore tenerentur, illud saltem cogitarent; non omnes ea firmitate animi esse, ut desertis voluptatibus in aspera Philosophia durent; etiam plerumque maxima ingenia avidiora libertatis suæ esse, & raro solitariæ gravitatis vinculis posse constringi. Nunc autem quasi nulla pars reipublicæ præter Philosophiam procuranda sit, omnem adolescentum industriam ad se vocant, & veluti tyrannicis dictis territiæ juventuti imperant: neque ferre ulla avis non relinquit ad vimina plumas, quæ illos aucupes audivit. Quid quod diversæ Philosophorum Scholæ subhorridis præceptis suos greges distinxerunt? Omnes subiisdem votis argumenta adolescentibus proponunt, omnes eundem



exitum laboribus profitentur : tamen vix aliquis ex iis adolescentem laudabit , nisi qui in eandem Philosophiæ sectam in qua ipse vivit, jurabit. Adeo pæne omnia sibi mortales affectus in ea veneratione vindicant ; & Philosophi miserrime decepti non sapientiæ cultum , sed suam rempublicam diligunt.

At vero miseriparentes , quorum periculo isti quotidie peccant tam inultis sceleribus , post ingratham sollicitudinem curasque, & sæpe prodigum amorem, cum primam tot laborum mercedem à jucunditate adolescentum expectant , omni spe fraudari plerumque suam messem hoc turbine interversam deplorant : sed nec tutis suspiriis desolatos penates prosequuntur, dum simplicitas vulgi omnibus fraudibus aperta, quæ religione adumbrantur , lamenta orbatæ senectutis pro flagitiis accusat, & ne in hoc gradu calamitas consistat, cum parentes lachrymis & tempore pæne dolorem exsaturaverunt, sæpe liberos abdicare Philosophiam, non minore indignatione , quam cum eos amiserant, vident. Tu tamen , Euphormio, si te non vera prudentia , sed veneficia ambientium juventutem ad hanc sollicitant vitam , & alienando in ea defessus ad priorem quietem suspirabis, noli multum tuo peccato imputare ; & ego immodestius lætabor, si jam conclamatus filius mihi iterum vivet. Cum in hunc modum affectu simplicissimo perorasset , & optima mulier implevisset omnes intimæ vestis recessus ingentibus donis, ego ultimis amplexibus acrius amorem irritavi, ac deinde cum Anemone Delphio profectus sum, & in Italiam iter converti. At vero posteaquam superatis navibus Mediolanum pervenimus , cum fama civitatis nos aliquandiu terneret, non sine dædum mente occurrit, qui hunc impetum saluberrima ratione moraretur.

*Qui fluctus tumidos, aut facilem notum*

*Mutare, aut tepidis vellera nubium,*

*Quæ semper coeunt veris honoribus,*

*Audaci poteris modo*

*Certis subdere vinculis ;*

*Hic solus juvenum corda ferocia,*

*Hic solus tumidi flectere sanguinis*

*Æqualem rapidis ignibus impetum.*

*Hic solus dare turbida*

*Mentem stultitia potest.*

*Nunc blande juvenis deliciis perit,*

*Nunc illumpietas aspera decipit :*

*Dat tempus tenebris ; jam veniet dies.*

*Iam pulchrum roseis jubat*

*Titan curribus advenet.*

*Sed nec, qua celeres precipitant aqua,*

*Certes oppositis frangere pontibus.*

*Nec tu dum calidus luxuriat error.*

*Optes imperio truci*

*Latum sistere turbinem.*

*Flumen sponte sua claudatur alveo*

*Quando non vetito lussit in agnore,*

*Et desiderii qui furit impotens.*

*Postquam crediderit sibi,*

*Vrret consilio senum.*

Forte in eodem diversorio, in quod nos sive casus, sive numinum consilium tulit, paulo ante advenerat addictus quoque religionum pietati, sed aliquanto prudentius quam aut ego aut Anemon, vir dulcissimæ consuetudinis, & in quo nulla severitatis tristitia liberalem arctaverat frontem. Theophrastus appellabatur. Ille nostra consuetudine delectatus, cum pæne iisdem ceremoniis diem exigeremus, eademque curiositas maxime nos ad templorum moles deduceret, paulatim insinuatus in familiaritatem, qui & unde essemus, quoque studio Tyberim quæreremus, à nobis voluntaria confessione expressit. Præter eximias virtutes in Theophrasto ætatem quoque reverebamur ; & ille mitissima manu paulatim profundis vulneribus sine nostro sensu medebatur. Nam & solertissima ingenia pensabat, & ut hominem viderat, veluti ex garrula invidentis Momii fenestra recludebat intimam mentem. Ille nos nec duraturo impetu Philosophiā petere

prævidit, & Anemonis quidem facile ingenium esse, subitisque desideriis exardens, me autem spontaneæ captivitatis impatientem, quæ austera Philosophia damnatur. Et jam illi faciliores eramus, quoniam pietatis studiis exardens, non quidem contra Philosophorum præcepta disputabat, sed tantum nostros impetus regere videbatur. Cæterum, neque amplius Anemoni parentum custodia obstabat, egoque veluti obicem Themistii ruperam, & utriusque animi faces, quia nemo jactatas inflammabat, spontanea remissione languebant. Itaque paulatim placabiliores illecebris facti, quibusdam gradibus de subhorrida sanctitate excessimus. Et Anemon quidem revocatus in memoriam gentilitii splendoris, cum sensim parentis hæreditas paupertatis consilium destruxisset, tandem ad penates redire constituit, & veniam ætati deponere. Ego vero superba deterrebar verecundia, ne ad Themistium redirem. Et jam tantum Musis debebam, ut earum beneficio ali possem, ac præterea frequentibus stimulis Theophrastus urgebat, ut ætatem in literis ponerem, cum laudare ingenium meum, mihi que inter Scholasticos promitteret nomen.

Cum igitur quærerem, ubi maximus literarum quæstus esset, & omnium populorum famam diligenti examinatione pensarem, non dubitavi quin commodissima esset Marcia, civitas in vicino. Quippe Acigniorum familia inde contumaci sese exilio eiecerat; & tum novis doctoribus avidissima juvenus vacabat. Et hoc quidem consilium Theophrasto minus placebat, quia atrox rumor bellum in proximam veris commoditatem minabatur. Itaque quanquam & ipse locum quærebat ubi literas non ingratis sudoribus promitteret; tamen graviore fama deterritus recessit in Eleutheriam; cum inter nos felicissimum amorem non vulgari fœdere sanxissemus. At vero Anemonis cervicem creberrimis amplexibus attrivi, neque divelli à charissimo sodale, sed aliquam partem meæ relinquere videbar.

Sed posteaquam illi quidem in montium barbariem, ego autem versus Marciam concessi, tunc vero molestissima solitudine afflictus me rediisse ad malorum consuetudinem sensi, & hoc quicquid calamitatis erat velut ultionem dolorum, quibus Themistium meo discessu oneraveram, non sine tristissima facinoris confessione toleravi. Nam ut illi orbitatem imposueram, ita me Numina amicorum solatiis destituebant. Sic Peleus cædem Phoci suorum interitu persolvit, & Cadmus satisfecit Martio serpenti dejectus in ventrem. Quicquid mortales peccamus, aptissimas poenas dii inveniunt, nec ingeniosiores sumus ad scelera, quam illi ad vindictam.

Marcia in effusis paludibus collocata quæ oceanum mare torpenti licentia destagnat, veluti provocat naturam, & hominum domicilium intra profundi limites protendit. Ego ut primas turrium minas in mediis aquis despexi, non audebam cogitare civitatem: sed veluti lapideas naves, aut si quid mirabilius animo occurrebat, mutus ipse torpensque contuebar. At vero posteaquam mediocri rate in mediam urbem perductus, ab utraque navigii parte splendidissimas domos, marmoraq; & aurum & tecta operosis minis pendencia conspexi, dii deæque! quam non opes civitatis, sed naturæ divitias, & plusquam Apollinis miraculū vidi, qui errores labentis patriæ impositis radicibus astrinxit. Ac deinde cum fora ingentibus spatiis aperta, ædesque publicas, & fanorum religionem perlustrassem, terrasque velut æquoris victrices ligneis fundamentis in hanc audaciam succrevisse mirarer, tunc ego nec quo vultu omnia exciperem, nec quibus verbis uterer, sciebam, & pallium, quod pictor Agamemnoni circumvolvitur, in tam manifesto stupore optabam.

Sed cum in medio foro novus hospes ambularem, oculosque ad publicam pulchritudinem sustulissem, forte quidam in pessima veste, caputque dimidiato orbe humiliter tectus, in me incuriosius vagantem superbissimo ictu offendit.

Ego tanquam de altissimo excitor somno, cōtem-  
platusque vilem habitum, non sustinui decedere  
præcipienti. At ille ut dextera ovillæ frustum te-  
nebat, fortissime in oculos nihil tale cogitantis  
impegit. Perturbatus, & præter commune inju-  
riæ dedecus perfusus quoque verecundia, quod  
indignum certamen mihi cum coquo judicarem,  
repente multitudine incingor, interrogatusque  
num in ea civitate habitassem, posteaquam me  
externum confirmavi, gravioribus quidem pœ-  
nis ereptus sum: cæterum severitate verborum  
non perfunctorie castigatus. Ille autem non mo-  
dico fastu ovillam suam quatiens, per adoran-  
tem populum vagus, tandem olus etiam merca-  
tus implevit laciniam vestis, seque in scapham  
conjecit, quam in proximo religaverant nautæ.  
Ego me in diversorium turbatissima mente rece-  
pi, stabulique dominum rogavi, num in illa civi-  
tate præfecti culinarum imperarent? agnito ille  
errore intemperanter risit, & quem inter abjectis-  
simos numeras, inquit, ab origine pæne ipsos Deos  
recenset. Nam hic genus optimates profitentur  
non stipatorum agminibus, aut habitu ad novita-  
tem mollis elegantiae correcto, sed secularium  
vestium constantia, ut tales agnoscamus, quales  
ipsi majores in imaginibus ostendunt; adeo con-  
suetudini apud illos est reverentia: nec si bellis  
attrivissent orbis opes, aut triumphos invenirent  
ad luxum; aut manipulare fœnum in Aquilam  
mutarent. Cæterum videbis macella pererrantes,  
neque illa, ad quæ stomachus connivebit, pu-  
dore est ad penates nobilissima manu deferre. Et  
his moribus nostri quidem nobiles nomen liber-  
tatis indiderunt. Sed externi rusticitatem horri-  
dæ vetustatis, vel ignobilis negotiationis vestigia  
lepidissimis jocis infamant.

Dum hæc mihi stabularius ex diversorii fene-  
stra memorat, egoque in subjectos vicos curiosis  
oculis vagor, multæ scaphæ diversissimis homi-  
nibus plenæ per angustias canalium ferebantur;  
ut ut publicos conventus crederem, tunc om-  
nium

rium gentium voces & discrimina vestium faciebant : & cum à diversitore quærerem, quæ causa tam diversam multitudinem coëgisset, Gephyrii minæ, inquit, & in hanc urbem contumax furor, pæne totius orbis studia excivit. Et jam legati ab omnibus imperiis venerunt, illi quidem ne Gephyrii nos ad turpitudinem iniqui fœderis deducant; alii ut incendii furorem obruere velinus, antequam contiguam partem terrarum ac deinde totum orbem, valentissimo ardore pervertat.

Ego sane nec quis Gephyrius esset ignorabam, & tam publici tumultus cognoveram fontem. Sed non habebam ineptum diversitorem, & præterea exterorum concursu docte mihi de controversia posse loqui videbatur. Itaque seductum in interius stabulum cœpi liberius orare, ut rem alte exponeret, & quomodo Gephyrium læsisset, cujus etiam furor ultra fatum mirabili ratione desævit. Ille se diutius collegit, & illius saporis orationem incepit, quæ non à vilissimo homine, sed plane à politis disceptatoribus condita videbatur.

Gephyriorum series, inquit, & formidabile tot gentibus nomen, non unica ætate, aut seculo, in tantum fastigium excrevit. Placidis mollibusque initiis, velut ille Europæ amator sensim orbem è littore in altissimum pelagus nihil sentientem deduxerunt. Ac ne omnia illorum artificiis impuitem, accusare majorum nostrorum benignitatem possumus, quæ invitam Gephyriorum integritatem nimia libertate corripit. Olim quidem, ut audio, Rex sacrorum inter pontifices imperabat, nullus ordinanti pulvinaria, vel fastos numeranti repugnabat, sed ne publicas vires occuparet tam superstitiosa majestas, neque populum ad conciones vocare poterat, & illum cum flamine Diali ab ambitione magistratuum sollicitæ amoverant leges. Sed aliter cum Gephyriis orbis egit. Ipsi reges atque imperia se sponte illis hominibus prodiderunt; & eorum pæne for-

didam sanctitatem ingentibus divitiis colentes dulcissimo imperii gustu humanam aviditatem laceraverunt. Nam cum venerarentur oracula, quibus Gephyrii Deorum mentem exponunt, repente synceram pietatem superstitione corrumpit, utraduceretur illavis, quam in syderibus habent ad imperium terrarum. Et primo litigantibus provinciis arbitrium ad Gephyrios deferabatur, illique feciales integerrima sanctitate inter volentes imperabant. Sed paulatim assuetarum gentium animi hos antistites deorum paulo infra Numina adoraverunt, & omnia eos posse, in religionis parte fuit. Nondum orbis se domitum senserat, & jam omnia infra Gephyrios erant, jam regna occidere ac edere poterant, & illud caducis rebus felicissimum videbatur, si eas inter immortalitatis suæ negotia alio nutu regere voluissent. Hinc tot urbium dira eversio, hinc funestæ pietatis crudelitas, & illius quod habebant arbitrii in iudicium superba mutatio. Gephyrii sane diu cum immodestia luctati, tandem se communibus vitiis permiserunt. Quippe paulatim obsolevit antiquæ paupertatis memoria; cultusque, & purpura, & gemmæ, & fasces, pæne hodie ad primorum Gephyriorum rusticitatem erubescunt.

Hic autem qui hodie Gephyrius imperat, quam lenissimæ consuetudinis homo, sollicitantibus illis qui per publicam mundi calamitatem clarescunt, voluit hujus civitatis secures circumvolvi inexplicabili fasce; & tantum ejus imperio stringi. Cum obstarent nostri principes, occidentalis nubes, in qua Gephyrius fulmina strueret, in nostrum caput promittebatur, & nos foederibus validarum gentium, etiam pæne illorum favore, qui publice maledicunt, mundi inclinationem agnovimus. Ille, velut impetu cælum ac maria rapturus, crudelissimis edictis detonuit, & si mihi credis, hospes, suam causam præcipiti furore corrumpit. Quid attinuit pæne minis conjunxisse præcipites ictus, quid nos deducere in angustias, ut etiam cogeret esse hostes? Vapor quoque



quoque in nubibus pressus exclamat, & timidissimus feris sua arma necessitas ostendit. Si permisset iracundiæ tempus, si diu librasset illud fulmen, quod immaturis nubibus emisit, forsitan mitigari potuissent tam cruda imperia; neque nostri magistratus armorum vel ignaviæ necessitatem expectassent.

Sed nec impune pertulimus sævientem; & ut amicis fœderibus coëamus, durabit ad posteros atrox memoria vulnerum, quibus Gephyriorum causam hæc contentio afflixit. Quot volumina per orbem dissipata excussere Gephyri vires, & hanc vanitatem imperandi deriserunt? nec ab iis quidem sparsi quos religio iniquiores fecit, sed ab illis qui sacrorum participes tamen docent graviora sceptrâ esse, quam ut illa inanes Scholastici argutiis moveant. Etiam plurimi intemperanter ingeniis utuntur, & res seria hodie ad ludibrium processit. Certe hanc chartulam, quam vides, modo filius è scholis attulit, impiam me hercule, sed quia jam vulgaris est, ejus te lectione oblectabo.

*Petrus ut in totum regnabat maximus orbem,*

*Hæc quanta cecidit jam modo parte sui!*

*Libera projectum videt Germania frenum,*

*Et negat excussas posse subire minas.*

*Quaque patet lato fœcunda Britannia ponto,*

*Vnicuique pro cunctis non datur una focus.*

*Majus adest vulnus: O vos miserescite Petri!*

*Italiam Petro tollere bella parant.*

*Nec tamen ille ferox, quo se Germania primum*

*Romuleas jactat non timuisse minas;*

*Nec qui tergeminam vides Calvine coronam,*

*Et Latium latius destruis eloquio.*

*Nec qui vel Tamesim, vel qui bibit incola Rhenum,*

*Tam fera collata pralia mente movet.*

*Sed tunc Adriaci Marcus tutela profundi,*

*Et secum varios cogit in arma deos.*

*O dolor! & veterem jam Paulus licuit amicum.*

*Tergeminoque illi nomine durus obest.*

Quod si hæc discordia incidisset in homines  
bellandi libidine furentes, videres omnia hoc fla-  
grare

grare incendio; nec aliter quam per alterius partis infamiam his miserrima constitui posset. Sed & sumus ab armis alieni, & Gephyrius dolet suam pertinaciam ad necessitatem pugnandi traduci; suscepitque Protagon tollere dedecus pacis, & tam atrox dissidium honesta tranquillitate extinguere. Nam conatus Lippii clam nostri magistratus contemnunt, nec à Gephyrio tam apertis vulneribus distracti, aliter quam Protagonis industria coibimus.

Cum diversitor in hæc verba tacuisset, ego qui Gephyrios semper colui, non nihil acerbatus paraveram verba, quibus illius audaciam refutarem. Nam ut olim occidentibus lucernis non afferebant manus, ne ignis divinitatem violarent; Ita in illis quia ad religionem prælucent, humanius est vicia, tanquam fumum lychnorum morientium pati, quam dignitatibus vim afferre, quas in turpissimis hominibus nullæ tamen sordes maculant. Sed facta mentio pacis lenivit animum meum, & præterea admirabar illius Protagonis felicitatem, qui huic morbo Æsculapius destinabatur. Itaque submovi atrocissimam defensionem, quam pro Gephyriis habebam, & rogo, inquam, quis ille Protagon? aut quibus viribus? dicere potes? Ille iterum longissima oratione Protagonis potentiam exposuit, qui in Eleutheria, inquit, amplissima regione, Fortunæ sacerdotium nactus est; & nunc tantæ Deæ arbitrium disponit, vir hoc seculo major, & dignus fabulantium miraculis vatium, haud dubie nobis amicus, qui Lippii cervicibus instamus, & utique devinctus Gephyrio, cujus beneficio etiam post interitum vivet. Intellexi Protagonem esse sub quo Anemon vivebat, & in cujus civitatem me crebris exhortationibus Theophrastus invitabat.

Sed dum in illis sermonibus diutius sumus, ecce ingens tumultus ad stabuli fores, & hospites ex Eleutheria splendido cultu adventant. Nec moratus diversitor occurrit intrantibus, & humanitatis officia pollicitus, mox in triclinia deducit,

cit, mihiq; deinde gratulatur, quod haberem homines meæ linguæ, quibuscum versari in sua domo possem. Ego vero nondum certus an gauderem (quippe Eleutheria non longe à Callionis patria recessit) furtim contemplantur familiam, ut obiter viderem, si quis ex illo comitatu usitatus mihi esset. Frequens servitium gentilitio more turbaverat domum, puerique petulantibus rixis pæne ipsum diversitorem obruerant: dominus autem in interiori thalamo erat, procurabatque fessum corpus, & credo ad specimen nobilitatis majorem mollitiem fingebat.

Ego posteaquam nullum ex familiaribus agnovi, cum illius viri potentiam ex servorum audacia metirer, me ex latebris angustæ cameræ produxi, quæ siveque domini nomen, & commercium linguæ in benevolentia pignus obtuli. Nulla gens est, quæ prolixius humanitatem nihil auferentem promat. Illi meæ prope vestigia inutili salutatione tangebant, cæteraque addebant blandimenta, quæ pæne infantes pernoverunt: cæterum domino suo Stratonis nomen esse ajebant; illum rerum exterarum studiosum, pulcherri- mum ingenium excolere peregrinationibus, & me in felicitatis parte ducturum, si in tam elegantis hominis noticiam pervenirem. Tum & ego verbosæ humanitati liberaliter indulsi, & cum jam extrema luce convivium gallico more diversissimis voluptatibus mensam implemet, etiam ab illo Stratone arcessitus ad cœnam, felicissimi hominis triclinium intravi.

*Nullus in absentem tuta convicia lingua*

*Efferat. Absentem semper adesse puta.*

*Forstā externis quem credis abesse sub oris,*

*Est tibi post magnos proximus illi deos:*

*Omniavolvuntur, nihil immutabile terris,*

*Huc illuc homines, astraque casus agit,*

*Huc illuc varii deducunt æra venti.*

*Huc illuc varias Æole docet aquas.*

*Pondera non aurum, non altas pondera sylvas*

*Vlla tenent, falsis curvis nixumque vadis.*

*Vertitur*

Omnino anxius eram, nec poteram comminisci, quibus potissimum sermonibus tam ambigua veritas explicaretur. Itaque modo de illius splendore, modo de servitutis incommodis loquebar, sed utramque scenam pervicacem armaverat frontem, & nunc exiguo risu, nunc securis, veluti alienis malis ingemisceret, mea tela vitabat.

Verum ut ad Callionis Percantisque nomina perveni, tum in oculis subita verecundia omnem constantiam destruxit, confusæque indicium linguæ prodidit animum hærentia verba in subita trepidatione molientem. Nihil aliud expectabat, quam ut illum in conspectu ministrantis familiæ apertissimo pudore damnarem. Timui etiam, ne me mediastinum appellaret. Itaque mutatis sermonibus tanquam fabulam non agnoscerem, reliquam mensæ partem hilarissima fronte traduxi.

At posteaquam famuli remoto apparatu & ipsi ad mensam dicefferunt, tunc Pedit ad incurvum fenestræ secretum me sollicita manu duxit, ibique semotis arbitris totum se in notissimos misit amplexus, revocatisque longius sermonibus multa de pristina servitute, & de Callionis impotentia, fraudibusque Percantis recitavit. Quid enim, inquit, attinet, per ambages inter nos pristinam dissimulare fortunam? & te Euphormionem fuisse memini, nunc sis, nec ne, in potestate tua est: & Pedit in servitute sui, quem nunc inopinata felicitas in splendidius extulit nomen. Adeo nihil in hominibus est constans, & fortuna cum Regibus amat eos extollere, qui suam felicitatem sorti imputent. Cum abominarer Percantis fastidium, & Callionis impotentiam devoverem, ecce tibi geminata felicitas me jam in mortis solatia intentum revocavit ad vitam. Nam & celeriter sublatus Callionis familiæ libertatem codicillis reliquit, & ego ad hæreditatem cujusdam Chrysi perveni, longa quidem cognatione mihi conjuncti, sed cui me sua or-

bitas

bitas & interitus sororum proximum fecit. Neque ille liberalius traduxerat primam ætatem, quam aut ego Euphormio, aut parentes nostri fecerunt. Nam à pueritia contempta paupertas depresserat ingenium, nec scholastici capacem indolem præceptis impleverant; sed tantum suæ conditionis miserabilis Philosophia docuerat sine stomacho despici & parere, quibus artibus cum addidisset sine suspitione adulari, non modo gratia valuit, sed etiam dominorum liberalitate ad opes aliquantulum promovit. Inde cum se Protagoni & Deæ fortunæ credidisset, incredibile dictu, quantum felicitas modesta præveniret vota; sane vel se tantum esse, vel iis initiis crevisse, interdum dubitabat. Cæterum ego tam repente felix, timui novitiam nobilitatem objicere ludibrio juventutis, quæ in Protagonis familia vivit, venique in Italiam, ut deinde gentiles non veluti ab exteris terris, sed ex alia stirpe venientem adorent. Ego jam iterum Protagonis nomine verberatus, (nam & diversitor non pauca de eodem retulerat) inquirere scrupuloser cœpi, quisnam ille Protagon esset, quæque autoritate apud suos floreret, ac cum Pedo nihil mortale de eo prædicaret, adderetque jam stupenti, tantum auri cumulum apud eum cumulari, ut sufficere viritim orbi posset; ego statim ad novas spes Pyrrho erectior interrogare hominem cœpi, mihine consuleret etiam ad Protagonem proficisci, quandoquidem ibi amplius Callionem non timebam. Ille autem persuasit, ne consilium omitterem tam opportunum ad divitias, si me fortuna respicere vellet.

Inter hos sermones consumpsieramus noctis partem. Itaque post occultæ familiaritatis verba, illum publico honore servis spectantibus veneratus sum. Cum deinde tota nocte consilium meum subinde animo revolvissem, placeretque ad Protagonem ire, ubi præter reliqua etiam Theophrastum & Anemonem habebam hac pæne oratione studium meum Pedoni confessus sum.

sum. Non facile expleveris agrorum sitim debilibus rivis, aut in inopia dominorum multum ex fortunæ beneficiis hauries. Ego non vulgari artificio literarum instructus, ad hanc urbem veluti ad divitiarum fontem accessi: sed posteaquam mihi largius compendium tua de Protagone oratio promissit, eo strenue cupiditatem conjeci, ne saltem negligentiae paupertatem imputem. Non facile dixerim, an crediderit Pedit illud mihi utile esse, an à latere amoliri voluerit pristinae sortis invidiosissimum testem: certe collaudavit mentem meam, & ita peroravit de familia Protagonis, quasi staret in limine felicitas, invitantem ultro manum humanissima benignitate protendens. Et meae eruditionis confcius eram, & credebam ingenio honorem haberi. Spe itaque fortunæ, meique fiducia repletus, iter quod dii bene verterent in Eleutheriam auspiciatus sum. Primus forte post Kalendas dies erat; ut nec omen fatalibus miseriis deesset. Sed eadem numina quæ clades auguriis significant, admonitos mortales suis consiliis uti non sinunt. Dives solum, ac oppidorum cultus, & supervacua humanitas in ignotos, fidem Pedoni apud me faciebat. Tandem in urbis confinia perveneram ubi Protagonem & Fortunam habitare constabat; Ilium appellatur, neque procul senem optimi vultus, & quem oppidanum ex equitandi ratione cognoveram, angustæ viæ beneficio conveni, & captata sermonis origine, primum de ædificiis urbis, deque victu & consuetudine civium quæsi. Procedentibus deinde sermonibus rogabam, quibus studiis illa civitas floreret, & qui plurimum in ea homines possent: etiam quibus ceremoniis sacrorum obnoxia teneretur. Tendebamus in aditum urbis, qui Honoris obtinet nomen, cum ille intueri ad dexteram jussit, ubi mediocre fanumerat, & turris supercilium non invidiosa arte porrectum. Ego hospes adoravi incolas deos, sciscitarique cœpi, num Æsculapius aut Vulcanus extra moenia habitaret:  
Pauper-

*Paupertas, inquit senex, habitat, ad cuius aram duo simulachra locantur, hyemis atque famis.*

*Perturbatus omine tam manifesto fui, quod in ipso limine dii inimici me deprehendissent, neque diu in illo stupore hæseram, cum mihi animum idem senex blandissima oratione restituit. Et vides ex pomerio ejectam Deam, inquit, nec frugalitatis nec luxus amantem: ut intelligas amoenissimam civitatem tristitia sacra, severosque Deos non tulisse. Cæterum quibus artibus in hac urbe honor sit, haud facile dixerim, quoniam omnium virtus ad magnæ Fortunæ libidinem examinatur. Videbis Fortunæ ingens templum, & religiosis cultoribus plenum. Dea in sublimi ara alterum pedem, velut aliquando avolatūra sustollit, alium volubili globo, nec ipsum satis constantem, reponit, apertissima quidem læva, dexteram autem sic muliebri simulatione porrexit, ut nescias dare an accipere malit. Certe muneribus tentatur, & fama est, non facile simplicitate lachrymantium exorari. Olim quidem literis avidissime delectata est, & elegantes libelli aut ingeniosi carminis acumen ingentes divitias emebant: Sed posteaquam artem præstantissimam mystarum vilitas & frequentia dejecit, primum ipsa Musarum pulchritudo fortunæ sordescere cæpit, deinde in contumeliam verti, ut jam nihil indignius putetur, quam illi carmen pro donario appendisse.*

*Cæterum excubare in fano supplices solent, neque unquam se oculis Fortunæ subducere. Ipsa levissimo nutu ubique cervicem inflectit, & si quando gratiosos offendit cultores, meliori vultu felicissimos homines salutat, suisque deinde Sacerdotibus inclinatione frontis ostendit. Nec illi rerū humanarum arbitro Numini repugnant, sed mox è turba eximunt quos benignior fortuna selegit, coronatosque lauro, velut temporum & sapientiæ victores, ad summum fortunæ antistitem adducunt: is Protagon appellatur. illic ambitiosi exitus voti, illic magnarum cogitationum portum iratis æstibus ventisque fortuna subduxit,*

*Et*



Et scis, inquam, pater, Sacerdotum nomina qui initiatos ad felicitatis bona in Sacrarium Protagonis perducunt? quidni, inquit, sciam, cum iis creberrima supplicent vota, cum & Protagon & Fortuna ex ipsorum consilio sua oracula componant? Omnium potentissimus ex severitate nomen invenit, & Doromifus appellatur: hic est qui primus eorum nomina ad Pratonem defert, quos fortuna respexit. Sed supercilium suum durissima arte effingit, ipsique fortunæ audet irasci, si quando benignius supplicantibus indulget. Et tamen istius Deæ beneficio in eum gradum conscendit, in quo positum Eleutheria & se ipse forsitan miratur. Nam in privatas spes adolevit, & aliquando Fortunæ templum ingressus, nescio qua Deæ benevolentia ad Protagonem traductus est, mox similitudine morum conciliatus, cum solertissimus homo ita cupiditates torqueret, ut omnino videretur iisdem syderibus conceptus. Itaque rei familiari præfectus est, vir ingentis naturæ, & quem, si me digno precio emeret, contra invidorum argumenta in cœlum meritissima prædicatione levarem. Illius potentiam Torrentius, & Neapolitanus, Ianicularis quoque ac Cursor, aliis rationibus proxime consequuntur. Nam Longinius nuper expectatæ morti concessit, & jam pridem emortua senectute languescens molestum negotiorum & dignitatis oderat nomen. Eminent quoque Figuli aureus honor, & veteris Agathoclis abundantiam immensis vestigalibus vincit. Sed nullus ad Doromifi potentiam accedit, & si (hospes) hic ad fortunam festinas, noli opes expectare, nisi te ille primus ad Protagonem hujus Deæ imperio deducet.

Cum hæc mirifica humanitate exposuisset, & omnem Reipublicæ ordinem historica fide promitteret, intercepte orationem affines, qui obviam optimo seni processerant, & eripuerunt notitiam mihi rerum illarum, quas postea difficillimi temporis dispendio perspexi. Igitur cum se

mihi jam pæne familiariter ultimis amplexibus traderet, paululum ab amicis semovi, & per fidem, inquam, tuam, quis aut quibus moribus Protagon sit, paucis dicere placet? nec libidine curiositatis motus, sed necessitate interrogo: misere, & ingenium viri ostende, sub cuius legibus victurus accessi. Iratus ille excussit fortius vestem, quam comprehenderam manu, & Omi hospes, inquit, scias me ad hanc ætatem sine parricidio vixisse, qui seris criminibus pervertis innocentiam meam. Nescis quantum flagitium admittant, qui de Protagonis moribus quærunt? Iovis quidem cerebrum & Regis, ut audio, Persarum proverbium conjungit, & passim quos familiaritas Deorum extulerat ad vaticinia, iis quoque secures parebant. Nulla tamen secula Protagonis genium æquarunt; nec ille Fortunæ tantum, sed Virtuti legem imponit. quidquid ipse aut facit, aut cogitat, Eleutheriani adoramus; nec quenquam similiorem numinibus ad nos fata transmiserunt. Tu vero Deos comprecare, ut ignoscant simplicitati tuæ, & in Protogene Deorum potentiam, & ipsis cœli imaginem, reverere.

Exhorruī tam improvīso scelere contaminatus, & tamen dissimulato metu, quoniam ad portas veneramus, Deos Deasque salutavi, urbisque maxime tutelam, sive esset ipse Protagon, sive aliud occultæ religionis numen. Et ea quidem vespere ignoto diversorio contentus, suspensam maxime noctem inter varias cogitationes exegi. Prima deinde luce quæsi, qui suam operam numis vellet addicere, & per ignotam urbem inutiles prohiberet errores. Novo itaque satellitio superbus, præterea redemptis optime vestibus ornatus, potentissimæ Fortunæ templum peto. Ac cum per viam catervatim homines occurrissent, non mollissima modo lana contexti, sed serico splendore ad luxuriam vibrantes, cœpi dammare veritatem hesterni senis, illudque certo existimare, neminem se opulentissimæ Fortunæ advertere, quem illa respicere nollit.

Ac pos

Ac posteaquam libavi sanctissimum limen, alias cogitationes strenue quidem projecì, cæterum illud attentissime reputabam, quibus maxime votis mihi deam propitiarem. Cumque solitudo tam ingens obtutos oculos defixisset in terram, forte omnibus transeunti matronæ assurgentibus, ego solus non decessi de via, obviumque corpus rustica simplicitate allisi, nam nec satis quidem ipsa incuriosum adverterat, nec etiam juvenis cincinnatus, qui delicate gradientem suspendebat. Sed ut trepidum sustuli lumen, & forma mulieris incauta præcordia trajecit; Dii Deæque, quam subitæ mutatio ne me quidem mihi reliquit! Oculi syderibus pares vivido splendore vibrabant, frons porrecta, & inter aurum atque argentumque comæ nitentes, genæ quas cerussa deteriores fecisset, os Venerisimillimum suo Marti blandienti, cervix nec immobilis, nec præter maiestatem annuens, sinus bicipiti turgidus colle, & cui suum Parnassum donare Phæbus posset. Denique si pro Fortunæ numine sedisset in ara, magis studiosos cultores invenisset. Ac in me quidem illa sine aliquo stupore conspexit, sed attonitæ similis hæsit, & mutua admiratione defixa meam frontem curiosa speculatione lustravit. Diceres convenisse, ut utrique immobiles animorum transmitteremus affectus. Adeo quiddam est arcanum in amicitiarum fatis, & natura similitudinem affectuum inter ignotos mirabili genio temperans, etiam cognationem animorum inducit. Vbi vero revocavimus animos licentius ad auspicia amicitiae coeuntes, illa quidem includit velo frontem, ego autem suavissimo dolore perfusus, veluti relinquerem antiquæ familiaritatis locum, ægre ab ipsius latere vestigia moliebar. Et hic quidem inconsulti amoris turbo omnia animi mei decreta subita tempestate pervertit. Sed quis sapientiam in odio, aut in amore iniquus arbiter quærit? Ipsa Venus temere nata est ex spumis, quas inanis egerat ventus, ne amicitiarum exordia ad severitatem pruden-

tiae disponamus. Fœminam nobilem, & quam sperare non poteram me in illa civitate inter tot Dearum millia inventurum, ego peregrinus & ignotæ conditionis homo, præterea adversantibus fati omnia aggressus, nullis argumentis præter subversæ animi impetum, pæne diligere audebam. Nec illius mihi consuetudinem promittebam, sed erat aliquid in læsi pectoris sensu, simile desiderio, & veluti cuniculus longæ spei, quæ nondum fatebatur cupiditatem suam.

Iam superaveram testudinem templi, introque pergebam ad Deam, cum simulachrum Fortunæ video, omnino quale descripserat senex, & donaria passim ex auro argentoque pendentia, omnia exsonabant professis supplicum votis, & plura, ut videbatur, muta devotio occultabat. Itaque posito genu, & ipse in hunc modum oravi: Domina mortalitatis & Fatorum, cujus imperium terras & maria exercet, si non fastidis peregrini supplicis cultum, & te velut sororem naturæ varietas delectat, muta, O Regina, & inflecte constantiam malorum, quæ me pertinaci odio laceffit. quo longius sparseris beneficia in externos, eo misericordiæ fama tuum regnum religiosius extendet. Et si me provexeris facilis, notæ miseræ adolescentem, mihi crede multi divites ex Lusiniâ spes eadem. Domina, preciosis donariis à te ement. Felicitatis meæ arbitrium tuo numini relinquo, nec descendo ad licentiam votorum. Injuriam cœlitibus facit, qui indulgentiæ viam præscribit. tantum O Dea, si licet, faventem Protagonem deprecor, & præterea ne in miseriarum omen omnium fœminarum foelicissima mihi occurrerit intra septorum tuorum sanctitatem. Hæc humillimo mentis spiritu effudi, cumque immota Dea nihil mitigato vultu constaret, etiam quasdam verborum blanditias adjunxi: donec lassata pietas impatientiam meam ad alterius spei novitatem convertit, & quid, inquam, si mihi ipse pro Fortuna faveo? quid si, quod illa tarde & fortassis faciet, ego celerius exsequor?

me

me scilicet ad Doromisi vultum confero, oroque ne repudiare velit hominis preces, quem ipse Apollo & Musæ, nisi me amici deceperunt, sibi intima familiaritate junxerunt. Quod ut mecum turbatus exegi, coëpi indulgere credulitati meæ, & fingere animo faventem Doromisi speciem mihi etiam sua sponte blandientis. & nescio quo me spes improba provexerat, ut jam divitias, quibus me Protagon oneraturus per Doromisum esset, ineptissimis disponerem votis.

Nec ultra cunctatus genua de pavimento sustollo, & novitium interrogo servum, sciretne ubi Doromisus habitaret? Pallidus ille actremens, se vero scire asseverat, cæterum nunquam ultra limen produxisse audaciam oculorum; nec fas esse, quæ illic miracula essent profanis luminibus contueri. Si me tanti crederem, si illam sustinere lucem possem, indicaturum quidem domum, sed nullo stipendii pretio stultissimam temeritatem locaturum, ut in eam mecum irrumpat. Ego audacter ducere jussi, & quo apud servulum majoris autoritatis essem, jactavi gratiæ meæ vires, ac ipsum Doromisum ultro etiam oraturum, ut per ipsum bene esse mihi velim. Et hæc confidentius proloquebar avidissime audienti, quoniam in Doromisi ædes omnino se non venturum prædixerat; ut nec si male acceptus à familia essem, ipse cognoscere contumeliam meam posset.

Igitur salutato numine à Fortunæ æde declino, & aliquantisper spatius per nobilissimam urbem, tandem ad flumen veni, lene quidem & ipsa libertate alvei placidum, nisi meantis cursum interciperent pontes. Sciscitanti deinde quod esset fluvio nomen, mercenarius meus in illa quidem urbe Pactolum appellari retulit: cæterum & cum propior fontibus suis manat, ac deinde cum se extra civitatem evolvit, Nilum vocitari, & in ipsa quidem ripa constitutum Saturni templum esse, in cujus vicinia custos Doromisus habitabat. Non libuit interrogare ubinam essent

ædes, quas facile aperiebat discursatio variorum, & tumultus fortunarum ingentium comes. Itaque relicto nomenclatore meo intravi frequentissimum limen; quod jam ab ipsis foribus perhorrescendum fuit. Erat enim supra portam Æt-næ fulminantis imago, & terribiles Cyclo-pum formæ suo Iovi molientium tela. Sed per-didi omnes metus, progressusque in atrii spatia pri-mum omnium cœpi mirari pares quorundam ho-minum cultus, quos ambitu præcipuo transeun-tes salutabant. Erant autem coccineis palliis te-cti, & tam uno habitu notabiles, ut ejusdem pa-tris hæredes viderentur. Cæterum in singulorum pectore non nihil ad lævum latus vidi coronam ex aureis filis sericoque fulgentem, quæ pulcher-rima texturæ industria eminebat aliquantulum extra tunicæ corpus, & quidem non multo ante factos significabat coronarum splendor, qui nihil de recenti venustate perdiderat. Notavi etiam omnibus pileum esse præpeditum multiplicibus pennis, & quas illi novo more in mediam obver-terant frontem. Non sustinui diutius ignorare, quæ hæc vestium concordia esset, & à transeun-tium uno quæsi-vi, quosnam illos mortales arbi-traretur? Ille, Doromisi domesticos, inquit, vel potius ingentis familiæ partem: totam enim non angustia domus, sed nec, quamvis ampla est, civitas capere potest.

Cum deinde errorem viarum timerem in am-plissima sede, idem, si ad Doromisum ire vellem, insistendum semitæ ostendit, quam utrinque claudunt exiguæ arbores, & quæ, ut ex muscosis corticibus apparet, tardioribus incrementis con-surgunt. Igitur in eam semitam me conjeci, & cum paria arbusculorum fastigia, ramosque ad æqualitatem præcisos intuerer, ne hoc quidem credidi sine consilio, & venerabilis arcani nota-tione factum esse. Sed tot quæstionibus trans-euntes fatigare non sustinet verecundia mea. Il-lud autem cogitationem meam vehementius ere-xit, quod de singulis arboribus tabella pende-bat,

in qua

in qua hoc erat minio scriptum : *Pares sumus, & Non sumus Pares :*

Cum vero in extremo semitæ essem, diligenterque tot rerum insolentiam annotarem, video pulcherrimæ fastigium portæ, & credo aliquot historiarum monumentis insigne. Erant enim imagines ex ære; illinc quidem Gradivus in curru ferebatur, Iovique jam satis concitato sævitiam ministrabat, multitudinem nubium, Vulcanique terribilem laborem Deo in manus ferens. In altera vero parte Aviditatem artifex expresse rat, omnino qualem Hercules olim inter monstra defunctorum à se visam memorabat. Illa Plutum multiplici catena constrinxerat, trahebatque pertinaciter reluctantem. Plutum contra vindicabat ingens rusticorum turba, & à se abeuntem irrita fortitudine revocabat, nec plus tamen in victricem aviditatem, quam questus & maledicta audebant: laxaverat enim artifex ænea imaginum ora, oculosque in aviditatem tam atroci acie defixerat, ut auderes ab ipsis voces etiam & querelas expectare. Et quidem sollicitati oculi tam præclari operis venustate, pæne omiserant ejusdem portæ columnas marmoreas perlustrare, in quibus incisæ literæ auroque diligenter imbutæ, in hæc verba legebantur : *Sacrum Doromiso sexes maximo, larium domesticorum curatori, vialium dispensatori & præfecto.* Cum hæc religiose veneratus perlegissem, subeo eandem illam portam, & cum ex ædibus quidam Doromiso domesticus processisset, (jam enim agnoscebam ex vestitu) interrogavi, num vacaret domino peregrinum hominem videre? Ille nec domi Doromisum esset nunciat: nec facile objiciendam negotiorum molestiam eo utique die, qui ad publicam hilaritatem esset ortus: me quoque prudentius facturum, si graviores omitterem curas: oculosque meos celeberrimæ pompæ spectaculo crederem. Quippe Deam fortunam à Venere exoritam commendasse suis sacerdotibus puellam Deorum favore dignissimam, formæque quæ insignis inter Deas esse posset, eam illo die



nubere Olympioni, & Antistites fortunæ conjugio exornando laborare; ipsi puellæ Casinæ nomen esse. Egi ut oportuit gratias tam liberaliter prolocuto, & quoniam ejusdem spectaculi studio trahebatur, ad nuptiarum pompam illo duce processi, ac multa quidem per viam differuimus (erat enim humanitatis plenissimus) tum de civitatis & magistratum genio, tum maxime de imperio fortunæ, quæ industriæ virtutisque damnatæ occupaverat locum, donec inter suavitatem colloquiorum superbissimam intravimus domum, ubi tot erant artificum labores, tam curiosa varietas, ut jam cultum, qui me in Doromisi æde perculerat, novus admirator contemnerem. Nihil unquam videram tam simile cœlo vel in Labetri, vel in Callionis domo, lucernæ de laureatis pendebant postibus, & florum etiam intempestiva pulchritudo sese alienis anni temporibus interserebat. Ipsa janua, quantum à lucernis lauroque vacabat, aurea vibrabat cælatura, non spissioribus quidem laminis exarata, sed quæ fideliter lignorum vilitatem occultarent. Cum deinde juvenis illius favor me per spissæ obstantium agmina provexisset in interiorum locum, si qua est jurantibus fides, caligavi ad tantæ majestatis nitorem, & veriori quam olim Cyneas stupore, non intueri visus sum cœuentium purpuram regum, sed ibi omnes deos deasque adoravi. Et quidem avidissime contemplationem in Casinam conjeci, utique novo cultu mirabilem, & quæ nec flammeo verecundiam demulserat (stabat enim hilari & aperto vultu) neque supremum pudorem jugali concluderat cæsto. At posteaquam animadverti hæc muliebris consuetudinis ornamenta in Olympionem esse congesta, omnino credidi esse Fortunæ datum, ut deterior sexus imbecillitatem abjiceret in viros; quippe Olympio obnupserat flammeo vultum ita per diversas plicaturas fastigiato, ut utrimque tempora Bacchico cornu elegantissime signarentur; & super ligaturam, ex qua ferrum pende-

pendebat ad latus, induxerat conjugalem cæstum, sed tot nodis me hercule, & tam implicata nexuum serie, ut videbatur, astrictum, ut nisi aliquot annorum labore explicare minime posset.

Cæterum ut pompa in medium processit, quo ministri sanctitas auspiciū cœuntibus esset, nescio quis Antistes in candida veste connubii legem ad hunc modum recitavit, novam sane, & quam ideo in tabula descripserat, ne inter pronuncian- dum laberetur; Vt tu Olympio hanc Casinam conjugem tuam nec attigeris, nec osculum retuleris, nisi peregre proficiscens & trinundinum abfuturus, ut à linu curiosam abstineas manum, nec ad sis molestus noctium arbiter, aut ante sextam diei horam uxoris thalamum temeraria manu recludas. Si quam interea prolem tibi genuerint dii, illam protinus tollas, & gratuito hærede felicissimam augeas domum. Si hæc faxis, tum tibi in uxoris nomen venire licebit, bonisque avibus juncto per exterarum gentium urbes celeberrimis itineribus volitare.

Cum hæ conditiones mitissimo conjugī placuissent, Antistes in Casinam convertitur, & hoc quidem cautiorem diligentiam adhibet, quod illius maxime causa nuptiarum pompa coiverat. Verba autem fœderis conjugalis, in quæ ille Casinam adegit, omnino ejusmodi fuerunt; ut tu Casina non minus virgo sis, quo tempore conjugium hoc vestrum interitus aut legis beneficium extinguet, quam nunc hodieque fuisti cum ad hanc procederes pompam. Vt ne cestum tui Olympionis procaci manu frangas, neu in osculum, neu in amplexum sollicites maritalem, ut aureum Iovis imbrem felix Casina expectes, qui te faciat matrem, nec mortalitatem Deorum semini jungas, aut Iphidius aliquis uterum tuum Herculinascituro angustet. Si hæc proba fide faxis, ut tum neque molas viro tuo, neque coquas, nec Iunonem iratam habeas, vel obloqui Cleostrata possit, & ipsa Fortunapenum tuam instrui solertissima ordinatione procuret. Plaudenti-

bus universis, Casina conceptissimis juravit verbis, nihil se unquam contra præscriptarum legum sanctitatem ausuram.

O felix Hymen, o Hymen fidelis,  
 Incundissime calitum deorum!  
 Sem tu de superis vides maritos.  
 Castis ignibus Hesperum vocantes,  
 Sem terras colis, & favente nuptæ  
 Matris bonus annuis puellis:  
 O felix Hymen, o Hymen fidelis  
 Istis quinque faces, thorum jugalem,  
 Panem, vellera, carlamque lympham,  
 Et lauro mediis tegente lychnos,  
 Flores postibus adferas decoris.  
 Sed nec lentus ades, Nihil moramur,  
 Nobis o Hymen est satis deorum.  
 Aut veni citus, aut Hymen valebis,  
 Nam si lentus ades, licens Cupido,  
 Et blandis Venus evocata votis,  
 Et dulci veniet lepore Risus.  
 Et quotquot Superum est licentiorum,  
 Tunc nec te tacite marita poscet;  
 Nec tardum cupidus palam maritus  
 Castis ignibus Hesperum vocabit:  
 Aut veni citus, o Hymen fidelis,  
 Incundissime calitum Deorum,  
 Aut felix Hymen, o Hymen, valebis.

Dum hæc celeberrimis cantionibus aguntur, interim religiosam sedem omnemque apparatus, avidissimis oculis lustrabam. Sed me præcipue tenuit matronarum puellarumque ordo, qui in Casinio vultu diffuderant mentem, omnes ardentibus gemmis, & fulgore serico vibrabant. Neque me fallebat plurimas jam non suo vero florere: sed & medicatis frontibus juventutis revocaverant legem, ut me unicam ætatem cerne-  
 re arbitrarer mea sponte deceptus.

Cæterum quanto splendorem astrorum nitidior luna coërcet, tantum eminebat divina omnino mulier, victamque cæterarum pulchritudinem castigabat: illa utique quæ mihi paulo ante  
 in For-

in Fortunæ occurrerat templo. Nihil emendatius natura ea muliere expolivit, nec fata illi digum amatorem inveniētem.

*Non si Taurus amet, vel falsis increpit alis  
Ipse deum genitor, vel spreto Phabus Olympo  
Rursus in Æmonius deducat ovilia campis.*

Forte idem temporis momentum meos oculos in ipsam, & illius in me conspectum obvertit, oculisque velut telis mutuo ictu, tam in imum admisimus vulnus, ut improvisa violentia pæne animam submoveret. Et illa quidem subito rubore mutata est, ego vero subsidentibus articulis labens, corpus ad parietem excepi, nihilominus in eam partem versus unde basilicam mulierem viderem, quæ me solo aspectu vulnerabat. Neque satis mirari poteram, cur miserabilis procus tam subito amarem, rudis antea voluptatum contemptor, & humanis suavitatibus intactus. Agebat me discors sententia; & quam male dulcedinem amabam, pæne tamen voluissē, ut inutiles affectus animum suo morbo indulgentem reliquissent. Quid enim ex dispari amore, præter privatas acerbitates, aut externa ludibria, sperarem?

Et hæc quidem anxia deliberatione pensabam, cum me excedentis multitudinis tumultus excitavit. Iam enim recesserat Antistes in interiorem domum, & secuta cum Olympione Casina erat, ut quædam quæ ad nuptias pertinebant, secreta consulatione agerentur. Cæteri autem per publicam portam, per quam & ego irrueram, sese recipiebant in domos.

Et quidem casus tulit, ut indigesta confusione me ad mulieris latus applicaret, quam insanus desperibam. Haud mora, evicit timiditatem audacia amoris, & felicissimæ tunicæ osculum cum modico suspirio tuli; ac ut ipsa sciret me poëtam esse, verius subito aliquot invocato Cupidinis numine effudi.

*O dea, syderei seu tu stirps alma Tonantis,  
Sen patrem factura Iovem, da numine dextro  
Has movisse preces, placataque lumina flecto.*

*Ecce ignes jussitque pati, jussitque fateri.  
 Nil non ausus amor. Nec sortem despice nostram,  
 Nympha potens. Calum cognataque numina cernis.  
 Pauperibus votis & parco thure vocari,  
 Placarique tamen. Tibi jam sua stamina Parca  
 Concessere mea. Vitam si forte negabis,  
 Da saltem Reginamori; da sydere flamma  
 Nympha perire tua. Non dignius arserit ales,  
 Qua super Eoos extincta renascitur ignes.*

Et hæc quidem modico murmure insusurra-  
 bam etiam inflexo in contrarium vultu, ut si qui  
 recitantem audivissent, tamen in ejusmodi amo-  
 ris suspicionem non venirem.

Sed quoniam jam aliquot diebus adversi non  
 sævierant dii, timuerunt ne intermissa consue-  
 tudine ego me parum meminissem Euphormio-  
 nem esse. Itaq; in ipso aditu qui ad urbem ferebat,  
 cum adhuc in conspectu meæ mulieris essem in-  
 cidi in petulantissimam turbam, & veluti invita  
 modestiaprognatam. Juveneserant, & diversis  
 quidem coloribus, cæterum unius genere vestis  
 ornati, ut facile appareret servilem manum esse,  
 quæ exeuntibus heris præsto futura confederat,  
 ac cum nescio quis ex illis quereretur sibi vestigio  
 meo pedem obtritum esse, egoque constantius  
 mendacium increparem, ille ficto acrius dolore  
 foedissimis detonuit verbis, & præterea in vultum  
 meum tanto furore sæviit, ut dentium series pæ-  
 ne ad illam machinam discuteretur. Putares si-  
 gnum ad pugnam datum esse. Concurrunt in me  
 universi, servilesque animos barbara voluptate,  
 & immerentis injuria explent.

Iam me in terram repetiti miserant ictus, jam  
 illi volutatum altissimo versaverant cœno; & ni  
 concurrentium pietas prohibuisset, credo aliquid  
 gravius moliebantur. Sed illa præcipue matrona,  
 cui acidum paulo ante Epigramma cantaveram  
 posteaquam me esse intellexit, quem ista amen-  
 tium rabies violasset, clamorem vehementius tol-  
 lit, servitiumque omne ad auxilium meum præ-  
 cipiti imperio accendit.

Cæterum

Cæterum nihil magis me movebat, quam quod verebar, ne me calamitas risui, aut mei etiã mercenarii exponeret. Ille laudabili probitate lachrymas in meo casu effudit, crebrisque singultibus concussus meam vestem obtusa cultelli parte ab eminentiori cœno purgavit. Cum effusa deinde procella me jam antea madentem novo frigoris horrore constrinxisset, ac omnino meum incommodum geminaretur, monente mercenario, cœpi in viam redire, quæ mihi in hospitium maxime compendiaria proponebatur.

Sed O rerum mortalium mixturam! & corpora quidem nostra contrariis elementorum virtutibus astricta; animas autem mœroris & gaudii discordia gubernatas! Perfusus pudore tam ingenti, etiam omnis consilii inops, & ominis malignitate turbatus, qui eo die, quo me primum Doromiso & Fortunæ credideram, me solita malignitas factorum fugientem invenisset, pæne de extremis cogitabam. Quis putaret in tantis angustiis patuisse solatio locum? forte sustuleram oculos, ut breviter viderem quæ mihi per civitatis vias occurrerent turbæ, id est, quibus ludibrio in madida confusaque veste essem, cum notæ familiaritatis virum mihi insperata felicitas, ac velut iratorum numinum pænitentia objecit. Is erat Theophrastus. Ac primo veluti somnii vanitate delusus, lætitiæ ineptias excussi; sed posteaquam me vigilare vivax gaudii sensus admonuit, utraque manu complexus sum abeuntem (neque enim me ille adverterat) & in osculum familiariter invasi. Ille pariter gaudio mutus nihil nisi me amplexibus attrivit. Et illum quidem ornabat splendidior cultus, stipatusque servulorum manu nescio quomodo videbatur Deæ Fortunæ placuisse. Invitavi nihilominus ut in hospitium succederet meum (quippe ad ostium occurreramus) ibique animos expleremus longiori absentia veluti diuturna fame marcentes.

Igitur ubi consedimus, primosque consumpsimus jocos, interrogavi Theophrastum, quæ illum  
ratio

ratio in eam regionem teneret. Cum errassem, inquit, per diversissimas gentes, & singulæ suis vitiis duplicerent, tandem hortantibus amicis in hanc urbem admigravi. Ibi continuo eloquens sum visus, & si quid suffragiis populi credendum est, gentilium oratorum suavitatem adæquavi.

Præterea deditum sapientiæ putaverunt, quoniam supercilium videbant voluptatibus adversum, & vitam publicæ infamiæ innocentem laudabant. Igitur ad famam aliquantulum promovi, & quod est omnibus divitiis suavius, inveni charissimam matrem, id est fœminam, cujus beneficiis impendi amor potest, quem parentibus debemus. Itaque & Sophagonis beneficio in altiore gradum ascendi, & Poimenarchorum unus evasi.

Excitatus ego ad majorem spem, quasi omnia quæ à Doromiso expectaveram, consequi per Theophrastum possem, & tu igitur, inquam, in Sacerdotum Fortunæ collegium venisti? ubi audeo neminem admitti, qui mortalitatem non deponat: nunquid humilia terrarum incommoda è divino despicias loco? miserere; & veterem amicum non trans mitte Doromiso, sed ipse ad Fortunam & Protagonem benigna manu siste. Ille me arctius amplecti, & luctantibus per suspiria verbis, interrogare cœpit, vellemne in eam viam conjicere securitatem meam, & Deæ Fortunæ judicium expectare? nec dubitavi libidinem meam confiteri: iterumque rogavi, ne veteris & certissimi sodalis studium destituere vellet. Non est ille passus me ulterius decipi; & severo nec in Fortunæ collegium unquam venisse; nec quicquam à Doromiso expectare potius quam à virtute voluisse. Cæterum si ego forsitan rudis insolentium morum audire vellem, quibus gradibus in ea regione homines ad dignitatem conscendere possint, se, utpote jam peritum, optima mihi fide explicaturum esse. Cum ego hoc avidissime promissum exposcerem, ille hominum statum sapientissima oratione exposuit.

Duæ sunt, inquit, hominibus viæ, quos animus  
supra



supra vilitatem extulit plebis. Alia quidem tuta, & quam veluti lenia flumina raro tempestates exercent: sed eadem humilis, & ignobili quiete subducta formidini ventorum. Alia vero præceps, & in arduum exurgens; inquam nihil mediocre cadit, enitentes enim in verticem vel improbus turbo in voragines rapit, infra prioris humilitatem viæ, vel ipsa fortuna sustollit, & ingentem felicitatem temeritatis præmium facit. Nimirum qui contenti paterna domo, non dedignantur avorum lectulos, nec insanas spes audiunt vocantes ad negotia, aut servitutem aulæ, eos ego primæ illi & securæ viæ assigno: item illos, qui literis diligenter imbuti hoc primum inter Philosophos didicerunt, felicitatem in quiete animi, non in fascibus aut purpura latere, quique omissis dignitatibus, aut humili stipendio adolescentum animos excolunt, aut condiciones quærunt infra invidiam demissas: illos inquam, quos non offendunt hujus semitæ sordes, nec ambitionis cupiditas revocat, meo judicio sapientia in disciplinam suscepit, & cum iis amat felicitas rusticari. Quos autem in aliud iter cogit æstuantis adolescentiæ furor, aut negotia, aut turbidæ naturæ impetus, aut potentiæ amor, & pæne semper aurea dignitas, illi non majoribus plerumque præmiis impendunt miserrimam ætatem, sed tantum illustriori fuce misérias suas excusant. Primum enim plerumque longa spe decepti, nihil ad miserrimam senectutem præter vota & curas afferunt. Et cum libertatem vilissima servitute permutarint, cum instar satellitum adoratum induerint latus, quod tam indignis laboribus emerunt, sæpe levi jactatione corrumpitur: Inclinatio temporum fundatas annuis curis opes frequenter secum rapuit, aut in illis mutatio animorum, quibus fortuna sui orbis incertitudinem permisit. Alii potentia cadunt in interitu magnatum, ut quæ Nymphæ cum abroribus moriuntur, & tot tela in eos fortuna invenit, qui se illius potestati tradiderunt, ut instar multorum videatur,

videatur, nullos minus quam domesticos amare.

Cæterum qui emerferunt ex illis fluctibus, fa-  
teor, humanitate domini in cælum feruntur, po-  
tentia & opibus sublimes, & quod felicissimum  
puto, in debilem omnium invidiam cadunt. Ve-  
rum illud Euphormio vide, si nondum omnem  
sapientiam ambitio delevit, utrum sit præstabi-  
lius, honestæ quieti securissimam vitam com-  
mittere, an in anxias cupiditates delabi, & incer-  
tam felicitatem quærere per certissima mala.

Nihil mihi persuadebat Theophrastus obsti-  
nato ad calamitatem meam. Erat enim in oculis  
dignitatum splendor, & tentare volebam hoc lu-  
cidum iter, ut si fors & Doromisus destituisset  
conatus meos, saltem non exprobrarem ignaviæ  
humilitatem meam, & ille in contrarium ami-  
cissima contentione certabat, & si inquir, ad glo-  
riam festinas, Euphormio, velis à sapientibus  
laudari, qui modestiam & virtutem amant, o-  
pes autem & purpuram, veluti generis humani  
lubibria, contemnunt. Neque te ingeniosus ani-  
mus ad spes improbas extollat: vix est industriæ  
in aulis regalibus locus, nisi si illa summis divi-  
tiis nitatur, & ut superi Dei cuncta laboribus,  
ita medioximi divitiis vendunt. Iam non sapien-  
tiæ studiis informare juventutem cauti paren-  
tes debent, sed aut turpi aut mercenaria arte,  
id est, Veneri aut Mercurio commendare. Nam  
ut ancillis non patebant Matutæ limina, nisi  
uni quam matronæ colaphis urgebant; ita raro  
Fortuna pauperes in templum suum recipit, id  
est, in principum domos, nisi quos ad publica lu-  
dibria destinat. Ego sane Poimenarchus pæne  
miraculo evasi, & puto, si illam dignitatem ca-  
ptavissem, adhuc me inanis umbra fugisset. Tu  
quoque virtutibus incumbe, & illæ vel inco-  
gitantem extollent, vel ipsæ præmium tibi e-  
runt, turbidas omnium partes ex tranquillo  
spectanti.

Dum inter hos sermones versamur, & ille a-  
moliri à me inanem honorum libidinem ten-  
tat,

tat, ego vero ignobiles privatorum tenebras per-  
severo fastidire, cœna pertinaciam utriusque op-  
portune diremit. Nam exoraveram Theophras-  
tum, ut apud me illa nocte esset, & severitatem  
serii sermonis mitioribus jocis temperaremus.  
Placebat consortio nostro secretum, & vacuum  
triclinium poscebamus, ne in publica stabuli men-  
sa ad gravitatem cogeretur amicitia tam familia-  
ris, nec ullum ex domesticis Theophrasti admi-  
simus, sed mercenarius meus utriusque pocilla-  
tioni suffecit: minus enim verebatur, ne condu-  
ctitius ille & externus effusa colligere verba, &  
in secretorum notitiam perveniret.

Igitur licentius collocatis, etiam de veteribus  
amicis mentio incidebat, cum unus de ministris  
Theophrasti, ad ostium triclinii astans, adesse A-  
nemonem significavit. Ego de mensa exilui læ-  
titia plenus; statimque ad cellæ aditum decurri,  
& Anemonem tenui barbula auctum, cæterum  
pristinam candoris imaginem servantem, optima  
fide amplexus sum. Ille me non perfunctorie sa-  
lutavit, sed tam examinatis verbis, ut jam ab  
exordio timerem, ne exulta prudentia labefa-  
ctum amorem significaret. Posteaquam vero in-  
vitatus ad mensam consedit, & ego attentius cir-  
cumspicere omnes nutus cœpi & muta quodam-  
modo mentis verba, tum non me fefellit diutius,  
intimam charitatem, quæ quondam animos no-  
stros miscuerat, inflexione morum aut oblivio-  
ne esse corruptam. Itaque & ego prudentius age-  
bam, licentiâque amicitiae, quæ libertatem jo-  
corum, & nudæ mentis simplicitatem amat, a-  
stute coerceram.

Cæterum illud mihi præcipue admirationem  
movit; quod in antiquos mores suos veluti pro-  
fessa lite pugnabat. nam ut olim discedens ad su-  
perstitionem reliqueram piûm, ita nunc alternis  
vocibus ad ludibrium religionum abutebatur,  
neque me latebat cum affectata impietate ejur-  
rare ineptiam prioris sanctitatis, & velut virili-  
bus vitiis tellari se ab ea imbecillitate recessis-  
se, quæ

se, quæ aut Deum aut homines timet. Nam & de literarum studiis tam constanter tacebat, ut etiam occulte barbarorum ageret causam, qui eruditionem contumeliis vexant. Equi, tubæ, atque arma successerant antiquis sermonibus, & omnia ægrius audiebam, quoniam non studio bellicæ rei, sed inani vanitate superbæ indolis jactabantur. Illud tamen sollicitabat interdum iracundiam meam, quod paulatim in superbiam declinaverat sermo; ut jam nec occulte dedignaretur parem.

At ut turbulentus juvenis non mediocrem cœnæ partem mendaci jactatione consumpsit, intraverunt citharædi, & aliquot satellites illius, tam vagis ac petulantibus oculis, ut facile ex ministerio dominum agnosceremus. Pudebat omnino Theophrastum, (erat enim Anemoni familiarissimus) nec diutius in illa petulantia duraturus videbatur, cum Anemon me ad pervigilium invitat, quod suavissimis, ut agebat, virginibus consecrabat, quamquam & conjunx sibi esset, cujus pulchritudini, quicquid est puellarum facillime ipse donaret, si vellem consentire in jucundissimum laborem, jam non imperitas Academicarum voluptates, verum delicias politiores gustaturum.

Non dissimulabo vitia mea, sordescibat mihi literarum nomen, & inexpertam procerum vitam velut eruditorem nequitiam optabam. Itaque facile ingratum laborem promitto, cumque jam tenebræ ad illam licentiam invitarent, & ipse Theophrastus se recepisset domum, ego cum Anemone, per ignota urbis compita, cum servis omnino tribus & occentoribus aliquot pergo, nec id mihi à principio molestum erat, & augurabar magnificam voluptatem, quoniam ipsis proceribus placebam. Sed posteaquam ultimus vespertinus effusæ licentiam plebis revocavit in domos, & jam nulli occurrebant, nisi præsidio facum, aut latrociniorum suspecti, exigebam ipse ab animo meo, quo bono frueretur intempestivo aëri com-

missus,

missus, inutiliter etiam vigil, & alieno arbitrio felix. Quippe nos diversis foribus Anemon sistingebat, & deinde progressus ad alias domos, iterum jactatione aures meas in via rerum symphonia onerabat. Itaque jam primum fatigatus occultis suspiriis supplicabam otio, ut me respicere vellet, & ab inquieta voluptate revocare; veluti qui primum maria subeunt, jam in ipso territi portu terrarum commoda & navigii difficultates narrant. Sed me plane gravior calamitas à tam exigui mali sensu reduxit.

*Quid est horridulis, dii deaque,  
Quid est, Numina, dulcius tenebris?*

*Si mortalibus ut quieta nox sit,*

*Lux qua pervigil imperat laborem*

*Ponto mergitur, & laboriosa*

*Cessant pectora, pallidaque cura*

*Paulatim tepido annuunt sopori?*

*Et tantum licet aut libidinantes*

*Nigris prode moribus puellas,*

*Aut nutu refugo, unguibusque duris*

*Vlcisci juvenum salacitatem.*

*Cum lites Venus inserit jocosas?*

*Haccertamina noctium vigeant*

*Cum Saturnus erat. Sed ista peior*

*Ætas munera perdidit decorum.*

*Nunc aut insidia latent tenebris,*

*Aut incendia territant tenebras,*

*Et vis impia, perfidumque furtum,*

*Quale non tener imperet Cupido.*

*Quid est horridulis, dii deaque*

*Quid est, numina, tristius tenebris?*

*Si nullis tenebris laboriosa*

*Cessant pectora, pallidaque cura*

*Iam nusquam tepido annuunt sopori?*

*O Di! quis superest locus quieti.*

*Si lux pervigil imperat laborem,*

*Et mortalibus inquieta nox est?*

Cum enim bivium transiremus, grassatores quidam nocturni improvise impetu nostros primum satellites invadunt, nos deinde ejusdem

belli motu spe prædæ involvunt. Prima sorte incurrentium rabies inciderat in citharas, quas fædelaceratas cum huc illuc instar Thraciæ feritatis dispersissent, in artificum involant ora. accurrimus implorantibus ministris, palliisque circum lævam inductis ad nocturnā accingimur pugnam.

Grassatores longioribus hastis dimicabant, & utrinque præfixis. Nobis breves gladii erant, & ut mihi videbatur, audacia minor. Obruerant faces ictibus crebris, & in obscura nocte nos in tutiori nequitia lacescebant. Iam Anemon aliquot ictibus fatigatus circumspiciebat iter ad fugam, & me viarum in illa civitate imperitum crudeliter deserebat. cum vigilum cohors, qui in diversis partibus urbis excubabant in cædes & latrocinia armati, velut facta indagine nostram aciem includit: grassatores autem, qui sæpe ex ejusmodi venationibus evaserant, nescio qua solertia eluserunt circumstantium manus. Ego vero cum Anemone, & servulis, & omni symphonia captus, non incidisse in manus civium, sed tantum prædones mutavisse putabam, nihil enim mollius sæviebant. Quippe nos planos esse & intentos in rapinam arbitrabantur. Dubitavit Anemon, an dignitatem nominis furenti opponeret turbæ, sed veritus ludibrium inter æquales suos, si divulgaretur facinus, tam diu inter verbera duravit, quam diu credidit contentos castigatione vigiles tandem dimissuros esse. Sed ut custodiam in crastinum curari audivit, & nos tribunali servandos, non amplius cunctatus, quis esset, & quomodo in latrones incidisset, non satis credentibus exponit. Quippe Anemonis nomen non mediocre erat in illa civitatis regione, ( nam in eadem habitabat ) & in illa cohorte duo mercenarii erant, qui diurnis stipendiis ipsi domum ædificabant. Igitur tam avide in Anemonem vultus obvertunt, ut pro nefas! dum incautis manibus admovent faces, delicata barbula, & cum ea tot unguentorum & pectinum labor arserit. Exclamavit Anemon, desperatione plenus, & nisi me

me fefellit rabies oculorum, dubitavit, an tanti dedecoris risum subita evaderet morte. Nec minus attoniti satellites contumeliâ & verberatâ rustice excusant, ut jam vapulare malit Anemon, quam se verberatum tam publicis vocibus audire.

Ac ut primum interquievit tumultuantium clamor, ipse ad mortis tristitiam mæstus proripuit semet è turba, meque sedulo servante vestigia, ad domesticas fores pervenit. Dimiserat symphonicos omnes, & importunis vexabat pulsibus linen suum, ut jam ego pæne furenti nec auderem blanditias adhibere, nec intronissus quidem, pacatius in familiam egit, trucique imperio, nescio quid, de servicio questus, duos ex illis contumelia verborum ruptoque capillamento objurgavit. In me deinde ficta serenitate intuens, procurare in crastinum corpus jussit, tum mihi lectulum sterni, nec ullam hospitii benignitatem denegari. Ipse in cubiculum ad uxorem secessit, ut opinor, tragicæ noctis furias mutaturus in socium.

Ego vero expectatione voluptatis fraudatus, cum tristissimum casum securo prosequerer risu, in altissimum soporem delabor. Prima deinde luce discursantis familiæ ministerio excitatus, non omisi pertinaciam consilii mei, sed omnino ad Doromifum constitui ire, suæque misericordiæ commendare eruditionem meam. Igitur ubi cultum meum diligentius polivi, rogavi, num Anemoni vacaret, discedentem hospitem videre. Ille ad se in cubiculum venire jubet: nec contentus tot officiis, ad uxoris conclave benigna manu ducit: fortasse ut ostenderet felicitatem suam, & quam egregia forma beatus frueretur. Stabat ad speculum uxor, vexatamque ferro comam ancillarum ministerio torquebat: ac tum jussa hospitem salutare, intermisit paululum cultus, vultusque humanitate plenissimos in me convertit. O Deorum ludibrium! erat eadem mulier, quæ mihi pridie in Fortunæ templo confuderat mentem, ac deinde in Olympionis nuptiis, nescio quam



quam auram felicitatis liberali fronte spiraverat.

Quis animum meum pingeret, qualis in Anemonis cubiculo fuit? hærebat ambigua lætitia suspensus, & turbatas inexpectato negotio vires non satis fortiter revocabat. Illud tamen præcipue timebam, ne quod argumentum amoris convinceret frontem. Cæterum pridianæ noctis molestiis hoc spectaculum jam bene emisse, jam in felicitatis portum per turbulentæ noctis tempestatem venisse credebam, jam agebam gratias libidini meæ, quæ in illam mulierem, veluti consilio, inclinarat. Sed & mulier, veluti quodam monstro confusa, nihil nisi me intuebatur. Ego more gentis usus sum; & humilem vultum ab osculo pallæ ad matronam sustuli, & titubantibus verbis communem quidem humanitatem explicui; cæterum omni nutu & furtiva oculorum mollitie meus amor satis intelligenti loquebatur. Iam ego Anemonem diligentius ambire, jam æquissime superbiam ferre, etiam quærere cæperam moras, & in eo voto defigi, ut me illo die invitaret ad cænam. Sed jam satis indulserant fata, & oportet spes amantium longius trahi. Itaque consumptis omnibus moris, excedo è cubiculo mœstus, & tantum in spem redeundi vivens.

Neque multum moratus hesterni itineris vestigia relegi, & in exteriori Doromisi atrio cœpi cum cæteris expectare, dum ille ad Protagonem exiret. Et cum aliquandiu vagus, modo de Doromisi potentia, modo de Anemonis uxore cogitasset, forte incidi in illum, qui pridie me ad nuptiarum deduxerat pompam. Ac ut me ille agnovit, tandem opportune advenisse, lætissima fronte, prædixit, subsisterem tantum in atrio, donec ad Doromisum laxata negotia promitterent viam.

Plurimi mecum in atrio erant, & Doromisum cum libellulis expectabant. Præcipue juvenis quidam impiger, si quid conjicere poteram ex vibrantia oculorum, cæterum artificiosis cincinnis præ-

nis pæne ad muliebrem mollitiem excultus, se applicaverat homini. optimi vultus, & ut arbitror, melioris ætatis, quam præmatura canities simulabat. Cæterum exaudirierorum sermo vix poterat: sed vehementia vultus acerrime loquebantur, dexterarumque argutis motibus, & sine arte excitatam sequentibus mentem. Vicini mihi erant, ut sine suspitione hærerem ambulantium tergis. Captaturus itaque sermonem utriusque, si quid forte & re mea audirem, in illorum vestigiis eram, cum ex illo sene audio antiqui poetæ versum, qui olim diversa fatorum dona æstimans, non omnes posse omnia admonuit. Quid tu, inquit, mœstus es, adolescens, quem pulcherrima dote dii auxerunt, id est, insigni patrimonio, & quod isti eruditi vellent omni doctrina emere? quid doleres tibi ingenium ad disciplinam tardum esse? num ideo minus fasces submittemur tibi, & litigantium turbæ? erras, mihi crede, si quid putas ingeniosius esse auro, aut sapientiam non venalem, quæ sæpe mulierculis in patrimoniipartem datur. Tu modo, cum Doromisus se in conspectum dabit, aude accedere ad genua, & aliquod sacerdotium petere, quo Fortunæ & Protagonii deservias. Iam enim illi Sacerdotes jura populo dividunt, & tu facile in id collegium venies. Habes enim symbolum tecum cui veluti machinæ nulla secreta aditum negant.

Tum ego diligentius cogitare mecum coepi, quod esset ejusmodi symbolum, cui veluti fulmini omnia paterent, cum progressus ex limine servus, idem cui paulo ante commendaveram artes meas, me, cum juvene illo, in interiora ædium ad Doromisum manu duxit. Pauci sequebantur à tergo, quos atriensi illustrior gratia commendabat. Ego vero nihil mediocre expectabam, tanta benignitate admissus, & jam spes improba concipiebat dignitates, quarum gratia in Anemonis domo tentarem conjugis fidem.

Vt vero sum in interiora perductus, omnia auro argentoque vibrantia insolitam aciem fefelle-

re; majestas deinde locorum, & animus spe metuque perturbatus, quicquid prudentiæ conceperam, & verba quibus ad Doromifum destinaveram uti, pæne submovit. Ille in communi veste erat, & per triclinii spatia satis truci majestate ferebatur. Ego in genua decidi supplex, & nisi quod precantis humilitas in contemptum transit, etiam vestigia ambulantis aut vultu aut pallio verrissem. At juvenis, cujus ego sermonem paulo ante captaveram, audacius ad Doromifum venit, osculatusque dextram tam felicem lepidissimis verbis in hunc modum peroravit. Et cœlestibus diis, & nostris destinatis religionibus parendum est, felix quem servitus Deorum in veram libertatem asseruit. Ego Fortunæ Numen & potentiam Protagonis, teque dispensatorem utriusque, semper veris honoribus colui, semper in familiam vestram venire adnixus sum; certe non invita Fortuna, quæ mihi hoc symbolum ad te dedit, ut me in domum suam, & Protagonis clientelam adscriberes, & ne gratis in tantam ascendendam sortem, utrique mille pondo optimi thuris annua devotione promitto.

Hæc effatus, oclusos diripuit sinus, extraxitque mirantibus nobis deæ Fortunæ signum. Erat imago Protagonis, ex aurea planicie exurgens, in cujus dextera parte scriptum erat, *Decies*, in sinistra vero, *mille*. Nunquam humanior Doromifus, ut postea intelleximus, fuit, certe porrexit juveni manum, & gratulatus est de indole, & ingenio, deque cæteris virtutibus, quas omnes in hoc legerat auro, advocatoque scriba, publicis instrumentis sacerdotium cum tribunali dari jussit.

Post hæc ego lentis passibus ad Doromifi latus veni, & composito vultu, ne ipsum non timere viderer: ego, inquam, minus explicabo meas doctes, quoniam vobis diis omnia patent. cæterum indulgentia mea perfeci, ne quis esset, cui Musæ profusius de artificiis suis dispensarent. Quæ res, si me Protagonis, tuis auspiciis, commendabit, & per hunc me Dea Fortuna respiciet, nihil  
majus

majus mihi imputaverit Apollo, quam quod ipsi tam preciosæ servitutis gratiam debeo. Audito ille artificii nomine, diutius hæsit, & quam artem profiterer, diligenti attentione quæsit, ego iterum Musarum disciplinam me afferre significavi. Cum ne tum quidem meam mentem percepisset, me in interiorem porticum vocat, ubi depicta humilium artium instrumenta toto parietum contextu explicabantur; mallei inducesque, & spirantes fornacibus ignes, alterius parietis exordium vivis coloribus impleverant, in altero vero marmorum species erant, & rudium lapidum politissimæ formæ: mallei deinde, & radii latiores; plumbum quoque, quod tenui filo propensum de ædificii rectitudine sua inclinatione judicat. Post hanc Latomorum scenam erant fictilium statuarum descriptæ rationes. Nec longe pictor ipse suum artificium expresserat penicilli figura, & ostrearum conchis, quas veluti dilutis coloribus inundabat, cithara deinde, atque lyra, & laboriosæ testudinis fides, velut in honorem saltatoriæ artis ex aurea tabula spectabantur. Supremus hortorum cultus erat, & deducæ industria fontis.

Hæc me omnia intueri Doromifus jubet, si forte invenirem illam artem, quam ego Musarum disciplinam appellaveram. Tum ego, intellecto nominis errore, me modeste artificem esse negavi, aliquid nobilius parentum fortunam aperuisse mihi, & ingenium à vulgi sordibus secretum. Meliteris esse excultum, me naturæ humanitatem mitium studiorum disciplina expolivisse. Audito ille scholastici nomine fastidioso, primum nutu averfatus est perorantem: ac modico deinde risu jam trepidum, jam pavitantem perstrinxit, & cum à seculi industria alienum appellavisset, existimaveras forte, inquit, ad ludimagistrum advenisse, qui tuis scientiis inter famem & argutias uteretur. Neque longius moratus, me, veluti atroci fulmine damnatum, & exanimi sopore marcentem, inter mustantem

familiam, meæq; temeritatis accusatores reliquit.

Egens ego consilii, cum tenacem meæ sortis malignitatem devoverem, quæ omnes meos conatus frustrabatur, ad inhumanum limen revoco gradum. Ac, ut primum ad exteriores fores extuli pedem, conspicatus in vicinia locum, qui commoditatem secreti monstrabat, eo me ad lugubre solatium contuli, ibi omnem miseri vultus constantiam omisi, indulsi que profusus gemitibus, & ad satietatem me ipsum lachrymis explevi.

Proclamabam in illa solitudine fortunatos artifices, & ubique Polycletum aut Myronem pro Apolline invocandum; interdum irascebar amicis quorum alii feliciter scelesti esse non poterant, aliis reverentia virtutis obstabat. Redii demum ad consuetudinem meam, & ipsi regioni iratus, indignantem furorem his sævissimis verbis expressi:

*Infanda tellus, quaque vix pejor Stygem  
Vehit profundis apra suppliciis humus;  
Quousque savos, misera, lassabis deos.  
Experta fulmen? tene non fregit satis  
Nuper per omne dira supplicium lues?  
Virtute pulsa cesserat mastus dies.  
Et omne tuta nocte regnabat nefas,  
Tunc atra Erinnyssqualidum movit caput,  
Caput Cerastras movit, & facem manus:  
Linguaque ( & illam sibilo auxerunt coma)  
Livente dixit; Ite gentes perfida,  
Ite, ite in arma, quaque patrastris diu  
Hac vindicate scelera. Non omnis sat est,  
Ni sponte fusus gentis in pœnam cruor.*

*Sic illa dixit, postque neglectos deos  
Huic parvistis. Tunc quoque & mortes novas  
Didicere fata. Perdidit natum pater,  
Abiit cruenta fratris in jugulum manus  
Civisque quernis frondibus merces fuit;  
Sed interempti. Quantus ob priscum decus  
Populatus alto vertice infandam diem  
Porrexit ignis? Iacuit infelix honos,  
Et mortuorum turpis in manes furor,*

*Vrinas parentum sparsit, & quondam leve  
 Tumuli cadentis mole depreßit solum.  
 Sic quasißtis nempe depulso die  
 Reges deosque, post fera noctis malum  
 Iubar reluxit. Pervicax gentis furor  
 Quidpejus in tormenta sollicitas deos?  
 Severiores forte non pœnas habent;  
 Habent easdem. Rursus increvit nefas,  
 Dolus, libido. Rediit infandum scelus  
 Et nuda virtus sordido jacens situ  
 Discit superbos divitum fastus pati.  
 Iamjam recedo Præveni ultores Deos,  
 Quisquis times perire. Non stabit diu.  
 Ductore caco, turba quam Plutus regit.*

Cum effudissem hæc in Eleutheriam probra,  
 tumentemque animum sublevassem, cœpi à me  
 repetere rationem tanti doloris: & velle callidis  
 argumentis fallere consciam mentem. Quid e-  
 nim? quod delicatulum recocta purpura non in-  
 volvit; quod tunicam vermes Assyrii non infe-  
 stant: quod non frequens servitium ad nutantis  
 imperia pendet, ideo culpæ fata sustines, & vel-  
 uti cum diis disputare? quasi magna sint æstimanda,  
 quæ Fortuna ignavis dare solet, vel facinorosi-  
 crimen. Non vides æterna consualia esse, &  
 ad turpissima animalia immerentes coronas de-  
 ferri? Ex ipsis illis quos miraris, quotus quisque  
 per virtutem promotus est?

Si es magno animo, honores infra te judicabis,  
 qui te tam pertinaciter refugiunt, & Fortuna et-  
 iam infesta tibi favet. Confer te in solitudinem a-  
 liquam; subduc hodiernæ ambitioni vitam: ha-  
 bebis consortium Musarum, & virginibus com-  
 modius frueris in secreto.

Eludant ignavissimi homines ut volent gloriam  
 literarum: illi & suis voluptatibus sopiti, neque  
 jam integrivivunt, & cum eos interitus occu-  
 pat, etiam nomen & fama moriuntur, & totos  
 tumulus accipit. Alumni literarum nesciunt fa-  
 torum legem, & tum maxime vigent, cum extin-  
 ctorum desiderium perennis memoria illustrat.

At enim in Lusinia ex primis gentibus venis, & Themistiis apud suos eadem dignitate florebat. Claram stirpem tenebris premi grave est, & abire à parentum luce. Succedunt avis meis servulorum stirpes, & me parem erubescunt quibus imperare majores dedignarentur. O hominis curæ indigno dolore obstrepentes ! quasi aliqua bona perpetua sint. Nulla putris in sylvis arbor aliquando non viguit, & quæ jam proceræ sunt, initio laboraverunt terram frangere, & debili fastigio emicare. Pastoritia Lavinii cohors plures humano generi duces dedit, quam olim greges paverat. Et miseri Scytharum exsules ( quis crederet ? ) tandem Arfacidarum famam sparserunt, pæne mundum cum Romanis partiti. Qui hodie florent, in autumno suo decident, etiam fortasse calcabuntur. Majores tui initium sui splendoris habuerunt, & nihil æternum mortalitati indulgetur. Quid doles, si finito magistratu Fortuna ornamenta repetit : nec quidem ab omni genere, sed ab uno Euphormione. Quam diu cognati florent, & familiæ tuæ misereri non potes, & lachrymæ, quas in aliam speciem subornas, plus superbiæ habent quam pietatis.

Quid denique tibi adimitur tantis quæstibus dignum ? tene à liliis excluserunt ignavia majorum, & res domi arctiores ? Te agnoscere veretur cognatus, ne ærarium sentiat familiam esse auctam ? Erras Euphormio, si non putas esse aliquos calamitosiores. Neque tu à Principibus quartus es, & tamen aliquid supra Æsculapium colis.

Non vides ipsos deos curis etiam fatigari, nec te illa Nympha admonet molestias non hominibus tantum graves, sed & in immortalitatem valere, cujus nomine isti versus circumferuntur :

*O patria, O arces, O dulcia tecta parentum,  
Vnde avus, unde patres unde ex ordine fratres  
Sceptra tulere mei, mene O agnoscitis arces ?  
Illa ego sum, cui vos cunabula chara dedistis ;  
Et patrio ingentem cultu jactastis alumnam,  
Stirpe deas, & fronte deas, & sidera vultu*



*Cum premerem, amborum spes ambitiosa procorum,  
 Nunc conjunx vidua, & vani cum nomine regni,  
 Rupibus è nudis, longique è carcere montis  
 Excedo. Sed & hic causas infesta dolendi  
 Disponit fortuna mihi, monstratque colendam  
 Qua mihi successit, quique ab de corpore nostro  
 Debuit esse puer. Nec jam contendere promptum.  
 Damnavit dudum miseram, fecitque nocentem,  
 Cum tali certasse viro. Iam credere divis  
 Felicesque sequi juvat, & subscribere fato.  
 O dolor! an potui victos inflectere vultus  
 Despectosque orasse viros? Ne credite vivam,  
 Iam dudum perii, jamdudum extincta supersum,  
 Et vivo & morior toties. Me funere longo  
 Nempe mori decuit, qua tot per sæcula clavam  
 Induco tumulis suprema Valesia nomen.*

Cum servires. Euphormio; summa votorum erat, aut catastam aut carceres vitare, nunc fastidis adoptivi patris opes, & si Fortuna ad arbitrium tuum favere, illam licentia ambitionis, & desideriorum immodestia fatigabis.

Persuadebam animo male credenti, vera esse quæ loquebar, & prope impetraveram pacem, cum ecce consumpta lachrymarum nube, veluti mihi Solem fortuna reduxit. Cum enim ad Theophrastum irem, mutuis questibus cum eo Fortunæ contumaciam vexaturus, intellexi eum quidem domi non esse, cæterum anum quandam minime in illis locis usitatam, bis me jam in illis ædibusquæ fuisse. Adhuc illi loquebantur, cum ecce mulier in limine erat, prolataque de sinu tabulas tradens, è re mea fore dixit, si quæ in ea cera mandabantur, curavissem. Erant autem tabulæ ad exactam opulentiae luxuriam consignatae. Involvebatur tenui serico cedrus, & eadem gemma sex locis fidem literarum una imagine sanxerat, ab utroque latere ceræ pendebant uniones, & ipsi molli serico ad cælaturam pertinentes; ut jam mihi cortex non quotidiani saporis suavissimam medullam polliceretur.

Gaudio itaque tumultuque plenus, frango vinculo-  
 culorum

culorum moram, apertasque literas in hæc verba conscriptas esse lego. Quæ sim, neque intelliges, ex nomine meo, neque ex ea quam huic secreto delegi. Si dignus es quem amem, jam in oculis meis incendium vidisti, & misertus es; non est ea vultus mei duritia, quam non penetret ignis latens: non possum erudita nisi doctis complexibus delectari, & potentias plurimum amo. Si cras descendis ad Fortunæ fanum, ibi te forte amicum numen inveniet. Vale. Perplexus significatione tam confusi amoris, sevocavi ancillam, jussique si ad matronam rediret, omnia quidem quæ in potestate essent polliceretur; sed si aliquid forte peccarem, certe non irasceretur mihi, sed ignosceret potius epistolæ, quæ nihil me aliud docebat, quam dubitare.

Dimissa muliere, cum jam spe crastini pacatius Doromisi sævitiam ferrem, quærere cœpi, num Theophrastus foris promississet ad cœnam; & dulciori tristitia etiam solitudinem in solatium petebam, cum se mihi Iulianus dulcissimo amplexu confudit, qui in Theophrasti familia princeps, arbiterque secretorum, me ad Doromisum non ignoraverat ire. Et, ô te, inquit, felicem, si Doromisus spes ingentes præcidit, & vanitatem tuam saltem subito foras exclusit. Sciscitabar ego fastidii causam, & cur humanarum rerum culmina tanta contumacia damnaret, quia, inquit, & ipse Theophrastus, antequam Poimenarchus evaderet, nunc magnatibus charus, nunc ipsa gratia periculis oblatas, documentum mihi fuit, quam sit difficile, tam levigatum iter sine casu terere. Et ipse olim fortunæ ludo versatus, jam contemptu vindicat miseriam suam, & aliis de littore saxum ostendit. Sed maxime quidem Leucomus tibi in Delphio vetusta amicitia conjunctus, optimatum familiaritate pæne periit, qui contempto littore aliquantulum in altum evectus est, sed & naufragio proximus fuit, & tabulam sui voti judicem diis æquoris persolvit. Tunc & ego non mediocri risu amicitiam nostram laudavi, quod inter eos

eos coivisset, quibus Fortuna ejusdem studii amore faciebat : rogavique ut fusius exponeret, quomodo magnatum favore Leucomus pæne in ruinam incidisset. Et ille : scis, inquit, quis fuerit Geragathus? integerrimæ famæ erat, & in eo Fortunam invenerat virtus. Hujus filius Leucomus olim familiariter usus est, & quis non sperasset hæc illi amicitiam causam omnium bonorum fore? quæ etiam ejus salutem evertibat, nisi obstitisset minimus fratrum, solus omnium dignus fastigio suæ domus.

Admiratus ego tantum nefas, cujus id piaculum fuisset, interrogavi. Major, inquit, illius familiæ Iovis sacerdotio præfectus fuit, iis conditionibus, ut de regionis more libationes ab aris in paternam descenderent domum. Sed cum ille mentem in Græciam misisset, ipse tam misere aberravit, ut nec in regionem perveniret, in quam proficiscebatur, neque viam reditus in corporis domicilium teneret.

Igitur ad aram frater vocatus, illo utique junior qui mentem quærebat, in insulam, & quod antiqui sacerdotes faciebant, etiam in vaticinium succedit. Etenim statim affari cœpit syderum orbes, nec tam in oracula erudito hiantis soli spiraculo, quam numinum præsentia uti. Neque diu mortalitas hunc favorem cœli incolumis tulit, & jam animi valetudo tantis Deorum muneribus fatigata parum supra fratrem erat, cum mater tot filiorum vivis funeribus pæne ad mortis tristitiam compulsa, se in collum Geragathi conjecit, & manantibus lachrymis utramque faciem rigans, quamdiu, inquit, te privatum conjugem habui, genui tibi liberos capaces fortunæ nostræ, & quos agnoscere majores nostri possent. Sed posteaquam senectutis tuæ otium importuna dignitas fefellit, visa est felicitas dedignari stirpem tuam, quæ non erat inter fasces concepta, & exemplo Medæ exhaustire Æsonis veterem sanguinem, ut sanctiori succo venas tuas & domum repleret.

Nisi quid in te est, etiam superstitēs excindimus.

mur, & cum Æmilio inter duo filiorum funera triumphamus. Non veteris ludi memor, vel intempestiva libidine accensa, quo die in hoc tribunali collocatus es, petii ut liceret antiquarum notitiam consuetudinem inire, nec jam aliquid rogo, nisi hunc laborem à te familia labens imploret. Si frustra conatus eris, at majore solatio moriemur, non ignavia nostra sed fatorum crudelitate orbi.

Hic Geragathus mærore impeditus, postquam diu suspiravit, quod ad ea, quæ uxor rogavisset, mature deliberaturum refert. Consilio quam strenuitate omnia salubrius geri. Cæterum de liberis dolorem tantum esse, quantum hæc vita & fessa laboribus senectus ægræ ferrent. Mox ingerere probra cœpit, & Leucomum omni verborum contumelia lacerare, illum esse, qui inconsultis studiis distraheret imprudentiam adolescentum, & inanibus superstitionibus juventutis impetum consumeret, toties cælum & numina inclamando effecisse, ut nec filius cælum teneret, & amitteret terram. Adeo sanctorum hominum conditionem infamia inundavit, & paucorum vitium, liberali adolescentum ingenio abutentium, etiam innocentem modestiam proscripsit.

Supervenit interim declamanti patri filius, ille scilicet, cujus mentem ita dii ornaverunt, ut suum in fratres peccatum excusent, obortisque pæne lachrymis cœpit amoliri à Leucomo tam inepti facinoris invidiam, illum enim ab iis moribus abhorre, nec fucatæ aut crudelis pietatis juvenibus esse authorem.

Hæc ipse juvenis ad Leucomum incorrupta fide cum detulisset, adjecit, non mitigatum modo senem fuisse, sed vincente iracundiam fide, si quid in eo esset, prolixè pollicitum, se reconciliationem beneficio firmaturum. Ille vero incertis magnatū amoribus fatigatus, velut instabili æstuantis maris motu, atrocissime damnavit studium suum, qui & ambitionis mala sciret, & tamen nonnunquam amicorum precibus exiret ab otii umbra,

Tu quoque si tibi victurus es, Euphormio, cedo dexteram in sapientiæ pignus. Si te illi beati temnent, certe illorum stoliditatem eodem munere prosequeris: Contemptus, ludibria, joci, tela sunt omnibus data: & securius è latebris emittuntur.

Inter hos sermones advenerat Theophrastus, & cum pauca in Iuliâni sententiam dixisset, ad illum præparata intravimus cœna. Ibi pretiosa fercula argento ad mensam ferebantur, cæteræque deliciæ erant, quas optima mater illius familiæ ingerebat. Exactæ ad valetudinem dapes nisi ad satietatem invitassent, triclinium tam castigatis fenestrarum ac parietum commissuris, ut rimosior esset uter in quo Æolus ventos Vlyssi credidit, & ut aër frigore inhorruerat, duo famuli ad largissimū ignem subinde cummulata ligna prodigebant.

Itaque ad tam elegantis triclinii cultum & oculos & mentem advertens, prodebam suspiriis, animum meum tam quietæ felicitatis admiratione suspensum.

Nec tenui lachrymas, alienis commodis admonitus calamitatis meæ, & certe, inquam, Theophraste, facile est in ejusmodi vita negligere magnatum opes, & non quærere aquamposito in ingentibus undis. Ego vero non aliter explebo animi dolorem, exprobrantis sibi fatorum odium, quam si mihi quæ in cæteros optimates argumenta, velut arma, divisisti, in tuam quoque fortunam convertero.

Ad hæc verba ille modestissime subrisit; & ne me longior invidia perturbaret, scis, inquit, tantum vitio nostro voluptates degenerare à pulcherrimo fine; Deorum munera esse, si adhibes modum, quem plerumque intempestivæ libidines corrumpunt, neque aliquid est tam molle, quo severi homines sancte uti non possint. Iam vero quantum sit corporis commercium cum animo morborum fastidia monstrant & dolores, qui in perpetuam sui contemplationem animum tenent. Itaque demulcendus est tam familiaris

mentis comes, corpus hoc inquam, ut eam nobis ad studiorum sublimitatem permittat, nec occupet importuno sodalitiijure. Mihi crede, vix in angustiis aut curarum ægritudine est literis locus, & sapienter majores nostri Solem omnis lætitiæ datorem Musis præposuerunt. Nam ut animum nimio luxu solutum nervi ad sapientiæ investigationem destituunt, ita nisi impetraveris veniam à corpore honesto veluti ludo, frustra tentabis conciliare animum literis proprio follicitudine intentum. Nullo æstu Apollinis calefcet injuriis hyemis apertus, & ipse Homerus nunquam securius deos vulnerabat, aut pugnantem Achillem sequebatur, quam cum promiserat ad cœnam. Ideo homines stultissimos puto, qui veluti pugnarent cum natura, assiduis doloribus suorum corporum patientiam fatigant, & interrim animum nolunt miseriis ingemere, sed eruditioni locum in mentibus quærunt, quæ tot malis plenæ vix ipsam ægritudinem capere possunt.

Itaque ne fastidiosis studiis provocem ad nauseam literarum timidum laboribus corpus, ipsi quoque suum ludum humaniter concedo: ita liberaliter excultum, vices quoque animo rependet, eruditionem cum illo impetu vestiganti, sine quo nihil addisces ingeniosum, aut victurum conscribes.

Præterea cum reverentia sit alumna divitiarum, & egestas contemptione damnetur, nobis Poimenarchis spectabilis cultus datur, ne populus majestatem pietatis in ministrorum sordibus contemnat. Hinc Antistitum opulentia, hinc collegiorum opes ad cantus & ceremonias sacrorum, & ipsius antiquitatis pæne prodigalitas in numen, quæ omnia, proh nefas! seculi licentia corrupta in invidiam plebis & bonorum odium cedunt. Utinam tam modeste peccassemus, ut culpa se domi continuisset, aut negari crimina possent. Sed ne me dissimulando peccata approbasse existimes, si ordinem nostrum veluti humanum consideras corpus, videbis in radicibus  
corru-

corruptos nervos esse, & inutile membrorum robur inde fluxisse. Dehinc pervicaci morbo correpta omnia, & singulos aliquid adjecisse publico malo. Ambitus magnas mentes occupavit, plurimas libido, otium denique & ignavia pæne omnia collegia pertentavit, in quibus inertes fuci languidis voluptatibus desidēt, cantibusque præcipitata atrosos lingua infame otium emunt. Nulla literarum studia, nulla curæ pietatis. Vbi noctem vel crapula graves, vel domestica libidine fatigati consumpserunt, ad fana, atque aras, veluti in officinam vocantur. Nec imponere cœlitibus curant: palam negligentia vocis queruntur de maioribus, quod tanti divitias vendant.

Inde digressi in domos (pudet fateri) plurimum inter scorta fœnus numerant; aut intempestivis conviviiis adhibiti inter populares regnant, & profanam cæterorum licentiam infami certamine præcedunt.

Sed nec superbis excusationibus carent, aut sine argumento in nos sædissimum crimen torquent: Nam ut ex radicibus vini suam folia & caule temperant, & rami animantur ingenio suæ stirpis, sic isti ex Poimenarchorum vita discunt, quantum vitiis permittant. Horreo eloqui, sed Antistitum dignitas, jam velut ad quæstum prostituta est, & sæpissime criminum merces. Quis ex potentioribus liberorum cunas non infulis premit: aut quis liberius præconi hæreditatem sub hasta, quam sacerdotium commendat? Iam urbes obsidione maceratæ, vel ultro proditæ Principibus arces, illud præmium inhiant, & potentia inter scientias numeratur.

Nec sanctius dignitatibus fruuntur, quam illas quæsierunt. Nullis delicatior Venus, aut magis ad scrupulum examinata libido. Fastidiosa autem superbia & inanium cupiditas rerum, jam pridem ex regniis ad has imagines pietatis excessit. Quid aliud quam disponimus opes, & avaris cogitationibus ad spem prodigendi servamus? Quis sacrorum in agnis jacentium amor? Quem ovi-



lium tutela fatigat? Quid illi qui pro feris terrenis caulas, timiditatem damarum indignissima voluptate fatigant? Quid alex Venerisque patroni? aut quid ille qui ne unica cruce dignus videretur, trifurcifer evasit? Neque me ad hæc insignia impium putes, sed illa credo in supplicii notam facinorosis dari. Mihi crede, post hujus ætatis scenam hoc pluribus infula erit, quod Mithridaticæ uxori diadema, quod cervicibus infelicem modum aptavit.

Ego sermonibus Theophrasti mirifice delectabar. Nam & sincero animo veniebant, & effluentibus lachrymis comprobabantur. Itaque in eandem pietatem excitatus sum, & olim conceptam de Poimenarchorum moribus iram liberrima oratione effudi. Cumque multa in eam sententiam vehementissime dixissem, cæterum inquam, & hoc maximopere dimiror, quomodo magistratus potentiam Poimenarchorum securis oculis videant. Iam divulsa respublica, non in turbas factionum, sed in diversissima corpora miserabili facto discessit. Hinc religionibus sacri, illinc obnoxii legibus, veluti census distinctarum gentium numerantur. Et prohi dolor! in Academiis non de siderum luce decertant, & felicitatem in equuleum migrantem, & naturæ exordia, nubiumque semitas relinquunt, sed junique ac delirantes Philosophi sollicitè inquirunt, *liceatne ministro sacrorum se magistratibus submissum profiteri?*

Iam impune Scholastici velut radio limitem designant, & principibus fines suos superbissima temeritate describunt. Ipsi pueri inter Acignianos enutriti de Principibus audacissime loquuntur, & divinam Sacerdotum majestatem adorant. Sceptra subtilibus jocos violare non est nefas; si quid in Gephyrium loquuntur, puerili supplicio & superum minis velut ad inexpiabile facinus docentur horrere. Ita imbuuntur juvenum mentes: & tenax disciplinarum animus, posteaquam ex umbraculis excessit, in illis sententiis cum pertinacia durat: deinde tot patres familias,

sub

sub illis præceptis vivunt, quot olim pueri nugabantur in scholis. Ita respublica sacrorum hominum florescit, & per populos dissipata pæne omnium Principum vires exæquat. Ac illi quoniam sub soliorum ictu positi, deinde regum beneficio æquales, paulatim ad imperium properant, & omnem purpuram inevitabili fato convolvunt. Quid iniquius, quam illos & quid possint iudices esse, & de regum fastigio pro imperio disceptare? Si quis interim de illis inquirat, opponunt nimum furorem, & velut temerati cœli ultricia tela promittunt. Neque me ut sacrorum hostem eliminēs. Cultum & magnificentiam vestro ordini, Theophraste, concedo, dum se beneficia accipere fateatur, & indulgentiam Regum adoret. Nunc suæ felicitatis dedignatur authores, & cum illis suam superbiam ingratiſſima lite committit. Certe leges audio esse, quæ vos implicari vetent profanarum rerum nugis; ne animos, quos vacare numinibus oportet, indignæ sollicitudines deducant in terram. Sed & Bizantios tonsores, si domi novaculam haberent, lex publica volebat mulctari, & Rhodi luxuries tondentium caput magistratuum meruerat minas. Nullus tamen tonsores castigabat impune pro foribus novaculam habentes, & Rhodii invenustum putabant qui non commiserat in legem.

Cum hæc dicerem, animadverti me ægrius à Theophrasto audiri. Quippe quantum sibi devitiis permiserat loqui, tantum pro sociorum auctoritate pugnavit. Et fortasse meam sententiam soliditate argumentorum frangebatur, & ejusmodi præcepta ex sapientiæ fonte effusa mihi altius insedisſent, nisi uxor Anemonis astitisset animo meo, & epistola tam precioso amoris pignore cælata novis ludibriis occupasset vacuum mentem. Itaque posteaquam de cœna discessimus, ego cū vigilia curarum provocato sopore certavi: cæterum tota nocte inquietatus, ut primum sol diem reddidit ad Fortunæ templum ascendi, ibique cœpi expectare codicillorum fidem, qui me illuc evocabant.

Igitur perambulabam fanum, & nunc primis porticibus vagus, nunc in ipsa testudine religiosis passibus gravis, ubique me venalem circumducebam, cum mulierem video, quæ pridie codicillos attulerat, in ea templi parte, in qua minor frequentia erat, omni gestu deos deasque venerari. Ego velut temere accedo, positoque pariter genu, usque ne valuisset, modestissimo murmure interrogavi. Illa quoque mihi salutationem insusurrat, & in hoc colloqui furto rem totam in compendium deducit, Matrona, inquit, à qua proxima die, hospes, codicillos habuisti, hodie ad publicam scenam aliquot familiaribus promissit. Tu si tanta fortuna dignus es, inter tumultum exultantis frequentiæ, aut cum sub noctem liberrima confusio cuncta miscebit, aggredere expectantem, professusque amorem, verecundissimæ mulieris pudorem demulce. Neque enim illius indoles patitur, ut se prima tam audaci oratione confundat.

Hic ego argumenta quæ sivi, quibus internoscere Nympham possem. Pallam, inquit, & elatos in tutelam crines flosculis purpurei serici ornavit, præterea in sinistram aurem nigrantium ardearum pretiosissimum extulit sertum. Sed tu maxime ex forma cognosces; neque enim venustior hodie vivit. Tum & theatri nomen rogavi, quo ad spectaculum esset itura, didicique Valerianum appellari. Quibus diligenter perceptis, ne intuentium curiositas in nobis suspicionem inveniret, in salutata muliere de templo discessi. Mox leviter in diversorio refectus, præcipitavi iter ad scenam, meque viliori turbæ immiscui, quæ ex cavea ignobiliter spectat. Illinc enim liberrime oculos circumducebam per claustra, quæ certis gradibus circum parietes distincta sunt, & matronis ac magnatibus servabantur. Nondum ibi frequentia convenerat, & quoniam neminem noveram, tanquam in solitudine liberrimis cogitationibus exercebar. Non exciderat menti Anemonis formosissima conjunx, lentoque ac molli, id est, du-

est, duraturo igne carpebar. Sed hæc rursus novitas ignoti amoris placebat: quia opulentam voluptatem pridianæ epistolæ dives cælatura spondederat. Dum hæc tacitus agitabam, veluti ventis lacescentibus mare, ita paulatim populi licentia petulanti murmure increvit. Sensim enim multitudinis capax locus coeunti frequentiae defecerat. Nec multo post matrona cum comitatu medio-cri in superiori clauastro resedit purpureo serico ardearumque plumis magnifice exculta, qualem mihi conciliatrix anus descripserat. Ego autem velut multitudinis violentia rejectus in eam partem, latus & cervicem reflecto, illiusque vultum (si quando integumentum poneret) paulo avidius expecto quam Solem in Phœnicia servi, cum regnum perniciosioribus oculis destinabant. Neque diu morata cupiditatem meam, velut impatiens caloris invidum velum rejecit à fronte, & osculum aperuit, quod Iovem in omnia animalia mutaret. Tunc vero omnis constantia attonitum defecit, & succidentibus gaudio membris velut ebriam mentem omnes nervi reliquerunt. Quippe Anemonis uxor erat, quæ jam antea profundissimo vulnere amoris meam mentem percusserat. Igitur ut ad sensum redii, nihil cunctandum arbitratus, me primum de turba explico, conductaque claustri parte unde spectaculum intuebatur, ad ipsius denique latus audacissimus amator accedo. Etenim Anemonis amicitia meam cupiditatem optime tegebat, & nihil ego ab ea prius quæsi vi, quam ubi conjugem reliquisset. Illa humanitatis plenissimam vocem pæne musico concentu resolvit, mihi que proximam subsellii partem mirifica humanitate concedit. Cæterum tanta majestas erat in fronte, tantus pudor in oculis, ut ipse trementibus verbis interdum dubitarem de internuntiae fide, & pudore subrustico pæne defraudarem pulcherrimam mulierem expectatione sua. Nam timore & verecundia confusus, præterea cum circumstantium aures time-rem, propositum meum in Anemonis domum

differre cogitabam, quippe illo mulierem sequi amicitiae lege jubebar. Tandem fortiori consilio usus sum; & quidem me ad spectaculi jucunditatem avidissime converti: interim velut Tragœdiam laudarem, passim ad aurem mulieri loquebar, & illa averfis ad scenam oculis, quia me non videbat, audacius suam cupiditatem confitebatur. Et quidem tam serio occupatus parum retulissim ex ludis, nisi eadem tragœdia deinde per librarios distributa meam memoriam repetita lectione firmasset.

Illustris propter Poëtam scenam non evocaverat modo vulgus, sed orchestra vix sufficiebat magnatibus; neque ulla Tragœdia magis unquam studia civitatis erexerat. Qui primus ad argumentum processit, novam fabulam pulcherrimo explicuit versu; cujus hæc omnino summa erat: Hippophilum olim Melandriæ regem, sparsoper orbem imperio, utriusque terminos Solis, utrumque Oceanum tenuisse; ipsum ad meridiem vixisse; & ne ullus naturæ cardo cessaret, gentes quoque ad Septentrionem horrentes, illi hæreditaria devotione paruisse. Regionem Icoleontem appellari. Sed Albagonis crudelitate offensas, quem illis Hippophilus præfecerat, provocasse ad libertatem pertinacibus armis. Inde omnia cruentis seditionibus impleta, & plus sanguinis profusum, quam tam angustæ provinciæ flumina caperent, interim Hippophilum decessisse; & hoc filiæ suæ bellum pro dote tradidisse. Sed jam deferbuisset partium studia, & tempore mitigatum furorem, veluti exhaustam in mari tempestatem residere. Omnia ad foederis sanctitatem spectare, cujus series hac tragicocomœdia explicaretur.

Cum ille prælocutor discessisset ex scena, statim chartulæ in populum sparsæ omnium nomina vulgaverunt, qui erant in ea fabula prodituri. Erant autem ejusmodi. Lysippi umbra, viri egregie literis imbuti, qui superiori anno in Icoleonte decesserat, Præterea Hippophili & Albagonis

gonis umbra. Ægori quoque manes, cujus olim cervices Albagon præciderat. Et hi quidem ex mortuis prodibant. Illa autem viventium nominalegebantur, Liphippus Hippophili filius Rex Melandriæ, Despotikyrius princeps Liphippi minister, & Leucus secretæ pietatis præfectus. Labetrus deinde affinis Liphippi, cum Pedæa uxore, cui pater Icoleontis jura reliquerat. Argyrostratus quoque dux belli, quod in Icoleontidas gerebatur, & Charridotus consiliorum præses. Ex Icoleontidarum parte, Necarius erat exercituum præfectus, & aliquot vultu purpureo ac membris valentibus, qui publici consilii partes agebant. Extremierant, Tessaranactus Scolimorrhodiæ Rector, & Protagon, qui scenam suo commodo claudebant. Cæterum omnes personati agebant, nec quicquam vidi apertum in Tragicocomœdia pacis.

Post hæc spectaculorum exordia, primum agere coeperunt Lysippi manes. Prodebat ille exanguis, pallido studiis vultu, albam vestem corpori circumvolvens in eum modum, quem antiquis Romanis ascripserat. Narrabat, posteaquam decessit se in suffulta veste ad sydera elatum, ibi nullum ex Melandriis agnovisse quibus assueverat vivens: exorasse itaque cœlum, ut cum illis nescio quo descendere liceret. Nunc vero ad lucem rediisse, ut augeat libellos, quos de civili regimine præscripsit, institutis Reipublicæ, quam ajunt plane novam in Icoleonte excudi.

Adhuc Lysippus loquebatur, cum ex latebris aulæi miserrima Algabonis umbra processit.

Hispidi crines, veluti metum tormentorum horrebant; inculta barbæ canicies, oculique lividi nondum feritatem viventis amiserant. Cæterum apertum verberibus corpuserat, duoque ad tergum lictores lentissimis flagris impigre iracundiam explebant. Sed maxime miratus sum, posteaquam lictores ex personarum similitudine cognovi. Erant enim Hippophilus & Ægorus. Ille Icoleontem ab Albagone repetebat, alter

autem cervices ulciscébatur. Ipse ad aspera verba ictusque suspiriis respondebat; & , Inducias date, inquit, ut amoto supplicii sensu, apud vos æquitatis arbitros vestre justissima veritate perorem. Suspendere avidos ictus, & fatigatas dexterarum ad severiorem impetum laxaverunt. At ille, tibi, inquit Ægore, primum defensionē meam probabo, cui caput nullo odio ademi, sed ut gladiatores undiquaque in tuo funere certarent, tumultusque æternitate viveret famæ, quem sane tibi ex ruinis patriæ spoliisque vicinorum tristissimo apparatu Fortuna collegit. Quoties Icoleontem tempestas affligit, quoties obsessæ civitates armis & fulminibus merguntur, totasque acies mutuae clades hauriunt, tuo nomini omnia pereunt, tuæ memoriæ sacrantur. Interim amicos tuos monui, ne cuiquam Melandriorum fiderent. nec vana præceptorum meorum hætenus fides fuit. Et quanquam tua proles mihi non credidit, tamen multi constanter in odio manserunt, quod cruore tuo sanxi. Sed jam hæc prudentia vetustate consenuit. Iam detumescit irarum cauta sævitia, & adolescentium volucrum inexperta libertas vix satis vimina declinat, unde ægre parentes viscatis alarum orbibus fugerunt.

Tibi vero, Hippophile, jam alia excusatione placebo. Eventus consiliorum, non fides aut industria me invidiosissima accusatione proscripfit. Nec me solum tam innocentis criminis reum dii esse voluerunt: & tu quoque non omnia auspiciato es aggressus. Si tuis consiliis Fortuna suffecisset, numquid Eleutheria catastis tuis gravis tam liberum amitteret nomen? numquid Scolimorrhodiam atrocius quam Oceanus inundasses? Quæ iniquitas est, nos infelicis Fortunæ accusare, cum aut tu similiter in illa, aut hæc in te peccaverit? Videbam tuum imperium religionibus firmari; Proximam Eleutheriæ partem eodem jure expectabas, quo Vanarram olim tenes. Et Gephyriorum autoritas ad hæc necessaria erat. Quid peccavi, si in tua Icoleonte adversarios religionum oppressi?



oppressi? si volui inexorabili severitate deleri? Certelongius quam credebam, emanaverat morbus, & dum amputare fibras cogito, malis fortibus radices offendi. Sed ne putes Icoleontem perpetuo divorzio recessisse. Nos miserifrequenter divinamus. Filius tuus hanc veluti aucupio placabit, & tot senectutistuz artes improvida juvena superabit; ut scias Fortunam non raro sapientiæ præstare.

Cum Albagon hæc & similia miserabili voce dixisset, instauravere supplicium tortores, flagellisque laceratum ad latebras aulaei reduxerunt. Sequutus est concentus musicorum; minime gratus auribus meis. Fingebantur enim quidam ex Icoleonte piscatores hordeaceo tumidi potu inepta vulgicarmine in Liphippum recitare.

Actus vero qui sequebatur, hæc omnino memorabilia exhibebat. Argyrostratus Labetri præfectus querebatur, sibi tantum pecuniæ quantum Protagoni non esse, se paternam opulentiã in Labetri milites dissipavisse, & spem cum Alexandro servasse. Itaque regem Liphippũ ambiebat, ut sibi apud Despotikyrium faveret. Rex Despotikyrium servum supplex rogabat, ut Argyrostratus ex Indiarum vectigali absolveretur. Contra Despotikyrius disputabat, Argyrostratum tantum famæ illo bello quæsisse, quantum non ipsius aut majorum institores omnibus mercimoniis emissent: Etiam fratrem armorum beneficio sublatum, & opimam hæreditatem, ad Argyrostratum cum eo luctu pervenisse. Expectet ille, inquit, donec victoria aut fœdere hæc tempestas quieverit: tranquilla Icoleonte, civitas tua, ubi mundi nundinæ agebantur, iterum felici portorio ærarium tuum implebit. Illinc expeditos nummos Argyrostrato numerabis. Nunc quincuncem usuram cum illis mercatoribus accipiet, quos ad egestatem perducis solutione fraudatos. Nimium est dignitate & opibus florere privatos, vix illud patri tuo tanto Regi constanter contingebat, cui stipem in Melandriorum familiis Acigniani quæsilverunt.

Quod

Quod si tam præcipiti Argyrostrato utimur, ubi sunt artes nostræ, ubi felix tot seculis dolus? Tanta spe impleatur, quantam concipere sine læto horrore non possit: triumphaturum in oculis patriæ, & felici senectute *Mille annis* imperaturum. Ac ut inescatus præmii gustu, reliquorum teneatur imagine, suam gentem Doriacæ familiæ præponet, quæ illi in patriam tam vetusta æmulatione componitur. Ipsum Doriacæ principem gentis aliis deinde promissis oneratum, veluti interveniente versura, placabimus.

. Rex Liphippus, sive consilio Despotikyrii, sive imperio contentus, credo, discessit ad templum, cum Indiarum imago, macie & verberibus ad extremum confecta, de crudelitate Melandriorum miserrimis questibus peroravit. Reges contra dignitatem interfectos, totas gentes in equuleum impositas, ipsa terræ viscera avaris concussa laboribus non sine audientium gemitu lamentabatur. Et, Si hæc, inquit, mihi divitibus contigerunt, cum eorum crudelitatem pretiosissimis pensionibus placarem; quid exhausta atque inops præter sævissimam mortem expectem? quæ undique ferro sollicitata, jam vacuo sinu nihil præter antiquæ opulentiae inanem famam conservo. Ad extremum, paulo post Melandrios aurum, & me vita deficiet. Sic effata, creberrimis concussa suspiriis, squalidam faciem lachrymarum fonte deterfit.

Dum aulæum repeteret, ex alia parte Labetri milites seditiosis vocibus inclamabant, nec Argyrostratum nec Indiam esse facturos, ut sine stipendiis vexilla servarent. Labetrus antiqui sacerdotii librum capiebat in manus, ac veluti malos genios figurarum religione tentabat. Sed omnes eadem sacra amabant: neque ullum manus in ære rotata avertit in fugam. Chorus ex militibus Labetrifuit, suas vires tam in dominum quam in hostes superbissima vanitate jactantibus.

Ex tertio deinde actu hæc maxime annotavi. Despotikyrius, Rex Liphippus, & Leucus secretæ pietatis præfectus, Pedæa quoque cum conju-

ge La-

ge Labetro, & Charridotus consiliorum præses, de rebus imperii secretissima consultatione agitant. Sed nihil jucundius fuit, quam Liphippum audire. Is Leucum interrogavit: possetne propitiis diis fœdera cum aliorum sacrorum hominibus ferire. Ille oculos in manicatam tunicam aliquantulum reflexit: cunctatusque, donec rugas contraxisset in fronte, ita demum posse respondit, si inopia bellum geri non sinebat, tantum hæc animo fideliter vota celaret, nihil se curaturum sacramenta, quæ illis hominibus præstantur, & commodis temporibus sancte ad hostium perniciem usurum.

Charridotus autem barbam aliquantulum defricuit, & ad Liphippum conversus, Nunquam, inquit, Icoleontem tuam recuperabis, nisi removeris arma. Quid cunctaris furentes sedare inani pompa promissorum, veluti flentibus pueris extorquemus silentium, illorum oculis ad tabulas aut aulæa sublatis? Mihi crede, tam rigidi in ferrum, auro facile vincentur, & si quinque millia talentum, quæ quotannis inutili prodigis bello in aureum mutaveris imbrem, facile æneas turres & Acrisii claustra novus Iupiter superabis, tu modo potentiores factiosorum illo nimbo obrue, & ipsi tam gratis ictibus verberati, pertinacis populi animos tibi certissimis cassibus includent. Certe ille Nearius, ille flos ducum, & tam longi animus belli, veluti subducto igne languebit. Marcescet martii imperium viri inter feroces superba pace cives, & si quid antiqua autoritas valebit, hanc beneficiis in illum, & occulta suspicionum malignitate corrumpemus. Et ille spoliatus exercitu, nudoque latere, quod in bellis juvenus magnifica stipabat, malet credo piscatorios fastus pati, quam vel tecum vel cum Labetro vigere, provinciis aliquot præfectus, nisi gloriam contemnit, aut non est magnificum, instat Thessalicæ hastæ vestrum imperium, quod toties quassavit, gloriosa mutatione firmare, Interim fœderati bona pacis adorabunt, pæne seculo

culo ignota: & ad novam quietem sopiti connivebunt. Nam ut calidis vulneribus sensus abest, & nondum peracto per animum dolore recentes calamitates obstupefcunt: ita illi furente bellorum impetu non sentiunt, quam sit miserum semper cum armatis vivere, & frigente per otium dolore lentius ad pristina incommoda iracundiam concitabunt. Externi interim reges, quorum opibus nituntur invicti, etiam ad auxilium tardiores hoc sollicita mente revolvent, juventute exhauriri provincias, & ærarium plusquam fugato Metello spoliari. Forsitan post tot imperii damna, fœderatos iterum insperata pace nobiscum coituros. Præterea, qui jam in fasciculum conjurant, domesticis discordiis incensi statim hæc vincula resolvent, quibus hodie tuas divitias fatigant. Trade modo intestina arma, & ab externo hoste vacuos civilibus discordiis relinque. Quis nescit, tot respublicas fore, quot civitates hodie vigent? Videbis provincias collidi, dum novo imperio caput quærent: & provinciæ urbium motibus labascent. Majora inter illos odia, quam nobiscum nascentur, & dissipatæ provinciarum vires tibi quidum latus ostendent.

Hæc subtiliter declamante Charridoto, jam cervicibus Liphippus annuebat, cunctisque acclamantibus in hunc modum Senatus consultum ipse conscripsit: Sibi pietatem placere, & secura ad cœlos vota, quæ nulla cogitatio belli deducat. Itaq; cum hostibus fœdus sanciendum esse, quod opportunis rebus semper, propitio Iove, dirimere possit. Chorus ex Melandriis fuit, antiqua carmina de Lusitani regis funere superbissimo recitantibus sono.

Succefferunt præcipui ex Icoleonte, qui in actu quarto quærebant, quo compendio rempublicam administrarent. Iam remittenti frigori successe-  
rat belli tempus. Protagon assuetam pensionem mittebat, quam illi ærario claudebant, dissimulabantque animum pacis, si à Melandriis sollicitarentur ad fœdus. Nec multo post homines à La-

betro

betro veniebant cum oliva. Illi inducias, & mox pacem, incredibili condicione, ferebant. Libertatis & Reipublicæ splendida nominaingerebantur ad fastum. Nihil erat mitius Melandriis, & ubi naturam exuissent, fœderatorum turba tacita reputatione volvebat. Mox tot promissis onerati, quamquam plena aberat fides, sic inter se loquebantur. Quid deinde aut Liphippus, aut Labetrus, ulla juris imagine fingunt? Non tantum nos in libertatem relinquunt, sed ut cum olim liberis disceptantes, belli, quod hætenus gesserunt, iustitiam ipsi proscribunt. Quis regum iterum à Melandriis violatos non fovebit? si jam non rebelles ad justum imperium, sed æmulos ad destinata supplicia vocabunt? Quid denique volumus aut quid ultra expectamus? jacent pæne supplices Melandrii, & quod quadraginta annorum bello negaverunt, spontanea benignitate promittunt. Res nostræ aliis fundamentis nituntur quam Liphippi. Ille ingentibus fruitur terris, & imperia per orbem dissipata exercet. Nos Tassaranaacti & Protagonis viribus regnamus, & si quaillos mutatio rerum avertet, Melandrii, quos dubitamus accipere socios, forsitan implacabili ferocia regnabunt.

Tum Nearium rogabant, ut & ipse quid sentiret expromere vellet. Ille non multum à pace abhorrentia loquebatur, credo ne inclinatis animis videretur plus suæ dignitati, quam Reipublicæ tribuisse. Qui post actum cecinerunt pueri ex Lugduno, probabant, nescio quibus carminibus, neque Romuli urbem, neque Adriaci ponti paludes, cum nova re Icoleontis posse conferri.

Postrema pars Tragædiæ hæc erat, sanciebatur fœdus utrinque, & Charridoti vaticinia se funesta veritate approbabant Icoleontis urbes in assueto otio superbæ inter se de imperio certabant, & Melandrii, velut in Protagonem armati sese effundebant in Icoleontis campos. Vidisses inopinis cladibus attonitos stupere, & invocato Tassaranaacto aperire urbes suas, Abdicabatur Reipublicæ

blicæ nomen, & Tassaranactorum adorabant. In altera parte sæviebat in Labetrum Protagonis miles, & ille Labetri hæreditatem, Tassaranaæus Rempublicam occupabat.

O Pax benignum Numen, atque Saturni  
 Hac prole melior nata qua quatit fulmen,  
 O mentis atque corporis bonum duplex.  
 Dic ô benigna diva, quas colis sedes?  
 Hic te sub ortu quarit, hic sub occasu:  
 Hic te sub altis montibus putatmersam  
 Scrutator auri, teque cum suis credit  
 Emisse dapibus alter. Hic parat fundos.  
 Hic dignitates, hic libidinem demens  
 Explorat, atque consulit, nec hic pacem  
 Nec ille demens invenit. Quibus tandem  
 Nulli repertum sedibus regis Numen?  
 Paci loquebar. Paxque blanda respondit.  
 Tranquillitatem quisquis auream quaris,  
 Sedesque nostras, quolibet loco tandem,  
 Moloque, blandas sive per voluptates,  
 Semper per metalli fulgidum jubar quaris.  
 Sive in cadente Sole sive nascente,  
 Seu per feroces syrtibus vagis undas;  
 Ignosco facilis. Quolibet loco hand possum  
 Ego inveniri, quo tibi tuam suades  
 Pacem latere. Sed tamen feram unquam,  
 Si quem inter omnes sic videbo ineptire,  
 Ut me esse in isto Belgii putet mimo.

Subsecutus est populi plausus, qui dum poëtam effusissima gratulatione commendat, ego factis ad Venerem votis, sic in aurem Anemonis conjugii dixi: O si mihi non atrocius bellum Fortuna parasset, quam felix miles virilibus armis certarem! nunc ipsa desperatione turbatus, etiam ante prælium spem victoriæ timidissima mente damnavi. **I**lla, intellegenti similis, hæsit; sic, ut se percipere mentem meam, sola oratione, negaret. Sed ut ad illius pervenimus domum, & , Anemone ad Protagonem profecto, ædes vacuæ libertatem colloquiorum fecerunt; Ignoscite Numina, & tu potissimum castissima Iuno: hoc unum est, quod

meæ probitati labem imponat. Præmium & voluptas corruperant meam innocentiam, jam pæne morum constantia superbiam. Ignoscite sancti Censores; & vos forsitan sub iisdem legibus peccassetis; non difficili arte expugnaui volentem, & me amore pulcherrimo ad satietatem explevi. Nec amplius de paupertate cogibabam; sed jam velut Doromisi victor, indignabar, supplicasse Fortunæ, cum liberalis Matrôna assiduis muneribus mutuam voluptatem cumulare.

Cæterum, ut virilis ardor provocata consuetudine languebat, ipsa flagitii turpitudine, nescio quo mihi odio me ipsum committebat. Super omnia mulieris cupiditas interdum me in indignationem rapiebat; & hæc sæpe in hortis solitarius proclamabam: Ergo me potuit amare? ergo fidere hospiti novo? & cum conjugem valentissimum haberet, scdare matrimonium mixtura alieni sanguinis, quem nulla familiaritas aut convictus, sed sola libido pretiosissimum fecit? O inanem Lycurgi fiduciam; & Solonis justissimos metus! Quid deinde expectabo, nisi ab Anemone contumeliam, aut ab adultera mortem? Nihil est facinus illi, quæ pudorem prodegit, & majore crimine famam, quam voluptatem redimet. Satis parvifiti corpori, redde te in disciplinam virtuti, Euphormio; nondum peccandi consuetudine securus es; & adhuc ad criminis nomen horrescis. Quid aliud antiquitas monebat, quæ convivis surgentibus partem cænulæ relinquebat in mensa, nisi ludis humanis sic utendum, ut ab iis recedamus, nondum consumpta voluptate.

Hæc & similia sæpe jactabam; sed fortioribus consiliis obstabat consuetudo pulcherrimæ mulieris, & cum insania vires otio epulisque redeuntes. Interim Protagon ad rusticas exiverat domos, & cū Protagone Anemon. Ego cum Theophrasto interdum, sæpissime in Anemonis domo dissimulata familiaritate versabar. Sed dum hæc inter amantes scena luditur, & videtur Hymen removisse à flagitio vultum; forte quidam è familiaribus in



eiusmodi sceleribus doctus, cœpit matrisfamilias in me benevolentiam habere suspectam. Nec jam satis communi secreto fidebam. Nam mulier, incensa libidine, sæpe secretas blanditias nimis licenter proferebat. Forte ad constitutum paulo ante vesperam veniebam, cum ille me suspectus circumspector deduxit in hortum, & post sermonum ambages malo cavere iussit, & ab Anemonis limine abstinere. Nec Anemonem de uxore dubitare, sed esse post Cæsarem multos, quos in conjuge fama moveret, sed si perseverarem insana cupiditate esse, scirem paratos percussores, qui meam audaciam finirent. Ego rationibus & audacia destitutus, nihil nisi velato capite effugi. Putares Vere Sacro prognatum, & è finibus gentis expelli.

Inter omnia præcipue timebam, ne me tam gravi injuria amicum & familiarem læsisse divulgaretur. Cæterum, cum diversa argumenta expendissem, quibus me à præsentī calamitate vindicarem, & altior consiliis clades omnem spem obruisset, tandem humano more ad majorem vim suspexi, Numenque superstitioso timore veneratus sum. Habebam in propinquo antiquissimum fanum & quod præsentem mærorem dulcissime alebat, subobscuris fenestris, ac forte solitudine horrens. Igitur in eum locum me conieci, lachrymisque, ut putabam, pietate fluentibus, significavi Numini calamitatem meam. Iam hoc ipsum mihi solatio erat, quod ad eum confugissem, qui mederi vulneri posset. Tum detestari cœpi humanitatis mala, quam caducarum rerum corrumpere amor, nihilque jam mihi placebat, quod non esset cum æternitate conjunctum. Ibi, consumpto impetu lachrymarum, veluti firmissimo decreto mecum sanxi dedere me in Philosophorum disciplinam quos olim cum Anemone amaveram.

Sed ipsa diversitas scholarum non unis institutis in eandem nitentium viam, meam pietatem aliquandiu confudit. Ac cum in hac jactatione

mentis

mentis posuiffem aliquot dies, & pietatis interim sensus per inopiam & misérias augetur, forte accidit, ut in Acignii domo agerentur literarum conventus, propositis tabellis, quarum pictura in diversos sensus trahitur, & omnibus doctis materiam ad differendum ministrat. Pace tua, Sanctitas, dixerim, paululum omisi memoriam tui, & veteres stimuli gloriæ jacentis animi languorem excitaverunt. Volui in eruditorum cœtum prodire, & extemporanea eloquentia meum ingenium publicæ famæ committere.

Igitur ut ad æris sonum convenimus, sedimusque, nos quidem in humilioribus locis, Acignius autem, & cum eo optimates, sedilibus ad diem magnificentiam exstructis, adolescens qui tabellam proponebat, in suggestum sublatus est, pulcher, concinnus, & imperata modestia gravis: nec longē tabula ex pariete pendebat, quam ut exponere vellemus porrecto in publicum radio, invitabat. Neque ego ulterius cunctatus sum, sublatusque in pedes, & vertice humanissime aperto, me orationi aptabam, cum ex alia parte quidem ex Acignii domesticis ad idem officium exsurrexit: vir exiguis & valentibus membris, orbiculari vultu, niger, nomine Brutus. Ego vero indignabar, si Acignii servus, si repudiatis honoribus pauper, & certe illis locis familiaris, mihi externo præponeretur, cujus saltem dignitas ignorabatur: nihilominus cum moneret revereri sanctitatem, clam admiratus insolentiam morum & dissimulata iracundia cessi.

Erat autem tabulæ facies, quæ ad differendum proponebatur, ejusmodi. Matrona verecundissimi vultus in medio stabat, purpureo amiculo insignis, quod virides radii pulcherrime distinguebāt: ipsa tristis, sollicitoque ore, & prope expressis in tabella gemitibus, querebatur. Ab utroque latere ingens turba, oculis quidem in unam matronam defixis, cæterum longe diversis affectibus, ut videbatur, animata. Qui enim à dextra pingebantur, ii supplicum vultu mulierem adorabant, &

illavelut repudiatis honoribus in lævam inclinaverat lumen, ad quam stabant contumaces imagines, tanquam populi aliquid mulieri exprobrantibus. Et hic quidem intentabat improbum reclusæ digitum dextræ, ille risu contraxerat vultum, alius aspernantis fronte, & superbo sæviebat fastidio: plurimi autem, veluti loquerentur, mulieri fractos fasces, & sordidam laurum, solium præterea eversum, sceptrique reliquias, contumeliosa indignatione monstrabant.

Et hæc sane plurimum in pictura eminebant. Nam cætera, ut in matronæ humero corvus, ut ad pedes plumis dissipata Luscinia, spissæ nubes in imaginis cælo, prima curiositas lustrantis tabulam omittebat. Igitur compositis omnium oculis auribusque, Acignii minister in hunc prope modum cœpit.

Iurisprudentiæ studium, quod quidam scientiam appellant, nulla eloquentia oratoris ingeniosius depingeret, quam in hac muta imaginis eruditione describitur. Hanc artem tot voluminibus diffusam, tot (miserum!) excultam ingeniis, istius matronæ species sustinet. Vestis purpura insignis, regii memoriam fastigii, unde originem habuit, contumaci majestate, conservat. Nisi credimus terribiles poenas, legumque capitalium furorem, sanguinis notas in pallam transtulisse, quæ quidem intermixta viriditate temperata, quid aliud ostendit, quam humanitatem Pontificum, qui mitia imperia legesque sine ultimis terroribus exercent?

Qui autem à dextera collocantur, devotiae supplices, illi sunt, qui hanc artem, si diis placet, omnibus studiis rebusque præposuerunt: quos nec Philosophiæ sublimitas ad sydera evocavit, nec ad rationis consultissimum iter, non mitiorum disciplinarum humanitas permulsi, aut divinæ lectionis sublimitas, sed velut oclusis oculis ad hoc studium, parentum communis insania coegit. Vides solutissimos vultus, &, nisi quod hanc unicam adorant, lascivia & jurgiis

contu-

contumaces, vides laceras in imaginibus vestes, quas luxuria & nocturnis grassationibus corrumpunt. Quis enim his seculis turbo Academiarum pacem foedius excussit, quis verius literarum studia infamavit, quam hujusmodi adolescentum petulantia? dum excussis pueritiæ frænis ad hanc juris licentiam proterva superbia properant; dum soluti scholasticorum metu, primi impetus lætitiæ non regunt, novamque, & adhuc inexper tam libertatem, in criminibus probant. Sed acrius incusare non ausim, dies atque noctes per ludum exigere, cum videri pulchrius possit otium cum voluptate colere, quam multiplicem hydram & inaniam hujus artis nugamenta consecrari. Quid enim laboriosius illa arte, quam in compendium redigere putavit, qui ejus licentiam intra quinquaginta libros coegit? vel quid incertius, quam illud quod libido disposuit mortaliū, quorum animos nec unum seculum nec eadem opinio conjunxit? nam quid deinde ineptius, quam tot jurisconsultorum mentes una casse concludere velle, & mortuorum dissidia vanapace extinguere, quam deinde velut divinis oraculis insistere illorum verbulis, percunctari, pugnare, tot voluminibus rem diffundere, ut nec inaria prodigiosa seriem librorum, distinctis per ventum fluctibus, exæquent?

Omitto vanitatem quæstionum, quibus ipsi ingratis laboribus torquentur, sed illos audio jam in partes esse divisos, dum dubitant, an sedibus, an pedibus Vlpianus in possessionis notatione scripserit: cur idem latissimam jus dicentis potestatem, non vero longissimam appellarit, num spadones à spata dicti sint, & Ælius Sentius Rex Romanorum fuerit, qui legem Æliam Sentiam promulgavit.

Tot maculæ per incultum asperumque corpus Jurisprudentiæ diffusæ, quæ utcumque rudibus majorum seculis inter æqualem omnium barbariem latebant, nunc politioribus detectæ ingeniis, utinam tanto pudore clientes confunderent,

quantum ipsa in hac imagine lachrymabili vultu & adorationem averfante confitetur. Hæc autem hominum turba, quæ contumaci manu, &, si posset, verborum petulantiam mulieris luctum crudeliter augeat, illorum est, quos ante hac antiquitas nominis & ipsius Iustitiæ amor decepit. Nunc vero posteaquam ex Iurisprudentiæ vultu meliorum disciplinarum liquor fucum diluit, amissos molestissime annos laboremque inutilem severissima exprobratione repossunt.

Marcida vero laurus, & effusi solii lacerata majestas, quid aliud, quam hujus artis casum solerti descriptione promulgant? Quid in humero corvus, nisi importuni ominis species atra, & barbararum vocum effigies pæne auribus gravis? Quid Luscinia, quæ cum plumis vitam & Musicam projecit, nisi ut omnem Iurisprudentiæ eloquentiam suo fato functam esse sciamus? Nam illæ nubes, quæ supremum tabellæ limitem obscurant: jamjam candidos præscæ Iurisprudentiæ soles abscondunt.

Dum hæc Acignii minister in divinam scientiam sacrilego furore profundit, notavi. Acigniorum vultus, nescio qua lætitia nec occulte diffusos, nutibusque invicem crebris, perorantis insaniam collaudare. Ego vero maledictorum impatiens quæ nec occulte in justitiam ingerebantur, vix creberrimo anhelitu luctantem iracundiam in præcordiis repressi. Sed ut ille peroravit, secutusque sociorum plausus eum in sydera levavit, ego tam indigna percitus laude, etiam vehementius exarsi. Nec diutius passus sum triumphare insaniam verborum, intentusque in vindictam, forti aspera que voce interrupti clamitantium susurros, & silentio reddito, cum omnes me intuerentur, ejusmodi verbis dolorem meum exoneravi.

Quod in Rerum publicarum partibus ambitio & invidia nocent, hoc eædem pestes in literarum imperio tentant, maledictis & calumnia, quæ hodie pro telis clypeisque eruditorum furori, & inermi

inermi discordiæ, ministrant. Neque antea putaveram in jus ipsas Scientias vocari, Gigantumque audaciam respicere in cœlum, sed credebam salvo numine dearum Antistites humanis inimicitiis collidi. Nunc vero cum novi Diomedis acumine, non Æneæ mater, aut inimici dii, sed Argolica Pallas, & ipsa Delphorum Themis jaceant, quid tutius quam à scholis ad barbaros exire, dum in ejusmodi sacrilegium provocata fulmina erumpunt, aut publicæ noxæ diis deditur qui insolentissime peccavit? O quisquis es mortalium, qui modo Iurisprudentiam provocasti (neque enim te novi, nisi quo nomine te odisse fas est) quæ te Deorum clementia in hanc audaciam excitavit, ut fœdissime de illorum alumna cogitares, & os tuum duraret in tam impias voces? an, quoniam perfidia, & furor, & impium nefas, expugnatam justitiam transmissere syderibus, in absentis Deæ filiam tam audax latro involavisti?

Cum hæc dicerem, interim universam concionem inexpectatissima querela turbaverat. Suspensi invicem, quis aut unde essem, & ipsi pavidissima voce quærebant. Nec aliquis incusabat, sed veluti Deorum ministrum & ultorem parricidii reverebantur. Quem enim alium in Acignii familiam dicturum, aut quem in ea domo daturum Iurisprudentiæ manum? Ego vero aliquandiu spiritum revocavi æstu & iracundia fugientem. Ac dum omnes uno stupore meam violentiam mirantur, subiit animo fabula tot seculis & vaticibus inclyta, cum Amphyraus per hiantis soli labem excipitur, & umbrarum imperiū ac silentis prodigia mundi, vivo corpore, & lauri nondum expirantibus ramis, exteret. Cæterum ne concio mutatis animis in novos affectus solveretur, aut recentis indignatio facinoris, quæ mihi eloquentiam tanquam tela suggerebat, sterili frigore inaresceret: cœpi acrius incusare flagitium, simulque hortari Iurisprudentiæ hostem ne deos ultores expectaret, sed voluntariis pænis sæviora supplicia

plicia deprecaretur. Quamdiu, inquam, in homines atrocibus contumeliis desæviisti, cum adolescentes, qui Iurisprudentiæ præceptis animos informant, scurras, turbinesque appellabas, utcunque patiebar te in communi argumento ferociter regnare. Illud tamen me gravius movit, quod videbaris in istam scientiam, omnium malorum culpam convertere, quasi corruptrix adolescentiæ fluenti luxuria tam lubricam ætatem prosterneret. Cum tamen hæc ruina juventutis, tot lachrymæ senum, parentumque miserabiles exitus, primis scholis, ubi sternuntur fundamenta literarum, omnem calamitatem imputent. Vestras scholas dico, quæ severis legibus & pæne sylvestribus edictis exurgentes puerorum animos castigant, nec ab infantiae servitute sensim ad virilem libertatem deducunt, sed tanquam semper in ea disciplina duraturi essent, subhorridas leges præscribunt, & ut infernæ artis mystæ velut circulum designant, ultra quem prodire certo interitus supplicio vetant.

Nulla interim civilis vitæ cura, nulla morum custodia ad consortia consuetudinis humanæ. Plerumque laceræ vestes & stantes annuis sordibus capilli, illarum disciplinarum ignaviam condemnant. Interim pueri in illis artibus enutriti plerumque ad lasciviam suspirant, &, si mihi creditis, de voluptatibus melius judicant, quoniam in earum exilium tot sanctionibus opus est. Nihil flammam fidelius nutrit, quam favillæ frigida moles, nec Sirenes auribus melius imponunt quam cum prima suavitate in expertas demulcent. Sic adolescentiæ cupiditates, quæ velut suppresso aëre ardentius inter tam cruda imperia vixerunt, posteaquam ab illis claustris in libertatem altioris disciplinæ, id est, Iurisprudentiæ, succedere, insolentius plerumque effervescent, & primis illecebris voluptatum, velut inauditis Sirenibus, non satis fortiter repugnant.

Sed hanc accusationem prætermitto: vellet enim Iurisprudentia cuilibet, vel per aliquam ignominiam,



miniam, debere sanitatem suorum. Quis autem patiatur te illi Nymphæ, te urbium præfidi, te pacis & armorum dominæ, Scientiæ nomen, aut si quid est præstantius inter literarum titulos, tam contumaci latrocinio detraxisse? scilicet nugamenta Philosophiæ somniantis, & vestrarum sectarum barbaries, illam dignitatem suis domiciliis præfiget: hæc autem hominum ac pæne deorum domina, templorum foribus ignobiles titulos & vulgi insignia imponet.

Ac quam illud astute differuisti, opinionem hominum, quæ ad libidinem pro ingeniiis mutatur, dubitantium non cogere mentes, nec unica veritate invitis oculis illabi, id est, scientiam non esse; Illa Iurisprudentiam constare, quæ proinde tam levi fundamento nihil nisi inanibus auris, & veluti ludibriis ventorum, implicata cultorum studia deludat. Piget respondere maledictis criminationis adeo ineptæ. Quis nescit tot Iurisconsultorum rixas, tot interpretum bella, & mancipia jam non cedentia urbi, veluti frondes esse atque ramos lentiores, quæ ab ipsius Scientiæ, id est, veræ sinceræque Iurisprudentiæ, trunco luxuriant? Ipsa vero, quæ firmis radicibus arbor nullis opinionibus mutatur, sed constantiæ laude inter scientiarum præcipuas exurgit, illa ferme continet, quæ Iustitiæ præcepta appellamus, quæ compositi regulas juris, cæteraque quæ nascentibus Natura de externa vi, aut de domestica continentia, & naturæ assertor magistratus, præscripsit. Ex hoc trunco illisque radicibus alia virgultorum instar uberrimus succus diffudit. Hoc vero cui Philosophiæ parti non contigit, quæ tot quæstionibus, tamque variantibus animis omnium temporum scholasticos commisit. Quis Legicam ministram rationis, sydusque mentium, à scientiarum ordine tristis censor amoveat, tamen & de entibus rationis (ita enim usus appellavit) disputat, & de Universalium natura litigat, & necdum deliberavit, an conclusionem Syllogismi partibus annumeret. Quæ controversia magis vestras ex-

ercuit scholas, quam dum *Phyfici de materia prima, de causalitatibus, de Alchymia*, diversissima mente contendunt? aut dum scientia morum felicitatem suam nunc in amœnissimo visu, nunc in amoris suavitate disponit? Sed quoniam tantum illa sunt velut incrementa solidi corporis, ideo nec Philosophiæ nomen ex scientiarum albo delevimus. Minus peccavisses, si inviolato numine Iurisprudentiæ, tantum ejus mystas accusavisses, qui se veri Sacerdotii ornamentum maculant indignitate juventutis, quam acerbissima eruditione in suos gradus adoptant.

Cum in tanta iracundia ferocius instarem, consurgit Acignius indignatione plenissimus, & ulterius querentem animo le perturbat. Negat apud se forum esse, ubi declamarem ad fastum, & invidiam hostibus facerem. Si quid haberem ad expositam imaginem, expedirem protinus sensum. Ceterum si in maledicta iterum erupissem, sensurum me & ubi deliquissem, & quam grave supplicium vesanæ temeritati deberetur. Ego vero ejusmodi minis verberatus, tum demum illum Acignium esse, me autem Euphormionem, verecundissime memini: & meæ eloquentiæ fons, modo tam vivida majestate decurrens, velut injecta frigidi Mercurii levitate, sese per occultos meatus huc & illuc timidissime subduxit. Rediit animo Baliana calamitas, & quantum Acignium ibi meis vulneribus sensissem. Sed nec amplius Callionis potentia utebar, & omnino metuebam, ne in antiquam notitiam frontis meæ argumento perveniret.

Igitur veluti sublatis odiis, facta tranquillitate detumui, & facio, inquam, inducias cum illo, nec serenitatem diei litigiosa oratione perturbo. Sed quam ipse Iurisprudentiam putavit, matronam in Tyria veste, quam læta viriditas permiscet, hanc ego pro omnium scientiarum & literarum imagine accepi. Scientia, inquam, est illa mulier, quæ in hac tabellæ pictura describitur. Ostro quidem coque purissimo insignis, cum olim in regiis habitaret,

bitaret, non tantum principum alumna, sed re-  
ctrix ac magistra, vitam & leges imperantibus di-  
ctaret. Illa tempestate, nec divinam Poësim, nec  
arcanam Philosophiam, in tuguriis vidisses, nisi  
quod eruditorum pertinacia interdum benevo-  
lentiam Principum in secura paupertate contem-  
nebat. Ipsi reges non minus ambitiose eruditio-  
nem, quam potestatem vindicabant, & qui tri-  
ginta legionibus imperavit, paulo superbius Phi-  
losofiam quam signa purpuramque jactavit. Quid  
ille Asiæ domitor, qui melius Achillis victorias,  
quam suas recensebat, qui dum ultimas terras no-  
bilissimis triumphis aperiret, Aristotelis Physicam  
avara eruditionis ambitione posteris invidit. Sy-  
racusanus autem ille, quem Corinthus è Tyranno  
civem fecit, quam scientiam habuerat principatus  
ornamentum, eam deinde calamitatis solatium  
solam ex tot opibus è Sicilia abstulit. Quid illi,  
qui assidue cum Ennio, cum Terentio scripsere?  
Quid ille, qui primas eloquentiæ Ciceroni invidit,  
ipse solus in Orbe Romano Imperator? Et ne sin-  
gulas regiones perscrutando etiam Ægyptiorum  
Persarumque Philosophiam in regia & templis,  
veluti simulacra Deorum, inveniam, nulla natio  
tam barbara aut tam inhumana extitit, cujus  
Principes eruditionem sui temporis non aut mi-  
raremur, aut quærerent. Diuque in illo fastigio  
scientia hæsit, donec eruditorum vitio, ipsa suam  
nobilitatem maculavit, & non ad umbram Phi-  
losophorum, sed ad vilissimam noctem recessit.

Nimirum hodie cum nostris artibus nugamur,  
& quæ laudes olim scientiam extulerant, contra-  
riis vitiorum maculis miserrime sordescunt. Nul-  
li quondam elegantius mores examinabant, nulli  
commodiores humanæ consuetudini putabantur,  
quam qui eloquentiæ, veterumque temporum  
memoriæ, aut Poësi studuerant. Nihil illis co-  
mius, nihil suavius, antiquorum ætas vidit. Et-  
iam creduntur sylvestrium populorum rudes ani-  
mos primi conciliasse inter se, inventisque legibus  
fundatas respublicas gubernasse. Inde ipsa huma-  
nitas

nitas illi scientiæ suum nomen accommodavit. Nunc vero quid amplius dicam, quam parentes metuere, ne pueri, dum Scholasticos audiunt, cum literarum commercio morum similitudine imbuantur? ut ineptiæ omnes, & quicquid in incessu vel oratione est insulsum, communi proverbio jam consuetudini Academiarum imputetur. Hinc proschripta majestas literarum, & præcipua utilitas, quam ipsæ in respublicas invehebant, miserabili fato sublata.

Non tenui equidem risum, quoties in Academiis declamatores vidi, scenicos pueros instruere, qua majestate imitentur fastigium Regum, aut matronarum blandissimos nutus, militumve iracundiam effingant. O quotquot literarum vindices estis, eripite squalidas Musas ex carceribus scholarum, & in pristinam libertatem vindicate! Quasi vero qui olim in literis floruerunt, & quorum hodie ingenia miramur, tam stolidis nugis immortalem quæsi verint famam. Olim quidem Poëtæ, celeberrimis conventibus immersi, vix secessum inveniebant ad carmen. Ita Maro, ita Flaccus, Tibullusque & Propertius vixerunt, & ille, quem Natura omnium ingeniorum compendium fecit, Naso. Tunc illustribus familiis vates assueti erigebant vividas mentes; & inter proceres audiebant quæcunque in civitate vel excitarent salibus animos, vel mores recentissima vetustate polirent. Ibi illi quotidie vel Panegyrim vel Satyram inveniebant, & omnino laudabantur, qui non scribere magis quam vivere novissent. Nam quid de Philosophia dicam? quæ pæne in Regum penetralibus nata est, quam in Platone Sicilia adoravit, Stagira autem tam potentem sensit, ut illius favore & mœnia recuperaret & cives. Cui potius Archimedes suam industriam, quam cognato Hieroni accommodavit; aut quem è vulgo ille Deorum & hominum honor Socrates Alcibiadem dilexit? Adeo illa scientia, quæ maxime secretum ad contemplationem exposcit, nihil fugiebat præter rusticum vulgus, & in con-

sortio

fortio magnatum vel erudiebatur vel docebat: nunc autem miserabilis scientia quantum degeneravit à moribus, tantum quoq; ex sermonibus dignitate recessit; & jam barbara appellatur, quæ effecit ne barbarus orbis esset.

Ac ut Philosophiam se in suis latebris plangentem relinquamus; quid aliud est Historiam facere, quam rerum gestarum eventus atque causas prudenti explicatione narrare? aut quomodo sufficient illi muneri, quo posteris nullum majus tribuimus, homines imperiti rerum civilium, qui neque astus suorum temporum intelligunt, & ignobili studio ducti, neque pacis, neque belligenium noverunt? Nemo pro dignitate Historiam componet, cujus indoles non sit apta, ea quoque gerere quæ Historici describunt. Nunc satis est ad eam scriptionem orationem ineptissime tersam cum mendaciis afferre. Quid est denique Poësis, nisi viva descriptio affectuum tui seculi, quostantum ex aliorum consortio cognoscas? Vnde polita confessio amoris, vel generosi odii pæne irata descriptio; quæ prisci seculi Poëtis adhuc hodie vel misericordiam conciliant, vel favorem. Nunc quicunque post insanam lectionem Poëtarum tumentia verba in ordinem componunt, aut vetustatis ignobiles ritus jam olim exulantibus verbis cogunt in versum, illi utique inter doctos umbratiles sunt Poëtæ, & illorum vitio quotquot in eam artem nituntur, velut ridiculi homines, iniquissima opinione damnantur.

Quis ferat hanc contumeliam Musarum, in quarum templis multi quidem insani concipiunt vota, sed nemo in hunc diem, nisi prudentissimus, litavit? Nihil loquor de Iuri prudentia, ne veteris iracundiæ insimuler. Sed quæ olim Prætores, quæ Præfectos Prætorii, quæ Principes habuit conditores, illa nunc cunabulorum dignitatem ægre in historiis conservat. Non celabo juventutem tutissimum iter ad Musas. Quorum eruditionem imitatur, eorum quoque moribus diligenter

diligentissima æmulatione insistat, putetque Ciceronem aut Senecam plura in negotiis civilibus invenisse, quibus literas ornaret, quam in literis, quæ ad humanam consuetudinem transferret. Nullus in Academiis solide eruditus evadet, aut cum gladiatoribus strenuus imperator.

Igitur hæc matrona, cui in tabella Scientiæ & omnium Musarum majestatem imponitis, regalem quidem purpuram aliqua lauri viriditate permixtam conservat. Quid enim illi relinquitur, si de palla quoque dubitat? Sed jam sceptri ac solii dignitatem miserabilis amisit, illosque averfatur præcipue, qui eam hoc seculo adorant, id est, quorum ineptiis ubique indignissimo traducitur risu. Videsne ad inimicos converti, qui importuno vultu & petulantibus dextris afflictiæ patientiam fatigant? Nimirum si illis aliquando sua voce loquetur, immutabit spernentium mentes, & pristino splendori restituta, omnem iracundiæ furorem in Academiarum ignaviâ effundet.

Cum hoc argumentum ingenti vociferatione deduxissem, & jam dies in vesperam esset pronus, adolescens qui tabulam proposuerat omnia ejus secreta jucundissima oratione publicavit. Quippe hæc matrona, seria erat optimi vini, lentis arborum ramis coercita; quæ quidem sui amatores aspernabatur, quippe illorum amicitia peribat, suisque osoribus adverterat vultum quorum fastidio diutius victura videbatur. Et quidem omnibus in risum effusis, juvenis lepidissimo argumento rem omnem disputavit. Cæterum Acignius meum ingenium probaverat, delectatusque oratione non indocta, me quoque inter familiares habere non mediocriter optabat. Itaque blandissime exeuntem demulsi, laudibusque in publicum effusis palpitantem animum periculosissima voluptate percussit. Ego inescatis præconiis, cum me iterum laudari vellem, postero die ad Acignium redii, & ille meam facilitatem solertissime cognovit, lætatusque jam prima pietatis formi-

formidine teneri, etiam incautum devinxit munusculis, cœpitque velut dulcissimis suspiriis interpellatus narrare, quam propitiis diis nati essent, qui in illius domicilium concedebant. Et hæc tanquam mihi aliena recitabat, quæ non obscure mihi dici sentiebam. Nihil, inquit, eruditis commodius mea domo videbis ad famam: velut in terrarum scena plaudentibus populis ingenium probamus, & suavissimam vitam colimus in consortio Musarum, nulla familiarium rerum sollicitudo nobilitatem animorum deducit in terram, & jam hic felicitatem ordimur, quam nobis certissimam in syderibus fata disponunt. Recensebat deinde complurimos, qui ex amplissimis gentibus in suam familiam venissent, & quam mali exitus alios occupassent, qui tam egregia fortuna nesciverant uti. Ego autem Acignii machinas perosus, quo plura in eam sententiam congerebat, eo malignius averfabar dicentem. Paulatim exinde elanguit pietas mea: & Acignii, cæterorumque Philosophorum iterato consuetudinem ejuravi: nec me latebat, nescio quomodo emoveri hominum mentes, & suavissimo veneno intinctas à Philosophis in suas Academies deduci. Itaque priusquam eo medicamine perirem, viam jam olim destinatam in Scolimorrhodiam aggressus sum. Sed & in maculas, quas tantopere vitabam, miserabilis offendi, monstroque maximo didici ubique Acignium esse. Cæterum minime Theophrasto significavi, me in Scolimorrhodiam cogitare, nam & levitatem meam timebam apud illum proscribi, ac præterea si in Scolimorrhodiam quoque malignitas Deorum persecuta fuisset fugientem, volebam ad Theophrastum redire, damnataque omni spe in ingrata quiete senescere. Mentitus itaque ad Themistium iter, ex Illo discessi. Necdum omnis mei criminis utilitas defecerat, restabantque aliquot nummi, ex iis, quos Anemonis conjunx secum olim in sinus effuderat nostros. Et jam quatuor erraveram luces, neque multum aberam à lacu, qui Scolimorrhodiam



diam suo orbe à cæteris abstulit terris, cum omni hospitio defectus, sub obscurissimam noctem huc & illuc ingenti tristitia errarem. Nulla in vicino civitas erat, neque villarum spem, aut latratus canum, aut caliginis volumina ex fumantibus tectis, circumspicienti faciebant. Frigore itaque & solitudine horrens, vagabar, velut in avia parte terrarum. Forte in asperi montis cli-vo. qua me Pallidus syderum fulgor ducebat, tenuis rivi murmur jam pæne concubiæ noctis silentium rupit. Secutus ego labentem tandem ad aquulæ caput me mollibus herbis implico, fessamque cubito cervicem sustentans frontem deinde atque manus, mox etiam ora limpidissimo humore perluo. Nec multo post apertæ vento nubes, astraque liberius splendentia, mihi pulcherrimam loci faciem ostenderant. Fons ille ut videbatur rusticus, nudoque exceptus solo, non communibus aquis perennis aut vulgari torrente volvebatur. Nulla laus est quæ ejus dignitatem possit exprimere. Liquor omni crystallo nitidior per lapillorum moras, quæ in arena passim extuberaverant, tenues crispaverat fluctus, & inde pæne musico concentu pulsabatur, reddebat quoque syderum imagines pæne ipsis cælorum facibus lætiores, & tam pulchræ noctis miraculo nescio quid mihi beatius spondebant, si ad Solis veritatem omnia examinassem. Quod si non pernovissem me nondum Eleutheriæ viciniam egressum, credere poteram ad aureos fontes in Perside esse delatum. Mox ut se purius Lunæ splendor exeruit, vidi in propinquo amplissimam domum. & turres in incinctu non modico fastigio surgentes: neque moratus de fronte consurrexi, primasque ædificiî fores ad hospitium pulsavi. Tum apertæ subito fores colluxere undiq; flammis, magnoque cereorum comitatu Acignius ad expectantem processit. Ego ad notum exhorruî vultum, & qua ratione ibi esset, quem in Ilîo paulo ante sine proposito itineris reliqueram, tacita admiratione quærebam. Nec expectavit, ut meritissi-

simi

simi stuporis exponerem causas: sed, Eutychia, inquit, istarum ædium & omnis vaticinii domina, te huc advenisse intellexit; illa nos monitores hospitii mittit, & in suum domicilium errores tuos hodie invitat. Succede hospitalibus testis, & utere beneficio Nymphæ, quæ hoc uno dolore suam felicitatem maculat, quod tam diu desint, quibus ipsa liberalis esse possit. His dictis, nescio quibus ramis, vultus meos perfricuit, confusamque suavitate mentem veluti quadam tenui caligine intexit. Secutus ego ducentem, cum eodem facum agmine in interiorem domum perveni. Ibi nova occurrentium frequentia venientem excipit. Nihil amplius vidissem, si me felix error in patriam appulisset. Quippe non blanditiæ verborum deerant, non obsequia ministrorum; & optimi familiæ vultus cum officioso apparatu certabant. Deductus igitur in triclinium cum magna comitantium turba, subitis primum dapibus extinxi reliquias curarum; mox cœna levi ambulatione percocta, cum interim nulla colloquentium suavitas deesset, mollissimis plumis omnia membra immersi. Itapingui obrutus somno pacatissimam exigo noctem; & sive malorum lassitudo, sive felicitas repens hoc fecerat, soporem etiam in altissimam lucem deduco. Tandem solis radiis excitatus, ubi essem, aut quid mihi contigisset, attonita mente versabam, nec dum libati fontis suavitas exciderat; & nescio qua affectuum dulcedine fontem & domum amabam: cum interim exsonuit ostium meum, laxatisque subito claustris antethorum Acignius stetit. Nunquam ante tam hilarem videram, & excussa severitas majoribus blanditiis reliquerat vultum. Ego pigræ quietis segnitiam incusabam, quod hoc lucis jacentem deprehendisset, sed ille, velut omnis otii author, moderatissimo risu nihil, nisi me ad Eutychiam advenisse, respondit; minima esse qua hætenus in illa viderim domo; omnia tēpore & patientia parari; Nec dii siverint, inquit, ut tam opportuna felicitate non utaris.

Tu modo cæterarum rerum longinquas spes ommitte: isthic tibi perennia bona, &, si mihi credis, omni sceptro eminentior fortuna paratur. Tum ego languentia excito membra, cubitoque innixus in illa familia hæsurum spondeo, sero enim intellexi me ad Philosophorum, quos vitabam, domicilium esse perductum, & ab illis suam Philosophiam Eutychiā appellari. Adjecique, me juramento obligari, ut in vicinam regionem proficiscerer, neque ulla quidem tempora oblati beneficii memoriam victura: cæterum longinqua exilia, neque tam maturam felicitatem meis fatis deberi. Ac tunc, ut saltem mendaciis effugerem Acignii artes, iterum jurato promississe assevero, sine mora me ad templum, quod in Icoleonte miraculis celebratur, iturum. Ita, inquam, ut neque jam cum Eutychia vivere salvis religionibus possim. Ad hæc verba Acignius non modico risulatera concussit, &, O te, inquit, divinum hominem, & religionis doctissimum mystam! qui nescis in Euthychiæ domo etiam mendacis venire gratissimum cœlo, &, ipsis diis esse, quos decipis. Huc quacunque veneris fraude, aut ipse alios adduxeris, ipsa te innocentia laudabit, & plerunque interfui, cum pietas juvenes collaudaret, qui istam felicitatem parentum funeribus emerunt. Sic dixit, rursusque madentibus ramis oculos meos & veluti mentem obruit. Agnovi hesterni dulcedinem fontis, victusque, & veluti marcerata ebrius mente, imperata me facturum promisi. Sed primum ex cubiculo excessi, & ipse vestes diligentissime componere cœpi, rursus evanescente medicati fontis veneno, paulatim verus animus rediit, & ego captivitatem meæ mentis intellexi. Itaque tacitas fraudes, & licitum libertatis furtum contra veneficia secretissima mente parabam. Ecce autem vix è limine extuli pedem, cum servitium frequens huc & illuc suo operi intentum animadverto: plerique juvenes erant, & in terram modestissima submisserant ora; ille temere jacentium lapidum ordines

compo-

componebat, ille comportabat ligneos fascēs, aut aquam, aut utiles herbas in publicum cibum digerebat, alius molestissimum iter ad domorum fores huc & illuc torquebat: plerique sævitia flagellorum obnoxium detriverant corpus, & singulis verberibus interferebant Eurychiæ nomen. Plane nihil tale videbam quale prioris noctis illecebræ promiserant. Iam omnes me tacitis vultibus contuebantur, & quem pridie tam humaniter exceperant, pæne ad societatem laboris invitabant. Ego meæ fugæ intentus, huc & illuc primum assidua contemplatione vagabar. Cæterum non mihi una domus videbatur, sed potius civitas ingens, cujus singula ædificia in turris altitudinem exurgunt. Qui vero per singulas turres distributierant, distinctis potissimum coloribus figurisque vestium noscitabantur. Hos albæ togæ, hos cineritiæ, ornabant: His mixtæ & panuceæ vestes erant, hinc illinc centonum mixtura viliores. Quibusdam funerum color, aliisque Neptunius probabatur. Nec ulla artificum cura deerat, aut naturæ varietas, quantacunque in velleribus ludit, præterquam quod ibi muricem non videbam. Neque minor ingeniorum diversitas illam arcem impleverat. Eminebat in medio angusta quidem turris, & ut videbatur multitudinis minime capax, cæterum patentes in seriem fenestræ, apertæque undique fores opulentiam prodebant ditissimæ sedis. Omnes parietes sericis velis tegebantur, iisque duplici fulgentibus ostro. Idem color lectulos & mensas adornaverat, & ipse quoque murus lateritio rubore nitebat. Suspensus ibi Eutychiam habitare, intellexi à quodam pullato, qui hortum in vicinia repurgabat, Nympham quidem in alia regione vivere, quam ipsi totius vitæ industria aperiunt sibi: cæterum si quis ad illam turrim, quam viderem, perveniret, illum statim ad maximam felicitatem esse venturum, ubi effusis fortunæ favoribus exceptus, hoc etiam timeret, ne ad Eutychiam in alium orbem vocetur; & certe pauci sunt, inquit, ex hac mul-

gitudine, quam cernis multiplici sudore exerceri, qui non votorum suorum partem ad istius turris cupiditatem dirivent. Neque olim felicius erat, purpureum arietem habere, quam hodie ad magnificæ turris dignitatem admitti. Hæc ille prolocutus, iterum prono pectore sterilibus herbis incubuit.

At ego tam magnificæ turris dignitate permotus, magnopere cupiebam ad illius interiora penetrare. Invitabat familiaris curiositas peregrinantibus, & desolatæ custodibus fores; cum præcipue admirarer, quæ causa sedis incolis esset, cur non protinus ad illam niterentur. Sed vix dextero pede libaveram limen, cum subito plusquam Scythicæ magnitudinis leo in vestibulum occurrit. Sive vera species fuit, sive attonitæ ludibrium mentis, videbatur ad longitudinem duarum palmarum exeruisse pedum arma, & tumentibus júbis apertoque ore, pæne interrogare stultitiam meam, quo proficisceretur? Petram deinde valentibus membris amplexus est, sive in me emissurus, sive obicem positurus ad fores. Ego per vetusto ebore pallidior factus, non audaciam modo, sed etiam fugam amisit; decidiq; extra limen morienti similis; & nutantem animam diu egi: nec aliquis ad auxilium veniebat, sed paulatim effusissimus sudor spirituum meatus sanguinisque laxavit. Ac ut primum officio pedes fungi valuerunt, in aliam partem, tam atroci imagine contritus, fugere cœpi. Semper in oculis feræ sævities erat, nec sufficebat supervacuotimori celeritas mea. Bellua autem veluti vereretur è præsidio abire, contenta me limite expulisse, non laceraverat ignaviter cadentem, minusque ignobilem fugam urgebat.

Sed dum in hoc turbulenti sanguinis æstu incedo, pavidoque lumine mentis incertitudinem accuso, infremuit undique aër modici æris sono, quod ex media area, ut postea intellexi, omnibus Eutythianis antemeridiani laboris missionem significabat. Iam enim triclinia strata erant cibi-  
que

que exiguis ferculis, & veluti distributis pensionibus ferebantur ad mensam. Convolavere ad epulas universi, neque ibi levius sancitur, ne aliquis se publicis commodis, quam imperatis laboribus furetur. Ego omni genere vestium dispar (neque enim me toga Romana consuetudine velabat) jam pæne solitariis spatii restabam, cum annosissimæ senectutis homo, hospitalibus præfectus officiis, rogavit, cujus ego auspiciis, aut per cujus portæ angustias, deductus in familiam essem. Ego qui prodigiosum locum, divinumque fortasse, irritare mendaciis verebar, simpliciter, quid mihi contigisset, enarravi, me ad fontem, qui ex adverso montis manat, pridie per errores & tenebras pervenisse; demum Acignii manu, ad hanc arcem, velut ad hospitium esse perductum. Nec ille audito Acignii nomine cunctatus, Illic, inquit, oportet habitare: turrimque in proximo angustiori, quam cæteras, specie ostendit. Plane eadem turris erat, in qua tota nocte jacueram. Nihil itaque repugnaui imperanti, aversatusque non voluntariam domum in turrim, velut in conditorium, intravi.

Iam omnes ad certas federant dapes, mihi que tanquam in Laconiam admissio subita hæreditas est allata. Cæterum neque luxu notabilis mensa laboriosis ferculis premebatur, neque tristissima fames inter modicum & parabilem victum audiebat, sed & rem pæne incredibilem inexpertis! omnis mihi apparatus sordebat, cibi que etiam post jejunium, & laborem viarum, fastidioso furore aversantem stomachum premebant. Illud autem multo post intellexi, ibi dapes cum convivantium affectibus consentire. Si quis sua sponte in ea domo Euthychiam quærit, liberoque animo in illis sedibus hæret, non modo suavissimos habet cibos, sed illum quoque vigiliæ delectant, & alii labores, qui me ibi tantopere terruerunt. Cæterum si quos error, aut violentia, aut non duraturæ blanditiæ, in illum locum veluti in carcerem producant: inquietati impatientia mentis, non

aliter quam in Promethei saxo vivunt, nam nec locum effugere possunt, nec impatientis animi stimulum, qui & sedem & epulas odit.

Refectus igitur modico pane (quippe minus displicuerat) de mensa, publico discessu, consurrexi, vitatoque sociorum consortio, per mediam turbam, dejectis luminibus, effugi. Atque illi modicis ambulationibus nsi, ad constituta officia dilabebantur. Ego vero jam nimis cognita familia, fugam è custodia moliebar. Sed illa mihi facilis videbatur, quippe nulla mœnia cernebam in incinctu, quæ fugitivum morarentur. Omnia aperta in planiciem vicinosque montes aspectum transmittabant. Cæterum huc & illuc dispersæ portæ stabant omnino ad illum numerum, quem Amphion suæ urbi esse iussit. Illæ mirabili artificio extructæ, fortissimis ut videbatur claustris foribusque rigeabant. Non potui satis admirari, quomodo illa partarum moles nudam apertamque arcem, sine muris, aut vallo, aut ductæ fossæ mora, tueretur; easque ut inutiles satis imprudenter derisi, ac cum omnia satis perspecta viderentur, secutus illam viam, quæ in proximum montem compendiosissima apparebat, intra limites periculosissimæ arcis tendere cœpi.

Sed cum pervenissem ad locum, ubi murum oportuerat esse ductum, repente intricatus, & hærens, & ipse ob inutilem moram mihi iratus, cum impedimentis pugnabam, quæ nec tangere poteram, nec videre, quippe velut tenuissimis retibus hinc & illinc implicabar, & tenacissimam indaginem, quo vehementius nitebar, in vincula & nodos arctiores provocabam. Iam pæne incideram in casses, ut nec progredi nec recedere possem: sed antequam laqueorum subtilitas pertinacius coi-  
ret, retrocedere subito cœpi, & cum maximo horrore admirari tam tenuia claustra, quæ nec oculorum sagacitasprehendisset, nec ipsæ manus, nisi in captivitate sua, sensissent. Iam Vulcani doli, & nota cœlo fabula, legatique, non simplici nexu, Mars & Venus, in memoriam redibant;



bant; jam ex Lemnio igne catenarum serientesse jurabam, quæ prodigiosam includeret arcem; & tum demum veluti victrici fortunæ supinas manus dedi, nec minus Superos inferosque Deos accusabam, quod juventutis meæ validissimum fervorem immerito carcere damnavissent, &, cum maxime beneficium simularent, velut Aspidem, inter Cleopatram collocaverant ficus.

Ultimum remedium erat, exitum per angustias portarum non dissimulata fuga pertentare. Nam cum nihil amplius monstris vacuum sperarem, ita neque aliquid in ultima desperatione meruebam. Succurrit animo, ire, & si qua custodia moraretur abeuntem, invocare Deorum omnium fidem, eumque maxime Iovem, qui violatis hospitibus succurrit. Devovere deinde crudelissimam gentem, nec querelis imponere modum, antequam aut meæ vitæ exitum aut calamitatis invenirem.

Tam robusto consilio ferocior factus, ad proximæ portæ limen, jam excogitatis verborum contumeliis, evado, cum ecce in ipso impetu ipsaque audacia mentis, occurrit Acignius, miti quietoque vultu, & non cogitantis lacertum tenens, intentam iracundiæ mentem & oculos in se convertit. Nec rogavit confusionis meæ causam sed de valetudine quæsiit, tam potentibus verbis, ut pæne me oblivisceret esse iratum. Sed cum ego illi animum meum de discessu significassem, & ille in contrarium argumenta consumpsisset; tandem iratus oculisque paulatim horrentibus, abire me jubet, quando me felicitatis tæderet; nec longe poenitentiam esse, & errores, tam securum temnentibus iter.

Cum discessisset post terribiles minas, tactumque animum excitasset in diversa, nihilominus urgere discessum meum cœpi; & ut eram portæ vicinus, primum diligenter circumspexi, si qua hominum manus in claustrorum præsidium fraret. Nihil autem aliud vidi in aditus angustis, quam anum nescio qua sollicitudine gravem: pallidissima erat, & macies extulerat ossa, nec com-

positi oculi terribili luce micabant: Cæterum huc & illuc cursitabat per angustias suæ portæ, & nescio quid ad digitos computans, nunc se velut ad consilium se vocabat, interdum turbido nutu quod censuerat aversata, secum ipsa mirabiliter pugnabat. Rerum quoque levissimarum pondera examinabat ad lancem, veluti stipularum levitatem, aut arenulam ad numerum injectam. Ac illius quidem nomen erat ingentibus literis minioque fulgentibus in superiori fastigio portæ scriptum, Hieromerimna. Cæterum tanta frequentia per eundem aditum arcem irrumpit, maxime adolescentum atque senum, ut habitatores sufficere amplissimæ sedi possent.

Non placuit mihi tam difficilis locus, exitumque molliorem per alias portas quæsi. Septem erant, & singulæ suis Numinibus notabiles, quæ in præsidium excubabant. In proxima porta huic ad quam Hieromerimna se inutiliter macerabat, eminebat virago pessimi vultus, quæ Aëlpidis nomine vocitabatur. Per eam portam nemo intra- bat nisi turbulentis luminibus turgens, & inter iracundiam doloremque trementibus. In proximo vero limine Penia consistebat, squalida veste, sparsoque capillitio inculta. Et illa frequentissimum agmen trans mittebat in septa. In vicino deinde præsidio Adrania erat, solutis poplitibus languens; recipiebatque turbas, quæ inertiae licentiam amabant.

Ego, ut indiligentius observari illam portam, non sine animi gaudio, adverti, ratus inter commodum fugienti, tamen ulterius progressus sum, ut viderem, quibus numinibus tutela cæterorum liminum credebatur. Erat autem in una quidem Philotimia, quæ cæruleis vestibus ostrove splendentibus, pæne totos parietes onerabat: in altera vero Glykite illa multiplici pallio intimum absconderat pectus, risuque minime duraturo quemlibet venientem salutabat. Neque alii veniebant ad illam, quam adolescentes tenerrima ætate, & veluti materni lactis consuetudinem requirentes.

At vero in ultimis claustris, omnino alia species nihil tale expectantem confudit. Erat enim matrona exercitatissimi vultus, & inquam invidia non diceret: Arete appellabatur.

Cæterum quoscumque intromiserat in arcem, sincera hilaritate diffusi ex incessu inter cæteros noscitabantur.

Cum omnia perlustrassem, & jam maturum ad fugam tempus esset, ego, pulsata Adrania, per illius portam præcipitata diligentia prorui. Neque illa revocavit abeuntem, & per mollissimum agmen, quod ad ipsam properabat, excitati supercilii minis, ipsoque corporis nisu, viam inveni. In hunc modum ex tristissimo carcere egressus, quam maximis itineribus in Scolimorrhodiam præcipitabam fugam. Erat semper in oculis pavitantis Acignius, & cum virgula crepuerat vento, jam me deprehensum, & ad Eutychem deduci, miserabili horrore credebam. Et quid, cogitabam, si percussores notis viarum angustis præcurrunt? Quid non infestum existimeni in solitudine, cum nulla urbium claustra grassatores excludant? Quicquid est, Acignii periculo vivo; & si me ab illo fugientem calamitas excipiet, difficilius amolietur invidiam, quam vulnus Paulianum Gephyrius excusat. Tandem ad lacum perveni, nullo Oceano minorem. Illinc rates in Scolimorrhodiam solvunt; & jam melioris patriæ aura videbar afflari.

Thebani ad Septentrionem latissimas obtinent terras, & ab Eleutheria ad Sarmatas excurrunt; gens laborum plus quam industriæ capax, & omnino Cœotia sua digna. Illis Aquilius per inter-nuncios imperat; ipse plus quam Assyriorum Principum solitudine inclusus, otiosam majestatem ineptissima gravitate damnavit. Igitur cum in Scolimorrhodiam cogitarem, jamque in extremo Eleutheriæ oppido quærerem ratem, forte unus ex Thebanis in eadem urbe erat, pinguissimus homo, vultuque regii coloris, & seminudum calvitie caput ostentans, nomine Trifartitus. Is ab Aquilio

ad Tassaranaetum in Scolimorrhodiam mittebatur: ac ut forte in eodem diversorio fueramus, me quoque in instructum navigium benignissime induxit. Cæterum idem stupor, qui à subtilitate ingeniorum Thebanos excludit, ab ingentibus quoque vitiis prohibet. Nihil facilius ad amicitiam vidi: fidemque inter vina sancitam velut extremam religionem non violant. Ego inter adulationum magistros diutissime versatus, statim incautum occupavi blanditiis, intentumque suis laudibus ad amicitiam compuli. Sed cum jam in conspectu Scolimorrhodia esset, lacus nigrescentibus undis intumuit, subitæque nubes eripuerunt cælum trementibus nautis. Neque tempestati modus fuit; & jam, veluti continuis aquis, cum nubibus coiverat lacus. Haud mora, securi percutimus malum, & omnia vela subducimus furentibus ventis. Iam clavus non sequebatur ducentem, jam latera laxabantur ad fluctus, cum ingenti flatu in Septentrionem propulsi, jam nec salutem quidem invocaremus.

Thebani, quicquid in ratem comportaverant, ad certamen perdebant; veritque ne pondera deducerent navem, ad ultimum patrii vini cados inter miserabiles ejulatus effuderunt in fluctus. Quatriduum naufragii minas tempestas irata protulit. Quinta luce interruptis nubibus enituit cælum, præliumque undarum extremis fremitibus elanguit. Interrogabat gubernatorem Trifartitus, an syderum memoriam servaret, & aëstorum indiciis posset ad regionis notitiam pervenire. Ille gravibus suspiriis cunctantem persecutus, silentio damnabat suam artem, & confusa omnia cœli terræque argumenta confitebatur. Tandem evanescente metu, ipse nautica acu doctus proclamat, nihil unquam illa tempestate benignius fuisse, & quoniam ventus Scolimorrhodiam non dederat, saltem se in patriam felicissimo errore compulso.

Iam in conspectu littus erat, & Thebas non inde procul esse constabat. Tum omnes excitato plausu

plausu navem in portum deducunt, egressique in arenam, passim osculis patriam terram & salutem adorant. Trifartitus reparari navigium, funemque & antennas & malum ex proximis vicis & nemoribus quæri jubet: ipse ad Aquilium rediit qui & tempestatis moras excusaret, &, si quid forte novi succurrisset, recentibus imperiis oneraretur: meque in urbem secum humanissime deducit. Iam id olim sciebam, neminem ad Aquilium admitti; nec tam insolentis beneficii genus apud Trifartitum urgebam. Sed ille me sponte in regiam deducit, jubetque in atrio expectare inter proceram Thebanorum multitudinem, qui mihi umbram corporibus faciebant, & post aliquot horarum fastidium ab Aquilio regressus, interiorum meam manum excussissima dextera pulsavit, &, ne putes, inquit, nullam gratiam amicitiae meę esse, videbis domesticos Aquilii cultus, tibi que plus quam Mathematico aut Pictori secreta familiarę patebunt.

Cum hæc dixisset, benignissima manu ex atrio produxit in domum, evolutumque ex porticibus vagis tandem constituit ad intimum Aquilii limen. Ibi tam syncere omnia filebant, ut Cereri sacrum fieri putarem: Igitur & ipse utrinque spiritum coërcebam, cum Trifartitus, modestissima manu, silentis ostii seram, & ipsam mutam, resolvit. Cæterum hanc mihi intrandi legem dixerat, ut ab ipsius non secederem tergo. Ita, inquit, optima fide omnia lustrabis, quæ nobis, utpote secretissimarum rerum ministris, patent; neque à me declinans, & per diversa vagus, in ignoti cultus officia peccabis. Parui ego monenti, & ad mensuram motuum suorum gestus meos figuravi, nisi quod leviter declinaveram cervicem ne omnino inutiles oculi essent.

Ac ut in thalamum Aquilii veni, hominem jam supra mediam ætatem vidi præcipientem in senectam; statura mediocri, vultuque optimo & quem indigne voluntaria solitudine damnavit, sed fluxis & turbantibus vestigiis oris majestatem

corrum-

corrumpebat, & omnino indignatus sum Veneri, quæ saltem non pepercerat nomini charissimorum nepotum.

Itaque ut ad satietatem oculorum omnia ejus lineamenta in animum transtuli meum, converto ad elegantiam sedis vultum. Et hinc quidem imagines stabant non quæ memoria bellorum secreti delicias turbarent; sed venustissimi vultus puellarum erant, exculti supra verum, & quos posset natura imitari; ut ego Aristidis vel Pausaniæ, aut etiam Nicophanis labores putarem intueri, quos meretricios pictores antiquitas vocavit. Illinc vero supra mensam orbes duo, in quorum uno terrarum situs & mariæ pingebantur: in alio vero syderum motus, & universæ cælorum leges aptissimis coloribus erant scriptæ. Illic aureus Phœbus, & vermiculata Venus erat. Luna vero cælabatur argento; & prope igneum fecerant Martem. Iovis autem hilaris signum, & nitens Mercurius pæne arridebat spectantibus. Denique malignitatem Saturni levido minio pallentique damnaverant. Flexuosum iter Solis, imagines Leonis atque Tauri signorumque omnium animabant. Iacebant supra mensam aliquot libri, lacescentibus digitis jam ad squallorem detriti. Præterea cœlestium orbium figuris aliquot in locis excusserat picturam nimis diligens versatio, maxime in Solis & Mercurii planetis, qui quacunq; decurrunt, per illam cœli imaginem solertissima monstratione signatur.

Neque advertere hæc poteram, quæ vicinorum curiositatem oculorum petebant, nisi Trifartitus vir benignissimus me ad hæc indicia digiti humanitate deduxisset. (nam Aquilius alvum levare voluit, & amotus extra aulæum, locum fecerat inter nos colloquendi.) Igitur cum rogarem, cujus artificis nobiles figuræ essent, quæ meruerant ab Aquilio tractari? primum, inquit, te scire oportet, nihil hac solitudine Aquilii laboriosius esse, nec ipse industriam cum aspectu hominum omisit, sed ad curiosas artium aliquot voluptates tran-

tes transtulit. Cæterum in his imaginibus, & foeminarum picturis, non ejus studium tantum, sed etiam opes vides. Libertatem amorum conjugio præponit, & vagæ voluptates ad ipsius arbitrium examinantur. Nam ut venustissimas species mulierum libido in animo finxit, omnia in tabellam eruditis coloribus tranfert, & imaginationis lineamenta secutus, votum suum in pictura confitetur. Appellantur deinde pellicum greges, virginisque, quibus multum est, id nomen sub Aquilio exuere. Ipse sibi probator formarum vultus mulierum ad similitudinem imaginis exigit, & quam proprius ad illam venustatem natura admovit, duarum, interdum trium noctium fortuna donatur. Etiam si cujus amore vehementius exarsit, si in alicujus amplexibus dulcis animam egit, non statuat in rostris, sed imaginem, sua manu exaratam in thalamo decernit. Hi vero terrarum cælorumque orbes, imaginem Aquilianæ potestatis ostendunt, & quotidiani laboris industriam, quo ipse in abdita naturæ perrumpit, & invidiam Deorum superat, qui res pulcherrimas latere mortales voluerunt. Iam crystallæ non æterna hyeme cogere, jam exprimere metallorum animas potest, & omnia Solis miracula in temperatum foculum convocare; etiam ignorantem naturam suas vires edocere; vitales autem succi, & qui supra Æsculapii artem invidi Iovis provocant fulmen, his artibus exprimuntur; & ne indiserta oratione detrahā pulcherrimæ arti, expectabant hæ scientiæ Aquilium, dedignatæ à minoribus viris, veluti imparibus procis amari. In eas Aquilius dies noctibus adjungit, & ne distractæ curæ diligentiam turbent, cæterarum domi forisque memoriam admittit. Cum hæc Trifartitus ad sudorem & anhelitum dixisset, Aquilius lubrico passu processerat è secreto, vocatumque Trifartitum, brachias superiori vesti annectere imperabat. Ego me ad parietem junxeram, & ipsum intexto auro sericoque fulgentem ac dum veneratione tantæ sedis incerti oculi



oculi in diversa dissipantur, inciderunt in imaginem, antiquam sane, sed in qua nihil erat magis notabile, quam hiversus, præter quos in conclavi nihil Martium vidi.

*Est regio Austriacis illic contermina campis,  
Qua frangit tumidus ripas & prœruit Ister,  
Cyaneas visurus aquas, dum fata sinebant  
Fortunatus ager, necterris invidus ullis.  
Pannoniam dixere patres. Nunc non in tantum  
Restant, & raris incisa novalia sulcis.*

*Nam ferus ut summo Mavors pugnabat in Æmo,  
Placatos aspexit agros, & pectore toto  
Intumuit. Thracesque suos, immania corda,  
Et secum rapidos huc traxit in arma furores,  
Protinus infandis mutavit cladibus urbes.  
Exhaustique domos. Iphis penetrabilia Divis  
Tristibus eripuit flammis, agrisque colenos  
Abstulit, & dominis moerentibus abstulit agros.*

*Hec quantum misera cecidit tunc gloria terra  
Qualiter horrentes reducis vicinia Phœbi,  
Cum solvit fluvios, & pelli gravina campi  
Invitant volucres connubia jungere cantu.  
Si mala per latas regnant incendia sylvas,  
Tunc luci stat truncus honos. irabibusque perustis  
Masta subit facies, & nudis flebile ramis  
Conqueritur masto calo nemo; Ipse viator  
Ingemit, atque ipsa plangunt sua tecta volucres  
Sic mala Pannonios tempestas perculit agros.*

*O quoties plenis maturum messibus annum  
In stragem servare deos, flavasque videres  
Pannonium armato perverti turbine messes!  
Nulla fides campis. Campos odere coloni,  
Atque arces vallumque petunt. Nec mania multum  
Hec pavidos quassisse juvat. Nam claustra pererrat  
Hostis, & obsessa frangit munimina porta.  
At vero erectis quoties exercitus armis  
Hinc atque hinc sine lege furit, taboque calentes  
Protinus immensis constipat cadibus amnes.  
Qua tantum immisissis horrens insibilat Arctos  
Nubibus, aut rancid tantum gemit unda sub Euris?  
Tela volant, Scythicis plumbum torquetur habenis,*

*Spiculaque & dira currunt per inane sagitta.  
Tunc enses lethale micant, tunc fulmina campis  
Salmonæo majora sonant. Sternuntur ubique  
Arma, viri. Nec spes immensa in strage sepulchri,  
Ni membris & cade tegi; dum jugera crescunt  
Mortibus, & planos attollunt funera campos.*

*Et nunc Ætherei superant vexilla Tonantis,  
Nunc Luna pejore cadunt, cum turbida pandit  
Cornua Theſſalis heu digna horrere venenis.*

*Save Pater belli, misera sat gentis in arvis  
Sedit atrox bellum, nostrumque exterruit orbem.  
Arma domum, Gradivæ, refer, (quid Thræcia cessant  
Orgyæ?) & Odrysios concede ad prælia campos.  
Illic Hæſperias pulchrum vidisse catervas,  
Illic dulce mori. Felix victoria cujus  
Constabit fatis. Tunc, ô fortissime Mavors,  
Sanctus eris, nullaque gement pia funera matres.*

Dum in hoc silentio compositus, carmen, quod non mediocriter placebat, in memoriam repetita lectione perduco; notavi ad vicinum parietem aliam imaginem, in qua vidi Protagonis simillimos vultus. Fingebatur autem aliquid scribere in Moreto, quasi non satis antiquissimus Poëta absolvisset hoc carmen. Ac deinde cum effusissimus imber sub dió ambulanti impeteret, fugiebat ad proximas sepes, & cuniculum, qui in illis latibulum defoderat, acerrima observatione quærebat: Neque procul Liphippi faciem agnovi, cum sua uxore & aliquot antistitibus populorum suorum fata (instar Parcarum) ducentis ex colo. Ac cum hæc impensius mirarer, increpuit ostium leniter, ut videbatur, digiti articulo tentatum. Nec mora, nescio quis linteo purissimo præcinctus, ad Aquilium intravit, vitroque purissimo exiguum liquorem hilarissima fronte ostendit. Aquilius, quicquid erat, crepitu manuum collaudans examinare cœpit ad lucem, & cum homine suavissime loqui, cum à Trifartito quærerem, quisnam esset tam illustis familiaritatis homo? Hæbræus, inquit, quo nemo gratiosior in regia vivit.

*Hæc dicente Trifartito, Aquilius cum Hæbræo  
thala-*

thalamum egressus, contulit se in scientiarum amabilem locum; ubi complures fornaculas vidi, ac vitrea ac argentea vasa, quæ humores in altum evocatos per obliquas fistulas reddebant. Artifices vero & foculorum ministri, pars versicoloribus pellibus præcincti, acapnum ad pondus ingerbant, pars vim liquorum viventium, quos ignis ex vasculis exegerat, diligenti examinatione pendebant. Omnem operis partem frequens sedulitas implebat.

Delectatus tam fidelilabore Aquilius, diffusissima fronte gaudebat. At ne quidem ego pulcherimæ artis ordinem, sine aliqua voluptate, aspiebam; cum Aquilius vasculum deposuit de foculo, &, hic, inquit, commendata est spes præcipua laborum meorum & nobilissime fastigium artis. Hæc dicentem lubrica materia elusit, (erat enim vitrea) & ab ineautis manibus labens, nefando in terram ictu secum Aquilium & nobilissimam artem afflixit.\*

*Qui tremor illicita cali de lampade tactos  
Percutit attonitum; paviterque horrore sub uno  
Vox, animus, sanguisque perit.*

Stabat Aquilius, velutiturbulento somno delusus, & ipse in tantæ perturbatione calamitatis se quærebat. Ex altera parte famulorum ejulatus deplorantium felicissimi vasculi ruinam, totam cellam impleverat; commendabantque gemitus, & ipsi vix ad plorandum fortes, ut non intercidisse vasculum aliquod, sed omnes deos occisos esse putares. Igitur plangentibus universis, & ipse, ne viderer otiosus miseriarum spectator, incipiebam exorare lachrymas ab oculis, bis terque pollice attritis, ac Trifarritum, ubi esset, intueri. Sed ille jam defecerat, sedensque ad lacunam, quam effluens impleverat humor, eam inundantibus lachrymis augebat. Et jam redierant Aquilio sensus; sed deerant verba, quæ in tanta calamitate effundere posset.

Itaque cum lamentabili vultu nihil aliud, quam fragmentamiserrimi vasis contueretur, ipse Trifarritum

titum monui, ut se virum meminisset, id est, colligeret in præsens animum, meritissimo quidem dolore dejectum, & Aquilium, priusquam expiraret, à conspectu illius liquoris, veluti paterni aut conjugal cadaveris, amoliretur. Pudebat Trifartitum exspectasse, ut ab externo moneretur. Itaque consurgit ad officium domini pæne supremum: & cum eo juvenis quidam præpinguis rarissimæ barbæ, qui omnium modestissime calamitatem tulerat, quippe ante biduum, dum cœlorum meatus & decreta perlustrat, illud factum præviderat ex contumacibus astris. Igitur illi conjunctis viribus, cum me etiam in auxilium advocassent, velut efferrent Aquilium, nihil repugnantem asportant. Personabant omnia funebri planctu, & omnes secretissimæ artis mystæ, cum acerbissimo clamore, sequebantur. Nescias, an Aquilium, an vasculum gemebant. Ille male consoporatus cum ad doloris sensum turbulenta vigilia redisset, velut recenti vulnere ictus, exclamat; Ergo superstes deorum iracundia vivo? & hæc quidem dicentem, ipsæ indicis venæ cum oratione defecerant. Igitur fomentis aggredimur languentem, vultusque, & præcipue narium spiramenta, acerrimo liquore perfundimus. Accum iterum in soporem laberetur, digressus ex molestissimo munere in diversorium meum pervolo.

Nec ibi diu hæseram, cum Trifartitus servum, & ipsum tuberosissimi ventris, ad me misit, qui ad coenam, ad quam aliquot ante horis promiseram, duceret. Videbatur mihi exorta lux in periculosa nocte, & Aquilium, quem jam optima fide comploraveram, omnino existimavi ad vitam redisse; quoniam domestici mensarum & hilaritatis meminissent. Itaque quotquot occurrebant in urbe (nam universi jam atras vestes sumpserant) detergere lacrymas jubebam, & in natalitiis vestibus diis sacrificium apparare. Neque me conjectura decepit: Etenim Trifartitus in simplici quidem veste, sed manantibus effusissimo sudore genis,

inaditu domus stabat; qui ut venientem me aspexit, attrivit amplexibus pectus, & ut Aquilius mirabili fortitudine revixisset, recitavit, pæne ipse gaudiō extinctus; deinde rapuit in tecta, & intriclinium deduxit, quod ignei vapores ex fictilium implerant æstu. Nulla in conclavi flamma erat; nam & caminum in obscurissima parte celatum etiam compluribus velis, veluti ædium carinam, damnaverant.

Longa fuerit series pompæ, quam si percenserem, tam ego fatigare audientes possem, quam ipsa me lassavit. Inter hæc, importuna convivarum benignitas me præcipue afflixit, quorum ut intriclinium quisque intrabat, me, utpote peregrinum hominem, & cujus honori solemnitas epularum parabatur, acidissima oratione verberabat. Ego vero credebam aliquid ex antiquis monumentis referri; quoniam ea loquentium facies erat, vocisque stabilitas, ut putares pueros ludimagistro imperatam pensionem memoriæ afferre. Tandem supervenit Trifartitus ad anbelitum lassus, excusavitque epularum tarditatem; & interim gustatione vini initiari convivium iussit. Cæterum jamdiu convivarum gravitas molestissima mihi erat, quoniam post primæ salutationis fastidium nulla jucunditate deliniebant morum, & inepta omnium majestas tam funeri conveniebat quam mensæ.

Tandem ingenti paropside invec̃ta est intriclinium offa, redolentibus herbis, & maxime pipere medicata. Erumpebat ex paropside fumus, tenuis quidem, quoniam pinguis liquor tarde vaporem dimittebat; sed qui singulorum vim odorem excitaret; veluti canes fragrantibus ferarum vestigiis monentur. Igitur considerare iussi sumus, nullis dapibus evocati, præter hanc offam, quæ sanepæne totam mensam tegebat. Paulo minus integra hora designatio locorum consumpsit. Et illi mox compositi tanto silentio scrupulosam honestatem expendebant, ut eos non minus offam venerari, quam Aquilium, putarem.

Ego

Ego Gallici moris memor, statim in cibum irui, pulmentique eminentem supradisci ripas acervum injecto cochleare destruxi. Secuta est me principem turba, & omnes parum variantibus oculis ( id enim ad majestatem pertinebat ) etiam manu in mensam eo tenore deducta, veluti musicos concentus gubernaret, pinguiissimam offæ molem expugnant. Cæterum qui in extrema confederant mensa, illi veluti spectatores convivii vacabant, & tantam nostram felicitatem contuebantur. Quod ego præcipue admiratus, eum qui proximus mihi erat interrogavi, quod illi facinus admisissent, qui nec ipsi ederent, & in convivarum conspectum perducerentur? Ille neque reos esse, & nostris epulis successuros, respondit. Inter hæc verba converto ad paropsidem vultus, quam vicinorum meorum humanitas jam transmiserat ad illos, quos inutiliter assidere questus eram & tunc ipsi aliquando vice nostra vacavimus.

Ac cum aliquantulum cessassemus, iterum unica lance reparatum est convivium. Perna & glandulæ inerant, & exsiccatae bubulæ rubor, & cæruleis aliquantum lineis variatus. Refecti tam mirifica suavitate cibi, iterum lancem in vicinos transmittimus; ac deinceps ita ferculis ad ostentationem paratis ( quippe plusquam quinquaginta sunt illata ) usi sumus, ut gustatione facta in imos mensæ fines succedentibus manibus veheremus. Cæterum neque lances simul duas in convivio vidi, & antequam explicaretur tam prolixus ordo ciborum, jam mediæ noctis processerat tempus, meque utpote fatigatum molesta voluptate trahebat in somnum. Illud autem diligenter adverti, quicquid torruerant igne, exhaustis humoribus pæne cineritium afferri. Cæterum pisces nunquam memini tanta suavitate conditos vidisse; ut hæc culina in eo genere erudire orbem possit.

Laxabatur interim convivarum taciturna majestas, & solvi in hilaritatem videbatur, ut cum indignatio ventorum primas undas suspendit

in mari, solvitque tranquillitatem magis quam excitat fluctus. Iam increbrescebant pocula, & paulatim perierat convivialium scrupulositas legum; momentoque me totum longa poculorum sepes obsederat: Interrogavi Trifartitum, quid me tot machinæ monerent? Ille autem blandissimo annuit vultu, rogavitque, num singulorum amicitiam ducerem tanti, ut illam modico haustu quo provocaverant, sancirem. Omnes idem petere ebrio plausu significabant; cum etiam Trifartitus monuit, nec id officium repudiari integra conviviarum gratia posse.

Ego pæne lachrymas in tanta calamitate profundi, rogavique, ne me suis amicitiiis occiderent; & misericors Trifartitus, quippe esse veros gemitus deprehenderat, ad vocationem meam suscepit. Ægre tandem impetravimus, ut nihil nisi pocula libarem. Ad hanc pacem cum sustulissem plausum, ac lætissimis verbis humanitatem commendassem, cœpi fœderis condiciones implere, & notabilem convivii exitum diligenter contemplari. Iam enim eruperat tempestas, & omnia temulentorum vocibus personabant. Omnes affectus cerneret, in quos solutas mentes insania Lyæi transformat.

Appetebat jam Aurora, ut facile ex gravioribus oculis conjiciebam; cum solum convivium credidi esse, remotis scilicet mensis, & assurgentibus aliquot, quibus modestior ebrietas reliquerat pedes. Reliqui tanquam sordidissimo funere in vicinos lectulos efferebantur. Tunc ego in memoriam revocatus Vlyssis, qui voluptatis blandimenta, velut hominis interitum, apud Alcinoûm proscribit; illud Thebanorum convivii adfuisse haud immerito cogitavi. Nam ad Cimærios in vicinia fuerat, & illinc ad sepulti orbis caliginem invenerat iter. Nihilominus & ipse fictis vocibus Trifartito gratias ago pro suavissima nocte, & molestissimi carceris fores non satis sanis oculis quæro, vino vigiliaque turbatus. Verum ad ostium satellites aliquot stabant, qui me exeuntem turpissi-



turpissima benignitate revocarunt; nondum missionem factam Nysæo sacro causati. Tum maxime recrudit bibentium certamen, neque me vix prioribus malis luctantem ille fluctus omisit. Astiterunt ineptissimi amici, & ructantibus verbis rogaverunt, ne omnia jam ad finem spectantia præmatura discessione turbarem. Præcipue Trifartitus considerare me iussit, quota pars convivantium jaceret, quota autem in pedibus esset, qui certe, inquit, de convivio querentur, si eos sobria vestigia reduxerint domum.

Parui extemplo hospiti, etiam periculo meo. Erant enim undiquaque propinantium scyphi, quos mihi convivarum barbaries parabat, innumerares quidem, sed ne omnia solatio vacarent, illi pæne sicci, & tantum exigua veluti libatione onerati. Sed ut ingentia flumina ignobiles rivuli componunt, & simplex assiduitas terit ferrum; ita ego his lataginibus plenus eram, & periclitabar corrumpere mentem; cum apertæ publico consensu fores dimisere volentes. Frustra gratulabar mihi de libertate nova. Etenim aliquantulum progressi in aliam custodiam incidimus, & illam non nimis inhumanam; ubi tribus poculis invitatus, cum consulerem corpus, possetne ad extremam necessitatem durare, ex convivis duo semianimes procumbunt in terram. Inundaverant solum reducis vini fontes, & odore turpissimo corruperant locum: cum alii jacentes attollere, nec ipsi bene sani; alii solutissimo risu elatos prosequi cœperunt.

Ego commoditate temporis usus, inter bacchantium tumultus elabor, domumque nec jam satis sinceris pedibus quæro. Postera luce, acerbissimo dolore afflictus sum, & mihi intestinis pulsibus caput collabebatur in partes. Itaq; abstinui à consortio Thebanorum, & dum appararetur navis, quæ Trifartitum in Scolimorrhodiam veheret, causatus intemperiem stomachi, ingrata conviviorum beneficia vitavi.

Tandem ex Bœotia commodissimis solvimus

ventus renovasset. Horrentibus nobis, planeque mirantibus, quod novum humanitatis genus esset tanto luctu hospitii gratiam violare, ego propius ad hemicyclum accessi; vultuque quantū simularipotui confuso, repentini doloris causam rogavi. Ille manu verberatam quatiens sedem, nutuque multiplici cervicem inflectens, nihil quidem sui causa commoveri respondit, sed periculo nostro: neque enim quemquam inultis criminibus lacecisse patientiam cœli. Exhorruimus omnino tam confusæ accusationis invidia inundati, mutuaque admiratione suspensi. modo nos, modo senem ingemitu perseverantem, sæpissime innocentiam nostram intuebamur.

Nec dubitavi quærere, quam in nobis flagitii suspicionem invenisset? Ille vero humentibus oculis mœstus, cæterum aliquantulum mutato in iracundiam vultu, Et hoc etiam rogatis, inquit, quasi in Scythica feritate & divini juris barbaria educti; nisi forte etiam ignoratis, quam sit inexpressibile crimen die feriata suscipere iter. Viam præterea (quod abominor loqui) non seria Numinis memoria, sed omnilibertate ludorum, solutaque remissione celebrastis, etiam polluistis innocentiam ædium mearum jocositate intempestiva, cum de via fatigati in proximo consideretis, & tecta mea infelicem umbram vestris sacrilegiis præbuerunt. Post hanc orationem cum omnino stupore contacti, tanquam Numinum cœlestium vatem adorassemus, veniamque inconsulto adolescentiæ errori deprecatemur, ipse habitis honoribus mitigatus, nihil de cœlitum lenitate desperandum ostendit; si lachrymæ nostræ emendationem bona fide sponderent, jam Superos quantum deliquissemus ignorare.

Refecti tam mirificæ spei benignitate sumus, ac tum socio meo libuit inquirere sanctissimi senis nomen. Ille spiritum aliquantum ad cogitationem collegit; Et quidem mallet, inquit, vos ab aliis accepisse: cæterum ne sciscitantes molesta taciturnitate suspendam, ego sum Cathari-

nus ille, cui sacrorum factiones tam candidum nomen fecerunt : & ut de me fateri audeam, moribus inter primos vivo, religione inter nullos. Tam superba probitate commotus sum, ut plura de sacrorum cultu & vivendi modo interrogarem : incertus an vanitas ambitionis, an sincera pietas, peperisset Catharinæ fastidiosum nomen. Ac cum senex repetita clarius tussi velut familiarum signum dedisset, omnes ad illius orationem mirabili diligentia convolarunt. Nobis etiam stratae sedes allatae, ubi compositi cœlestium oraculorum authoritatem exciperemus ; ut jam ego nunquam cassus miseriarum vates, ariolarer ex tam religioso apparatu, nos molesta senis oratione hospitii gratiam empturos.

Sedato ille venientium tumultu, cum omnium ora oculosq; in eum expectatio defixisset, in hunc prope modum cœpit. Primis temporibus, cum nondum ex humano genere cognata astrorum semina abolevissent, & inter superos mortalesque, non virtus, sed habitatio, discrimen constituisset, patebat in astra merentibus via ; & cœlo mortalitas pæne libere commeabat. Testis Herculis Liberique fama nepotibus sacra, & tot humorum corporum formæ, quæ viventium siderum numerum auxerunt. Sed posteaquam virtutis præmia libido occupavit, & nihil honestum inter homines credi cœpit quod non voluptatem promitteret ; dii corruptam humanitatem aver sati, præcluserunt limitem cœlorum, & flagitiorum gravitate suum æthera onerare timuerunt.

Igitur amissa æternitatis via superiorum sæculorum infelicitas laboravit, & omnes excogitata sacrorum novitate plus etiam deorum iracundiam sollicitarunt. Tandem paulo supra ætatem meam aliqui sacrorum ineptias aspernati sunt detraxeruntque ineptissimis superstitionibus larvam, aut, ut melius dicam, detrahere sunt aggressi. Stupuerunt enim in conatu, velut tanti operis immanitatem demirantes ; contentique ex religionum agro succidere virgulta, noxiosissimas

firmas radices tangere timuerunt. Ego tandem sum, hospites, majoribus fatis natus, qui, ut primum ætas magistrorum licentiæ me subduxit, & purior quædam doctrina cœli munere inunda- vit, non tenui gemitus in tanta calamitate morta- litatis, cum omnes, qui duodecim seculis vixe- runt, viderem veluti caliginosa nocte per præci- pitia & immensas voragines prolapsos. Ac quod me maxime movit, nec unus eo spatio in hunc orbem est ingressus, quem non sæde in supplicia perpetua morte victura commune flagitium per- turbarit, nemo, inquam, illa religione, quæ tum viguit, sibi aliud æternitatis domicilium para- vit, quam impiorum carnificinam, ubi mori ju- cundissimum putat. Viderit quidem Deus; sed in- tegra justitiæ fama, nec cuiquam eorum debuit parcere, nec potuit. Nec irascetur huic liberrimo dicto: nam & sæpe graviora ausus sum: & tamen vivere in hanc ætatem voluit, quam videtis. Cæ- terum non minus acriter exosus istos seculi e- mendatores, qui superstitionibus pepercerunt, qui Poimenarchos, ut vocant, qui pervigiliorum tempora, qui linea sacerdotum ornamenta, cæte- raque deliramenta antiquitatis, nimis faciles ad- miserunt, quam eos, qui omnino priscis consopi- ti erroribus adhuc jacent; longe in aliam emen- dationis viam institi, & admota severius manu, tenuissimas superstitionum fibras, etiam omnem imaginem, sustuli. Cœpi damnare quicquid avo- rum seculum probasset, & si mihi creditis, pæne dubitavi, an esse crederem Numen, quoniam in eo inepta antiquitas consensit. Ego sane grande diligentiae pretium tuli; & in familiam meam re- viviscere innocentiam vidi, omnino qualem in ordiente mundo Numen primis mortalibus infu- dit. Nuda vota, sinceraque religio, nulla ceremo- niarum vanitate, veluti pestiferis odoribus, cor- rupta. Die sacro nec apud nos via longiori cōmea- refas est, nec publicis scenis aut privatæ ludo- rum commitati indulgere. Æqualitatis sanctissi- mus amor; &, si mihi creditis, plus meorū volun-

tate quam autoritate mea impero. Pudore & virtutibus contineri modestiam bonorum oportet; malinec severitate poenarum possunt. Considerate figmenta Poëtarum, qui felicitatem in aureo seculo describunt: id est, cum nulla vis paria ingenia subigeret, nec tribunalia essent, ex quibus severitas metum palloremque divideret convocatis. Sed vereor, ne, antequam hoc superbissimo persuaserim orbi, dum melioribus cæptis fata cunctantur, morbus ac senectâ in ventos vires meas & animam effundant.

*Dixerat, & lachrymis vultus maduere secutis.*

Videbar mihi Pythagoram audire, tota charta apud nescio quem Poëtam suis legibus indulgentem; &, nisi commode hæ lachrymæ senis intervenissent, periclitabamur in illis sermonibus pernoctare. Sed jam deterfis luminibus videbatur novam fabulam producturus in scenam, cum lepidissima uxorexerrantem labia aliquot basiolis compressit; laudabili mulier forma, emendatissimo ore, nec eminentibus oculis nec effosis, iisque subtristi petulantia vibrantibus, annorum circiter viginti. Hæc ut effluentes Catharini lachrymas combibit, miscuitque rugis maritalibus amabilem vultum; blandissimis precibus exoravit, ut faucibus & pectoribus parcere vellet: jam omnia ad cœnam comparata manere convivas, iret, & hospites meliores exhortationibus factos suavitate convivii mulceret. Amavi mulierem post hæc verba, credidique omnibus Catharini præceptis potiorē esse.

Igitur ut ad cœnam discubuimus, & multiplicibus ferculis excepti, pietatis antecœnanæ cœpimus oblivisci; etiam ultro invitante Catharino ad hilaritatem poculorum processimus. Ego continuo in eum lumen obverti, omnino mitigatum, & suæ severitatis tristitiam submoventem, quippe in formosæ conjugis vultum tam constanter oculos defixerat, ut putares in ibi latere magnetem, qui ferrei senis conspectum in eam partem cogeret. Non tenui ego risum, nutuque meum

comi-

comitem in eandem contemplationem converti.

Cæterum nihil mirabilius mihi fuit, quam quod extremo convivio nescio quæ instrumenta illata sunt; levia quidem illa, politaque, sed Samiatantum. Eorum hic modus fuit. Calix erat exiguæ capacitatis, ad quem pertinebat directa velut tibiola, eaque cavata. Catharinus autem aliquid evolvit ex multiplici charta, & in minutissimas dissectum partes in illum calicem digerit, admotaque excitat flamma. Tum vero exundavit tenuis fumus, & se in aërem dispersit; cum Catharinus extremam tibiolam ori insertans, perductum spiritu fumum per concavos instrumenti meatus diutius faucibus pressit: donec subhorridus vapor occuparet domicilium mentis, & mirabili monstro per omnium fere sensuum receptacula laxaretur, oculi concepta lachrymarum nube tamen ardebant: nares caliginosi aëris reddebant volumina: & os omnino fornaculæ imaginem figurabat cum humiditatem lignorum nondum victrix flamma exprimit. Sequutum est ingens ac sordidum flumen, cum omnibus ostiis excitab hac peste humores aut concepti exundarent. Ac ne quid deformi spectaculo deesset, tam pestilens odor triclinium invaserat, ut jam mallem vel Catharinum orationem in illam horam produxisse. Invitati deinde ad eandem medicamento suavitatem sumus, plantam enim mirificæ in humorum noxam animositatis esse, & in omnes morbos procul dubio valituram. Sed neque me, neque focium meum, tunc fatigabat vita ad desiderium mortis. Imo credidimus hominem illum, ultra ad dotes, quas memoraverat nobis, etiam Psyllum esse: alioqui nunquam venenum tam atrox percoxisset.

*Planta nocens, ô lethifero planta horrida fumo.*

*Quam bona diversis natura removerat oris;*

*Quis te, planta nocens, tristi vectare carina*

*Instituit demens, nostrisque ostendere terris?*

*Scilicet infelix vaperet cum secula Mavors,*

*Deformisque famas, morbi que, cadensque senectus,*

(*Prob*)

*(Proh dolor) & sacra legerent aconita novercæ;  
 Heu etiam in nostras deerant hæc fata ruinas !  
 Quis sordes facinusque tuum divosque vapores  
 Explicet, & fædo surgentia nubila fumo ?  
 Talis avernali corrumpit spiritus auras  
 Missus in astra lacu, morituraque germina solvit,  
 Vicinumque pecus, volucrumque intercipit alas :  
 Talis & inferni subter mala limina Mundi  
 Urget odor manes, cum lampada tristis Erinny  
 Solvit, & extincta fumant post prælia tada.  
 Planta nocens, ô lethifero planta horrida fumo,  
 Te si simifero Cacus jactasset ab ore,  
 Alcidem vicisset odor. Te sacula prisca  
 Si nossent, poterant vacuis præferre cicutis,  
 Et de Cerberea natam te dicere spuma.  
 Tum si quis patriam violasset cade senectam,  
 Huic mites nimium flammæ, huic lenta putassent  
 Flumina, fumiferi potasset nubila Peti.*

Igitur post olidæ fastidium cœnæ sermones-  
 que Catharini novos, non minus vanitate homi-  
 nis quam convivio saturati ad quietem secessi-  
 mus. Sed posteaquam altiori mente omnia pari-  
 ter revolvi, & quæ jam in Catharini domo, &  
 quæ olim apud Acignianos cognoveram, quæ præ-  
 terea à diversarum religionum acceperam mystis,  
 acerbissimo dolore perfusus sum, quod viderem  
 contentiones mortalium non aliter divinis cere-  
 moniis, quam humana lite, abuti; omnia agi su-  
 pervacuo impetu, & crudelibus maledictis, quæ  
 tamen invicem reprehendunt; eruditos ambitu  
 trahi, & factionibus potentes, imbecillos vero au-  
 thoritatem doctrinæ aut virium sequi. Quotus-  
 quisque, cogitabam, aut Acignianus est, aut in Ca-  
 tharini familia vivit, quem non impressa institu-  
 tio parentum, aut suæ gentis conversatio, aut im-  
 petus nullo rationis argumento firmatus, in par-  
 tes seduxerit? quam pauci maturæ mentis consi-  
 lio ducuntur, & tamen illis odiis pugnamus, ut  
 facile videas omnes sibi sapientiam imputare? O  
 superba mortalitas! o immisericors superstitio-  
 nis ingenium! quasi qui vere sentiunt, non plus  
 felici-



felicitati debeant, quam consilio; aut quos fefellit occupata tot sentibus via, magis iracundia quam suspiriis digna committant. In hæc verba conפורatus publicas curas cum sensibus amisi. Postera luce ad Catharinum accessi, hospitemque Iovem precatus, ut exhibitæ benignitatis gratiam referret, destinatum iter ad Tesseranactum cum socio aggressus sum.

Scolimorrhodia terrarum pulcherrima, nunc exiguis collibus tumens, nunc in planicies pabuli feracissimas extensa, ubique lætissima viriditate exsultat. Arborum per publicas vias ordines adulti, sepesque quæ eminent ad securitatem pascuorum, ubique imaginem sylvarum commenantibus ostendunt. Armentorum atque gregum tanta frequentia, ut ibi Geryonis ac Atlantidarum fabulas ponere possis. Flumen erat, cujus alveum perpetua semita stringebamus, reciprocantibus undis statos cursus mirabili commoditate reflectens, & passim quidem ingentibus navigiis stratum erat, scaphis autem remisque tam multipliciter everrebatur, ut nunquam magis Xerxes Hellespontum oppresserit.

Ego felicitatem regionis admirabar, & adorabam simillimos Lufiniæ campos. Sed populus, ut plerumque fit, nimia fortuna saginatus, stimulos ingeniosæ paupertatis in superbum otium mutaverat. Præcipue externi fastidio eramus, & nisi ex Catharino cognovissem, tam rusticum crimen tantum in vilioribus hære, jam incipiebam averfari Scolimorrhodiæ fastus. Certe quotiescunque ad magnates divertimus, etiam meæ Lufiniæ humanitatem damnavi.

Lautissima supellex, & ipsum pavementum quotidianis levigatum laboribus, hortulique per plantarum ingenia dispositi, fessos erroribus oculos suavissime levabant. Ipsa colloquia magnatum, & puellarum humanitas, nescio quid mihi ipso cœlo felicius videbatur: tum convivia omni opulentia repleta, mensæque ferculorum mole depressæ; thesorum deinde apparatus, & exa-

Et in omnibus mundiciis, animum meum etiam Themistii vaticinia permulserunt.

Sed posteaquam ad Tassaranaëti pervenimus sedes, primum quidem religiosam majestatem frequentissimæ domus, tot tricliniorum cultus, tot atria famulorum splendore vibrantia, etiam paulo digniora credidi, quam ut ubi Iupiter habitaret. Cum autem Tassaranaëtum contemplatus sum, utique apparatus quantumvis venerabilem, tanto fastigio minorem esse arbitratus sum.

Cæterum cum aditum ad ipsum studiosissime molirer, ad Amphiaræum amicorum principem veni. Nulli est Tassaranaëtus intima charitate conjunctior; nec aut cuiquam Deorum justius potuit nasci, aut Iupiter similem in cœlis Mercurium habet. Ego statim in illius notitiam sua facilitate perveni, & per hunc deductus ad Tassaranaëtum cœpi melioribus diis uti. Nec multo post Tassaranaëtus, cum me non mediocriter auxisset, etiam in sacrarium suum induxit, ubi inter lectissimos famulorum ambrosia vescitur: quod beneficium divinæ mentis impetu raptus, istis subito versibus prosecutus sum.

*Quantus erat, magni peteret cum testâ parentis,  
Quamque potens Phaeton, tantum si visere currum,  
Nec currum voluisset agi: penetralia tantus  
Nunc subeo, cælumque tuum pulchrosque recessus,  
O proles genitorque deum, qui sceptrâ tiarâque  
Ostrumque & tanti decoras insignia regni,  
Nec tu sole minor, quo se genitore superbus  
Iactavit Phaeton. Tu nobis Phæbus Apollo,  
Tu radiis Titan, tu mœsibus alter Osiris,  
Et mitra, & Paan, & cunctis gentibus olim  
Sol quodcunque fuit. Medius Sol temperat astra:  
Tu medius Reges, tu magni fœdera Mundi  
Certo jure ligas, tu qua discesseris ora  
Pallida surget hyems: tecum ver protinus ibit,  
In campos quoscunque voles. Lucebis Ibero;  
Non erit Occiduo confinis Iberia Ponto.  
Eoa plus luce nitens. Si Gallia Solem  
Senseris, ô Galla quæm frangens horrea moesses,*

*Sed grates, Sol magne, tibi. Peneitalia tandem  
Mortali patuere viro. Iam cernere coram  
Ambrosiam nectarque licet, mensasque deorum;  
Iam mihi non dubio venient oracula visu,  
Luxque oculis aterna meis, aternaque menti.  
O lux alba mihi, quam nullis obruet unquam  
Nox inuicta rotis, nebulaque ingrata maligna.  
Nec Superos majora precor, nec vota Tonanti  
Vlla fero. tantum, ne, dum bona cuncta severe  
Temperat, atherea me vivere malis in aula.*

FINIS SECVNDÆ PARTIS.

---

P A R S T E R T I A.

A P O L O G I A

Euphormionis pro se.

Serenissimo & Potentissimo Principi,

C A R O L O E M A N V E L I,

Magno Duci Allobrogum, Gallorum Insu-  
brium Principi, &c. Euphormio S. D.

**V**etustas Asylorum (Princeps Potentissime) magis tu-  
tam improbitatem prestabat, quam justis solatiis ex-  
plicabat humanitatem. In iis ipsi diu scelerum custo-  
diam agebant, ad audaciam novorum facinorum & infamiam  
cæli. Nec miramur, adulteros & fures deos, tutelæ flagitio-  
rum esse factos; sed innocentibus viris pudenda incolumitas  
videtur, ad alias profugere aras, quam quibus nec insidere  
improbitas, nec innocentia potest arceri. Talem lucum, tam  
candido numini sacrum, quasi in maledicentia quorundam,  
qui meum Satyricon laceßiverunt. Nec longe petendus vide-  
batur sub meo rege viventi: sed ut illi quoque probarer, qua-  
sivi suffragio tua Celsitudinis niti. Tibi igitur (Dux Sere-  
nissime) destinavi hanc innocentia mea Apologiam supplicem,  
donec

donec periculum inimicorum erit, & postea quam vicerimus donarium. Indigna res, quam tua Celsitudini nuncupem. Sed si quaesivissem fastigiotuo dignum munus, non habebam: si maxime conveniens, istud erat, ut sub auspiciis tuis, Princeps armis & litteris inclite, hanc literarum capefferem pugnam. Quis crederet, inter tot armorum strepitum, tot negotiorum molem, qua omnem Celsitudinis tua aetatem exercuerant, Musas quoque in secretum tuum ausas intrare? Atqui capacissimus animus tuus, & per omnem eruditionem lavigatus, nuper mihi in sacrario tuo, velut de maturis & ad vera negotia otiosis literis, pulcherrime eluxit. Neque de nostri Numinis penetralibus egressus, alibi sincerius, quam in tuo templo, summam, & qualem reliqueram, virtutem adoravi. Nunc vero, Maxime Princeps, te veneror, ne istud votarum meorum exile monumentum de tuis tholis refigas; maxime illa manu appensum, qua, si tui Iani fores ad novas laureas recludes, jam se alia Pallade tua Celsitudini approbabit. Vale. Londini, Cal. Septemb. MDCX.

**I**Nnocentem ludum, & calamitatis ex composito sœvientis imaginem, per veras querelas, proh fatum, & indignationem jam non fabulis quæsitam, absolvam. Inturnescet aliquando pulsatus animus, qui etiam ad umbram quas effinxerat injuriarum digna veris doloribus verba invenit. Sed hoc malis accessit, quod Andabatarum discrimine exerro in arena. Velato enim capite qui me laceffant, & quos devoveam, ignore. Inter tot maledicos, tot invidos meæ famæ, nemo se obtulit, quem possem celebri ignominia, velut longa, & apud posteros duratura morte, dignari. E latebris, quem non possunt imitari, ignobili invidia conantur opprimere. Nam magnorum hominum securus sum, qui Satyrici mei simplicitatem, nec ad livorem morsus, pro scripti genere & temporibus æstimant. Nec aliud in callidis aut imperitis adversariis horresco, quam pessimam artem subornandi in odium meum non intactos mihi tantum, sed etiam laudatos, contra modum susceptæ severitatis. Sed non feram

feram diutius foedarum avium voces, in candida scriptorum meorum omnia euntes. Iudices autem feram summos viros, quos ut sæviter traductos in libertatem mei styli ipso Satyri nomine excitaverunt.

Cum exercitam primæ ætatis ambitionem de schola attulissem, cupiditas nominis & adolescentia, commune argumentum ad famam, acrem stylum obtulerunt. Accusare totum Orbem institui infonti violentia, & plus in spem propriæ laudis, quam ignominia aliorum. Dissimulatus igitur verecunde mihi ipsi sub Euphormionis nomine prælusi: ut, si novi hominis & vigesimo primo anno scribentis exploderetur mali successus labor, saltem occulti vulneris dedecora alieno titulo exciperem. Evulgatus liber, tanta modestiæ lege ut sibi in neminem privarim quidquam acerbi permiserit, statim ad famam quodam æstu exultantis fortunæ subvectus est. In eo sub fictis nominibus, quæ ad sustinendas vitiorum personas induxeram, conabar per suavitatem fabulæ multa & disparia flagitia damnare. Nam quid insulsius fuisset, quam suscepta accusatione omnium, paucos, neque ex improbiorebus, perstringere? aut quæ illa periculorum aviditas, si magnos viros gratuitis inimicitiis inconciliasset, præsertim in luce & discriminibus victurus? Quosdam tamen de notis & spirantibus miscere inter hæc falsa & inania simulachra institui. Sed & facili imitatione nominum prodere, ne per omnia fictam scenam multorum studia destituerent, qui in certam & viventium criminationem intenti sunt. In iis plus voluptatis aut risus, quam solidæ & legitimæ accusationis quæsi. Ita communi & malo vulgi gaudio, sed non per flagitium, obsequutus sum.

Ecce autem, ne impune fortuna faveret, primo eorum; qui Euphormionem amabant, intempestiva diligentia; mox sedulitate invidiæ, in omnes simplicissimi scripti partes sollicitæ severitatis lege quæsitum est. O ridiculum tam ineptæ sapientia

pientiae acumen ! omnia ad historicam legem cogere, pro libidine sententiis abuti, perpetuasque injurias & malignam prudentiam cogitare. Iam Callionis, jam Fibullii nomina turbulento vaticinio certis hominibus destinabantur. Denique quae communia peccata sub privatis nominibus carperam, in singulares homines à publica criminatione referebat hominum quorundam ineptanatio & ex faucii animi livore cæterorum modestiam æstimens. Multi quoque irascendo agnoscebant scelera, & sibi maledixisse invitum cogebant. Etiam ubi commendaveram virtutem, omnia opinio continuæ atrocitatis corrumpebat. Primus itaque turbo ex hac irrequiere vulgi imperitia concitatus est. Alexandriae Quæsitorem, non procacitate ulla, aut contumeliam celantibus jocis, sed hilari & ingenua laude prosequutus sum. Habitationis suæ via, materiam ludendi sua appellatione præbuerat. Indignum itaque dixi, qui inter mala habitaret. Hic vero potissimum genus rudes, & suæ imperitiæ ignari, ad indigni nomen commoveri, facinus clamitare, quod illi homini convitiarer. Ex Academia quoque (proh labem servitutis) quidam ad eum perveniunt, monentque cujusdam Euphormionis Satyricon illius innocentiam tetigisse. At ipse in media stinis ignorantæ latinitatis vitium derisit ; Euphormionem autē tantilli beneficii memoria amare professus est.

Eodem quoque tempore Callionis, Percantisque, Fibullii quoque & Pedonis nomina, ab otiosis tacita æstimatione jactabantur. Designatos proceres aiebant, & ignominiosis coloribus ad populum velut in tabula esse productos. Sed in neminem unum lineamenta alicujus imaginis cadebant. Itaque variatis sententiis, neque meæ petulantiae, neque ejusmodi divinationis idonea argumenta, reperiebantur. Nam & plerumque frustra quærentium labor erat : cum hæc nomina, partim ad argumentum efficta, non alibi, quam in mea scena consisterent ; partim autem essent hominum mihi privata familiaritate cognitorum,

sed

sed qui non summis fastigiis editi apud multos latebant. Nam quid intererat describere vitia summorum aut mediocrium hominum? cum utrique eadem pravitate sceleribus indulgeant; & sæpe efficaciora nequitiae consilia in humilibus videas, dum ambitio ad parandam magnitudinem foediora flagitia quam ad tuendam audet. Nihil dissimulabo in hac simplici professione sensuum meorum. Aliquet amici hanc ultionem ingratis animis meruerunt: quibus ad consuetudinem benevolentiae receptis, & illorum crimina & Satyrici mei iracundiam reconciliatio extinxit. Cum in illis vana quaedam studia torquerentur, ne Euphormio quidem supersticiosam diligentiam evasit; quis aut unde esset, quæ illius Lulinia fabulosa felicitate celebrata, num denique propriis doloribus hanc Satyrici libertatem dedisset, omnia per vanas conjecturas, inter otia literatorum vel invidiæ curam, pensabantur.

Speciem amentiae, crucemque, & cætera quæ lusi calamitatis mala, præcipue servitutem, voluerunt imputare, cui me in Gallionis familia, mea fabula addixit. Sparsa in vulgus chartulærat, quæ omnia Satyrici mei secreta videbatur reclusisse. Inter cætera, mihi quoque dominum mirifica sagacitate invenit. Is erat, quem ego nullius coloris novi; nisi quo famam in ignoto reve-reor. Fortuna liberalius mecum egit; nec ullius privati familiam auxi, è paternis in regiam focis eductus. Ita excusso Satyrico, nullam partem volebant arte aut convitio vacare. Sed nec omnibus incivili iracundia adversor. Multi in meos sensus candide quælivere; digni quibus referam gratias: per quos & ubique jam vero, neque fatis rapientibus extinguar.

Tandem occidente invidia, videbar expurgationem habuisse. Galli Germanique mutuis editionibus Euphormionem vindicabant, & ubique sine malæ atrocitatis suspitione tractabar. Sollicitatus male fida pace ventorum, ecce iterum solvo de portu, & navigium vix resectis armamentis



in altum perduco. Nondum enim consumpseram impetum, qui me ad ambitum publicæ celebritatis protraxerat: & jam cum præjudicio vocabar ad Satyram. Novos igitur libros ex eodem cortice excidi. Sed ô fatum! non periculosius illum in Alpibus impatientem motus lacum, quam tranquille sedentia seculi vitia agitavissem. Præcipue fraudi fuit, quod Gephyrium & Acignianos tetigi. Nec enim æstimatis argumentis passim proscribebatur Euphormio, & ad tristem litteram iudicibus satis erat, quod in Satyra Gephyrii nomen & Acignianorum legebatur; dum illi sua vitia putant tutissime à populo superstitiosa reverentia nesciri, hi autem in sacris hominibus accusari omnes deos. Non indulgebo imprudentiæ meæ, si quid procaciter aut contumeliose ullarum partium iudicio peccavit. Nam quod verbum in Gephyrium atrox? quid in tam invidioso argumento non benignissima humanitate diductum? Occasione motus qui Marciam nuper erexit, tempestatis minas despexi, quæ hybernū in Adriatico increpuerant. Parricidium aut portentum, cum rescerneretur atrocibus stylis, Euphormionem, animum suum tot horrore fluctuum gravem, tot nugarum indignatione tumentem, exonerare voluisse: Sed & tam miti studio, ut Gephyrium excusarem, quasi alieno impetu falsis & vanis hominibus se tantum præbuisset. Hic tanquam vicino incendio æstuarè Italiam, & totam quæstionem curiosis libellis excussam, post omnium fœderum religionem pugnaturis. Nam piget excusare quod insolentem & toties Gephyrius funestam potestatem notavi abdicandi vel constituendi principatus. Sed & ibi parcente iracundia videbar languisse, cum tam publicam facem, tot cælum & turbinum consciam, Gephyriorum manu jactari modestius indignar, quia unusquisque sibi favet, & nulla vis est suavior quam supra se adulationis tormento rotari: Illis autem, qui hanc mentem Gephyriis injiciunt, id est, qui illam facem ad incendium

dium adornant, non humano tantum odio irascor, sed aut supra communis malitiæ, & quam veluti usus excusat, jura euntes abominor, aut infra humani acuminis præstantiam demissos contemno. Nam quid importunius, quam rescindere vincula reverentiæ à primordio terrarum ipsa Numinis manu sanctissime astricta, &, quod terribissimum puto, tam grandi flagitio inscribere ipsum cælum? Hæ sacrorum hominum furia, quibus ne suæ quidem sententiæ vere placent, non alios sibi conciliant, quam ingenia imbecillitati damnata, vel simulationem callidorum ad perfidiam ambitionis pietatis imagine utentium. Ex ipsis autem religionum ministris, præcipui arcana spe Gephyrios omnia posse voluerunt, quia quo superbius fluvii excrescunt, eo vividiores rivulos propagant. At vero parvæ mentes spisso judicio inter Numen & Gephyrium vix distinguunt. Ecce, ipsam Urbem si placet intueri (nam quos alios Gephyrium sceptris præficere non pudet?) & superbam fiduciam supra suos tumentium colles, illic mixti utriusque potestatis fasces, & procul ab hostibus tanta majestas, etiam conscientia aut poenis compositæ mentes, sciolos illos, velut fulmen in Capitolio tenerent, in contemptum Orbis attollunt. In iis, si paucos excipias, frustra solidas maturasque litteras expectes. Non gentium monumentis, non illa ipsa, quam jactant, Theologia, sat nervosis laboribus nituntur. solum eruditionis tam superbæ, tam fidentis sibi supercilij fundamentum, Juris Canonici Praxisque Rom. mediocris & ad fastum subornata cognitio. Hoc est urbani laboris compendium, quo, velut anhel in omnis scientiæ culmen ascendant, despiciunt totum Orbem, tanquam soli integri & soli sapientes. Quid mirum si Gephyrii lacelessiti tot vocibus, & veluti Luperco Antonio diadema omnium gentium tradente, vincuntur dulci & pæne invictio malo ambitionis? Hi sunt, inquam, urbis incolæ, qui suis coloniis pessimorum invidiam facinorum & exitus

& innoxium damnant jocum, cur theatrali licentia indulgent, cur intersunt suis scenis, quæ illos nec dissimulato nomine traducunt? Erumpit barbatus ex aulæo senex, purpureæ tunicæ pullam vestem superinducens, hanc utraque manu collectam in renium sarcinam levat, & Marcianorum habitum profitetur adumbrare. Num ideo comitas proscripta ludorum? num Poëtis vel histrionibus tristiori lege detractum? Imo curiosa frequentia adsunt, & se hilari imitatione productos ipsi sæpe cum populo riserunt. Adeo publica cavillatio plus habet remissionis quam aculei, ut videaris illi ipsi, quem aperto nec flagitioso lacefferis risu, jocandi voluptatem ingenua libertate quæsiuisse. Vna Cynicorum malignitas, & intra latebras susurrantium nefas, leges in maledicos, & magnorum hominum iracundiam extorsit. Etiam beneficium debetis, o quicumque mores vestros in publico videtis excussos. Hæc libertas, iniquorum & invidiæ nervum franget; si tantum ad occulta & inconcessa ludibria tendentem. Astus quoque sibi aliquid consciorum est, jactare suam culpam, & proprio risu alienam licentiam redimere. Nam quis perpetua innocentia candidus, aut se intragratiarum legem nunquam exerantivenustate polivit? quis de cælo illam prudentiam deduxit, quam Ioviaffidentem & ideam laborum suorum Pictura & Poësis in artificii æstu intuetur? Nimis superbe dedignatur mortalitatem qui peccasse erubescit. Sed ut primam pulchritudinem nascentis Solis excipimus ad Occidentem obversi, quippe jugis montium primum in ea parte nondum emerşi Solis radio occupatis: Ita virtutum splendorem admiramur in sapientibus, compositi velut ad eorum Occidentem, id est, suorum vitiorum umbram, quæ rara & egregiis dotibus concessa, non minusquam extremæ nubes in picturis nobiles delectant. Sed & recensitis maculis cætera videmur adorare, in iis qui numerandis vitiis, immensis autem virtutibus, minus terræ quam syderibus debent.

Marcia felici miserorum exilio erecta in utriusque naturæ confinium, callidissima virtute, nec minus ingeniosa fortuna, inviolatam majestatem in hoc seculum erexit. Quis neget civilium rerum æstus illic ad Orbis spectaculum eximios fuisse, inter tam vicinæ & diversæ potentiae vires semper per turbines & tempestatem exeuntis? Italia virorum Principum victoriis occupata est, nec minoribus armis amissa. Eximiae res Lygum, & Longobardia ferox felicibus bellis. Super omnia Imperatores quidam vetus nomen, vetus auspiciū, veteri quoque ambitu & militia implebant. Sed tam gravi multiplicique procella plus terroris prudentiæ Marcianorum quam calamitatis infusum est. Per tot mala & servitutem Orbis sospes Respublica, & ingentibus inimiciis superstes, non mirabilior imperio quam libertate fuit. Hanc sive moderatione suorum, sive rigida custodia institutarum legum, nulla tyrannis delibavit. Gentem quoque barbaram, & quæ sui ponderis ruina ad nostralittora provoluta est, laceessere diu ausa, tandem æquis foederibus continuit. Quis tantam clementiam factorum, quæ dignos suis beneficiis invenerunt, aptis præconiis adæquet? Nam opulentiam civitatis & prudentiam Patrum erit facilius mirari, quam jejuna & impari laudatione libare. Tamen & natura suis nævis pulcherrimum corpus aspersit, & iis fortasse aliquid ad incrementum republicæ profecit. Nec enim Syllas vel Marios, aut Pompeji magnitudinem, & ad suum fatum gentem Iuliam invenit, quia ibi sive sponte sive sic instituta ingenia vim legum non ægre patiuntur, & humiliter spirantia, quam ut fastigium quatiant rerum æstum, quo plurimum possunt, in communis potentiae decus informant. Equidem crediderim ex genio gentis descripta esse jura, quia tot sæculis perennant: quæ summoti pompa non ambitum modo, sed sumptus, & per hoc inopiam proscripserunt. Vestium ambitiosa pretia, & inanes comitantium cœtus, plusquam

Lycur-

Lyeurgica rigiditas ex urbe summovit: ne inter pares luxuriosa æmulatio solidis patrimoniis constaret, vel liberam civitatem tot satellitia quasi ad imaginem tyrannorum exterrerent. Vna Optimatibus vestis, non colore, non filo pretiosa; idem integumentum caputum, ad externarum gentium jocum, simplex, nullaque melioris seculi venustate spectandum. Ipsa solitudine neglecta majestas; dum patricios videbis nullo stipatore circumagi scapha victis & per totum populum errare. Absit huic licentiæ ignominia, sed & convitium narrationi meæ. Nec mercari, nec mercimonia manu ferre, nobilitatis flagitium est. Illi mores, & seu casu calliditate majorum felicissimæ nugæ, ita nobilitatis licentiam miscuerunt, ut res eadem & nota libertatis & custodia esse possit. Nam & optimates in urbe velut sua evagantur; nec liberiores domos quam publicum suum habent. Rursus autem tam modestæ magnitudinis lege depressi non dispiciunt æquales eminentiæ suspecti, & sectam clientibus plebem emunt. Hoc est grande maledictum, hæc procacitatis immanitas, quam in me quisquis ille Censor est importuna sedulitate notabat. At te sancta Respublica, te veræ dignitatis & opulentiae alumnam veneror, ne memoriam tot laudum, & Satyrici beneficium tibi ultra suam sortem blandientis, insons jocositas extinguat: si te dignis nominibus veneratus sum, & mitius tecum quam cum Britannia mea egi. Post tam simplicem & verecundam defensionem meam, non putabo per ullius invidiæ maledicta te alienari ab innocentia mea posse.

Vtinam me Acigniani tam candide audirent, qui utriusq; sæculi tribunalia petentes, numquam tamen bene conscii animi fiduciam terrebunt. Ingens factio, & suæ potentiae authoribus gravis, lenta vincula, & supra Vulcanicos hærentia dolos, territis alterutro metu animis injecit, demissionis culpa per contemptum opum ire arduasque virtutes: populi credulitatem ad om-

nia tenuerunt, & robustiores mentes fastuosis viribus tentant, tam sancta potentia ad humanum imperium repente traducta. Hos infamiae aut egestatis horror, hos spes alta tam superbe florentibus junxit. Quippe illi per virtutis arbitrium sibi à populo alumniisque commissum, ipsi famae interdunt, ne suis adversariis liceat probis aut ingeniosis esse. Ad ultimum divinis & humanis viribus freti, has callidissime in illarum stringunt contemptores.

Cum his hominibus quæ me commiserint causæ, privatis injuriis asper, an inimicitiarum claritudinem sponte deposcens, quidam frustra quæsi-  
verunt. Nullam acerbitatis argumentum in his scriptis, aut iniquæ vestigium mentis. Sero & leniter in eos quædere ausus, quædam verâ aperta-  
que modestissima admonitione descripsi; &, si Satyricon sine præjudicio legent, fortasse prævaricationem amabunt. Nam quid triste innocentis scripti hilaritas objecit? Parata ab inimicis tela non strinxi, quæ agnoscere nolebam, & graviora suscepto risu erant, & ambitum eorum, quasi ad veram potentiam nesciret attolli, intra solas literas persequutus sum. Nec putabam tantæ modestiæ irasci, qui id solum proficiunt, ut quod sub inani luseram joco, altiori præjudicio confirmem.

Attentatum in literas regnum & domorum temerata secreta: tum ingeniosam juventutem in illorum maculas omni venatione compulsam, extra convitia arguebam. Ac utinam fallis indiciis tanta nomina detulissem, quæ jam vulgaris altiorum mentium indignatio damnavit. Quis non enim melioris ingenii tot mortalium insaniam tristi acerbique persequitur risu? aut quis captos Acignianorum artibus ignorat, qui cæterorum quidem tanquam barbara & incondita ingenia aspernati, apud Acignianos credunt Musas omnes felici facinore pæne in custodia haberi? Majestas & moderatio incessus, & secretum ab externis penetrabile, tum quorundam ingeniorum felicitas, quæ in illis viguerunt, eos ad tam immodicam  
scientiæ

scientiæ famam evexit. Accessit industria callidissimæ gentis, quæ sese ad existimationem mutua commendatione protrudit, & in alibi orientia sydera levidespectu & veluti fastidio, etiam maligna laude, nubem perniciosissimam exhalat. Nam & hominum generi dominantur inepto quidem aut insano, sed ipsa multitudine impetuque valenti. Si placet, Sciolos appellemus. Hi superbo nec capaci ingenio, rumores, quoscunque ab Acignianis acceperunt, tanquam secretæ rupes multiplicato tumultu referre stolidi pertinacia assueverunt. Tantæ quoque juventutis quantam ipsi excoluerunt, obstinatis suffragiis nituntur, dum se omnes ab eruditissimis edoctos supervacua vanitate contendunt.

Et his quidem machinis intemerata potentia ad ipsa sydera suspexit. Nunc videas tot fucorum perire secretum, Societatis flore paulatim per ipsa fortunæ munera oppresso. Nam qui in paucis urbibus suorum aliquot lætiora ingenia ostentabant, qui fastidiosum delectum habebant suam clientelam ambientium, nunc immensis coloniis dissipati, ægre sua Numina in tot templa dividunt, & exhaustis civibus servitia ad sacramentum vocabunt.

Quid censeam de illorum studiis si quæris: in illis non pauci mediocres, per proprias dotes aut laboriosa institutione formati; multa humilia, sed quæ suo & sociorum vultu fallunt; denique ingentes quædam mentes, quæ nuda & exilia exterorum nomina sua fama circumvolvunt. Fallitur enim qui tantum ingeniorum proventum esse putat, ut alicubi spissa & tanquam per armenta numerentur. Quod si Acignius pro suæ catervæ paupertate frequentem industriam invenit, quis ideo illudat cæterorum hominum dignitati, quasi si decertandum sit singulis Acignianorum eximiis totam decuriam non opponant? Nam qui Naturam tot capaces & sublimes animos Acignianis prodigere putatis, cur rursus effingetis tam sterilem, ut in cæterorum tanto numero non sæpius



sæpius ingeniorum bonitate luxuriet? Et quidem in scientiarum regnum venturus, omnes illarum partes impetus Acignianorum invasit. Sed præcipua Theologiæ & Philosophiæ cura fuit. Has antea sub veterum codicum pondere vix spirantes, nova insania scribendi operuerunt. Humaniores autem literas, id est, amœnissimam partem, & si mihi creditis, utilissimam Musarum, nondum satis delicate habuerunt. Vulgaris, & ut ita dicam, profana licentia facientium carmen, in scholis vel miseris scenis, suffecit inexpertis adolescentibus, & raro Ludimagistro publicorum iudiciorum periculum fecerunt. Vellem & Crispum Tragœdiam tenuissent, ne scire cogeremur, eos non infelicius scribere quam agnoscere verum. Nam si quis ideo doctissimos putat, quia rudem pueritiâ ad literas informant, pessimo iudicio in infinita rei exiguæ æstimatione caligat, quod aut mirificam industriam magistrorum credit ad primæ doctrinæ initia requiri, aut ab Acignianis juventutem perfici, cui forte ad decimum sextum annum ea studia procul ostendunt, ad quæ vix curiosæ vitæ maturitas pertingeret. Et quidem de eo genere literarum plerosque afferre suam sententiam non fero, quibus nunquam veræ eloquentiæ imago de sui aut alieni ingenii speculo illuxerit. Summam & eruditam eloquentiam dico, quæ cæteris comitata scientiis offenditur ineptia scholarum, neque se indulget ingeniis intra veterum imitationem inclusis, quæ suas partes in stylo sperare aut ducere non audent. Tam venustæ & difficilis scientiæ vix aliquem singulis ætatibus idoneum reperiri non sine illius fastigii admiratione videmus, cum huic nemo nascatur nisi amœno primum fœcundoque ingenio, deinde solida prudentia ad civiles astus idoneus, & cui patientia laborum nec fragile, ut ingeniosis, corpus, nec refugientem animum ostendat. Itaque in Acignianis nullum esse, non causa contumeliæ obiecti, sed risurus vanitatem ad tantum vocantium nomen plerumque inexpertos, & sublimis

blimis scientiæ imaginem inter viles Ixionas constituentium.

Videtur quam prolixè indulserim Acignianis, quos in amplam eruditionis partem non invidiosa confessione admisi, dum & cæteris mortalibus sciamus non parcius, divisa munera Musarum, nec ibi perpetuam ingeniorum felicitatem esse. Nam quod adolescentes ad Societatem dicebam pæne de animilibertate deduci, industriamque in illis aut opes, non autem naturæ impetum æstimari, quæ omnibus per suavia & virtutes diversa vivendi genera distribuit, nolo instituere defensionem meam. Utinam patiantur nos suppressis querelis dissimulare inepta sæpetela, sed in illam ætatem valentia; quæ si vellem excusare, quid amicus invenirem, quam illos juventutis venatores decipi inconsulta pietate, nec crimen in omnibus hæere? Temerata quoque secreta, & arbitrium familiarum illis callidissima insinuatione quæsitum, hodie intemperantius rideam quam indignor: quippe omnis doli ingenium post primam aciem hebescit, & quos insidiæ secundos aut tertios decipiunt, digni quoque videntur maturius perisse. Cur igitur in illos scopulos offendimus, & jam tantis naufragiis tectos? cur illam domesticæ censuræ procacitatem non excludimus, quæ nunquam severe detrectantibus illudit, semel autem infusa, non facilius sistetur, quam flumina, quæ viam aquarum ponderibus rupe-runt. Ad summam, si intentum peregrinæ mercis vectorem, si servantem astra agricolam, & militum arma probamus, quis Acignianos damnabit, si, quem facillimum credunt ad potentiam, ascensum omni artificio pertentant? Imo applaudam ingeniosæ calliditati, & stultam prædam in tot caveis videbo.

Contentus tam modesto indicio, atrocitatem majorum facinorum submovi, quæ fama vel inimicorum acerbitas adornat, & si vere æstimamus, in solam calliditatem & felicem prudentiam lusi. Multi enim magnitudinem illorum invidiosa speculatione-

culatione damnamus; irati non iisdem artibus  
 nobis quoque patere ad gloriam iter. Nam ut au-  
 steram virtutem tanquam signum textumve anti-  
 quitatis suspicere in aliis solemus, incommodam  
 autem in nobis aversari, sic è contrario beatam  
 fertilemque fortunam aliorum liventibus oculis  
 perstringimus, quam à cœlo post omnem crimi-  
 nationem tacita veneratione mercamur. Quod si  
 Acigniani simplicitatem meam agnoscent, facile  
 residui amoris vestigia amabo, quem apud nos u-  
 tinam publicis offensis non extinguant. Si vero  
 pro authore scriptum premunt, si devota in me  
 tela facili Euphormioni & aperto vulneribus in-  
 figunt, non irascentur liberrimo dolori, qui ad-  
 huc priscæ consuetudinis memorię pepercit. Nul-  
 las injurias pervicacior indignatio solet ulcisci,  
 quam quæ creduntur in publicum emissæ, & in-  
 gratissimum beneficii genus est de universis me-  
 reri. Purgatus itaque totis corporibus, & tam  
 grandiliberatus iudicio, ad singulares homines,  
 & quidem gravissima majestate dignos confidenti  
 defensione decurro, quibus magnifice negligentibus  
 imaledicta, neque tristi supercilio indultriam  
 damnantibus, risus aut sensus meos aut pœniten-  
 tiam approbabo. Non excidere his seculis Antigo-  
 ni atque Pyrrhi, qui multa convitia despiciant de  
 fastigio suæ famæ, nec Antonii celebrata jucun-  
 ditas, qui provocatis aliorum salibus, in se quo-  
 que ludibria invenit. Sed non patiar conscientiam  
 meam de integritatis suæ fiducia simpliciter ad  
 deprecationem traduci. Ipsa lex citatos ad tribu-  
 nal non tantum, si, quæ fecisse arguuntur legiti-  
 ma quæstione, negaverint, sed & si ea fecerint ju-  
 re. litera salutaris dimittit; & Prætores æqui bo-  
 nique judicia abstulerunt severitati verborum.  
 Etiam in fabulis populus agitatur, qui primo cri-  
 minis vultu deceptus, in Cnemone parricidium  
 vindicavit. Adeo non est ubique aut amare simu-  
 latam virtutem, aut vitiorum imaginem odisse.  
 Sed præcipua ratio in æstimandis laudibus aut  
 convitiis esse debet? Nam & illæ sub querelarum  
sæpe

*sæpe & atrocitatis specie vibrant ; hæc autem inter maligna præconia periculosis insidiis conduntur. Itaque nec Satyram fecisse excusabo, nec ad illam accessisse qui Panegyrum expectarent ; modum vero tenuisse ut castigarem licentiam scripti ad eorum laudationem quos notabam, æquissima monstratione defendam. Nam inania nec turpium vitiorum simulachra in plerisque quæsiui : ut sub opinione querelarum opportunissima prævaricatione laudarem. Hos si tam mansuetum iudicium offendit, damnantque beneficium innoxie libertatis ; saltem patientur emendari facinus, & superfusis laudibus, instar Simonidis oculos suos quærentis expiari.*

*Et Callionem quidem tam suis lineamentis expresseram, ut suspicionem à cæteris viderer submovisse. Ne illum quidem produxeram vulgo, ne spem redeuntis amicitie vulgata nec sanabilis injuria extingueret. Igitur quædam vela circumvolvi illi tabulæ ad ipsius naturæ veritatem expressæ, ut nec alius meis telis huic soli destinatis fauciretur, & tamen secreta ignominia plus pudore in consiciam mentem quam infamia sæviret. Multos quoque admonebam, errorem quem nunquam amator Poëta expiavit, non tutius latere quam verum Callionem. Nihilominus aut in plures divisa scena infelici curiositate quorundam non unum inquinabat, aut unius actus suspitione tota tragœdia innoxiiis imputabatur. Quibusdam sufficiebant obscura natalia ; alii facile ingenium, & virtutum vitiorumque potens, vanis suspitionibus luebant. Illud vero acerbissime tuli ; præclaræ dignitatis purpuratum traductum sub hac larva ab inimicis meis iniquissima accusatione jactari.*

*Molles & parum viriles illecebras quibus voluptatem invitaret. turpemque formæ curam agebant, falsa quidem illa sed contumeliosissima procacitate dilatam. Hoc autem non illi modo quem volebant, sed & ubi Callioni objecerim ignoro, quem tantum paruisse sui seculi vitiis, non autem muliebri*

muliebri ingenio præivisse contendi, sed adulatio Satyra peior, summo & nobilissimo homini illu-  
 sit, eum sub Callione laceratum, & inter Berecin-  
 thiæ Gallos per ludibria & enervium vitiorum  
 contumeliam exsectam. At ille quia nihil de se  
 ejusmodi credebat, aut referentibus tardiori fide  
 consensit, aut quicquid illud erat infra ultionis  
 dignitatem esse duxit. Mihi autem ignoto, & a-  
 lieno facinore laboranti, cum ultra biennium in  
 ea suspicione jacuissem, ab inimicis nuntiatur me  
 parum pro modestia tantum hominem tristi &  
 inverecunda oratione læsisse. Turbatus, & ex-  
 templo conscientiae interrogans fidem, circum-  
 spiciebam ne qua tam intempestiva impietas nu-  
 gas Euphormionis polluisset. Nec timebam me-  
 ditati facinoris culpam, sed verebar excidisse inter  
 publicos questus quæ in eum non sine conjectura  
 deflecti potuissent. Vt deinde Callionem nomina-  
 runt, tunc vero attonitus & impatiens contume-  
 liæ, non risum; non iracundiam tenebam, simul-  
 que ingemiscebam miseriæ Optimatum, qui ne-  
 que sua bona neque mala, nisi ex aliena fide co-  
 gnoscunt. Et illius quidem nomen fideliori reve-  
 rentia tacebo, quam stulta & imperita adulantium  
 nequitia, qui nescio quid de illo videntur credi-  
 disse, in quem Callionis scenam convenire puta-  
 verunt. Quod nisi in curiosa excusatione offen-  
 sam metuerem, satis antiquissimæ gentis imagi-  
 nes expugnarent infelicitatem nascendi, quam in  
 Callione traducebam; & totius ordinem vitæ,  
 notæ & à multis celebratæ virtutes non agnosce-  
 rent. Summa igitur excusationis hæc erit, me  
 nulla invidiosi scripti parte, ne concessio quidem  
 & innoxio joco, ejus innocentiam laceisisse, nec  
 eum quidem occurrisse, de principibus viris læ-  
 tiori procacitate ludenti; eos autem qui inepta se-  
 dulitate ipsum nempe in Callione invenerunt,  
 abominandos tam integræ domui esse, quod per  
 illius maledicta amoris & diligentiae quæ siverint  
 nomen.

Sed nec solertia meliore meum Anemonem  
 produ-

produxere de tenebris, in quas illum composita conjecerat larva, eo etiam peiores quod integerrimam matronam eodem facinore læserunt. Con-  
tubernalem meum se inanius efferentem, ne ipso quidem invito eram ultus, & quidem ne hæreret suspicio, uxorem attribueram, cum spem ipsam conjugii ejurasset. In ea vero muliere multarum impudicam licentiam exponebam, sed præcipue subitam & inconsultam libidinem flagitiosæ domus. Sed nec favore lasciviæ niti, aut frangere obligatos mihi animos quærebam improbavoluptate legendi, cum non videretur dubitandum tam foedæ mulieris æstus nemini placituros, viris certe faciles & oblatas voluptates aspernantibus. Illam autem quam foeda suspicione violarunt, neque suo merito Satyram timuisse, neque mea integritate oportebat. O virtutis inanem custodiam sui, si alieno scelere deformis esse potest. Matronæ prostituere famam, & de mea Comœdia in fornicem deducere, conjectores ineptissimi audebant, digni, si perveniunt ad populum qui nati per eadem scelera, vel non meliorem familiam ducere credantur. Et hæc quidem in privatorum ignominiam jactabantur, sed præcipua moles invidiæ me in Protagonis & Doromisi nominibus pæne toto pondere afflixit: neque tamen molestius fuit hic criminibus onerari, quam nunc lætandum puto defensionis locum esse per summorum hominum laudes ituræ; nisi omnino deliquisse me credas, quod tam sancta nomina indigno polluerim loco, & velut contagione criminum quæ in aliis arguebam. Nam nec olim Principis signum inter inultas sordes, aut funesta obscenæ sedis vilitate stetisset. Cur igitur in Satyram ausus tam indignos conjicere Heroas & velut in mortalitatis mala ipsos deos adoptare? Hæc si tristis objiceret Censor, non fortasse à sincera ratione erraret priscæ simplicisque virtutis: cæterum nec peritus hodierni moris erit, & intempestiva probitate molestum facillima defensione submovebo.

Nunquam nostro seculo tam pervicaciter iratus

R

fui,

fui, quin paria aut foediora in Majoribus facinora  
 agnoscerem; & de fati injuria queritur, qui post  
 Heroum ætates inter mortua semina virtutum  
 putat se in sola vitia natum esse. Sed non susce-  
 peram revocare memoriam pristini pudoris, &  
 velut exemplis tot autorum consuetudinem no-  
 strorum malorum sancire. Ac præterea videtur  
 inhumana accusatio quæ in solam nec profutu-  
 ram ignominiam mortuorum insurgit. Sed & hu-  
 manæ naturæ vitio, maligna gaudia criminatio-  
 nem viventium insinuant; frigida autem & in-  
 tempestiva reprehensio antiquitatis non inveniet  
 probatorem. Igitur nec accusationem pessimæ æ-  
 tatis institui, ac ne quidem hujus ævi corruptissi-  
 mas gentes aut stultissimas veris & meritis con-  
 vitiis prosequutus sum. Gallias Britanniasque, id  
 est, florem universi, & humanitatis hæredem quæ  
 decurso Oriente in nostrum vesperum deflexit, in  
 severitatis meæ titulos causasque rapiebam, tum  
 quod nitida & exacta corpora suos nævos melius  
 ipsa dissimilitudine fatentur, tum quod ibi litera-  
 rum domicilium esse, & istius notæ volumina,  
 inter liberos & ingeniosos homines, & quidem  
 sine altiore malitia procaces, sciebam avidius ex-  
 cipi. Et fortasse in vitia ducturus, nescio cujus vi-  
 tii jam tacitis sanciti suffragiis commoditate usus  
 sum. Si tamen vitium appellem, solutam qui-  
 dem illam, sed innocentem & peccantem intra  
 verba dulcedinem jocandi, aut etiam de fastigio  
 rerum & tota Orchestra disputandi. Nam qui  
 dies Galliæ illuxit qui evulgatis aut se inter con-  
 scias tenebras prementibus libris novum scripto-  
 rem per aliena ludibria commendare noluerit?  
 Taceo quod illiberaali ingenio & sæpe non artifi-  
 cioso facinore magna & casta nomina diris & cru-  
 delibus contumeliis infestant, in quibus plerum-  
 que sola temeritas placet vel mentiendi audacia,  
 tum statim moritura novitate.

Sed nos quidem plus quam Herostрати nomen  
 de memoria tollamus, cæterosque humanius sæ-  
 vientes, si placet, saltem ad cognitionem & ju-  
 dicium



dicium admittamus. Ex iis aliqui, jam in partes discedentibus sacris, mystas adversæ factionis permissis & veluti religioso odio, falsis sæpe sed apud suam plebem creditis facinoribus aut ludibriis objurgant. Alii in externos obversi Principis sui imperio late viciniam destinant, & inter Musas suas debellant. Illi exprobratis hominum aut regionum incommodis toto spiritulicentiam suam fatigant. Quidam felicitatem ulciscuntur, quæ indignos attollit, multos quoque muliebris fastus, aut impotentia, de sua sorte exeuntium ad scribendi violentiam accendit. Etiam lenta judicia, emptæque curules, & forum prædonibus plenum, irritos & supervacuos accusatores invenit. Iam nuge & cassa vanitas incolentium aulam, jam perjuriam amicitiam polluentia, jam omnis conditio & sæpe virtutes citatæ sunt literatorum studio ad populi famæque tribunal. Mihi autem inter hos acres impetus, & interdum illustres, illi, plurimum aberrante prudentia, videntur in ineptiam quam in aliis castigant incidisse, qui gravi & ad majestatis speciem ornata sapientia larvæ ambulant, id est, qui plurimum sapere volunt, subitipatres nec à censoribus recitati, & de magistratibus queruntur; remque summam non rogatis sententiis evolvunt. Nunc suarum partium sacra veluti de fastigio aliis inaccessæ sapientiæ excutunt: nunc populi mala, & inconsultæ fortunæ munera, nihil profuturæ iracundiæ ostentatione vexant. Audent quoque Regibus componere sua edicta, & quam vitæ rationem probent inimica potestate præcipere. Inter hæc, modestia & hilaritas de tumescentibus exigitur scriptis, quæ libertatem styli sibi multa permittentis potissimum commendant. Nam ut immensa & inanis loquacitas nullis seriis condientium risus probatus, etiam in Parasitorum vilissima fame: ita nec victura aut profutura cavillatio, perpetua sapientia debet esse invisæ. Cum oporteat omnem Satyram aut veniam habere modestia, aut lepiditate mereri. Sit igitur, ut profit, altis quidem viris-

que querelis conspersa & plena comitatis, ut delectet, magisque suo seculo & vitiis quam hominibus irascatur. Neque enim aut Tarentinorum quisquam Metonio offensus est in errorem civitatis ad Pyrrhi auxilia conversæ ludenti; aut lenitas Brutitruce Fannii libertatem admisit.

Igitur Gallia in infinita libertate scribendi indignis & felicibus Satyris exundat, dum omnis generis ingenia vel impatientiam risus per hæc ludibria offendunt, ut tumorem subeunti invidiæ levant; etiam tum-prudentiæ applaudunt quam sibi affinxere: pessimi autem vel fortunæ suæ crimine omnibus irati, vel malignitate livoris ipsam maledicendi voluptatem satiant. Hos mores polita disciplina, & in humanissima quidem gente, palam ulcisci, an opertis oculis dissimulare debeat, si quisquæret, primum sciat, cœli quidem & terrarum velut fata, non arborum modo aut animalium genera pro regionum conditione variâ esse, sed & in mortalitatem valentia nostram, vario & dissimili affectu incolarum animos temperavisse. Sub hoc cœlo subtilis & sæva timiditas videtur, sub hoc autem insana & sese profundens temeritas nasci: reverentia Principum, aut odium legum, vectigalium quoque patientia, vel infra avaritiam sanguinis sui cura. Nec ullus est humanarum mentium affectus qui non aliquem Orbis locum præcipua religione invaserit. Huic itaque morbo sese male tenentium linguarum mederi publico imperio præfecti haud dubio debebunt per terrorem sævientium legum, in illis gentibus, in quibus despectum Principum odiumve quidam communis spiritus alte egit; aut sicubi tardos provisosque sermones non nisi matura animorum acerbitas expromit: At vero Gallicis animis ipse halitus superstantium astrorum longe alia ratione providit, qui extemporaneo impetu pæne iracundiam priusquam conceperint, effundunt, industriamque jocandi non sæpius inimicis quam familiaribus adornant. Ibi virtutes & vitia, si vere judicamus, majori quam pro vero specie erumpunt,

punt, quæ laxa inaniter & effusa nunquam ad verum bonitatis aut malitiæ ordinem possunt cogi, nisi cum refelluntur. Testis alacritas in fidentibus animis magnifice exsultans, altoque spiritu gloriæ & discriminibus ad fastum intenta; ista quoque procacitas, & asperitatis Satyricæ morsus; quorum illud fortitudinis specie tectum, hoc autem persona maledicentiæ infame non paucos hoc seculo decepit. Quippe illa generosi spiritus velut expressa effigies, dum per inconsultos tumores in Gallica juventute luxuriat, nihil est aliud quam adulterata fortitudo, quæ sua petulantia veræ virtutis decora projecit. At vero idem torrens cum ad obices rumpitur inhibitus, æmulatione aliorum, & ad experimentum provocante fortuna, tunc inanis ferocitas de illo fastu suam aciem evolvit, rediensque in virtutem ad virilem & maturam fortitudinem se componit. Hoc contra malignitatis simulachrum, hæc nonnumquam insana & præter fascium reverentiam procacitas, ut turpissimam larvam habet, sic intus innoxia, nec vero facinore deformis, ipsa libertate contenta est. Si vero non parentibus edictis teneretur, tunc fortasse totum virus, quo per hanc lasciviam se Gallica ingenia exonerant, in immanium & rectorum ulcerum tabem coiret. Adeo sæpe virtutes & vitia non sunt priusquam lacessantur. Igitur ut eadem arbores pro terrarum situ naturam quoque mutant, nec Persarum mala Romanos extinxerunt, cicutaque nonnumquam utimur ad frigiditatem potionis; ita mores æstimare ad ingenium utentium oportet. Neque plus eadem verba, quam ritus in his illisque gentibus diversa significant. Et fides aliorum populorum linguarum pensata modestia, seditionum scelerumque pericula male in Gallia metietur innoxia scurrilitate, quæ his nugis occupatum fastidium odiumve præsentium rerum & in nonnullis fortasse nequitiam consumit.

Erectus hac consuetudine tot inultis ludibriis sancita, quamquam alienæ gentis homo, ausus

sum in iura & veluti sacra Gallicæ libertatis intrare, & Satyram, vix ultratitulum sævientem, leni fletu & inermibus jocis implevi. Quod nisi Principes Viros tenuioribus velis obductos (ut nec longa conjectura dubiave retegì possent) egissem in hunc ludum, quis (ô facinus) innocentem turbo, quæ tempesta inundabat! Nihil esset tristiori supercilio grave, nihil invidiosa atrocitate suspectum, quod non malevolorum improbitas in contumeliam illorum rapuisset; mihi quidem in simulato tam funestæ loquacitatis gravis, sed illis iniquior quos tam grandi malorum facinorum suspicione violasset. Igitur ipsam purpuram consultissima ratione detexi, ut æstimari modestia mea posset, nec in deos crederem ausus quæ vilioribus ingerebam, aut quibus etiam ipsa vitia sub fictis & scenicis nominibus lacerabantur.

Cum hæc moderatio tutum iter primis scriptis præstitisset, nescio qua fiducia in secundum Euphormionem excrevi. Hic cum primo se solveret risu, suppressere jocos jubetur, & ex operarum manibus, ad iudicium multamq; descendere. Quod cum mihi tot fluctibus terrisque diviso amicorum indignatio ad intempestiva odia vocantibus literis pertulisset; non indulsi dolori, aut repentinis inimicitiis mutatus sum. Nam & Magistratus sciebam, si quid injuriæ esset, ignoti hominis libello obtulisse, quod si maxime meum esse cognovissent, tamen pepercissent diligentia, quam prætextu publico in me malevoli homines vel imperiti exexerant. Nimis enim humiliter summorum Magistratuum res erunt, si sufficere minimis debent: & illorum otium severissima lege turbamus, nisi alienam concedimus fidem, cujus diligentia tuta præsertim iudicia & extra fortunarum sortem exerceant. Libet quoque agere gratias ipso nomine injuriæ, quæ Euphormionis famam fortasse extulit, ipsa damnatione præsignem. Sed jam fracta invidiæ nube, haud dubia timidave fiducia expecto, ut expertam verrecundiam emendata in Eleutheriam suffragia

reducant. Quantumcunque severo tribunali disceptemus, ecce, Italia & ab utroque Germania cœlo, ludibria, ne appositis quidem pensata præconiis, non modo neglexit vindicare, sed pro munere amplexa, ingenuæ libertati applausit. Vbique evulgatus, velut præmio delationis suæ liber in illis urbibus illisque domiciliis quæ notavit, jam fidelius mores explorat: & sua indicia, præsentit testimonio sancit, aut in jocum traductus emendat. At Eleutheria in immani patientia urbanitatis, proh fatum, meos sales publico donare dubitavit, quæ ridiculam, &, quod est pejus, non ridentem sui Militis audaciam, & equitis fanaticum robur, & toties scribentium pudendam libertatem, nullo supercilio tam sedulæ majestatis offendit.

Sed nec illis tenebris projeceram foetum, ut obscurus parens essem, & si quid parasssem atrocius præsentissimus vindex erat, qui in suis nunquam sociæ & amicæ majestatis despectum patietur. Ignorant moderationem mei Regis, qui, quam pacem Orbi facit, non putant ad verborum etiam tranquillitatem pertinere. Nam & diligentius in populi sui ore, sociorum Principum famam amat, quam suam castigare, gnarus nec amoris pignora cum improbis jungenda, neque bonos contumeliarum flagitio esse lædendos, sed nec deorum crimina licenter in vulgus & sine honore efferenda. O præclarum, & quod tot Principum ambitio inter feroces & inhumanos titulos non vidit, bonitatis fideique cognomen; quæ in hoc inultæ amentię fuisset. Sed laudationem omitto ne suspecta adulatione evilescat. Longa posteritas, quæ vere de præterita virtute censebit, satis tantum memoriam sua in nostra tempora invidia commendabit. Cæterum non facile videri debebam, voluisse tunc primum se tradentem fortunam jugulare, & profana petulantia in quædam Numina, mihi inconciliare omnes deos. Quod si faventibus vindiciis, quæ hospitibus certe debetur, jam non fidelius tamen à se

amicorum imperio Regum quam nomini esset consultum. Etiam cum hoc lustrum horribilis atrocitas Diræ una face pæne Britanniam cremasset, & proditionis nefas vix de suo jugulo esset excussum, de populi sollicitus voce, nihil prius edixit, quam ne quis tristi suspitione macularet Regum sociorum dignitatem. Iocos tamen, aut vulgaria, & veluti per totum populum lassata ludibria, exorabili comitate agnoscit, quæ se lepiditate conciliant, & nocere jam non possunt, veneno quod tectum & occultum sævisset jam corrupto & per nimium aërem expirante.

Hoc arbitrio fortunarum mearum potuissent fortasse magistratus dubitare deferentibus meum nomen, nec vicaria fide tantilli voluminis conscientiam explorare; cum præsertim scriptiorem inquam magis tempestas incubuit nuncupassem Heroi, quem foedis convitiis præficere, supremæ nec in hoc Rege tanto plus vibrant quanto Natura capacior communium vitiorum facultatem obtulerat, ne inepta necessitate esset probus. Hoc est enim esse sanctum, non si à sceleribus abes, sed si ea refugisti. Equidem Rex meus gloriari pulchre potest: nullos quidem exterorum suis muneribus ad perfidiam fraudis allectos, sed nec proditionis conditionem ferentes humanius auditos, quam ludimagistrum Faliscorum Camillus excepit, audiant Magistratus meum librum (nam pro se ejusmodi dicet) eum facile de judicii metu littera saluari exsolvent.

Sed in Protagonem tamen lusit, & de Doromiso totas chartas implevit. O horribilem rectorum mentium calamitatem! secura flagitia occupare præmia virtutis, beneficia autem & merita periculo sceleribus constituto palescere. Ego vero si literatorum infortunio quæstum accepissem librarium, anxiamque mercedem sordidissima adulatione captassem, nemo ante Protagonem erat cui meos labores exprobrarem: illum extra humanam sortem laudibus eductum, illum huic honori qui est ambitioni humanæ charissimus esse

subve-

subvectum; nec unico seculo duraturapræconia meritis saltem donis & imparibus comparanda, nunc gratuitis muneribus & neæstimata viderentur confuso sub Euphormione nomine largientis ipsa gratia perit, & plus invidiam, horum temporum vitium, quam meam fidem inassueta integritas adjuvit. Ecce autem ne hoc quidem beneficium fata indulgent, ut apud sentientem me excusum, cum vulnere (ô dolor!) post omnium memoriam indignissimo, ille Protagon, ille natus ad miraculum terrarum, destituerit Orbem. Proh facinus ad nostri ævi infamiam efficax, quod per teterrimum nefas tantum Principem nondum poscenti reddidit cælo. Sed & stupor lachrymas, & stuporem ultionis cupiditas, de omnium pæne gentium corde & oculis submovit. At te adoranda Anima, te melius per virtutes & famam quam per exeuntem de busto Aquilam consecratam, hic omni sollicitudine placabo; si quid de tam iusta remisero cura, non minore flagitio quam si viventem offendissem, peccaturus in Manes. Sed nec ille excanduit, & si adhuc dignaretur mortalitatem nostram, nullus certior aut veniæ author esset, aut innocentiaæ meæ vindex.

Stabat ad tribunal Africanus, & jam intonerat acerbitas in ipsa innocentia quærentium crimen, cum Antiochum, filiique vinculum & indicium corruptelæ non expavens, ipsam quoque defensionem erubuit. Iudicum quoque plausus, revocata beneficiorum memoria, in Capitolium usque perduxit. Tam memorabili exemplo meus liber de reorum pulvere dignissimo tumore confurgens, & summarum creditor laudum perambulare potuisset Protagonis totum limen, donec præmiis absolutus abiret. Primum enim non imparis dignitate personæ, tantum nomen magnificentissime operui. Nam quid aliud Protagonis cognomen quam militaris scientiæ verissimam confessionem expressit? Nec pensata tot principum tot seculorum laude, illum omnis memoriæ pri-



num ac pæne solum ducem, in justum gloriæ fastigium assereram. Nempe ex hoc convitio cæteræ & sub iudicibus litis, ipsa innocentiae meæ verba ad testamentum citabo, nunc igitur est in Euphormione Protagon: *Vir hoc seculo major, & dignus fabulantium miraculis vatum*: hic alius, nihil de eo mortale predicabat. Et solertissimus senex multis in eum præconiis effusis in hæc verba desistit: *Nulla secula Protagonis genium aquarunt. Et, Nec quemquam familiorem Numinibus ad nos fata transmiserunt.* Nec minor eximii viri cultus totum ubique Satyricon adoratæ majestati substernit. Quod si de jocis publicis meus deinde liber crevit, si cum populo scire ausus sum, nec acerbioris risu quam quo Protagonem delectarem inclamare Thalassio, ignoscite, quæsitores; bonitate Protagonis & vestra libertate sum deceptus. Sed videte, ne maiore piaculo nimis officiosam diligentiam polluatis, dum hos ludos intempestiva severitas silentio damnatos videtur nescio qua censura notavisse.

Si vero de Fortunæ descripto imperio queruntur, quam in ipso Eleutheriæ templo, ipsa ara, sanctissimo honore appellavi, si aspernantur illam deam, & me quasi suorum sacrorum ignarum incusant, certe legum suarum videbuntur oblivisci, sed & parvam gratiam habere illi Numini, per quod ipsi creverunt. Nam quod his seculis virtuti stabile iter ad opes, nisi jam opulentæ? aut quis ad magnarum dignitatum culmina, nisi quadam sorte pervenit? ac ut nemo nisi dignus, aut divitiarum potiatur aut bonorum, nihilominus opus est fortunæ regno, quæ æquales virtute, saltem impari felicitate distinguat. Nam multorum ingeniorum magnæ dotes, velut debiles & ipsa paupertate ægræ jacent. Libet aliquando meminisse Satyricæ libertatis & iterum adorare fortunam. Tu es, inquam, sine qua nullæ virtutes sibi placent, nullæ possunt per nostrorum temporum tempestatem emergere. Tu de sacerdotiorum collegiis suffragiorum potestatem, tu de opulentis

pulentis solitudinibus excussisti, sed & forensibus ministeriis in hoc arduo locatis quo solum extructæ pertingant divitiæ, quæ via nudæ industriæ patet, aut quid saltem felici ignaviæ vel ingenioso scelere negavisti? Sed tantos & tot fascēs tibi hæc ætas non dedit. Iam olim omnia potuisti, etiam ante luxum atque æstus; etiam cum memoriæ labentium annorum satis fixæ parietis fides erat, cum numerantibus clavis, & captas tot annorum usu gentes nulla interdicta extorquebant. Hac veneratione Fortunæ si quis offenditur, aut ipsius beneficiis saginatus, capta & ebria mente desævit, aut sane est iratus, nec respicienti per tot vota litavit. Sed hoc totum non video quo argumento possit ad minimam Protagonis notam aut injuriam traduci, cui etiam fortunæ arbitrium adscripsi, ut felicitatem ab illa nemo magis quam ab isto exoraret. Doromisum autem (alterum Satyræ crimen) immani piaculo aggressus sum. Scilicet ab ipso nomine initium injuriæ fuit, & Doromisum appellavi, quasi per nimiam frugalitatem liberalitati infestum. Ecce de infelici beneficio novum nefas, amorisque conatus iterum indignissimo reatu perculsi. Quasi Doromisi non invenerim nomen, quod nullis donis tanta integritas posset, nulla sollicitatione perverti. Cur igitur ambiguum nomen (nam vos ambiguum fecistis dubitando) in tristius deduxistis, nisi quod mens mala, in suspicionibus gravis veneno suo pastum de innoxio flore quæsit? Sed & illum quibus verbis, qua commendatione celebravi? Amisisset Satyra suum nomen, si paulo ulterius indulgissem. Nunc *vir ingentis natura* appellatur; nunc *qui in calum possit meritisima predicatione levare*. Nam imperitiæ imputabo æmulatorum, si vel senem de illius frugalitate loquentem, vel Euphormionis inopiam cum suo artificio Musique neglectam, in criminationis acerbiteriam deducere audent. Nimirum æquo jure sua libertas scenæ ac Satyræ larvas indulgit, quibus supra Pythagoræ fatum sæpe homines renascantur in die,

& nunc

tione. Nam qui continua integritatis fiducia suam causam cum cœlo Principibus miscent, mei premendi occasionem putavere se nactos, quod eodem scripto in Labetrum & in ipsos jus libertatis exercuissem. Sic igitur potentiam alienam ad suultionem callidissima fraude armarunt. Suis injuriis silentio testis, tanquam pio & laudabili dolore commemorant contumelias; (ita enim appellabant) quas ego in Labetrum & Pedæam flagitiose fudissem. Adeoque valuerant astus, ut innocens procacitatis Euphormio, novo judicii genere, in alio Euphormionis & Satyrici innocente pæne vindicaretur. Et hoc quidem atrocior videbatur injuria, quod Pedæam illis jocis miscuissem. Nam & severius suæ Metellæ vindictam in Athenas quam defectionis Sylla exequiebatur, & hic Scythia qui in Bajazete pæne facta Ottomano- rum præcepit, plus contumeliis in uxorem quam imperi libidine accensus est. Non est tanti meus liber ut imparis odii magnitudinem excipere velim, &, si pietatem nolit, ultro se iratis noxæ dedit: plus tamen innocentia sua motus quam periculo meo. Labetrum & Pedæam non tam originis vetustas, aut potentiæ extulit robur, quam virtutum claritudo. Neque præconium tantæ confessionis jam effundo, aut spe beneficiorum agitur, aut indignitate terroris. Sed ubi res ad serium procedit, non ausim ad tanta fastigia nisi vera adoratione suspicere. Et vero nullius flagitii incusatos tantum veluti publica voce produxi. Nam communem, & si maxime esset verus, non turpem rumorem sequutus sum, & per aliquot jocorum suavitatem expressi, ac ut magis impetrabilis venia offensæ sit, non tam illud in Euphormionis ludum arripui, quam ut fabulæ vanitatem improbabili narratione damnarem. Igitur nec isti libertati mallent tristi & ignobili superbia irasci. quam ridere cum domino gentis humanæ, qui trimestres liberos felicibus nasci impatienter non audivit. Sane de Liphippo, nisi ex persona aliorum nihil dico, quos si reverentiores majesta-

tis fo-

tis fecissem, periclitabar adulationis opinione contemni.

At Thebanos quis ignorat eximie à me coli, dum majorem nostrā patriam assidua veneratione appello, & amicitias illorum ambitiose quæsitæ ad scrupuli molestiam & solitudinis conservo. Nec illi moderationis obliti, acerbius meos risus quam eos miseram exceperunt, digni quos veris laudibus attollam, cum synceris judiciis nec falsa beneficia admittant, nec injuriarum speciem vanitate præjudicii ulciscantur. In Aquilio autem è vivorum societate jam sublato, etiam supervacua excusatio esset: in cujus conditorium neque fama meæ narrationis intrabit; & si maxime fieret, ejus manes humanis negotiis non sollicitantur.

Vereor ne prolixa trepidave defensio meæ causæ fiduciam corrumpat, præsertim quam non ita suscepi quasi inimicorum meorum humiliter pulsare meam quietem ægritudine solitudinis posset. Magnatibus autem sic me facilius approbabo; Nihil scriptum aut cogitatum esse, quo illorum dignitatem violarem; Si nihilominus perseverant suspicari, me execrationem mei factus pretium suæ benevolentiae esse facturum.

Domita autem vel sedata vi ferocitatis externæ, jam forte familiaritas merentium quæret, num tam perpetuo favore mei pignoris caligem, ut in eo cognoscere errores aut agnoscere non possim, denique si quam eum toti orbi, tam etiam mihi excuso. Nam & Brutus suos liberos primum virgis, mox securibus cæcidit, ille autem adulterii vindex non prius filio oculum reliquit, quam sibi excussisset; & ubique quo est tolerabilior lenitas parentium suis, eo laudabilius erit hujus veniæ suavitatem aspernari. Igitur tanquam è publico rediens, & hemicyclo augente privatam majestatem domesticas de ipsis Præstitibus culpas expecto. Neque mollius quam jurata sententia disceptabo, vel ut tanquam Hermolai patrem sua rabies in filium absolvat, vel ut ipsius filium

lium iracundia parentis eripiat externa misericordia per internam & velut parricidalem discordiam, benignissima lite erecta. Ecce autem jam vexatum percensui scriptum, duriasque discussi, quæ recipere culpam aut abscondere possent, nihil publice peccatum annotavi quod castigatione in exemplum possem ulcisci. At privata & tantum in domesticum nomen errata, etiam ætati donavi. Primum quidem, invidiosi argumenti ferociam, quæ sub prima juventute adhuc rudem & inexpertam libertatem sævientium odio vel iracundiæ objecit, tum conatus præmaturos, & cupiditatem famæ, quæ luxuriantem vitio annorum scriptionem novaculæ severiori non servavit. Nam in prima Satyrici parte etiam quotidie lituras facio, ut in multis velut fronti invenustæ, saltem velum imponam. Sed hoc iudicium non ingrata violentia mihi ereptum fatorum clementiæ permisi, quæ hoc pæne exeuntis pueritiæ tyrocinium victuris spiritibus annumeraverunt. Secundæ vero parti quæ, provectior bienii mora, sapuit per prioris impetus nævos, meam quoque gloriam imputo: ac quod Epidicus & Orator suis authoribus fuerant, id mihi de Callionis potentia liber Euphormio, & seprimis litteris sub fabula imbuens, esse potest. Nimirum ut censeri per illius virtutes aut vitia non recusem. Neque me tam propitii itineris ad gloriam potest, aut si mavultis præclari erroris, poenitere, sine contumelia immerentis fortunæ, quæ velut consilio meam temeritatem provexit. Adolescentibus autem totique juventuti, quæ adhuc curiosa & libera diligentia speculatur aditus ad ulterioris vitæ securos & opulentos cursus, meis cautionibus, & jam experto navigio, quo ad remigent portum ostendam. Fallitur enim qui literarum splendorem putat etiam Pluti cœcitati illucescere, & statim ac in Parnassum pervenit, opes ab Apolline efflagitat omnis metalli conditore.

Nam omnibus seculis diverterunt divitiæ à studiis virtutis, & sæpius Philosophia in gratis fruguit,

frigit, quam purpuram despexit. Illi ipsi qui libertatem solutarum gentium subegerunt eloquentia, qui Cheronæa in Philippum arma cedere; qui Corneliis Sergiisque sua consilia extorserunt, non exivissent de Rhetorum umbra, nisi nudæ eruditionis altam & candidam simplicitatem mixtura civilium negotiorum corrupissent. Nemo igitur intra ipsas literas aliud suis laboribus promittat; quam castissimæ dulcedinem voluptatis, & ad summam inutilem egentibus famam. Ille nobilissimus amor impetusque sciendi, à pecuniæ & ambitus utilitate semotus; in securis & jam felicibus ingeniis, inter avitas opes digna & præcipua majestate se commendat. At vero si quis impariamore deceptus, dægestate sua altissimas quoque Musas contemplari & eadem sinceritate colere audebit, quantumcumque magnifice cogitet, sæpissime de Hecates cœna gustabit.

Nam ut primum de Rhetorica dicamus, & humanis literis, sequentemque has Philosophiam, quod præmium quamve spem illæ Nymphæ suis amatoribus invenerunt? perpetuum scholarum pulverem, & (proh facinus) in tam liberalibus disciplinis ne quidem mercenariæ doctrinæ opulentam locationem; in privatis quoque familiis educationem puerorum jam olim servilis necessitatis munus, & hodie non unius Pistocleri immitti superbia despectam. Iuris autem immensa cognitio, per tot nodos impedita, & plerumque solventium nugis, ingratis sudores raris stipendiis videtur ad solam æternitatem laboris educare. Nam interclusa tribunalia non nisi jam opulenta scientia pulsantur: si placet de reorum miseriis augeri, si in patronorum nomen ire, jam existi de merarum literarum pulchritudine, quam hic sterilem & ad opes currentibus inutilem damnamus. Nempe enim tot municipiorum jura, in sola codicum nausea & solitudine vestigabis. Vivo strepitu opus est, & callidissimis experimentis, quibus incendere lites aut opprimere possis. At nec divinis studiis clementior portus; ubique divitias

divitias sui juris faciente fortuna. Nam infinitæ opesquæ sacrorum custodibus venerunt longa & trepida majorum pietate, nunc mercedi, aut inconsultæ amicitia Magnatum, aut sollicitæ adulationi cesserunt. Inter hos scopulos tam turbido freto & obstinatis fluctibus repellentes literatorum remigia à divitiarum cursu quidam velut everberatam tempestatem propitia fortuna vicerunt, qui in apice studiorum aureos quoque fontes & ambitiosum otium invenere. Sed in illis ipse casus potius quam eruditio felix fuit, & saltem numeranda paucitate infamant Musarum egestatem, quæ pauciores quam vilia aut pudenda artificia ad humanam sublimitatem attollunt.

Desolanda igitur tantorum Numinum limina, & literis inexpiabili sacrilegio ejectis, foeditas barbarorum annorum revocanda? Absit ut per tantum flagitium velim fatum jam labentis eruditionis præcipitari, quæ, si verè æstimamus, nos à pecudum vilitate seduxit, soletque præcipue cognationis cum cælo admonere; Sed nec velim juventutem aberrare velut Sirenibus deceptam, nulla præsertim poenitentia utiliter illius temporis consilium emendante.

Igitur domesticas amoliri angustias & fascium dignitatem volentes respicere, acri quidem impetu incumbant illis literis quas magis propitio impetu iis natura admoverit: nisi forte flexibili ingenio eligere studia, & repugnantem animum regere possunt: cæterum ut se aperuerit floridior ætas, & veræ curæ per primos stimulos sollicitaverint mentem, non quidem relinquunt ipsas Musas (neque tam levi sarcina opprimuntur) sed eas secum velut ad utiliore mercatum circumducant. Tum primum suos mores civili venustate nec perfunctoria solitudine mitigent, tum ipsa comitas amorque solertiæ, & cura placendi, tum fraudis & malarum artium disciplina, non in usum sed cautionem ac fortasse speciem invigilantem animum informet. Ex quidem (ut omittam qui in forum prorumpunt, civica arma in consultis ven-

S

dituri)



dituri) pro genere ac fortuna transeat juvenis in factiosam clientelam. Ibi de omnibus diis patronum suum placet, non gravis affectatione paritatis, aut sordida vilitate dejectus. Sed & ista prudentia est in eligenda servitute tenenda; primum ut quod præcipue genii impetu potes, id est, quæ potissimum emines dote, id aut possit cognoscere patronus, aut mirari; deinde ut per altissima quæque flumina navigationem intendas. Nam & de vivis fontibus multæ aquæ hauriuntur, ne quidem sentientibus ripis, & tuas sordes eluet pretiosæ purpuræ contactus, ac, si supra Philosophū dona erunt, tamen Alexandrum decebunt.

Inter has curas, miserrimæ quidem mortalitatis ludibria, utiles tamen ad præsidium senectutis, si facilitas rerum aut magnitudo ingenii reliquerit otium, ad eruditionem cum pulcherrimo labore colendus est animus, qui hac deflexione forensium rerum, veluti quodam ludo, suas curas mitigabat. At verò cum emerferit liberalis animus de formidine paupertatis, vel cum satiaverit modestas honorum cupiditates, & poterit suas literas inter splendorem dignitatum majori præjudicio ostentare, tum vero permittendæ sunt habentæ isti ambitioni, tum inquam acrius descendendum ad perpetuos quidem studiorum labores, sed dignos mortalitatis fastigio, & sudoris præterea rivos per multiplicem amœnitatem plusquam Apio aut Oleastro detergentes. In iis domestici solatii vis ingens, & per stupefcentem tuorum æqualium barbariem admirationis externæ. Per hanc famam ut omnia felicibus accedunt, si quid supererit ad editos honores, poteris faciliori ascensu emetiri. Quod si quis tam robusto animo erit, ut acquiescat uni suavitati literarum, omneque dispendium infra celebritatem ponat, & par ingenium tantæ nobilitati effervescat. Valete fastigia dignitatum, & habendilibido per ipsas opes excita. Hæc Philosophia, & inopi lectulo demersa paupertas, cum volet certis telis omnem magnitudinē petet, sua mole vulne-

ribus

ribus patentem. Sed & longis præconiis supererit suo seculo cum luxu ambituq; morienti, neq; ulla spatia definient doctæ virtutis perennitatem. Verum hæc est dura & pæne sylvestris eruditio, quæ, si me audient, multos habebit laudatores; rari autem excellentes animos tanta rigiditate imbuent.

Neque vero supervacua disceptatione hic exerro, qui defensione mea erupi ad præcipiendi gravitatem, sed volui ita meæ juventutis impetus ad studia probare, ne inde aliis exemplum statuerem, & omnino castus liber quam in alienos fuit temperans, tam sit innoxius laudatoribus suis. Nam & Satyricon propitiis fatis tradens, stimulos multis forte adolescentibus admovi, ut assiduus maturisque literis properarent ad dulcedinem famæ. Nunc vero juventutem utilissima ratione dehortor, ne rapta pulchritudine laudum anxie eruditæ eloquentiæ invigilet, id est, omnis doctrinæ sed & omnis sudoris compendio, nisi suis opibus nitatur, vel capaci animo partiri curas possit, aut denique de scholastici pulveris otio nulla ambitione semoveat.

Ego vero qualiscunque fortuna deinceps meos conatus excipiet, non revocabor ab hoc cursu, utraque Pallade aut amicitias meas aut odia colendi; sed vobis summas gratias diligentissima memoria habebo, quicunque Euphormionem amavistis: cæteris autem, qui sunt sollicitudine mea digni, non cessabo simplicitatem tam inermium jocorum probare, donec ratio aut fortuna meam innocentiam explicaverit.

FINIS TERTIÆ PARTIS.

# P A R S Q V A R T A.

## I C O N A N I M O R V M.

Serenissimo & Potentissimo Principi,  
 L V D O V I C O X I I I, F R A N C I Æ  
 & Navarræ regi Christianissimo, Euphormio  
 Felicitatem, Victorias, Triumphos.

**M**ortalium animos seria contemplatione deprehendi.  
 Ludovico rex Christianissime, & veluti oculis sub-  
 jici posse, ille sciebat qui in oraculis modum edidit  
 ut se quisque cognosceret. Sed privatim bonum est ad sue u-  
 nius mentis uotitiam pervenire. Plurimorum autem varios  
 genios, impetusque animum, curiosa diligentia posse deslin-  
 guere, res adeo publica utilitatis, ut nec indignum duxerim  
 munus quod Tua Majestatis adolescentia iraderetur, hanc  
 mentium morumque picturam: In qua ut potui fidelissime  
 Natura lineamenta sequutus sum, & aliquot discrimina ad-  
 umbravi, quæ in hominum animis eadem Natura constituit,  
 siue terrarum ubi oriuntur spiritus, siue fortuna, in quam na-  
 sciuntur, aut perveniunt, sorte: siue etiam variarum ata-  
 tum discrimine, aut illorum affectuum qui pane diversi sin-  
 gulos agunt. Non indulgeo, Rex Serenissime, intempestiva  
 & superba sapientia, ut his scriptis informare adolescentiam  
 tuam studeam, & inter disciplinas quæ jam primam tua Ma-  
 jestatis ætatem feliciter exercent, non rogata sententia suffra-  
 gio audiri. Habes Inventuris tua Rectores, quos Burrhum  
 & Senecam appellarem, nisi quod in Trajanum inciderunt.  
 Habes utriusque parentis sacratissimum genium o Rex, illum-  
 que præterea qui à Numine est, vultus sua Majestatis vicariis  
 incubantem. His tu optime indolem tuam credes. Nobis ta-  
 men in parendi sortem genitis si templa adornare & coronas  
 licet aris appendere, cur non & pietati videamur operari, cum  
 ipsos ingenii nostri census, velut in sacrum Numinum vestro-  
 rum ararium, ingenua devotione conferimus? At quid (in-  
 quies) externa gentis homo divertit ad peregrini Numinis  
 cultus? Numquam erit (Rex) ut meo Regi domesticus me a-  
 pud te doceam externam. Tua enim fortuna magnitudo non  
 in Gallia-

in Galliarum adeoque nec terrarum finibus haret. Transis quoque maria, obtinetque amicitia Jure Britannias, quod persape est ipso servorum & civium sacramento validius. Ex-  
 adus dies, seculoque pudendus, qui parricidio supra omnem atrocitatem horribili inclytum tuum Patrem Orbi ademisti, tibi fidem tuorum amicorum approbavit certiore experimento quam etiam ipsi vellent. Inter omnes nemo Regum Principumve Serenissimo meo Rege, aut verius defuncto Henrico ingemuit, aut sincerius timuit urventi Ludovico. Neque vero cunctatus est, dum cognito rerum eventu posset perfunctoria & secunda pietate se jactare. Sed cum adhuc in tanto rerum articulo extrema timerentur, in hanc vocem ad immortale amicitia exemplum erupit, se tecum communicaturum pericula, venturasque in sortem Britannias quamcunque ille turbo tuis Gallis fecisset. Nec deinde degeneravit Rex maximus à suorum verborum sanctitate, affectu annisque tibi Pater, & antequam velles frater, communionem dignitatis. Hactanta animorum utrinque mixtura, & Gallica decet in Britannis vota fervere, & nostra apud vos exaudiri. Et ea mihi publica ratio (nam privatas tacuerim) nuncupandi Tuae Majestati donavi. At nunc quidem Iconem Animorum, Rex potentissime, tibi vovi, mox quoque Tui Animi & Majestatis imaginem Posteritati paraturus, cum te ad illa, qua Orbis expectat purpura tua digna, major atas propulerit spiransque in oculis atque ingenio tuo Maximi Patris virtus, qui bello ac pace mirabilis, amulorum invidiam vicit, & amicorum fidem. Galliam suam agentibus fatis insanam armis fregit, quid in Caesaris laudibus majus? Suum deinde in victoria animum clementia exarmavit. Nec id potuit Alexander. Tu tanti Patris haeres, tu spes metusque populorum, jam famam implevisse quamviscunque capere tam teneri anni possunt. Dum crescis, dum in vires summis rebus maturas exurgis, Tuae Majestati in hereditatis interim partem laus Parentis, triumphique, & cetera dotes erunt quibus aternitatem emit. Sed & hac ipsa, licet patria, aliena esse censebis, volestque tuis titulis nisi, ubi eosdem poteris per aetatem metuisse. Vale.

## CAPVT I.

*Ætates hominis quatuor. pueritia, adolescentia, ætas  
virilis, & senectus.*

**H**umanigeneris, sicuti cæterorum omnium præcipua in cunabulis custodia est. In arboribus rami nascentes obsequuntur Agricolaæ cujus ductu vel in altum enituntur: vel ad terram proni deflectunt. Ita puerorum animi, parentum velut obstetricum manibus fingi possunt, cæta & insequenturam ætatem mansura imagine. Semina maxime, & veluti fundamenta virtutum, his antiquo præaltoque affectu insinuanda sunt; ut deinde ignorent, natura an præceptis acceperint, parentibus obnoxio ingenio esse, facilique præcipientibus; intemperantia, mendacio & fraude, veluti insolentia prodigiorum, exterreri; præcipue vim Numinis venerari, nunc beneficio nunc vindicta suspiciendam. Et hæc ipsa non atroci aut molesta ratione urgenda sunt. Nam quæcunque suppliciorum metu colimus, eadem tristi fastidio solemus auersari: & concepta à puero odia, nescio qua horroris consuetudine, ad senium quoque deducimus. Sed assiduis sermonibus imbuendi sunt de fastigio præmiisque virtutum; flagitia cum supercilio ac verecundia apud illos nominanda: quæ omnino nesciant sæpe publice nec jam cum infamia regnare. Tam lenibus rudimentis initiati, oderint vitia, virtutesque tanquam feras aut rigidas non timebunt; & faciles ad hæc prima rectæ disciplinæ initia accedent, parentum magistrorumque auspicio, quorum sententiis veluti divinæ mentis oraculis, detinentur imbecilli in illis animi, nec dum judicandi ambitione sollicitati; Accedit, quod non emitur promissis adulantium vitiorum haud intacta modo ætas, sed incapax voluptatis. Itaque rem turpem iudicio suorum, & sibi nullis lenociniis commendatam, facillime proscribent. Neque  
hic

hic pueritiam iniciamus ad superstitiosæ & anxie pietatis supplicium, sed ad virilem cautamque virtutem. Nam cum animus hominis ingenerato pondere in prava deflectat, necesse est adhuc faciles ramos in contrarium cogi, ut deinde impetu suo redeuntēs medium inter naturam & institutionem teneant.

In hac autem puerorum disciplina, gloriæ quoque stimuli passim infigendi sunt sentientibus animis, ut jam tum suos honores assuescant suspirare, & sive scholis sive ludis exerciti, eminare æqualibus labore dulcissimo contendant. Præterea cum ætate sensim veluti ex captivitate deducendi sunt; ut & mitior majestas parentum sit, & illi etiam non subito aut improvise libertatis incremento lasciviant. Suis etiam studiis relinquenda est pueritia, ne videamur Naturam arguere, quæ hanc ætatem imbecilem esse jussit, & intempestiva semente sapientiæ nondum præparatum ingenium corrumpamus. Sit illis innoxia lasciviendi venia, studium literarum magis ad mutationem ludi quam ad fastidium, minusque supplicii ex supercilio parentum quam timoris: fruantur denique adhuc miserantis Naturæ indulgentia, nec ante humanarum mentium supplicia, quam meruerint, tolerant. Nisi forte, putamus in levibus malis esse, cum pueri à ludo in totum prohibentur, omnemque strepitum fascium cum illius Stolonis conjugē exhorrent: & sapientiæ quam nondum capiunt acerbæ documenta, tanquam mimum, aut exhibent aut revolvunt. Qui sensus est ad miseras acerrimus, in hanc ætatem cadit: dum teneræ mentes nec timorem regere possunt, & pejus de incognitis malis judicant. Ac ut viri quos fortuna ingentibus malis fregit, quam capaces animos habent, totos implent suarum miseriarum contemplatione, atque sensu: sic & in pueris, dum incidit quod miserrime expavescunt, omnis vis timendi dolendique consumitur. Interrogatus qui prædones laqueum minitantes evaserat, quo animo expectasset mor-

tem, quo, inquit, olim puer flagrum expavi. Sed & illa in pueris perpetui metus acerbitas succum absorbet, quem Natura ad laxandos corporis artus, & incrementa adolescentiæ, exundare voluerat. Non enim suam vim ventriculus habet, evocato ad laborantis cerebri præsidium igne, neque actulæ titiæ diffunditur sanguinis impetus, qui omni interpellatione tristiæ marcescit. Ita hæc ingenia, inter ægræ custodiæ vincula, vel territis vel exhaustis viribus sic subsistunt, ut qui supra pueros sapuerant, postea infra decus virilis prudentiæ delirent. Equis certe, juvenisque, in primorum annorum libertate incuriosos impetus effundere concedimus, ne tunc primum robur enascens timeat ad vincula accedere. Adeo cœcæ mentes, quod in cæteris animantibus videmus, in nostris pignoribus aut negligimus, aut nescimus. Neque tamen in infinita libertate prima hæc ætas dimittenda est. Sit illis mediocris terror supplicii, summa parentum reverentia, & semper quantum sibi liceat ignorent. Nam si procax est alicujus pueritia, nimiumque ferocia exuberat, tunc faceffant lenitatis ista præcepta; tumorque, naturæ vitio enascens, quem sæpe parentum lenitas ad ulceris maturitatem fovet, adhuc crudus ac facilis exsecetur.

Hoc modo lepida pueritia suæ & parentum voluptati relinquetur, & postquam expleverit stultitiam innoxiarum cupiditatum, ipsa ætas paulatim studia mutabit, radicesque virtutum adolescent, quas ipsi jam non impetu, sed judicio amabunt. Tunc afferent ad adolescentiam, & ad crepusculum prudentiæ, mentem liberam, placidamque, quæ ad illius lucis pulchritudinem visus institutionis obversa sit.

Sed ut omnis rectitudo diversis vitiis oppugnetur, plus inter se, quam cum media virtute luctantibus; ita qui acerbos adhuc animos vocant ad nimiam maturitatem studiorum, non durius oportet accusari, quam ignaros virium quas Natura ejusmodi ætati concessit. Nam præterquam quod



quod quibusdam est præcox ingenium, & Curia capax prætexta Papirii, est etiam à natura illis annis dos sua atque sensus; vix scilicet capacis facilisque memoriæ, quæ in pueris summa est, & quicquid iis temporibus acceperit, pertinaci felicitate servatura: sed crescentibus sensim annis hebescit, instar roris ad nostrorum corporum salubritatem eximii, qui in ferventibus plagis ilicibus inhærens, nisi excipitur prima luce, ad surgentis Solis radios expirat. Multis ideo sermonibus, mox uberi historiarum lectione, dum licet, ferendus est ille campus, ut nec cogitantes pueri bona concipiant, deinde vel cum invitis adolitura. Linguarum quoque varietas, quæ tot vigiliis nobis constat, surgentibus ad pueritiam infantibus per colloquentium commercium pulchre accedet. Hæc scilicet minimi laboris opera, nulliusque judicii, ubertim exequitur illa ætas, nec labori idonea, nec matura judicio. Quod si arescere siverimus facilem humentemque memoriam, erunt longo laboris fastidio querenda eadem, quæ tunc melius, & absque nausea, habuissimus. Nam quid miserius, quam hoc tempus, quod prudentiæ idoneum nobis in virili ætate conceditur, licet breve, nec jam tot scientiis artibusque sufficiens, in his etiam sæpe consumi, quæ vacua pueritia, si eam excoluisses, ita in recessus memoriæ ut in penariæ cellæ latebras condidisset.

Sunt autem in ejusmodi quoque annis quædam omina crescentium vitiorum aut futuræ virtutis; moliente jam Natura aptum unicuique indoli fundamentum. Adhuc Cyrus, qui Persarum Imperium condidit, pastore genitus credebatur, cum in eo emicuit animus, quo deinde totipæne Orienti jugum imposuit. Puer cum parium annorum cœtu ludebat: rex forte ludendi à jocantibus factus, vere jus regium in sodales exercuit: contumaces verberibus cæcidit, sat superque idonea majestate. Res ad Astyagem delata est ab eorū parentibus quos Cyrus verberaverat: Et is jussit Cyrum ad se perducere, qui ad solii tiaræque con-

spectum non vili aut puerili timore emarcuit: Regem se aiebat à pueris constitutum, & quod regium esset, egisse. Hinc majora suspicatus Astyages, quam quæ præsens pueri fortuna jubeat, in illius genus & parentes quæsiuit, mox suum ex filia nepotem agnovit. Cato autem qui à fatali sibi Vtica nomen traxit, paulo supra infantiam erat, cum Legatj Latinorum suæ genti jus civitatis oraturi Romam perveniunt, adeuntque Livium Drusum Catonis patrum, apud quem ipse educabatur. Hunc puerum cum legati per jocum rogassent ecquid illos juvare apud patrum precibus vellet, hæsit immotus, eos etiam acri vultu perstringens. Et ipsi tantulæ ætatis contumaciam admirati, in experimentum indolis ulterius blanditias, moxque minas ingerunt, nec verbum extorquent: tandemque correptum extra altioris triclinii fenestram, ut in terram projecturi, aliquandiu versant: Sed is timere dedignatus pejus quoque supercilium arctavit. Tanquam in severæ rigiditatis auspicium, qua ipse deinde tota vita inhorruit. Errant tamen haud raro qui ex puerorum moribus temere de futurorum affectuum ratione conjiciunt. Nam oportet grave esse indicium, & supra illius ætatis levitatem pertinax, quod sit efficacis argumenti ad motus venturorum & flexilium annorum deprehendendos. Vnum est quod vix fallit præsagium; scilicet lacrymarum profuse excidentium facilitas. Qui enim ad primum percussæ mentis ictum veris gemitibus madent, sunt illi naturæ mollioris & ad humanitatem amoremque compositæ. Alios videas magnis quidem clamoribus, & simulantibus fletum, siccos tamen oculos inter parentum minas & verbera tenere; feri isti plerumq; si adoleverint; aut certe in opacis pectoribus nec teneros affectus, nec justos etiam timores admissuri.

In adolescentiam deinde productos, primamque juventutem, ipse impetus sanguinis, viresque jam se nimis cognoscentes, prorsus immutant, & animum abripiunt per inconsultæ fiduciæ ac securi-

securitatis æstus. Tunc primum idonea deliciis ætas est, nec plus de voluptatum sensu gaudet, quam quod illas audeat impune experiri. In posterum consulere ideo nesciunt, quia adhuc crudæ vires non reputant se obnoxias esse fortunæ: & præterea lætarum rerum species tunc animos ita implent, ut severiori prudentiæ, quæ primo aspectu molesta est, in iis nihil vacet. Et tunc quidem, jam non vano aut dissimulato impetu, sua quemque natura in studia abripit, ad quæ potissimum factus est. Nam quos ad vilia artificia ignobilis indoles ducit, ii destinatam sibi artem monstrantibus fatis agnoscunt: tum quibus potior militaris disciplina: tum quos ingenii vigor sive Musis sive negotiis dicavit: omnis denique species animorum in suam tribum adoptatur, præeunte Natura: Quæ nisi quendam impetum ac suavitatem adjungeret huic utilitati laborum quos præscribit, certe adolescentia juvenusque, vix ducta ratione necdurum aliquid in se audens, pæne cum venia erraret.

Verum & in ipsa incuria eorum qui omnino à labore ac officio recedunt, plerumque illa vis emicat ad se vocantis industriæ: veluti herbarum semina, per saxorum latera quæ nascentibus obstant exili cacumine enituntur, ut saltém se ostendant enecari. Sive enim ignavia adolescentes perdiderit, sive luxus, aut commestationum insana dulcedo, quoties suis voluptatibus ludisque lassati, recedunt interdum ad aliquam laboris ac industriæ speciem, cui perfunctorie incubant, & tantum ad mutationem voluptatis; ad eam potissimum partem divertunt, cui diligenter excolendæ idoneam mentem geniumque acceperant. Adeo non potest in totum interire fatorum stimulus in certa munera unumquemque pulsantium.

Vt vero arbores, quæ multo ac valido succo in inutiles ramos exuberant, tandem maturescante illa luxurie felicissimos proventus alere possunt: ita juvenis nimio æstu exultantem liberumque animum nactus, aliquando iusta & ad sapientiam

tiam sufficiente moderatione residebit: quod si jam ab ipsa adolescentia maturam sobriamque vim sortiatur. certe languore inutili ante primam senectutem marcebit. Sed hoc maxime est ad judiciū futuræ virtutis, si ipse inter cætera studiorum aut affectuum genera aliquid valde volet: id quicquid est nimio ac veluti præcipiti fervore complectens. Nam hæc acris cupiditas saltem ostendit, illum verò, & per hoc laborioso impetu, in sua studia posse ferri: sine qua indole nemo virtutem vere colet, aut gloriæ litabit.

Cæterum quamvis adolescentiæ interdum sint ingrata senectutis consilia, tamen ipsa conscientia sapientiæ nondum in suis annis maturæ, nescio quid de iis altum sentit, qui jam ante experti juventutem per eam commeantibus iter ostendunt. Animus autem in hoc ætatis flore prima cupidine laudis ardet, impatiens contumeliarum, non diu eadem consilia probare, aut exequi, facilis, etiam plurimum sibi placet, nec satis amicitias potest eligere, nec postea adversus succrescens fastidium tueri. Quicquid autem subito mentis acumine inveniri aut perfici potest, non aptiores in mortalibus habes quam in illo flexu annos. Ut videatur pueritiæ esse, facta majorum, vel dicta, indefessa memoria adipisci; juventutis autem, & facere nova, & loqui; sequentis deinde ætatis se ex utrisque moderari.

Excipit juventutem statura ætas ac virilis, media inter adolescentiæ præcipitia, pondusque senectutis. In hac adeo cum animo corpus viget, ut tunc demum vere hominem esse credideris, datamque in illorum annorum gratiam quantacunque est mortalibus vita. Hic ingens corporum & animorum mutatio, ut ciborum plerunque ac voluptatum alius tunc delectus, ita mores alii, & in novum efformatæ cupiditates. Robustus animus, & veluti ab adolescentiæ caligine emissus, primum solet de antea actis erroribus atroci censura judicare, mirarique se tam improvide potuisse peccare.

Illinc statim utilis pœnitentia, & ruinas, quas juvenus fecerat, emendantis sedulitas. Opum honorumque præcipuus amor est; & quasi nunquam de vita decessuri, ita avide ad illam subsidium & ornamenta quærunt. Simulare amicitias, suisque desideriis imperare, non alii magis sciunt. Veram quoque fortitudinem habent, castigato impetu, neque extincto, quo ad iram vindictamque adolescentia fervebant. Tunc demum vis integra solersq; iudicii, non incitata torrente juventutis, non fessi corporis ægitudine laborans: Cauta illius vitia; ac plerumque nec virtutem sine præmio colunt.

Sed hanc denique pulcherrimam vitæ partem senectus, velut aliquo æstu sensim inundans, sanguini primum, & mox ingenio, suum frigus insinuat. Hæc diversa habitu, affectibus, moribusque, priorum annorum virtutes partim auget, partim avertit in vitia. Timiditas maxime insidet, & aptam alioqui prudentiæ sedem infestat. Quippe senes hoc pectoris igne defecti, qui fortitudinem inspirat, nec aliter quam per sua aliorumque pericula in tantum ætatis provecti, omnia solent nimis anxie cogitatione versare, tam quæ ipsi ef- fugere, quam quæ alios perdiderunt. Hinc illa vis consilii, atque prudentiæ, quæ maximam senectutis dotem facit, sæpissime nimio pavore corrumpitur, dum omnia etiam tuta circumspicit, mavultque interdum malo ocio vulnera tegi, quam in periculum venire medicinæ. Felix ille Cunctator, qui furentem Annibalem vallo castrorum, velut clypeo, à perniciæ Italiæ submove- rat; ille Fabius pæne Imperii Urbisque assertor, quid abfuit, quin religiosa supra modum timida- que sententia, redeuntem felicitatem à Romanis liminibus arceret? Scipio trajiciendi in Africam consiliū impetumq; sumpserat. Ita extorquendus erat Annibal, & ad patriæ clades de visceribus Italiæ revocandus. Tam salubrem optimi ducis mentem, simulque incolumitatem Imperii, pæ- ne ille Fabius intervertit, omnia tantæ expeditio-  
nis pe-

nis pericula anxie reputans: cum ad naturam sua sponte cunctantem senectus accessisset. Sed hunc in senibus nævum facile virtutes excusant, maximeque conjiciendi futuris agacitas, quæ in illis docta per præteriti temporis memoriam, quo minus corporis vinculis obligatur, eo purius omnia & quasi communicato cum syderibus consilio prospectat.

Quot urbibus, quotque Imperiis hæc sapientia salutis fuerit, quanta etiam privatis hominibus utilitas, qui se senum consiliis permiserunt, plena sunt vetustatis monumenta, & quotidiano usu unusquisque perdiscimus. Et fortasse hinc senibus illa ingens & plerumque indefessa loquendi cupiditas, quasi datus à Natura stimulus, ne illi docere gravarentur qui omnium optime possent.

Sed plerique eorum non satis in hac parte modum tenent, ut quisque se juvenum illis applicuerit, per suorum annorum rerumque gestarum seriem infinita oratione euntes; ac quod molestissimum putes, ne una quidem & simplici vexatione contenti, quotiescunque in eundem inciderint rursus, pari sermoni aut inveniunt causam, aut faciunt. Etiam quo patientior aut verecundior erit, quem ad illud audiendi supplicium rapuerint, hoc miserius eum plectent.

Nec audiri tantum amant: sed ubi consuluntur, aut etiam sponte monent, sibi fidem haberi, componique omnia in quem modum præscripserint, nimis interdum pro imperio volunt; urgentque nolentes: rati ab iis se contemptos qui abnuunt regi: Juvenum virorumque consilia pervicaci fastidio & veluti de altiori scena despicunt. Tu si dignus es, quem aliquando in senectute peccantem juvenus quæ ventura est excuset, jam mulcebis animos innoxio gaudio exultantes, faciliisque dicentibus, fronte saltem ac luminum nutu, quicquid dixerint lætus accipies. Nam quæ minor reverentia pro vestris his annis & patrium cultum merentibus potest haberi, quam ut saltem simulemus probari à nobis quæ edicunt, faciliisque

facilique & nihil auferentē officio tantæ venera-  
tionis ætatem suo gaudio perfundamus?

Eadem autem rerum humanarum experien-  
tia, quæ illos per reliquas ætates ad senectutem  
deduxit, simulque eorum exempla, quos vide-  
runt in egestatem labi, agere solent ad nimiam  
domesticæ rei curam. Quis ferat hoc mortalita-  
tis ludibrium, tunc fortunas avidissime expeti,  
cum nec diu manere, nec jam sollicitare preciosis  
deliciis effoetum corpus possint? Viget hoc ta-  
men in siccis pectoribus malum, labensque Na-  
tura timet scilicet ad inopiam pervenire, à qua  
non possit jam lassis viribus, in dies morienti-  
bus, vindicari.

Illis vero qui in senectute hæc vitia, velut syr-  
tes, effugiunt, nihil est ad omne consortium  
commodius, Res publicas atque privatas felicissi-  
me regere: despiciere malos impetus, ac vincere,  
qui animos nostros inconsulte diripiunt: & con-  
sulere juventuti, & parcere; quid ipsi fuerint,  
quid tunc senserint, nondum immemores: digni  
denique qui longa senectute sua sapientia fruan-  
tur, Orbemque illa veluti expertæ Philosophiæ  
disciplina componant.

## C A P V T II.

*Secula pane singula suum genium habere, diversumque à ca-  
teris. Esse prætoræ cuiuslibet regioni proprium spiritum qui  
animos in certa studia & mores quodammodo adigat, Hos  
spiritus investigari opera præcium esse.*

**G**Renovicum pervetusta Regum Britannico-  
rum domus est, milliaria 1111 sub Londi-  
no, ad Tamesis ripas. Mons imminet Regiæ, mo-  
dico supercilio subiectum oppidum fluvium-  
que despiciens. Brevibus tumulis in illum ascen-  
ditur: verticemque deinde ingenti ambitu plani-  
cies extendit. Forte in eum bene mane conscende-  
ram: & solitudo circum erat, ut nemo interpellare  
posset cogitationum ludum dulcissima libertate  
erran-



errantium. Sed memorabilis amœnitas pæne citius animum quam oculos diffudit, aspectu, non Britannia tantum, sed fortasse tota Europa pulcherrimo. Ingens planicies aliquot suspensa colliculis, rursus montes in orbem effusi, neque cito castigabant oculos, neque illos per immensum cœlum spargebant. Tamesis lætissima ubertate in viciniam exudar, & ad radices montis redeuntibus in gyrum fluctibus insulam pæne molitur. Passim toto alveo naves, & omnis generis onerariæ: ut proximas quidem totas aspicerem, cæterum longius stantes, aut sub altiori ripa, ex malis antennisque tanquam nudam & brumalem sylvam cognoscerem.

Nihil illa plaga viridius. Pascuorum utilitas eam frugibus abstulit: & vix alibi felicior in graminaterrarum luxuries. Privatorum quoque fundos, de more patrio, perpetuæ fossæ & pleræque in marginibus arbores sepiunt: Maxime vias publicas altissimæ populi à lateribus tuentur, ut de monte despicienti perpetua facies hortorum videatur saltuumve factorum ad ambulationis voluptatem. Præcipua est tam varia viriditas, pæne in diversos colores distributa. Nam quæ longius absunt velut cærulea incumbentis cœli facies opacat: propiora, densiore fronde in arboribus nigra sunt, vel humitenui herbarum virore nitentia. Sed pulcherrimum spectaculum præbebat ipsa urbs, inter eximias Europæ celebrata, Londinum, innumeris domibus, vix tamen populi sui capax: Quippe ad alteram Tamesis ripam late effusum est, vicinisque annexum oppidis, & pæne continua ædificia per quatuor milliaria protendens. Per hoc spatium non privata tantum domus, sed & sana crebro fastigio eminent, & media civitas tanquam umbone, ita præcipui templi mole distincta est.

Cum his ego nec provisa voluptate deducerer, tandem revocare animum cœpi, & sic mecum reputare: quid esset quod incogitantem rapuisset: unde ille aspectus sic placeret, quæ occulta vis, quæ

quæ ratio meam mentem tetigisset? num ipsa urbs, num fluminis cussus, montesve, an campi, an imago sylvarum? Horum omnium nihil unum: sed tantarum varietas rerum, & veluti Naturæ suas opes explicantis industria. Subiit inde cogitatio: nihil esse in mortalium rebus ad suam pulchritudinem sic exactum, quod tandem non fatiget contemplantem, nisi ad hunc quem intuebar modum adversarum dotium beneficio in aliam aliamque venustatem mutetur, semperque lassatos improvisa novitate reficiat: Et quoniam ad omnis decoris fastigium perducendus Orbis erat, nequaquam tantæ artis oblita natura est: Regiones aliquas montibus sustulit, alias in planiciem deduxit: has æstu torruit; has damnavit ad brumas: reliquas, nec quidem æquali ingenio, temperavit.

Fœcunditatem, aut squalorem, non modo non ubique, sed nec in perpetuum imposuit: olim felices proventibus terræ, nunc sterilibus arenis informes ac vastæ sunt: & quæ quondam crudo aëre horrebant, non tantum jam in fruges, sed & in voluptatum instrumenta luxuriant. Adeo est ex totius Orbis pulchritudine illius partes in multiplices habitus vultusque transire. Neq; astra licet certis itineribus semper cursum tenentia, aëri motus eosdem & effectus solent infundere: Ideoque quamvis iisdem spatiis omnes anni in orbem excurrant, nullus tamen in totum, aut eum imittatur qui præcessit, aut exemplum est sequuturo.

Sed ille cujus gratia cæterarum rerum ornatus institutus est, ille ad divinitatis memoriam specimenque homo compositus, præcipue nascitur in hujus varietatis venustatem. Nam non modo diversos in corporibus habitus sortiti mortales sunt: sed & animos adeo multis simul rebus idoneos, ut nulla pictura pluribus coloribus possit, aut lineis, delectare intuentes, quam quas in hominibus fata duxerunt. Quæ virtutum aut vitiorum series, quæ artium sublimitas,

tunc numerus in Rhetorum arena sudantium : in quibus jam labentis linguæ indicia, & pro nativi decoris, quod perierat, pompa, tumor obscurus. & ad sapientiæ specimen subornatę sententiæ. Eadem tempestate sub Nerone, excussa pax, qua Orbis Romanorum in quietem componebatur: & mox turbo ubique, & in omnium animis bellum, à Gallia, Germaniaque, ad ultima Orientis sensim infusum, quid erat nisi arcana vis, quod prope modum fatum appellem, ad certas & destinatas vices corda mortalium propellens? Quæ secuta est ætas, jam quidem plurimum exciderat de antiqua venustate dicendi: & quod milites omnia possent, mores quoq; ad feritatem recedebant. Tamen humanitas cum illis malis luctata est: donec externæ gentes in Imperium invaserunt: & quod luctuosissimū fuit, extincta scientia vix sui memoriam reliquit. Nati sub hæc tempora homines velut ad barbariem facti, non illam quidem feram, sed quæ obtusa ingenia tristi nocte spissabat. At tunc plerique Majorum, quorum scriptis vel præcepta vetustatis vel gesta inerant, omissis per incuriam libris, secunda & pejore morte oppressi sunt. Artificiorum quoq; alia rudioribus præceptis procurata: alia in totum perierunt. Nec multo post rursus hominibus scientiæ amor increvit: Sed in illorum teculorum infelicitatem damnati, non quam optare tam invenire scientiam poterant, si scientiam appellamus antiquarum notitiam rerum, & acumen, non in scholarum modo argutiis, sed altius ac nobilius spirans, denique eruditionem ejusmodi, qualem veteres in sui seculi literatis coluerant.

Erat tamen scientiæ quoddam genus, animis & temporibus illis aptum: Philosophiam, resque divinas, immenso disputandi studio aut evolve-  
re, aut miserius impedire: tum in Iure responsa Prudentum, Imperatorumque rescripta, vel quæ Pontificibus placuerunt, insanis & inconditis voluminibus ad æternos discantium labores augere: Pluribus vero hæc ratio tunc scri-

bendi, ut quocunque argumentum sibi sumerent, priorum authorum de eadem re verba atque scientias, tanquam sua, lectoribus darent. Sic unius sæpe error cæteris lubricum fuit quo temere laberentur; vicissimque de unius recta sententia mutuam sapientiam multi sumebant.

Etiam quoscunque titulos libris suis facerent, ad universa digredi tunc decorum. Quæ illa tempestate historiæ à condito Orbe non exorsæ? Quæ pars rerum humanarum à rudibus ingeniis, quotiescunque scriberent, velut in chaos non coacta? At ut scias illos homines non defuisse Naturæ, sed illam tunc angustam, & propemodum ægram, certe non parcebant laboribus, nec deerant in illis indicia sincerae prudentiæ, ubi eas scientiarum partes obibant, quas tunc solas illi seculo fortuna indulserat. Hoc erat, in Philosophis quædam arguta disputandi ratio; in Iurisperitis autem quid legibus caveretur potius nosse, quam formularum vim, causasq; factionum aut ætates distinguere.

Isto denique seculo hæc ex hominum animis caligo evanuit, jam ad omnis generis astum lucemque compositis.

Nec tantæ mutationis indicium in litteris tantum & scholis existit. Regnorum, & rerum publicarum momenta multo callidius procurata; bella ingeniosius aut illata, aut repulsa: & in multorum artificiorum culturam tanta felicitas, ut quidquid invenustum ac rude est, id vel dignum esse, vel natum incultis majorum moribus, cum fastu jactemus. Nec aliunde tanta mutatio quam veluti ab istius ætatis indole: cujus præstantia ubi post definita tempora expirarit, tradet Orbem alteri, ac quod timeri potest, rudiori genio; fortasse & ipsa post aliquot deinde annorum spatium reditura. Ita sæculorum ætatumque discrimina, non melius ex syderum motu, quam ex humani generis in varia ingenia ac studia deflexione, distinxeris.

Sed alius præterea impetus animos rapere solet, certisque affectibus addicere: ille nimirum

spiritus,

spiritus, qui singulis regionibus proprius, nascentibus hominibus patriæ habitum & cupiditates statim ingenerat. Nam ut iidem cibi pro condientium arte saporem quidem mutant, cæterum interna vis alendi aut nocendi nullis blandimentis in totum corrumpitur; ita in omni gente per æstus succedentium sæculorum, mores animosque mutantium, hæret quædam vis inconcussa, quam hominibus pro conditione terrarum in quibus nasci contigerit, sua fata diviserunt. Hinc illa ab antiquo vitia, & patriæ sorte durantia, quæ totas in historiis gentes aut commendant, aut notant: ut istic naturalis levitas populos agat, turbidisque incerta consiliis; illic pingues gravesque animi tristi superbia, tanquam specie arcana sapientiæ, ferociant: isti sitim non tolerant: alii in mutationem, nec provisa consilia, temporariis ingeniis incumbant: apud cæteros placari non possit ultionis ingenium: Rursus virtutum æternitas, velut hæreditatis jure sancita, in quibusdam simplex fides, in aliis acumen animorum, in pluribus fortitudo.

Et quoniam nihil utilius, quam ex genio variarum gentium sic animum instruere, ut diversus sit cum diversis, cognoscatque quid à quaque expectandum, aut timendum; operæ precium erit aliquot populorum præcipuos mores in conspectum ita dare, ut ex communi multorum hominum indole, privatam in singulis deprehendas. Nec invenietur opinor, tam superstitiosus amator sui ortus, cui grave sit in recensione patriæ suæ, etiam vitia nominari. Si enim neminem Natura mortalium tam conditis moribus finxit, in quo non aliquid desideres, velut ultimam artificis manum; cujus supercilii esset, totas Provincias publico fato velle eripere, & indignari se ubi peccatur, id est inter homines, natum esse? Faceßat in omnibus suæ gentis præceps favor, simulque cæterarum aversatrix invidia: Et nostra vitia fideliter agnoscamus, & virtutes in aliis nos delectent.

Igitur sequestro animo injecturi contemplationem in indolem Populorum, primum Orbem à specula despiciamus, & quales sive incolas, sive dominos hac tempestate sortitus sit. Asiæ Africæque sub Barbaris Imperiis casus, & Græcorum Thracumque calamitas, præcipua humanitatis commercia in ultimam Europam coegit; ut tot cladibus à barbaris domiti, & veluti feliciori parte execti, nostras vires possemus recognoscere, aut timere alienas. Nos vero ad malorum omnium sensus pestifero sopore torpentes, nec divinam vim horruimus, ac ne in barbararum quidem gentium minas tot Provinciarum quæ restabant valiturū citavimus robur. Etiam omni discordiarum genere laceravimus nostras opes, indigno prorsus facinore, ut quod uno corpore vix sat erat, bellis odiisque in diversa discederet. Tandem sive expirantibus tot motuum flammis, sive per malam requiem pejora concipientibus, posita pæne ubique arma miscent hodie mutuis consortiis populos, qui ut ingeniis linguisque diversi, ita nec una arte possunt esse tractabiles. Hi sunt Galli, Britan-nique, Itali, & Hispani, & quos jam immensa Germania suo nomine occupavit. Pannonum quoque reliquæ, & quod de Illyrico & Dalmatia nobis superest: tum illi Sarmatæ, atque Scythæ, quos Polonos Moscosque appellamus: Cimbri etiam, & quidquid sub Danico aut Suevico sceptro componitur. Nec adeo (proh dolor) à Turcis recessimus, ut pigeat mores illorum, vivendique consuetudinem, cognoscere.

In istorum populorum moribus licet utilissima contemplatione versari, & Naturæ divitias numerare, quæ tot habitus, mentiumque variarum impetus, una membrorum similitudine obtexit. Cæteras vero plagas eadem diligentia scrutari, minus fuerit ad consortii usum, quam ad curiosam voluptatem. Nam Africam qui hodie præter mercatores adeunt, in ipsis littoribus, aut si forte non nihil ulterius à fluminum ostiis in regionem invehuntur, cum incolis subita nec  
ad ami-

ad amicitiam valida pacta jungentes? Persas autem à nobis non superstitionis magis impietas, quam ingens terrarum cœlique divortium discrevit. India pari modo à mercatoribus tantum nautisque lustrata: si Lusitanos excipias ibi pertinacius inhærentes. Chineses autem cum exteris consortium ultro refugiunt. Nec ullus ex hominibus nostris curat cum Tartarorum fœda & ut plurimum misera gente misceri. Americam, qua cultum animorum passa est, Hispani sic tenent, ne ullis extra hos unos impune liceat commeare. Ita solis & licet & est commodum, illarum gentium indolem pernoscere. Qua vero in eadem parte terrarum, nuda barbaries, & generi humano pudenda, efferavit animos incolarum, nullis legibus, nulla industria temperatos, diligenter annotarunt quos illuc opum spes à regionibus nostris trahit, inconditi populi ingenium nostros cultus non capere, ad se advectos plerumque tanquam insidiatores libertatis pro hostibus ducere; nec deesse tam rudibus animis in flagitia calliditatem; crudelitatem, atque perfidiam, his non rato prudentiæ & fortitudinis loco esse.

Horum ulterius mores tradi quid juvet, qui fero impetu Naturam videntur exuisse; Præsertim cum suis littoribus terrisque contenti sint; neque ad se commeantes, nisi subacti, aut in solum subitæ mercaturæ usum, excipiant.

Sed, ut à gentibus abeamus, vel ignotis, vel nimio terrarum mariumque discrimine à nostra familiaritate subductis; de nostri Orbis incolis genioque quærentibus, ne quidem supervacua disceptatio erit de regionum cultu, de conditione terrarum, cœloque propitio, vel alterutra intemperie gravi.

## C A P V T III.

*Gallia dotes, & ingenium incolarum.*

**G**Allia pæne provinciarum in Europa amplissima, si eam intra veteres terminos æsti-



mes, Romanorum quondam terror, Græciæ Afæque victoriis clara, jam in varia imperia morisque distincta est. Quidquid Rheno, Oceano, Pyrenæis, Alpibusque clauditur, Gallia erat. Ab alio deinde Alpium latere ad Rubiconem pertinebat. Romanorum cervicibus gravis. Quippe fortissimi hominum Galli, cum in Italiam penetrassent, capta incensaque Roma tantum terroris attulere, ut deinde caveretur ne quoties Galli tumultum intulissent, sacerdotibus senibusve ab armis vacatio esset. Et domita quidem à Romanis vicissim Gallia est, sed per partes, & inter se domestica æmulatione commissa.

Neque integra aut agnovit suas vires, aut in Italiam experta est. Post hæc Franci è media prorupere Germania; & videbantur ad secundam servitutem Gallias vocaturi.

Sed mox victores miscuere se victæ genti, ne tam Gallias quam Romanos in Galliis vicisse viderentur. Iam vero divisus in plerosque Principes terris, pæne in tantum Galliarum nomen obtinet, quod in iis occupant Franci, gens virtutibus factisque eximia, & quæ meruit ut communis fabulæ vanitatem ad suæ stirpis præconium Scriptores usurpent, dicanturque Trojanorum reliquiæ esse.

Hæc igitur omnium regionum quæ ad Occidentem recesserunt felicissima, soli bonitate cum genio & indole incolarum certavit.

Ager vini & frumenti passim ferax; olea quoque insignis, & omnibus pomis quæ crudum ærem non ferunt; qui ad Alpes & Ligusticum mare porrigitur, aut viciniore Occidente intepuit. Nec ulla provincia in Orbe terrarum pro suis finibus tot incolis divitias indulsit. Adeo omnis generis opibus clara, ut exterorum mercatorum commercia pæne ad solam voluptatem exceperit. Nam & luxus transalpino serico precium fecit, & artificia Germanica opulentum populum ad peregrinas delicias adverterunt. Britannicæ tamen merces, si non necessariis, utilitatis certe plenissimæ

simis navigiis subvehuntur, quæ plumbo atque stanno, ubere etiam croco, tam quotidianis usus, quam altiori elegantiae ministrant. At Gallia præter messes, quibus solitudinem Hispaniæ levat, vina etiam in frigidiorum viciniam dispensata, multa carbaso & cannibidives, necessaria plerisque gentibus vela, rudentesque, & quæ cætera ex funibus in classium ornamentis idonea, subministrat. His & aliis dotibus, aurum quod in venis suis vix habet largissimo proventu excipit; ut qui illud anxia & crudeli diligentia effodiunt, qui ab extremo devehunt Sole, plerumque videantur Gallicæ felicitati famulari.

Tam diffusa regione, tot provinciarum vario nexu composita, vix sterilis aut inculti soli glebam indulgentia Naturæ omisit. Nam & vasta aliquot in Aquitania loca, ne incolis quidem sunt vacua, vel ingrata, pinetis frequentibus, & succo fructibusque preciosis; Avibus quoque catervatim provolantibus, quæ in deliciis solent haberi: ut aëri illa plaga tantum debeat, quantum de iusto telluris officio arena subduxit.

Gallia ad utrumque mare pertingens, Oceano alluitur, & pelago quod ab Hispaniæ Africaque faucibus positas ad Ægyptum terras interfluit. Ita commodus nauticæ rei situs, & qui classes per omnis nominis maria littoraque possit emittere, si Galli quam equis tam navali industriæ assuescerent, spesque, ut subitas, ita longas ferre possent.

Toti populo ingens amor & patientia dominantis. Apud illos vere regnatur, nefasque quantum regi liceat dubitare. Gens armis strenua, sed equestri certamine melior; ignara perfidiæ, publico præsertim consilio: indomitæ intra se molis; ut ubi in externos exundat, statim impetus sui oblita: eo modo nec diu externum imperium, tenuit, & sola est in exitium sui potens. Longobardiam, Neapolim. Siciliam, & pleraque alias per Orbem terrarum provincias, frequentibus victoriis subegere. Sed mox hostes male dominos fidentius quam par erat contemnere, aut si-

mulantibus obsequium credere, inconsulta laxaque bonitate. Tum licenter uti victoria, & præter illarum gentium indolem lascivire: Ad extremum oblivisci armorum, aut ad patriam suam respicere, cuius diu absentiam ferre non possunt. Per hæc vitia cessare in prædam his ipsis de quibus triumphabant; læta semper bellorum initia atroci exitu corrumpentes.

Nullis mortalibus indoles ad speciem virilis elegantiae magis facta. Oris intrepidi habitus, motusque, atque gestus, qui totum corpus decet. Et hic decor virtutem ingentium virorum adornat; exiguis autem animis profuoco est, ac veluti naturali munimento, quo suam humilitatem abscondant aut mitigent. Sic venuste compositi qualemcunque vestium de suæ mutationis infinita serie, tanquam inexhausto penu depromplerint, quocunq; salutationis artificio corpus inflectant, putes nihil magis illa institutione convenire. Vicinæ autem gentes ridiculo errore deceptæ, ad illorum quoque mores, per earundem vestium ac motuum variam imitationem putant accedere; ignaræ, leporis & gratiæ virtute in nonnullis hominibus uno genio cuncta placere; in aliis autem in quibus Natura ad hos mutabiles habitus propitia non est, ejusdem venustatis imitationem & curam ingratham ac ludicram esse. Nam virtutes & vitia, & quicunque alii motus ipsis animi recessibus inhærent, possunt à nobis non multum operosa simulatione effingi, quia adeo ingentibus latebris reconduntur nostri sensus, ut vix ullus deprehendat, veris an extemporaneis affectibus deducamur. Sic facile humilitatem simulabis, sic odium, amorem, pietatem. At vero quæ non magis imperio animi, quam usu, & externo corporis obsequio, perficiuntur, eorum imaginem in te transferre, reluctante natura, non poteris, ut est aptitudo corporis prompto habilique decore idonea, ut hilaris jocandi facilitas, & omne eloquentia, non in præcordiis, sed summo ore nata. Hæc autem cum in Gallia consuetu-

suetudine emineant, ægerrime te ad illius similitudinem transferes, nisi se tuus genius huic indoli sponte admoverit.

Cæterum nunquam Orbis dignas gratias hospitali Galliæ habebit, quæ humanitatis templum videtur aperire, quo se omnium externorum fortuna conjiciat. Animum in hominibus, non patriam æstimat. Neque communi cæterarum regionum errore, in inquilinis, ac advenis, nascendi sortem punit. Ita candido simpliciq; amore virtutis eximios viros, undiquaque prodierint, sine invidia miratur & sua opulentia gaudet augeri; & intantæ humanitatis præmium habet publicam primum laudem; tum etiam tot hospitum fortunam, ac famam, qui Gallico corpori, non indigna aut inutili adoptione inserti sunt. Neque illic hospitibus dediscendi sunt patriæ suæ mores, aut ad Gallicam similitudinem flectendi, dum superbia absit, aut inculta barbaries. Quippe ipsa veluti professione externi moris, sollicitabis curiosæ gentis studia, simplicius peregrina, quam sua æstimantis, etiam quædam vitæ aut corporis vitia, si modo aliunde advehantur, trahentis in laudem. Nam & peregrini hominis eloquentiam vidimus crebro linguæ errore favorem meruisse; & grandis opinionem scientiæ, quod non intelligeretur.

Plebis in amplioris fortunæ homines vera, nec ex metu, aut sola institutione, reverentia; Rursus primi Optimatum eodem genio culti ab illis, quia gratia aut genere perinde non excellunt. Sed superbiam fastumque non ferunt; Si videris dominari, servire erubescunt. Comitatus, quæ frontis artificio, luminumque clementer vibrantium, vel per sermonum familiaritatem blanditur, fidelius purpuratorum latus clientibus cinget, quam potentiae magnitudo. Opes omnes & ipse vilior honoribus sanguis. Præcipue Patriciorum spiritus in suum aut patriæ damnum sæpissime excrescunt, dum nemini eorum mercaturæ aut artificiorum utilissimam disciplinā capeßere ipsa

ipsa inopiæ experientia persuadet. Æmulari præpostero ambitu magnitudinem placet avorum, & foedarigentilitium sanguinem putant, si populum vivendi consuetudine accesserint. Ita vanum nobilitatis nomen, & magnifici ocii improba species, ad patientiam tristium curarum sufficit, & in sola exeuntium morte. Et hæc animorum celsitudo, quamvis sibi placeat, adeoque ab omnis generis sordibus videatur abire, tamen interdum pæne necessariis facinoribus corrumpitur, in miserorum penatum angustiis turbulentam industriam exercens, ut vel publica violentia, vel arcanis sceleribus inopiæ squalorem repellat. Mercatura illic vilior quam tantæ utilitatis rem esse deceret, & quæ prima humanitatem per orbem circumduxit. Solon quidem qui Athenis leges condidit, & plerique Græcorum, usque ad nos fama durantium, illo commercio suas res tulerunt ad exteros, vicissimque fecerunt ut exotica sui cives viderent. Nec abhorret ab hoc more Italia, in illustribus familiis opes eadem industrialitate componens. Britannia quoque sanguinis claritatem illo vitæ genere foedari non putat. At in Galliis hanc mutuae utilitatis rationem non modo stirpes antiquæ aspernantur; sed & quasi mercatores sui puderet, ubi illis largius fortuna indulset, statim in aliam disciplinam filios suos agunt, jubentque majorem paterno fastigio scenam sperare.

Et quidem magnitudinem Gallicorum animorum nullibi efficacius videas, quam in ambitu Magistratuum à quibus pervicax licitatio jam diu egentium virtutes exclusit. Exhaustire familias, nomina facere, rem fidemque consumere, decorum; dum inter æquales emineas vel sterili dignitate, vel precio furtivorum munerum patrimonii ruinam reparante. Nec dubium quin illa libido titulorum, nisi ipsa se frangat, curias, tribunalia, præfecturas, tandem sit viliori sanguine angustisque animis maculatura.

Quippe è sordidissimis artibus multi compendiosius

diosius ad divitias properant, quam antiqua nobilitate spectabiles, paternisque opibus utentes ex majorum dignitate. Hoc modo, dum ad emendatæ Curiaë, aut Præfecturæ, ambitum, nummorum pugna initur, sæpissime si vincunt, qui ut sanguine sic & ingenio cedunt. Accedit, quod vetustarum stirpiū vini non tam pervicaci studio suas opes dignitatibus illis donant, quam homines, adhuc novi, qui è latebris quas auro condiderunt eruere filios properant, & eam nobilitatis gloriam suæ genti emere, quam absque ullo sumptu in hæreditatis partem Patricii habent.

Sic paulatim hi honores sordidiorum esse possunt, ( si pecuniæ tantum conceditur ) & forsitan aliquando in ignobilitatis suspicionem, eorum nominibus censeretur. Neque ideo fisci industria maligna criminatione carpenda est, qui de ejusmodi Candidatorum bonis excrescit. Nam cui non satius videatur professo precio dignitates à Principe molem publicam subeunte proponi, quam avaris Purpuratorum suffragiis in prædam concedere? qui ubi hæc publica licitatio non est, obtrudunt Regibus Candidatos, quos sibi munere charissimos fecerint; & quod à domino impetrant, deinde clientibus vendunt. Ut nec meliore sortitu delectos Respublica accipiat, nec intersit eorum qui ad tribunalia subvehi ambiunt, utrum cupiditatem dignitatis sub Principe an sub Optimatibus luant; utrimque pari sydere in Patrimonii ruinam percurrente. Hæc igitur tolerabili instituta consilio, jam ipso furore licitantium in præceps abiire, qui & mediocris census virtutem excludunt, & tota opum mole eos honores redimunt, quibus ipsi tam immodicum premium fecere.

Ut vero quo generosius vina adolitura sunt, eo adhuc recentia turbulentius despumant, ita istius gentis, ad humanitatem & cum senuerit prudentiam factæ, adolescentia ac juvenus, insano incautoque impetu ut plurimum fervet. Vana in ejusmodi ætate libertas, nunc jocandi,

nunc ignotos pariter notosque laceffendi, & ubique titulos nimiae securitatis affectans. Leves animi, & rumoribus rapti, jam impatientes oculi, moxque tumultus. Oſtentatio libidinis ſupra naturæ deſiderium inepta, tunc inconfulti riſus, neminique parcentes; viſ etiam intra ſe irrequieta, per varium ac multiplicem tumultum erumpens. Quidam tamen in omnium exordiis rerum induunt non veram & ideo majori ſpecie ſubornatam prudentiam: Veluti matura ſapientia compoſiti, verba tarde euntia deducunt, lento vultu, & aſtum cum humanitate fingente. Ex re quoque factum nomen, ut appellent frigiditatem. Sed & virtutis ſimulatio tunc eſt ingrata, nec diu tamen ſcientia perſonæ impatientem omnis veli levitatem abſcondit. Media autem indoles, quæ nec Gallis certe deeſt, lætitia capacis animi exuberans, eique non efficta prudentia frenum imponens, ea demum omni precio major, & ad ſapientiæ ſimulque hilaritatis imaginem exacta eſt.

Illud autem in Gallicis moribus, ac veluti fatiſ, triſte, quod benevolentiam qua in ſua regione hoſpitibus indulgent, extra patriam vix in ſuos cives expromunt.

Quis credat in exteris tam humano populo non ſatis convenire? Aves quoque in caveam deductæ roſtra & iracundiam vix ſtringunt, & ſocietas fati peregrinationem ferarum conciliat extra ſylvas quærentium prædam.

Soli Galli quocunque in peregrino ſolo conſederint, præſertim ſi miſeri, & ad opem alienam converſi, iæviffima æmulatione decertant. Tum occulta ludibria, livorque deformis, tum profeſſa odia, & rixarum etiam ad peregrina tribunalia concives vocantium deriſa improbitas. Sic inter ſe certantes neſcio qua infamia apud imperitos inundant ſuam gentem, quaſi in invidiam nata ſit, exorſque quietis, ac amoris quo unius patriæ cives arcana vi Natura conjunxit.

Et hæc Gallorum extra patriam ſuam labes.  
Adhuc



Adhuc ædius in Galliarum visceribus peccant, qui passim tanquam gladiatores ad arenam damnati, subitis odiis, armisque privatis, ad ultima discrimina committuntur. Rem immanem, & ad istius seculi probrum: leve jurgium, sola-que altercantium ambitione increascens, aut revera innocens jocus, plerumque autem turbulenti ingenii præcipitatio ad famam, sæpe ad tristissimas cædes & familiarum orbitatem, lymphatam juventutem propellit. Hinc toties miserorum parentum intercepta consilia, spesque occisæ; & propemodum frustra pax in Galliis, & quæ vix minus patricii sanguinis quam si bello certatum publice esset, in hæc arena hausit. Quæ hæc autem dementia? ritu ferarum, non ratione, sed impetu injurias ulcisci, rerumque suarum judicium permittere pæne scenicæ arti, fortunæque sæpe fallenti ipsam artem, ut quicumque felicius, ille & justius arma sustulerit? Feræ gentes & ab ipsa venientes barbaria, Orbem supra aliquot sæcula suis moribus polluerunt.

His authoribus quondam factum, ut in dubiis judiciis, cum utrimque argumenta essent obscura, armis litigantium crederetur. In circum arenamve dimissi pugnabant, victus pro nocente habebatur: & inde vesaniæ origo hanc ætatem infestans, quæ jam auctis finibus, cum olim in Magistratuum arbitrio esset, hodie ad privatorum libidinem desævit. Isti tamen gladiatoris arti prætextus est, nescias magnificentia an utilitate acceptior, peritia pugnandi. Nam cum arte gladio ferire, vel deflectere destinatos sibi ictus, quis neget ad rem militarem pertinere? Hoc Græci, Romanique, & omnis gens armis strenua, cum ambitu quæsit.

Nunc vero non tanquam in angustia sese prementium cuneorum (ut in justis præliis solet) sed veluti in apertæ arenæ libertate, per cursus recursusque, per omnem corporis habitum, per longam & disparem oculorum manuumque fallaciam, quis non potius privatorum odiorum  
crude-

crudelitatem erudire, quam publicæ pietati suam fortitudinem parare videatur? Et vero nihil jam ad amentiam aut impietatem residuum in propinquos amicosque sævientibus. Sive sanguinis, sive familiaritatis jure conjuncti, non atrocibus injuriis, sed inani superstitione verborum, & prope modum gratis, diffociati, alterno cruore imbuuntur: quodque ultimum furoris gradum putes, ne inter se quidem læsi, sæpe aliorum inimicitias tantum nefas tribuere amant, & in gratiam nihil ad se pertinentium odiorum seipso & amicorum charissimos immolant; quippe à pugnaturis qui perire soli nolunt, veluti ad theatrum aut cœnam, ita ad hunc feralem ludum invitati, ultro subeunt; & quicquid hominibus aut dulce aut charum est violare non dubitant; ineptissimo desiderio famæ: ut jactentur magno vitæ contemptu in arenam processisse, id est, truculentissimum facinus ausi esse barbara ignoratione virtutis.

Sed hæc mala, & si quæ præterea maculæ se Gallicæ indoli interseruerunt, omnino donari eorum virtutibus debent, quos vel ætatis vel sapientiæ pondus ita composuit, ne æstu patriorum vitiorum diripi possit. In iis egregia comitas: non fucata, aut insidiosè in hos ipsos quibus blanditur collocata. Non fraudibus, non secretis odiis vacant: Dignari singulos qui accessum aut notitiam petunt, & pro sua sorte unumquemque mulcere.

Externo homini ad illorum consortium admissio satis erit, aperto scelere aut nimia ineptia non peccare: ut quidem alibi in alienos mores, ne tibi noceant, intentus sis; cum maturis autem & castigatis Gallorum animis teipsum respicias. Nec aliquid in humana societate felicius, quam consuetudinis tam politæ erecta virilisque suavitas.

## C A P V T IV.

*Britannica Insula : in quibus diversi populi. Angli,  
Scoti, Hyberni.*

**B**ritannia per tot spatia diffusa, tam diversis pulsata fluctibus, tamen magis ad magnitudinis suæ fidem potest varios civium mores, quam tantorum littorum sinus & nomina proferre. Tanquam alium in Oceano Orbem faceret, omnis animi genera incolis iniecit. Non alia Insula toto terrarum ambitu illustrior. Sicilia, Crete, Cyprus, visæ regni fortunam ac nomen capere posse, non si in unum corpus transeant, uni Britannicæ terrarum spatiis aut opibus pares sint. Priscis quoque temporibus, armis inclytis strenua, materiam fabulis dedit, quæ plurimarum gentium ingeniis linguisque vulgatæ sunt. Quasi nihil eximium fingi posset, quod non apte caderet in alumnos Britannicæ. Olim quidem inter novem principes distributa. Mox bellis atque fœderibus mutati cum Regibus gentium fines: donec tribus Dominis fortuna totius Insulæ cederet: Saxonum coloniis, quos Anglos appellamus, sub unius sceptri felicitatem coactis: Britannorum vero reliquis, pertinaciter insidentibus Cambriæ montes (hæc nobis hodie Vuallia est,) Et Scotis quibus jam diu excisorum Pictorum portio accesserat ad Septentrionem colentibus. Mox Cambria diuturnitate bellorum inacerata totius Angliæ consensui impar fuit. At Scotia spe quidem victoriæ minor sed cujus spiritus Anglia non domaret, veluti in æmulationis argumentum, non pervicacius armis quam diversa ab Anglis indole pugnare suos iussit: donec noxiosissimam æmulationem fata damnarunt, nunc utrisque imposito Rege cujus spiritu Insula in unum Imperium coaluit.

Anglia felicibus pascuis, & ad multas variasque arbores commoda humo, commeantium

oculos pulcherrima viriditate mulcet : gratuitis etiam bonis plebis animos in segniciem exsolvens. Pabulum illic passim pinguibus campis abundat, boum equorumque armenta ad perpetuam ejusmodi animalium aviditatem explens : alibi autem siccioribus arvis, & humili gramine induentibus terram, super fidem multos greges educat, excusatque utilissimam & ad ovilia factam sterilitatem. Ne hyemis quidem rigor assueta libero aëri pecora (nisi forte supra moiem inhorruerit) in stabula aut ovilia deducit. Iis sufficere solent nuda sub dio cubilia, herbæque quas hybernus tepor alit. Quippe hyemes non illic pro plaga & Septentrionis vicinia asperæ, cum vehementer Gallicam oram quatiant, qua Britannia adversa est, multoque rigidius Batavorum cœlo incubent.

Intanta aëris indulgentia Britannicus ager omnis generis semina facile concipit atque servat. Proceras habet lauros : Rorismarini planta apud multas gentes ipsa cura qua educatur preciosa, hic vulgaris, & nonnumquam in sepes velut ad hortorum custodiam stipata. Vitem alere potest, uvæque ad maturitatem perducere. Nam & Cantii amœnitas crebro collium dorso suspensa, & Wintoniensis regio, cum cæteris ad Meridiem Ortumve spectantibus, olim vineta habuere, quæ deinde pascuorum utilitas, viliusque redemptum ex Aquitania vinum, exemit. Lupi quoque ea insulæ parte exacti, nudos greges, & vix alicui molosso creditos, non infestant.

Nam diligentia antiquorum, cum grassaretur luporum rabies, curamque pastorum aut fatigaret aut falleret, totum in iis sedibus tam pervicacis feræ genus extinxit. Ita fortuna per patientiam pecorum sub dio durantium, & mirabile luporum exitium, profusas nec æstimatas opes videtur indulgisse. Cibo, corio, vellere, velut exundantisterræ muneribus, populus in ocio, & plerumque oblivione laboris, ditescit. Ne quidem in colendo croco labor, quem optimum habent, facili herba oblatas in floribus opes non in ullius

curæ

curæ aut industriæ præmium aperiente. Et ne quid tam propenso fato desit, transmarinum militem ante aliquot ætates non viderunt : Domestici autem motus hoc seculo rari : neque in Anglia ut alibi terrarum, solent bella consensescere. Sæpe ostiduum ingentes simul turbas quam parit tam absolvit in homines sæviunt, non in opes & tecta, & subitæ acies adhuc crudas surgentesque lites dirimunt.

Tam spontanea felicitas securum & opulentum vulgus non modico tumore sustollit, ut neque pro consuetudine cæterarum regionum timida humanitas, & patriciorum dignitatem reverita, mitiget mores plebis, & plerumque rudiora artificia tot divitiarum tantique otii crimen fiant. Nam artem aliquam professuri, septem annis, ut plurimum, tyrocinia deponunt : ubi vero peractis rudimentis in collegium artificum adoptantur, quasi laboribus exempti, sub se alios tyrones asciscunt, edoctosque breviter in officinis prostituunt : Tunc ipsi non solemnes modo dies, sed & fastos (quis credat ?) si sudum est, vario ludo in proximis campis exercent : nubilos in diversoriis oblectant : prorsus ut artificia impolitius habeant, quippe discipulorum peritiæ credita, & eorum redemptores contumacius urgeantur ad pretium, quo & tyronum labor, & desidia magistri ali possit. Diligens tamen nonnullarum Operarum industria, exactis artificiis emittens, preciumque per Orbem merentibus, satis prodit, in ea regione ejusmodi studia non stipatis cœli vitio animis, sed nimia felicitate laborare. Vt enim ad extimulanda ingenia, artesque fovendas, nimis cruda aut avara imperia nihil juvant, depressis populi mentibus, & desperatione solutis, ita fortuna lasciviens, laborique haud aliter quam per ludum intenta, plebis solertiam non attollit ad exactam artium curam.

Nulibi in tam ingenti regno vectigal, non in urbibus pontiumve discriminibus publicanorum stationes : præterquam iis locis unde naves

in exteras plagas solvunt. Nam importatas merces aut quæ inde exportantur, profiteri apud eos necesse est qui à Rege portorium conduxerunt.

Sed nec plebis superbia acerbior peregrinis quam in patricos suæ gentis exerta est, qui opulentiam suæ patriæ luunt rusticorum fastidio, se ipsos pæne primis ordinibus stirpibusque æquantium; & indignationis suæ tam pretiosam causam odisse interdum non verentur.

Summa tamen apud omnes nobilitatis reverentia: quam intra brevem eorum numerum æstimant, quos Dominos vocant. Hi sunt Duces, Marchiones, Comites, & Barones: Ducum & Marchionum omnes liberi, ex Comitum filiis major natus. Illis quoque Episcopos Majorum pieras adjunxit. Apud hos proceres ad omnia obsequia descendere non indignum, & ipsi velut interram positos contemplantes suum fastigium non ignorant. Nec illæ dignitates emptionis commercio producuntur in vulgus nummorumque fortunam: sed successionis serie transeunt in hæredem; vel beneficio Regis, novi quoque Optimates in hos gradus adoptantur. Et ne hoc inanè existimes decus: multa publice constituta tam ambizioso nomini reverentiam cultūque conciliant. Si contigerit ærialieno impares esse, urgentibus creditoribus in eorum corpora nullum jus esse potest, quamquam in Anglia debitores etiam in judicium non vocatos sæpe carcer accipiat. Sed hoc illustrius, quod maximorum criminum accusati, scilicet, in ipsam rempublicam iniisse consilia, de equuleo securi sunt. Veritatem ab iis per tormenta posse exprimi noluere qui leges condiderunt.

Anglis ut plurimum gravis animus, & in se velut ad consilium seductus; seipsos, & suæ gentis mores, ingenia, animos, eximie mirantur: Dum salutant, aut scribunt, descendere ad verba imaginariæ servitutis quæ istorum seculorum blandicies invenit, nisi forte externis moribus imbuti, non sustinent. Populus rei maritimæ studio-

studiosus. neque aliud tantæ Insulæ validius munimentū quam tot nautarum sedulitas. Nec in castris quam navibus pejor miles, præsertim si externo aëri assuevit, cibisque, quos sæpe inexper-  
tos avidius Angli gustant. Nam hæc gulæ incommoda à Britannia delatas legiones non semel absumserunt, & classem Elizabethæ Reginæ auspiciis Lusitaniz littoribus applicatam, cum Angli stragem hostium & vastitatem fecissent, nimius æstus, & suavitas pomorum, ac baccarum, quas illa plaga habet, pæne totam debellavit. Discrimina omnia, & adeo mortem, impetu plus quam iudicio spernunt: Et hinc utilissimos militum dixeris, ubi ducum suorum consilio reguntur: Sua autem sponte ruentes, & illa audaciæ caligine pleni, de se sæpius post funestos exitus queri quam de fortuna debuerunt. In Belgio cum studia partium nuper & arma sævirent, milites Hispanicarum partium aliquot à Betavis capti erant, & suspendio conficiendi, (ita visum referre vicem hosti, qui captivos eodem lethi genere perdid-  
derat.) Sed in omnes sævire non placuit. Ex quatuor & viginti (tot enim capti erant) octo ad laqueum destinantur, cæteris incolumitas promissa est. Demissæ igitur in cassidem sortes, iussique singuli suum fatum extrahere: qui tesseram sustulisset nulla nota insignem. periculum effugeret; qui ferali imagine impressam, statim ab infelici arbore penderet. Omnium mentibus ingens periculi imago inerrabat; quidam præcipue Hispanus votis lachrymisque misericordiam plurimorum, etiam aliquorum risum elicuit. Erat in illa sorte ac periculo Angelus, è militum vulgo, qui ingenti vitæ neglectu accessit ad cassidem, & tesseram nil cunctatus adduxit, favit sors; erat illa salutaris.

Exemptus periculo accedit ad Hispanum, adhuc fatali cassidi manum credere dubitantem: decemque aureos pactus, (fides Numinis) Iudices rogat, ut Hispano extra aleam misso sibi iterum liceat fortunam experiri. Furioso, vitamque



tantulis nummis æstimanti, Iudices annuerunt, & is rursus felici reſſera evaſit: non hac gemina modo, ſed & ſimplici ſalute indignus, quam adeo vilem habuerat.

Leges quibus utuntur Angli, Gallica lingua, ſed veteri, & ab hoc ſeculo abhorrente, ſi traderunt, quos Normannia ad eorum ſceptrum tranſmiſit. Paucae illæ etiam, & plerumque ambiguae De cætero, conſuetudo & conſulta ſapientum ſufficiunt, magno aditu ad lites, & infinitam iudicum poteſtatem, & arcanum populi ingenium tanquam Neuſtricæ originis habitus retinens, ad ſubtilitates apertum eſt, quæ litibus forum implent. Et inde vulgatam fabulam crediderim, in eſſe Angliſ caudas.

Conſuetudinum autem ac legum, quæcunque à majoribus inoleverunt, adeo patientes ſunt, ut jam olim ſancitas, rudi adhuc tam peccantium vitio, quam legum ſanctitate, etiam nunc mutare aut delere, religio illis ſit. Vnde enim niſi ab hac majorum incauta bonitate lex viget, ut maritus jubeatur prolem agnoſcere, hæredemque habere, anno poſt aut amplius natam, quam ipſe ultimo ab uxore diſceſſerit, modo conſtet interim à Britannicis littoribus in exteræ regiones non evectum.

In Philoſophia autem, ac Matheſi, terrarumque & Aſtrorum ſcientiis, nulla eſt tam prodigioſa ſententia, quæ non ex hac regione authores invenerit vel turbam amatorum, vividam quidem, ſed modum curioſæ ſubtilitati & per innumeras diſputationes effuſæ non invenientem. Terram circumagi, non cælum, Solem cum ſyderum lata ſerie non inhærere cæleſtibus globis: ſed & globoſe ejuſmodi nuſquam eſſe, & quicquid Philoſophi deliraverunt, multi ex his opinantur, aut credere ſimulant: tanquam altius ſupraque vulgi ingenium ſpiraturi, ſi videantur communem ſapientiam ut prophanam vilemque negligere, altius in arcana Naturæ, quæ pauci deprehenderunt, intuentes,

Sed ut nihil animos magis agit, quam religionis sensus, ita multo acrius ejusmodi disputationibus incumbunt. Nec quicquam in numinis cultu modicum possunt, qualemcunque sibi speciem pietatis persuaferint. Prioribus seculis aucti opibus homines in solitudinem & eremum jurantes, adeo ut optima pars regni fundorumque huic pietati concesserit, nimis timido & periculoso voto, tam illorum quid dabant, quam eorum quibus hæc ipsa concedebantur; cum illi rempublicam exhaurirent, isti autem in luxum se agi tantæ fortunæ vitio sinerent, mox in invidiam secum quoque sacra tracturi: Et hanc quidem colendi Numinis rationem jam Anglia publice ejuravit, multi autem sic in contrarium divertere, ut quo longius à vestigiis patrum absunt, eo se propiores cœlo credant. Nec id tamen publico consilio, aut si deprehendi contigerit, palam inulto, sed elusis per privatas superstitiones animis, novamque, ac propriam, & per hoc sibi gratiorem pietatem fingentibus. Itaque quos hæc cepit superba suavitas, præter cæteros sapiendi, in varia nomina abierunt, legesque diversas, non ipsa hominum authoritate, aut numero, sed pertinacia sancitas: & quod miserabili risu dignissimum putes, crudelibus edictis illæ sectæ invicem sæviunt: unos se cœlestium rerum participes, exortes cæteros omnes esse. Forte in unam superstitionem consenserat cum duobus liberis pater, è plebe vir, sive vulgus intra opum aut ingeniorum humilitatem æstimes. Illi tres unam rempublicam sectamque faciebant, ( & sæpe non pluribus hæc religiones constant ) Tandem pervicacius inter se de divina re agentibus, decessit primum à filiis pater, non quod meliora sentiret, sed diversa: & ab illis de communione sanctorum (nam sic nugatores dicebant) ejectus est. Porro sancti non his alii præter seipsos erant. Mox autem & discissis mentibus alter fratrum alterum à cœlesti consortio exclusit. Sic de angusta ecclesia, & trium hominum numero definita,

tres quoque ecclesiæ natæ sunt ; prodigioso scelere, & in amentiam prono. Nec perfunctorie vesani pro somniis suis pugnant. Novæ indies sectæ rapiuntur ad tribunal, in quibus nihil simile præter unam contumaciam Iudices vident. Fœda, indigna hominibus, sentiunt. Non ullius præeunte vestigio errantes, sibi quid credant auctores sunt : non tormenta perhorrescunt ; non salubribus consiliis aut prudentiæ acquiescentes, igne quoque consumpti, seipsis furori suo litant.

Iam vero peregrinis cum hoc populo agentibus ingens cautio esse debet, ne ex paucis, ac fortasse plebeiis, totam gentem æstiment : sed neque instituenda est ratio qua mores tam diversos excipiant. Ferox vulgus ubi vino aut ira incaluit, nonnunquam superbiam tumoremque in hospitum injuriam vertit: In tanto turbine animorum eos per æmulæ superbiæ contumaciam laceßere velle, paulo aliquid supra dementiæ malum esset. Nec tunc quidem tempestivum est tuam causam fidentius orare in sævo ægroque tumultu ; multo minus magnitudinem animi ostentare defensionem meditantis. Leni & placido questu melius exarmaveris irruentes : ignobiles preces erunt, quibus primum æstum mitigare conaberis in furorem euntium.

Nam hic torrens si nullo obice irritetur, momento languebit. Et hæc quidem timidæ prudentiæ cautio adhibenda, ubi in oppidis agrisque multitudo in ad vocationem eorum qui in te primi deserviunt, aut concurrunt, aut timeri certe potest. In solitudine autem, & ubicunque non impari certamine potes ingruentes refutare, tunc exercenda est, saltem ad speciem, vis animi contumelias non ferentis ; qua terrebis non vera virtute insultantes, & injuriam patitam idoneos quam inferre. Magistratus porro, ac iudices, peregrinorum questibus faciles, haud inultam popularium in illos injuriam ire sinent ; Si modo non peccaverit multitudo quam accusari pronū, plecti autem ubique difficile, & ut plurimum, nefas. Et  
adeo

adeo hospitalia tribunalia in eagentē erecta sunt, ut siue externus actor sit faventes iudices habeat. siue uno crimine cum indigena reus, siue ad virgas furcamque destinato, ipse interdum nihil acerbius iubeatur quam ē Britannia excedere. Patriciis quoque animus ad excipiendos peregrinos sponte factus; & famam illius comitatus cum honesto ambitu quærunt; ut neminem possit peregrinationis Britannicæ pœnitere, nisi aversis incultisque moribus in barbariem natum, aut indignum qui Optimatum consortio misceatur. Cum his tamen qui sui fastigii gravem cultum ipso gestu atque verbis magnifice adornant, ex adverso componendus est gradus ad certamen maiestatis, ne te forte aut ex sua gravitate, aut ex tua oratione æstiment; quæ non Italicæ Gallicæve humilitatis more demittenda est. Evilesces alioquin apud homines non assuetos huic generi humanitatis per alternas blanditias mentientis.

Britannia in Septentrionem excurrente, Angliam Scotia excipit, inclyto sceptro supra fidem & ætatem Regnorum cæterorum: quippe viginti jam seculis sui imperii fortunam in unius familiæ hæreditatem servavit. Centum & octo Reges à primo Fergusio in Iacobum Britannicum numerantur; qui tot Regibus Anglicam nobilitatem addens, nunc primum uno imperio omnes Insulæ partes junxit.

Scotis animus ad humanæ consuetudinis culturam facilis; corporis habitus supra multas gentes: cæteraque cum Gallis communia, præter soli ubertatem. Nam regio ad Septentrionem porrecta, nec frumento ubique idonea, multis locis steriles montes habet, neque illos saltem nemoribus indutos, præterquam ea plaga quæ horridius in cœlum exurgens, sylvestre & barbarum cognomen incolis suis fecit. Fortissimæ tamen genti multum cibum, de avium, ferarumque, armentorum etiam, & gregum frequentia, natura paravit. Trecentorum cervorum, aut amplius, agmen videre non insuetum. Multo plures

incolarum industria cogit ad venantium procerum voluptatem. Neque ex patriis bonis defunt, quæ advectis exterarum gentium mercibus ad necessarios usus permutent. Sed inopiam æris nullo artificio emoluntur. Sic in patria facillime degentes, etiam numerosis clientibus graves; non in exteris locis similitu, & fortunæ suæ pari, vivere possunt. Nulli tamen magis memores suæ stirpis adeo ut familiæ decus malint interdum sua paupertate foedare, quam suppressere intempestivos titulos, & suæ cognationis parumper oblivisci. Nam in regione, virorum fecundiore quam frugum, necesse est clarissimi sanguinis multos in egestatem nasci: quibus per diversa terrarum quærentibus opes (nec alii fide, aut industria, præcellunt) & ad præconia suæ nobilitatis obstinatis, sæpius audientium risus, quam lachrymæ & fides accessit.

Ipsam autem regionem, in se quoque animosam, passim inimicitia exercent, supra fas humanitatis aut odii etiam sævæ. Quippe per familias & cognomina discreti, suarum gentium Principes habent, illos qui in antiquissimam familiæ hæreditatem successerunt. Eos ita observant, ut vix patriæ charitas major sit: & ad ipsos læsi confugiunt, patrociniis viribusque suæ familiæ usuri. Ita sæpe modica jurgia, & inter obscuros, magnis & indignis motibus suffecerunt; Dum utrimque jurgantes apud illos suæ gentis Principes dequesti, privatas contumelias in ipsarum familiarum injuriam vertunt. Neque rem modico sanguine peragunt: Interdum in agmen & veluti aciem coacti desæviunt, & insita inimicitiarum vis in hæredes quoque abit. Cædem cæde repensare decorum; incendia alternis ignibus vindicant: Nec aperto tantum Marte; insidiis, fraudibus agunt. Nihil turpe aut ignobile, sananti oculos inimicorum malis. Et hæc pestis sæpe Optimates evertit: sive inter ejusmodi arma extinctos, sive frequentiam stipatorum (nam suspectam vim inimicorū ita submo-

vere

vere necesse est) fere inopia distractisque fundis luentes: Etiam quod ut plurimum regio arboribus caret, quidam putant illorum odiorum facinus esse, dum adversis facibus inimicorum sylvas cremant, & privatis injuriis vastitatem patriæ faciunt. Sed hæc olim deßenda dolentius, cum indies ista arma sævirent. Nunc placidis rebus, quam sentire meliora, tam licet augurari. Quamquam enim tantum nefas submovere non fuit in veterum Regum manu, proceribus fide clientum numeroque ferocibus: tamen patriæ suæ hoc demum Iacobus Britannicus beneficium dedit. Is cum adhuc uni Scotiæ imperaret, hanc publici mali causam habuit in præcipuis regni curis. Sed pigebat illi pesti per partes, & plerumque inutiles sollicitudine, occurrere; nec enim poterat ullis jurgiis vera pax statui, nisi simul omnia componerentur, cum exempla ejusmodi criminum, illisque venia, necessitate temporum frequens, omnes sollicitarent ad parem audaciam, saltem ne timidas aut degeneres iras gessisse viderentur. Semel itaque & in perpetuum placuit hæc odia aboleri.

Ipse Rex eorum rationem inivit, quorum familiæ & rixæ eminebant. Precibus, & auctoritate fractos, partim per se, partim per Senatus sui delectos, ita reconciliavit, ut vix amplius in tota Regione tam assueti facinoris acerbitas nominaretur: Ingens opus, nec à sapientissimo & diligentissimo Rege, nisi multo tempore & mira felicitate absolutum. Iam biennium erat ex quo pacaverat Scotiam, cum ad Angliæ successionem vocatus est: ingenti auspicio ad hanc novam Scotorum sanitatem; quippe tot viribus auctum Regem nunc vero & salubri metu colentium.

Scotis præceptis ad omnia animus quæ spes semel persuasit, cui maxime credunt: Iracundia in promptu, sed quam facile post primos impetus mitigant. Quærere opes, quam servare, meliores: Sive quod indoles fortuna sua major inconsultæ libera-

liberalitatis impetu laborat, amatque opulentiae famam, sive patriae more decepti, ubi ad nummos pervenerint, qui in Scotia felicitati sufficerent, jam de inopia sunt securi, nesciuntque in unaquaque regione cum auri argentique frequentia sumptus quoque & rerum precia convenire, ut nec facile ingens pecunia quaeri possit nisi ubi effusissime solet expendi. Animi illis in quaecunque studia inclinant, mirifico successu inclyti, ut nullis major patientia castrorum, vel audacia pugnae, & Musae nunquam delicatius habeant, quam cum inciderunt in Scotos. Etiam urbanis negotiis pares, ad omnis fortunae vitaeque genera, suam industriam aptavere. Vagis porro, nec ex dignitate peregrinantibus, adeoque non alia nitentibus ope quam ut suae gentis hominum, qui in externis regionibus sibi divitias peperere, ineant domos, exigantque veluti patriae vectigal, nihil est superba mendicitate deterius.

Insula Britannicae plagae vicina, sub eodem Imperio, Ierna antiquis, mox Hybernia appellata; spatiis ingentibus diffunditur, navibus commoditate portuum facilis, neque ex quorundam incolarum illuvie aestimanda. Quippe multa felicitate colonos ex Anglia Scotiaque invitat; humenti quidem coelo, sed salubri, & quod animalia veneno infesta impune non hauriunt. Lacerati bufonesque ibi delati non vivunt, exportatae arbores nullo situ concipiunt vermes, aut incuria araneas admittunt, quamquam & suas Hyberni araneas, sed illas innoxias, habent. Westmonasterii ampla sedes, ubi jus litigantibus dicitur, ex illis sylvis trabes accepit, & efficta multa arte tabulata. Mirum dictu; araneis circum parietes pendentibus, vix ligno tam sordidae texturae filamenta adhærescunt.

Hybernici, qui ab oppidis cultuque recesserunt, mira cujusvis aeris cibique patientia, paupertatis longo usu. Victu parabili, semicruda fera, vel bove, satiant famem; cibum temperant lacte, fragiles domos ad altitudinem hominis excitant,  
sibi



sibi pecorique communes Et hoc in illa gente mirum : Amor desidiæ reliquas gentes emollit ; Hybernos duravit ad bella. Quippe per ignaviam fertiles campos illis colere, ac ferere, pæne ignotum. Pabulo, & telluris genio ad armentorum alimenta, contenti sunt. Artificia quoque non exercent, tanquam maculantia nobilitatem quam tantopere jactant. Itaturpi ocio exigunt vitam, & incommoda ex ea barbarie frequentia patientia quam laboribus malunt refellere ; tantaque est ignoratio deliciarum, ut nec sentiant mala. Simplici veste imbrem & frigora tolerant ; venatibus ad celeritatem perveniunt, feris parem ; fessis vel nocte deprehensis humus sufficit ; contentosque nivibus vel imbre diffuentes, prius saties quietis quam cœli injuriæ excitant ; pulchra fortitudinis bellique rudimenta, si non ex tam fœda segnicie. Et has sordes ne in pace quidem excutiunt, communione Anglorum, vel æmulatione Hispanici moris ; vitamque tot malis horrentem, veluti curis vacantem, diligunt, improba libertatis specie capti, quæ per diversas fraudes variis gentibus illusit. Illis animus ad sua vitia obstinatus, labori aversus & per hoc omni frugibus ; acer ad furtum & prædam, omnemque laborem qui venationem imitatur. Et hæc quidem ignava plebis mala. Optimates sincera fide multi, eximios animos dignis suo ordine virtutibus excolunt. Etiam qui in urbibus degunt, aut amœnioribus plagis, non mediocri humanitate adornantur. Ita probant feram illam populi partem, sua sponte barbaram, non Insulæ fato in illa vitia factam esse.

## C A P V T V.

*Germania vitus : & Belgii, cui hodie Germania inferioris nomen.*

**R**henus flumen ab Alpium radicibus per Belgarum fines Oceano illabens, quam olim incipie-

incipiebat Germaniam, hodierna imperiorum nominumque mutatione auctam interfuit. Amplā regio, & à Gallia Alpibusque ad Sarmatas & Pannonos pertingens, in diversos, Principes & Respublicas, distributa est. Olim sylvis & incolis fera, nunc oppidis passim insignis: nemoribus quoque quibus immensis tegebatur, ad usum decusque castigatis. Vitem alit, qua in primam excurrit Italiam, supraque inumbrantes Rhenum colles, in Pannoniam quoque declinans, & aliquot præterea locis, ubi humus propitiis collibus vel tepore fluminum mitigatur. Multa deinde abiete, in montibus, sylvisque, frigentis plagæ arena abundat. Pæne mediam Ister interfecat, in Europa fluminum Princeps, maremque alveum in annuorum pontium ruinam attollens. Ripas amnis celebres quidem urbes, sed paucæ, nec pro fluminis nobilitate insigniunt. Rhenus, Albis & plerique deinde jam ab antiquo celebres fluvii totam quam lata est Germaniam permeant. Regio diversoribus non inculta, qua Alpes latus tegunt, totoque Istri cursu, & qualabitur Rhenus, Mœnusque, & Mosella, tanti fluminis incrementa: eadem, qua ad Oceanum spectat, aut introrsus à præcipua ac publica viarum celebritate divertit, squalentibus hospitibus, totoque vivendi genere, multum sui illius genii retinens, quem antiqui scriptores notaverunt. Urbes tamen non indignæ sua fama: foro præcipue compitisque ad munditiem exactis: porrectis quoque domibus in altum & æquale fastigium, & fragilem materiam celante pictura.

Interiora ædium non pari artificio ad usus aptata sunt. Lectos sternunt in semota ac plerumque obscura ædium parte. Caminis, ut plurimum, non utuntur. Fornaculas ad levamen frigoris malunt; quas intextas tricliniorum parietibus pro conditione aeris ignibus complent; sed hic calor plerisque advenarum molestus est, quod & capita inexpertis vaporibus gravet, & illinc in publi-

publicum prodeuntibus, laxum corpus, atque omnis auræ impatiens, exhorreat, Præterea si remittere ignis incepit, hoc genus hypocausta ingratissimis odoribus spirant, ea maxime in quibus convivantur, ubi expressæ confusæque tot dapium nebulæ exæstuant; vino quoque, ut illic assoler, quam epoto tam effuso. Neque in hypocaustis modo, sed & in cæteris thalamis quoque atque tricliniis, foeda multis Germanorum & confusa rerum incuria: ideoque advenis in hæc penetralia admissis aër gravis.

Immensa cupiditas potus, jam confesso vitio, ideoque magis libero, illam gentem infestat. Nec ad voluptatem tantum hæc Thracia libido est, sed in parte comitatis, & pæne disciplinæ. Vernalis quorundam Principum gratia pretio tam infami, siue quærentium comites vitiorum, siue legatis, advenisque, hospitalem parantium mensam. Nam Germani nulla comitate suavius, quam longo nec sobrio convivio, peregrinos credunt excipere; & tunc verissimam ab ipsis hospitibus benevolentiam in se expromi, ubi mutuis poculis inundari non abnuunt. Id illic summa urbanitas, & coëuntibus prima amicitia animis in foederis locum.

Forte stipendiarium è Germania militem Tribuni in Gallias, & ipsi Germani, adduxerant, Regi operam suam navaturi. Ex his unum vir inter Gallos clarissimus vocavit ad coenam, gnarus utique quam preciosum esset amicitiae pignus quod bibendo cum Germanis sancitur. Itaque hominem largiori potu invitavit ad hilaritatem convivii; crebræ poculorum formæ & bibendi rationes commeabant, cum Germanus, siue in experimentum benevolentiae, quam hospes præferebat, siue quod languidum in bibendo certamen averfatus, strenuam victoriam quærebat, lacessito Gallo præit, exsiccatque ingentis modi scyphum: neque Gallus conterritus mirantibus nobis surgit, &, ut scias, inquit, te in amicum incidisse, non modo conditionem quam fecisti, non  
recuso,

recuso, sed ecce & in benignissimam litem mutua vice laceffo. His dictis, poculum primo, in quod erat provocatus, perpetuo spiritu haurit; idemque iterum ingesto mero plenum in hospitis gratiam jam tumentibus menbris infundit. Delectatus tam prolixi amoris indicibus ille Tribunus, in pedes vix tum patientes oneris surgens; Tu vero, inquit, nec putes collocatam in ingrati tantæ amicitiae operam; scis non parvam militum manum sub signis meis esse. Hos ego totis duobus mensibus in castris habebō, vestro ætario nihil graves (quandoquidem id jam temporum iniquitas absumpsit.) Stipendium deinde si placet, & licebit, persolvetis. Ad tam grandem unius poculi mercedem tum subito quidem horrore stupuimus, sed multo deinde amplius cum promisso fides esset. Apud hanc gentem aperti mores placent, & qui Baccho libertatis nomen imposuerunt. Omnem speciem reconditi astus odere; siue quod fideliter non tegunt arcana, cum mero solvuntur, siue quod animi in illis corporibus plerumque sentiunt se retusos, & aciem cæterorum, tanquam in se intentam, molestissimo timore suspiciunt.

Regum publicarum Magistratus, ex civium sorte delecti, non quidem sublimis elegantiae mentem afferunt ad Tribunal, sed diligentia efficaciter inhaerent parentum institutis. Faciles autem ad imperantium nutum populi, etiam sæpe suis Magistratibus de Religionibus credunt; & vix sacrorum ritus, quos Princeps Civitasve probaverit, videas ulla privatorum religione aut pertinacia inquietari. Mala quæ Angliam, &, quamdiu inter hos æstus luctata est, Galliam iactaverunt, hæc miserabilis incuriæ pæne dicam felicitas evasit, Austriam tamen exceperim, scilicet pæne exeuntem de Germanico cœlo, nec quæ ut nomine ita priscorum ingeniorum sorte excidit, (pars enim Pannoniæ priscis fuit.) Bohemiam quoque, non hac primum ætate infelicibus circa Numinis cultum litibus in se conversam: Sed illa quam

quam in Germaniæ sinu, tamen ab ipsius corpore exacta est lingua; moribus, legibusque diversis.

Litteræ in multis locis cultæ inter homines minus sciendi avidos quam docendi. Plura quam legerint scribunt: & suam famam ex voluminum quæ edunt, numero aut magnitudine æstimant.

Vis mentium ut opaca, ita ad æternitatem laborum est robusta, ut cæteri melius quidem scire, illi vero plura possint. Ex Optimatibus multi, qui suis opibus moribusque contenti, unam Germaniam aut viderunt, aut mirantur. licet suo judicio gravissimæ prudentiæ conscii humanitatem nostri seculi parum habent.

Verba illis simplicitatis antiquæ, neque scientiarum vis hodiernæ sapientiæ coloribus cincta. Peregrinandi gens avida, & exterorum morum, dum se receperit domum, aut simulatrix aut retinens. In eorum sedibus inolescere peregrinos aut ad dignitates pervenire, insuetum: & pæne contumeliosum apud illos nomen est, quo externos appellant.

His moribus oneratam Germaniam, suæ dotes & magnitudo virilium virtutum absolvit. Ignota ibi perfidia, etiam in venali fortitudine stipendia merentium. Ne ingenium quidem fraudis aut odia sub amicitiae titulis latent; & omnino ingentia scelera verecundi populi simplicitas ignorat. Parca & in furtorum suorum tenebris mersa libido: non, ut alibi terrarum, palam inter titulos atq; ludos exultantis juventutis. Nam & prope ad muliebris pudicitiae similitudinem viri quoque hanc pestem aspernantur. Prudentia autem ut non illic subtilia ingenia passim habet, quorum artificio deducatur in confinium doli: ita veris maturisq; judiciis infidet, quæ & facile caveant suis rebus & alienos errores despiciant.

Neque desunt altissimæ mentes, in quibus patriam gravitatem vividi & excitati acuminis felicitas temperat; Præcipue si validum ingenium diu peregrinis artibus moribusque miscuerunt. Gens armis egregia, & quæ pacem ferre possit.

fit. Tarde & cunctantibus consiliis ad tumultus concitantur: sed excitos, longa tempestas, & hominibus digna, exercet. Populus æris ferrique tractandi peritia, & per mille artificia ducendi, insignis est. Typographiæ inventum, pulverisque nitrati, illis ingenius Orbis debet, ambiguo prorsus beneficio, & quo tam pernicies mortalium quam utilitas, sese humanis rebus ulterius insinuavit. Candidi animi, virtutes aliorum, factaque, aut inventa, maxime absentium, non maligno & tumido livore delibant, sed sinceris laudibus ac propemodum immodicis attollunt.

Sed nihil in ea gente magnificentius, quam quod nomen summi Imperii Aquilamque sibi habet: tanquam Romam Germania vicerit; & provinciarum ultimaquæ Italico jugo accessit, jam sit sola in qua nomen atque reliquæ fortunæ Romanæ acquieverint. Tanti nominis sancta Majestas, nulla sociorum Principum æmulatione corrumpitur, Regesque, quanquam viribus sæpe majores, sponte Imperatorio culmini concedunt. Olim quoque illi summæ appellationis fastigio inerant dignæ vires, quæ paulatim emarcuerunt velut fatali senectute. Quippe domesticis bellis, tum nimia Optimatum potentia, denique quod non nascendi sorte, sed per suffragia deferretur hæc dignitas, datus ad terram Imperii vigor venerabile specimen in hæc secula magis cæterorum pietate quam sua fortitudine servavit. Inter cæteras hanc præcipue excidentium vitium causam invenias, quod ipsi Optimates nimis patrimoniiis, tum Imperatorum beneficio aucti, commissas sibi quondam Provincias tandem in Principatus mutavere, & ne non aliquid supra Imperatorem essent (qui non juri succedendi, sed suffragiis, fortunam suam debet) etiam suæ hæreditatis fortuna in sobolem transeunte Hoc modo gentium & populorum mentes, quas vis quædam ingenita ad suorum Principum cultum advertit, antea in unius Imperatoris reverentiam intentæ, ad istos vicarios, & mox dominos, accesserunt:

ferunt: propiori scilicet vel periculo, vel utilitate. Ita cœpta, insitaque deinde, Purpuratorum potentia, totam Imperii molem exhaustit; Primumque quod e Gallia supererat, mox ipsa Italia, fons nempe imperii, tum validissimæ Germaniæ partes, veluti de suo corpore excisæ, in diversos animos, ipsa dominantium varietate numeroque abierunt, Galliæ, Britannique, id est verissimis regnis, longe alia ratione provisum; exterminati Numinis consilio, regnantumque industria, Optimates quorum suspectæ vires erant. Nam quis porro regibus locus, si Neustriam, Armoricos, Aquitaniam, Æduos, Avernos, Pictones, Provinciam, atque Campaniam, sui ut quondam Reguli, Ducum titulis, Comitumve obtinerent, viribus suis tuti, & veluti precario obsequio Regem minorem tantum non despicientes? In Britannia autem formidabiles Ducum opes, Comitesque Palatini, regio prope jure, factionibus & clientelis graves, quibus regnum cladibus miscuerunt? quam sæpe in Reges atroci conjuratione certarunt? Nulla hodie certior Regni salus, quam quod eorum potentia, stirpesque depressæ, regni nervos in unum contulerunt.

Hanc igitur discepti Imperii cladem antevertere Imperatores debuere, cum se primum immodice Optimates efferrent. Nunc autem inveteratis rebus, adeoque composito Imperio, ut ex his ipsis Proceribus potissimum constet, velle iisdem potentiam extorquere, intempestivum ac inane facinus esset, tot vindicibus ejusmodi dignitatum in communis decoris securitatem coituris: maxime cum tam jure hodie suis Provinciis potiantur, quam Imperator summæ rerum præfectus est. Consensu videlicet eorum qui potentiam tradidere; tum possessione, ac tempore, quo omnia Imperia plerumque ab initio aut violenta, aut invalida, legitima esse cœperunt.

Sed quod expiranti Imperio malorum summum fuit, imitatæ Procerum morem plurimæ urbes, se quoque velut in singulares respublicas col-



legerunt. Leges sibi dixere, certosque magistratus; & ne dubites ab antiquo recessisse officio, sibi nomen libertatis in ista secessione fecerunt; mutuis quoque inter se fœderibus ad auxilia, & asserendum jus repentinæ majestatis. Sic illa regio quæ sub uno spiritu, unoque Rectore, par toti Europæ esse possit, viris, urbibusque inclytis, & digna in quam Romanæ fortunæ species transierit, jam vix agrum urbemve inveniat, quam suo Imperatori pleno jure cum Imperio tradat. Neque enim aut Respublicæ, aut Dynastæ, in suis arcibus Imperatoris præsidia regnare patiantur; neque inveniat tam augusta appellatione dignatus, in tot oppidis, ubi cum civium venia habitet. Hoc dulci publicoque errore, suæ patriæ majestatem exarmarunt. Neque enim Septemviri quibus nominandi Imperatoris patrio more concessum jus, alium quam ingentis potentiæ virum, & qui vel opulentis ditionibus, vel purpura etiam sceptrisque emineat, Cæsarem dicere debent. Sola virtus atque nobilitas hæc suffragia ferre non possunt. Vbi enim consideret Imperator, nisi jam illi antea extra Imperium sedes? ubi Regia, quæ tantæ majestatis titulos excipiat? Ægre alicubi habitare paterentur, quem ut plurimum amant absentem venerari. Quod si fortissimæ gentis fatum delecto Principi totam provinciam regio more habendam permitteret, tunc indomitis viribus de suo corpore inveniret illi scepro idoneos, unamque in comitiis virtutem respicere cogeretur.

Igitur Imperatori in omnes est, sed certa & castigata potentia. In civilibus litibus ad eum ut plurimum provocatur. Capitalia judicia Dynastæ, atque Respublicæ, sæpe suo jure exercent. Is comitia Imperii cogere, bella indicare, de summis inter ipsos Dynastas controversiis judicare. Ingruentibus bellis milites & pecuniam imperat: si imperare putes, quod non aliter quam assensu civium tollit.

Principes, ut in ingenti regione, permulti. Sed divisæ inter agnatos singularum familiarum opes ingen-

ingentium titulorum magnitudinem sæpe non æquant : quippe haud multo secus Provincias atque Dynastis quam privatæ sortis hæreditatem dividunt. Eo modo Saxoniz Principatum forte plures hoc seculo fratres inter se spargebant & quoniam res arduaerat, legum & consuetudinum periti his advocantibus advenere ; quibus in conclavi sedentibus cum litigantes fratres adessent, emotæ mentis vir, sed innoxia jucundaque insania consuetus delectare audientes, in id secretum perripit, quem grandior natu ex Saxonis fratribus intuens (nam is illius aulæ cibusque assueverat) Vis autem & tu, inquit, sententiam dicere de herciscūdæ familiæ rebus? At ille, Et quidni, inquit, velim? Expectaverant omnes ab amente ridiculi leporis venustatem. Igitur rogare perseverant, ne in tanta re suum consilium deesse pateretur. Sed ipse negabat, nisi vestis qualem Iuris periti induebant sibi daretur, tantæ consultationi misceri; cum illa se sapientiam esse sumpturum. Hilarior genius omnes in vase: at: Adeo ut ipsius quoque herus, non sine maximo risu, juberet, de penu sua produci suffultam pellibustogam, injicique cupienti; quam ut ille curiose aptavit, bis terque per triclinium spatatus, rogare dominum cœpit, ecquid se illa vestis deceret. Egregie, inquit; sed superest ut his rebus, quæ inter nos agitantur, tua sapientia modum imponat. Ille brevem in se moram esse respondit; in proximum conclave paulisper abiturum; illic se melioris sapientiæ spiritus ad consilium arcessere velle: Cum eo secessisset, adduxit repente ostium, ne quis arbitet prudenti nequitie interveniret; exiitque illam togam, & gladiolo quo erat accinctus, ab humeris ad fimbriam in longas & exiles partes exsecuit. Ita laceram cum sibi iterum injecisset, referat fores, pervenitque ad dominum, & intueri rursus jubet quam ornatus incederet. Iracundia arcuit risum, quia preciosa erat vestis quæ ita in partes parierat, & ô te vecordem inquit flagellisque scindendum! nihil vero timuisti dominicæ vesti

furiosas manus afferre? Neque ille contreritus, ridiculum, inquit, cum vos multo periculolius insanjatis, tam graviter mihi irasci. Hæc est vestræ fortunę imago quam indui, multoque stolidius Saxonicum principatum perditis quam ego hanc togam. Incolumis me decebat, ridetisque discerptam. Ita Saxonia integro corpore viget, armis & opibus gravis, cum eam per partes laceraveritis, nemo pristinam dignitatem agnoverit.

Germanorum Principum divitiæ, præter aliquot vectigalia, aut tributa, plerumque ex gregibus armentisque sunt, agri quoque fœcunditate, quem ut maxime spontanea nec redempta rusticorum opera exercent. Hoc modo suas opes, & annuę pecunię numerum, non possunt definire, cum sit ex mutabili annonæ precio æstimanda. Nobilitati magna & superstitiosa sui generis cura est; & maculari veterum sanguinem putant, si ad novam imparemve familiam, matrimonii consortio accesserit; nec in multas stirpes hæc nora eluitur. Quippe ad Patricii generis syncerum documentum, in utraque parentum serie octo ex majoribus numerant, in quibus hæc inæqualis conjugii labes non hæserit. In conferendis sermonibus unicuique hominum sorti destinatos titulos & loquendi normam habent. Ea negligere, aut incuriose confundere, magna religio est. Nec ulla gens tot conceptis formulis agit; etiam eorum memoriam fallentibus, quos à puero illa ars & tot discriminum superstitio exercet.

In illius Belgii parte quam suo nomine Germania invasit, sunt fere illæ provincię, quę sub Burgundica olim stirpe unum corpus bello, nuptiis, successionem fecerunt; mox ad Hispanum conjugii fœdere delatę, & suminum illius gentis robur, si tam pati absentis Principis cruda imperia, quam præsentis parere potuissent. Sed ex his populis multi durius hac ætate se habitos questi, rescissis concordie vinculis, quibus cum Principe, ac inter se, tenebantur, acerrima tempestate, & ad Europę terrorem idonea, inhorruerunt. Per hos  
motus

motus pars sibi libertatem armis fecit, & cæteri  
sive domitibello, sive antiquum dominorum no-  
men reveriti in Principis fide manserunt. Qui Hi-  
spanorum Imperium aspernati in Rempublicam  
secessere, ii maxime ad Oceanum colunt, ad ex-  
teros populos nomen à præcipua inter illos Bata-  
vorum gente sortiti. Necessaria post defectionem  
audacia, rem nauticam curavere. Inde robur, at-  
que opes, omnia littora scrutantibus, & per hos  
infestum Hispaniæ mare. Statimque aucta oppi-  
da, & ex quotidianis prædis divitiæ. Accessere ex  
Gallia, Angliaque, auxilia, in mutuam tam eorum  
qui juvabantur utilitatem, quam illorum qui ju-  
vabant. Alii sub Hispaniæ sceptro positi, nomen  
quoque à Provinciarum una duxere, & per Or-  
bem Flandrorum appellatione censentur. Distin-  
ctis in hæc duo imperia populis, idem tamen ge-  
nius, idem mores manent. Candida quidem, sed  
veluti cœli vitio depressa ingenia, quæ etiam gra-  
vius bibendi intemperie stipant, sive hanc sitim  
fortunæ terrarum, & ex majoris Germaniæ vici-  
nia velut spiritus, sive mos educandæ infantia  
accendit. Quippe adhuc ab ubere pendentibus,  
quo paulatim lactis desiderium minuant, lagun-  
culas ad similitudinem uberis effictas, & hordea-  
ceo potu plenas, tradunt in manu. Tum rudis &  
incuriosa ætas subinde ad os referens tarde mean-  
tem potum, sugendi similitudine capitur, tum et-  
iam innocentis oculi fastidium levat. Nec utilitate  
res caret, si ex primis incrementis rem æstimes.  
Quippe valida membra, succoque lætissimo ad ve-  
nustatem florentia; ita institutam infantiam de-  
corant. Sed assidua bibendi ratio, ipso usu in per-  
petuam voluptatem transiens, subinde palati avi-  
ditatem sollicitat, semper utique post hunc morem  
aut natantem aut arentem. Accedit illius potus  
conditio, non ad diluti vini consuetudinem sitim  
satians; sed crasso liquore identidem faucibus re-  
linquens quod succedente potu diluendum sit. Il-  
la tamen perpotandi dulcedine (quod mireris) in  
segniciem non merguntur obrutæ mentes: Sed

ultra cæterarum gentium sedulitatem, mercaturæ, artificiiis incumbunt. Assuefactis scilicet robustisque corporibus, illi vitio pares sunt, & haustas inter convivia nebulas mirabili felicitate exolvunt; adeo ut in multam noctem producta temulentia postero mane ad negotia vacaturis pigritiam non imponat.

Nulli ad vilium artium industriam meliôres. Ocium plusquam Attica severitate multaverunt. Pueri in tyrocinia distributi, publico si necesse est sumptu, virgines ad filum lanamque eruditæ, omnem ætatem idoneus sudor exercet, & à puero familiaris labor ignotam segnitiam, vel ipsa consuetudine, nescit amare. Tam frugali disciplina, artificiorum vis ingens opulentiam illustrat civitatum, paucique in mendicitatis veterino acquiescunt. Ingenium populi neque capax neque patiens fraudum. Ea fide qua sunt digni facile alios æstimant, sed decepta simplicitas intrastabili odio perfidiam lædentium fugit. Inter hos eximie quædam mentes omni seculo sustinuerunt dignitatem literarum, aut ad Principum, rerumve publicarum secreta admissi, commissas res digna solertia curavere. Nimirum ut in regionibus, ubi vulgo, & velut ipso natalium munere, acria aut lepida ingenia exurgunt, pauci ex suæ mediocritatis tenore vel curant vel possunt excedere, ita humilioris veluti fati gentes, & plus antiqua bonitate, quam per vanam subtilitatis culturam ornata, interdum ingeniis sunt insignes, quæ propius ad cœlum accedant, quam ad terram erant nata.

Batavorum Optimates, ad Reipublicæ genium, quam ipsi fecere, animos quoque & mores velut in vulgus deduxerunt; sive facilitate naturæ, & in eam sortem nati quam res suæ hodie habent, sive callida, & ad tenendum populum apta imagine; prompti quoque ad mutæ servitutis imperia, nisi cum iussi imperare. At Proceres Hispanicæ ditionis, plus scilicet stimulis aularum exercentur & Belgicos animos imperantis populi mori-

moribus miscent. Hinc veluti gemina illis indoles, variatumque, ac pæne divisum, per diversissimos affectus ingenium Sed inter cæteras cupiditates, præcipua honorum libido est. Titulos, ac nomina per adulantium astus inventa ad discrimen dignitatum, anxie ambiunt ac tuentur. Neque ulla re magis tibi eorum animos conciliaveris, quam cum arte & honore compellando. Blandientibus faciles, largique honorum, dum majores expectant. Ita callidæ laudationis fraudem, vera simplicique gratia remunerantur, nisi quod inanibus causis ad amandum concitatos, sæpe idem impetus mutant, vana forsitan suspicione contemptus usque ad odium quoque averfos.

Vulgus in illis utrimque Provinciis, speciem libertatis & vanæ paritatis indicia, plus ipsa libertate æstimat. Et hinc artes, quibus facile capi possit. Non dedignari rusticos jocos, per viam annuere comessantibus, & cum multum emineas, ipsis tamen nihil auferente, nec multum duratura humilitate, misceri. Guilielmus Auriacus, summorum consiliorum vir, plus hac arte quam ulla acie Ibericas opes affixit. Agrestes Batavorum pleraque oppida ad Oceanum incolebant; haud dubie deficientis ab Hispanio Belgii summum robur, & utriusque solis divitias fatigaturum, nam urbes natura situque impeditæ, non operoso munimento poterant ad inexpugnabile robur educi. Sub prima igitur defectionis initia, Guilielmus popularitatis novitate animos omnium in se convertit, reputantes quanto meliori conditione quam sub ipso Rege viverent, sub auspiciis ducis, sibi fasces & imperium debentis. Quippe ab aratro aut navigio inculti, adibant nec maiestate nec satellitio gravem. Ipse altissima calliditate gaudebat, non se per invidiosa nomina ab obviis objectisque, sed & Guilielmum interdum appellari, gnarusque quo potissimum modo suæ gentis affectus impellerentur, nullam salutantium vilitatem alto aut incurioso supercilio obibat. Excepta vox in adulationem castigantium huma-

nitatem suam; hominem bene emi, qui salutatione constaret.

## CAPUT VI.

*Italia, & Italorum indoles.*

**I**Taliam inter exiguas olim aquas quæ Rubiconem faciunt æstimatam, nunc Alpium claustra propius ad naturæ mentem definiunt. Tellus multum suis bonis, sed amplius propitiæ famæ debens, Olim Græcorum coloniis ad Orientem celebrata; tum magnitudine Imperii, quo illustrius nulla ætas aspexit, & suorum ingeniis culta; nunc etiam post excisos Romanæ magnitudinis nervos, adhuc multis gentibus manet omnis vitæ & institutionis exemplum. Ibi lævigari iuventutem, ibi humanitatem velut ludum aperire, nostri homines arbitrantur. Ipsa nomina urbium, locorumque, tot historiis fabulisque vulgata, ad stuporem imperitorum valent, semperque aliis syncerius quam sibi credentium. Hoc mortalium favore, & Italiæ mala teguntur, & bona speciosiora sunt. Nec dubium quin aliquot locis amæna sit supra cæterarum regionum felicitatem; qua Benacus masculis undis per montium claustra ludit, qua Avernus, Puteoli, Cumæ, lasciviant. Etiam quicquid Gallico nomini Longobardi eripuerunt, ferme æquis & irriguis agris, pulchritudinem suam habet. Sed si totius Italiæ fortuna cum vicina conferatur Germania, Galliaque, & ad Septentriones pertinente Britannia, tunc fortasse & erubescemus, quod prævaricatione nostra, qui tantam illius famam ultro alimus, dotes premat nostrarum regionū non inferiores.

Tellus frequenter montium aspera, aut nimio & maxime sterili æstu torrens. Solum in plerisque locis aret, & qua segetes patitur frequens rubiginis tabes crudas truges corrumpit, aut incussa turbinibus grando. Ne quidem pascuorum magna vis improbo vellere, ciboque pejore. Et vix unquam



quam ubertas Italię suis alumnis per triennii continuam felicitatem satisfecit ; multo minus suffectura, nisi frugalitas, cœlique conditio multum cibum aspernantis, parca & sobria convivia temperaret. Variorum generum arbores, quæ sub nostrorum syderum mansuetudine largo proventu se onerant, ibi nimio Sole consumptæ, invalidos & vix utiles fructus edunt. Malis autem aureis, punicisque. præservida regio, & diversa ficuum stirpe, ad suorum æstuum levamen abundat: quæ nec necessaria ad humanos usus sunt, & per Orbem circumlata, plus nostris deliciis quàm precio suo merent. Nam olivas, quanquam ibi inter tria maxima humani generis commoda ( cum segete vinoque ) numeratas, maxime ex suarum regionum conditione æstimant, in quibus pascuorum vitio siccæ boves, exilia ubera, aut olida, mulgentibus tradunt. Carnes, si paucissimas excipias animalium sub sole pervicacius durantium, à nostrarum mensarum deliciis pæne in alios sapes degenerant.

Vt jam illa Parasitorum gula, Græcas Romanasque comœdias piscium commendatione implens, pro illarum sedium sorte non parum videatur sapuisse.

Urbes eximix, amœnis, ut plurimum, locis conditæ ; Domus non è fragili materia, hæ præfertim quas Palatia appellant, plus interdum sua mole spectabiles quam ad habitantium usum aptatæ. Vario marmore, ac interdum auro nitent, fastigia ingenti opere non altum producuntur. Exsæ statux preciosis locantur umbonibus, haud raro solo vendentium mendacio debentes quod tam ambitiose emineant. Qua vero parietes laxantur in fenestras, non par reliquo artificio ædibus decor est. Nam plerumque aut carbasi vile textum, aut inunctæ oleo chartæ id spacium amplectuntur, quod recipiendo lumini destinant, quæ nec in publicum decent, & eorum oculos qui sunt in ædibus, intra triclinii aut porticus fores, tanquam in custodia, coërcent : longe à Britannix aut Gal-

liæ cultu, quo muri ad fenestras aperti vitro junguntur, libero ad exteriora conspectu, lætaque trepidantis, ut solet, splendoris imagine. Tempia autem (nam in tantæ famæ parte sunt) nec totam advenarum expectationem implebunt. In imaginibus, signisque, summus decor. Nihil aris formosius. Purpuram, sericumque, inter gemmas, & metalla, pro vilioribus ornamentis numerant. Solum omnis artificii pavimentis effulgens diverso marmore miscetur, quod per idoneos colores vel imaginem florum reddit, vel in voluminum pecudumque speciem conjungitur. Columnæ etiam ex marmore, ingentes, & pæne ad illius lapidis vilitatem. Sed tam opulenta pulchritudo non ad ultimum venustatis pervenit, fastigiis scilicet plerumque non editis, & nunquam libero sole in obscuras sedes admissis, Fenestræ multo ferro, & ipsa picturarum densitate inumbrantur: si quam Ædem vel fores opportunæ, vel viciniæ libertas illustrat, etiam appositis velis, pariete interjecto, tanti syderis munus repudiant. Adeo religionis sensum putant tristitia noctis enatum, & per lucis jucunditatem expirare. Quicquid vero peregrini de publicis illis operibus credant, certe privatas hospitiorum sordes, ac plurimum egestatem non sine tristi sensu & mirantur, & oderunt. Quippe in diversoria delatos, jejunæ squalentesque epulæ inter aviditatem & fastidium dividunt. Tum tricliniorum situm, tum culicum, cimumque omni genere infesta cubilia. Acer inde diversitor, & inclementis hospitii gravis merces.

Sed alia illi regioni blandimenta fortuna invenit, quibus adventantium studia caperentur. Nam aut publicus error, aut propitium Italiæ fatum, ex omni Europa ibi juventutem propellit, mutuo in tanta frequentia solatio, quod cum ipsi sibi debeant, huic tamen imputant terræ. Sive igitur tuæ gentis homines amas, ibi frequentiam invenies; sive te aliorum delectabit consortium, in tam numerosis diversarum regionum cætibus

erit

erit quoque quod deligas : præcipue quodam animorum commercio peregrinos alligante, ut interdum ad amicitiam plus valeat hospites simul esse, quam cives. Ita ex omnibus provinciis in unum corpus transeunt, ibique communem, & extemporaneam patriam videntur constituisse. Præterea, qui in Italiam pergunt, juvenes, ac plerumque opulenti, dum aut oppida mutant, aut præcipua incolunt, dum omnia ad vivendi, audiendique voluptatem sollicitant, animos elapsæ pueritiæ venturæque prudentiæ medios permittunt incuriosæ remissioni: maxime cum à patria semotis non occurrat domesticorum negotiorum facies, & hæc ætas à gravioribus curis seipsa subducatur. Accedunt oblectamenta juventutis, ars equestris, Cithara, spectacula artifices ad Comœdiam nati, sed vix cothurno pares. Reversis deinde in Patriam, & negotii (ut opus est) plenis, quid mirum suavi recordatione redire mitissimi temporis ludum, percussoque animo in elapsæ nec redituræ oblectationis memoria, locum quoque tantæ felicitatis conscium gratum esse?

Cæterum magnificus, & regio toties in exitium sui dives, illos primos, & quos ex veteribus dicimus mores, de Italicis gentibus ut plurimum excussit. Animus tamen omnium rerum capax. Neque pingui impetu, & tantum ad naturæ imperium; sed erudite, & cum artificio, virtutes, aut vitia sequuntur. Humanitatis effusa promissio, ab iis omni corporis gestu sancitur: verba exactæ urbanitatis, & cum volunt ad persuadendū aptissima. Etiam prolixæ benevolentiæ indulgent. & ubi vere amant, omnia discrimina habent infra tam humani foederis sanctitatem. Si quos autem oderunt (sive sponte averfi, sive se laceffitōs existiment) ideo periculi plenior res est, quia hanc animi ægritudinem plerumque tegentes alte interim æmulationis aut offensæ memoriam recondunt. Læsi interdum ad obsequium descendunt, ut inter amicitiae jura tutiori fraude

grassen-

grassentur. Etiam ætatem odia hæc ferunt; Ac quod noxiosissimum putes, nonnunquam animus tam facilis est ad vulnus, quam pertinax ad cicatricem. Mentis intra tristiore prudentiam castigatæ vix sustinent jocos; nec quid temere, & absque consilio, vel dicere assueti vel facere, ex suo quoque more alios æstimant: nutus omnium, oculos, verba, in argumenta animi superflua subtilitate ducentes. Ita perpetuis suspicionibus, atque curis, sui æstus pœnas luunt. Sed & ipsa nimis calliditatis opinio est ingrata, cum vix in simplicem, nec suspectam familiaritatem descendentes semper stare in specula credantur, quid cæteri agant arbitraturi. Venena damnatamque libidinem, ideo omiserim, quod non Italiæ propria vitia, sed in totum Orientem criminatio, ad meridiem quoque deflectens, uni genti præcipue imputari jure non possit. Maxime cum hæc scelera tenebris fraudique mandata, & negari facilius à consciis possint, & ab æmulis fingi. Ingens autem & publica crudelitatis opinio est, qua illic feruntur odia inter se inimici exercere, prædonesque grassari. Ita affectus dispensante natura, ut in quibus regionibus major passim humanitatis species cernitur, ibi prædonibus sit trucior animus, inimicitiarum quoque & ultionis ingenium magis in barbaros ritus degeneret. Nam Italia ultro prodigens obsequii cultusque promissa, quod est ad odiorum immanitatem aut latronum, in extremum sævitæ abiit. Galli non pari humilitate verborum, gestuumque, amicitiam colentes, multum quoque de crudelitate remiserunt. Neque enim tam facile adducuntur, ut impiis cædibus naturæ jus violent, saltemque mortem suppliciorum maximum putant, non pœnarum optabilem metam, & ad quam debeant inimicis per tormenta gradus esse. Demum Anglia à Gallicæ humanitatis pompa recedens, etiam multo magis ab illa crudelitatis barbarie divertit. Nam & prædones spoliis contenti sunt, & omnino insolens facinus adimere vitam: oblongas perticas, ferroque præfixas,

fixas, cervicibus euntium illidunt, ut animo per subitum & brevem liquente torporem, nec illi suas res defendere possint, nec ipsi ad cædis nefas adigi, qua mutæ rixæ frequenter funestæ sunt.

Italiam autem, quanquam totam Alpes & maria in se collegerint, unius quoque linguæ societate cognatam, tamen diversus multiplexque spiritus in varios mores egit. Sæpe enim, & per partes, à diversis gentibus victa, non unius animi incolas admisit, quos indoli suæ miscens, ab iis vicissim externi genii fati imbuta est. Accessit ad formanda ingenia regiminis modus, in quod se unaquæque pars post tot cladium mutationem composuit.

Roma multo variarum gentium impetu jam olim de suæ magnitudinis ac opulentiae fastigio dejecta est, tanquam Orbis sua spolia inde reposeret. Neque unquam mutatio jus suum in hominum animos majore prodigio exercuit, quam cum illud Imperium, ingenti spiritu Romanæ indolis erectum, humilitate & socordia affixit. Nunc ipsa Vrbs sub Pontificum lute, cum non modica Latii Vmbriæque regione, vicinisque aliquot populis, aptos quoque tali imperio animos induit, scriptis quippe, terroreque, & veneratione cœlestium rerum, toto Orbe sui Principis Majestatem, plusquam armis & majorum fortitudine, asserens. Sub Regibus autem illud omne concessit, quod à Piceno, sinuque Formiano, Adriaticæ & Tyrrhenæ undæ cingunt, in ingens Ionii maris latus extrema cornua Italiæ effundentes: Sedem nomenque Imperio Neapolis dedit. Non alibi in Italiæ finibus majoribus animis nobilium virorum impetus, ac propemodum fastus, attollitur: Equorum armorumque studiosi sunt; faciles ad stimulos gloriæ & in omnis magnificentiae cultus intenti.

In alia Italiæ ora, qua influenti Adriatico primæ terræ intercedunt, urbem Veneti condidere cum oppidis exuti, in illa vastitate quam Attila  
Italiæ

Italiæ fecit, suis se paludibus tegerent. In ea civitate quanquam toti nobilitati gerendæ reipublicæ jus est, tamen summum Imperium penes paucos ex senioribus manet, severum quidem illud atque sollicitum, ut necesse est, in tanta vicinorum potentia, civiumque deinde opibus, nisi cohibeantur, ad ambitum vitio divitiarum spectaturis. Sic illa disciplina domitos animos, per aulicorum studiorum venustatem non deducit; ac ne quidem illis voluptatibus decorique assuefacit, qui Patricias stirpes alibi tenet; ut est rei equestris, amorumque disciplina, aptæ quoque elegantiae, & urbanitatis, pro seculi more, peritia. Plus denique publice sapere, quam privatim, edocentur, nisi quod in procurando patrimonio eximiam sedulitatem habent. Aliæ præterea urbes olim se composuerant per varia Italiæ littora in Reipublicæ auspiciis, quas fortunæ vis erepta claritate Imperii, quod per externa maria quæsierant, in Regum Principumque clientelam coegit. Iam in iis mixti animi, semperque pendentes sunt, inter gloriosæ libertatis cupiditatem, cujus adhuc imaginem vident, & Principum, ad quorum patrocinium confugere, necessariam simul gravemque potentiam.

Insuæ autem, corporibus animisque speciem ac genium Galliæ Italiæque miscuerunt, vultu membrisque pæne compositis ad Gallorum venustatem, quam deinde Italicis dotibus implent. Sed & utrinque ut virtutes, ita vitia exceperunt. Cæteræ in Italia regiones Principes suos habent, modicis plerumque imperiis, ideoque majori calliditate, ut sunt in ingenti pelago scaphæ, ad gubernandas: cumque in angustis Provinciis nisi per immensa vectigalia sufficere opes non possint majestati dominantis; salubri consuetudine illæ gentes assuescunt & opes invenire, & pro imperio reposcentibus non negare.

Nihil autem est tam arduum sedulitati humanæ, ad quod Italici acuminis Præstantia non toleratur.

latur. Ab ultima etiam sorte vulgi non paucos quotidie in nomen atque opes felix industria producit. Nullum curarumgenus quod divitias promittat, aut, si opus est, humilitatis specimen aspernantur: longi quoque laboris speique patientes. Quorum alterum fastus Hispaniæ, alterum subita atque præceps vis Gallorum non toleret. Atque, & ad Rerumpublicarum gubernationem validæ mentes, ad omnem fortunam idoneæ, frugii homines, intentique ad futura.

Latine scribere inter illos haud pauci, non utique loqui norunt. Linguam quoque, qua vulgo utuntur, quanquam nihil est aliud quam cum corrupta Latinitate barbarorum mixtura verborum, quantum possunt, ab originis suæ vestigiis loquendo scribendoque avertunt; adeo, ut in fauces revocent verba, quo asperitas soni, vocumque contractio (quæ vix totæ ad aures perveniunt) nihil Latinæ cognationis videatur habere. Quo more Hispania jam & ipsam suam linguam infecit, ita demergens simplicitatem vocum, ut confusa, & summo pectore coacta asperitas deleat multarum literarum suavitatem. Tamen amœnitas studiorum in Italia non exigua, & maxime eæ partes ad quas vivax Naturæ lepiditas invitat. Testis gentilitii carminis pulchra, & ad vicinorum invidiam gravis ubertas, quæ nomina Poëtarum, tot amorum ignibus ad supplicii celebritatem fictis ardentia, sacravit. Nec enim interest, sua, an antiquorum lingua locuti sint; cum sit ejusdem virtutis impetus, qui tenerum & opulentum ingenium in popularem, quique in veterem facundiam, laxat. Nam & Græci quæ intelligeret populus scribebant; & Romani Græcos mimos, & Atticæ eloquentiæ efficax robur, ad sui vulgiaures accommodaverunt. Iam quid de Italicis historiæ scriptoribus dicam? istis quidē sincera prudentia victuris, illis autem tantum nimia eloquentia & partiū favore peccantibus; Sed & sapientia cœlestis, & humanæ prudentiæ disciplina, cæteraque omnia quæ in Musarum tutela sunt, nunquam parum illius  
Y  
populi.



populi ingenii debuerunt. Ad extremum non a-  
libi sanctiorum virtutum exempla, peiorumve  
facinorum, quam in Italicis animis cernas, & quod  
quidam de Attica dicebat. nullibi vel atrocior ci-  
cuta est, vel suavius Apes exuctis digestisque flo-  
ribus cellas implent.

## CAPUT VII.

*Hispanorum genius, mores.*

**V**Ltimum Europæ claustrum est, in immen-  
sum Oceanum Libyamque tendentibus, Hi-  
spania, quæ olim à situ Hesperia, mox ab oppido  
Hispalia appellata, tandem in hodiernum nomen  
concessit. Ingens tellus, quippe Galliam Afris  
committens, &, si Pyrenæi paterentur, Insula,  
antiqua ubertate insignis, hodie per vastas soli-  
tudines fidem tot historiarum cerumpens. Nu-  
dum in pluribus locis solum & sterilibus arenis  
incultum, egens aquæ, non herbarum, non mes-  
sium decore spectabile. Sed qua repentibus venis  
frugum aut vinetorum alimenta suggeruntur, mi-  
rum est quantum natura indulgeat. Illic ubertas  
eximia, & pænè reliquæ plagæ sterilitatem pensa-  
tura. Monstrum putes quod alicubi arva auctum  
centies semen agricolæ restituant. Frequentia op-  
pida non sunt: sed nec in iis comœdatus, quo ho-  
spites, Gallico, Britannove, aut Italico saltem mo-  
re, excipi possint. Incolæ autem in priscos habi-  
tus, geniumq; majorum, ut maxime durant. Ro-  
bustum hominum genus, laborisque illius patiens,  
non quo arva coli solent, aut artificia procurari,  
sed qui maxime est ad bella idoneus, ut est ferme  
pervigilium, inedia, sitis, & omnino ad militarem  
disciplinam obsequium. Nam in susceptas spes  
pertinax animus, præcipuæ virtutis partem cre-  
dit, malis & periculis non lassari. Hinc ad Roma-  
nas olim partes obstinata Saguntus, excidio suo  
& mutæ cædis fortitudine clara. Tum pro fa-  
mæ magnitudine parva Numantia, tot Romano-  
rum

rum primo, ad extremum sui victrix. Lusitania quoque repentinis viribus, & cogi solvique facilibus, Viriatum suum succingens; & omnis Hispania, ad Sertorii disciplinam fide & moribus commoda, ipsumque cum Pompejo Metellum fatigans. Adhuc Barbaros & in rudia variaque imperia dissectos, suæ fortitudinis admoveere laceßentes Pœni, hinc inde Romani; quorū ambitū Hispania luebat velut in præmium alienę victorię concessa.

Domitis expulsisque Carthaginis copiis, libido & aviditas Romanorum, libertatis quoque cupiditas, quam Hispani demum ut amissa est cognoverunt, crudam gentem, & barbaram, ita inconciliavit victoribus, ut nunquam in totum pacata, pæne omnibus fastis Italica arma lassaret. Ipse quoque Augustus, bellum cum Cantabris, non ut leve, & quotidiani momenti, suis Legatis mandare sustinuit. Visum illi par suæ felicitati periculum, præsensque depugnavit. Nec dum Hispani tot bellis, tantoque suo & hostium sanguine, de exteris Imperiis cogitabant, duntaxat adnisi non servire. Tandem jugo assuefactos Gothi, Vandallique, de Romano exemerunt imperio: tunc quidem sibi ipsis, sed quoniam in Hispaniæ corpus transierunt, & Hispaniæ quoque vincentes. Supervenit deinde ex Mauritania atrox fulmen, non ipsam modo Hispaniam corripiciens, sed uno impetu in Galliam transiens, Saracenorū viribus in immensum effusis. Exacti è Gallia & viciniore Hispania illi Mauri, ultra Bætum & Iberum condescenderunt. Reliquæ Hispaniæ partes in diversa & plerumque æmula imperia abiire: donec in primum coalituræ Hispaniæ pignus, Isabella, quæ fratri in regnum Castiliæ successerat, Ferdinando Arragonio nupsit, & magnitudine dotis, Arragoniam semper liberiolem quam sub iusto Rege provinciam in meriti jura coercuit: Mox ambo communibus armis domitos Mauros, pæne octo jam seculis Hispaniæ incubantes, suæ Africę reddidere. Sub eorundem auspiciis Americam aperuit ille Columbus, ad Occasum positę Indiæ pæne au-

thor; & ut prosperis undique fatis res Hispania emicaret, huic etiam Belgium, ascito in communionem generis & imperii Philippo Austriaco, accessit. Eodem tempore pulsa ex Apulia arma Gallorum, Neapolim Ferdinando concessere. Mox novis & crescentibus rebus, reverentiam, & quandam maturitatem, addidit Carolus V, Imperii titulo auctus, strenueque Mediolanum sibi asserens. Restabat ex omni Hispania, nomine & affectu Lusitania dispar, Orientis commercio gravis, ad quem per immensa, & infida Africæ littora magno ausu navigans, victo etiam & per sparsas colonias occupata imperabat. Sed hanc quoque provinciam in suæ Hispaniæ corpus restituit Sebastiani Regis casus, quo amisso Lusitani in Philippi II Hispani potestatem concessere.

Tam ingentibus incrementis non mutati in Hispanis quidem mores, sed magis aliquanto excusati. Quippe eorum rebus adhuc humilibus dignus tamen hodierna magnitudine tumor fuit in quem suæ Naturæ sponte nati sunt. Et hic illis vitiorum ac virtutum causa est. Graves enim animi, & cum pondere quodam elati, non subito impetu effunduntur in diversa: nec vincere magis sciunt, quam victoria uti. Ita ad omnia pericula pervicaces, ne tempore quidem & tædio vincuntur; factamque natura & arte constantiam vix de illis locis amoveris quos semel infederit. Sed verba, quibus se suosque attollunt, ingrata audientibus, fabulisque scribentium traducta, vultus quoque cum hoc grandi sermone conspirans, & convictus, nisi servientibus & domitis animis gravis, severæ majestati pæne quoddam odium addit. Vnusquisque in acie, ac maxime phalange, quam singulari discrimine melior. Servatas parcimonia opes, & ad temperantiam institutis corporibus sæpe negatas, in vestitu consumere amant, & sic ad ostentationem proferre; immensa sui fiducia, sed apud timidos aut patientes majore. Illis frugalitas eximia, non tantum in suæ Hispaniæ æstu (ubi corpora nimio Sole

marcen-

marcentia cibum pati non videntur ) sed ubicunque suorum numerorum periculo edunt. Modicus panis, nec preciosa herbarum condimenta, assuetis tam rigidæ virtuti plerumque sufficiunt. In alieno autem sumptu haud facile alii ad mensarum hilaritatem meliores. Nulla tunc series opulenti convivii, quam non totam oculis manumque percenseant. In ultima paupertate supercilium non omittunt. Sutori & egeno, cum jam fata instarent, aderat filius in paternam sortem natus. Is cum rogasset ecquid sibi decessurus præceptorum relinqueret, jam defecta voce pater, Ut, inquit, memineris in majestatem assurgere familia tua dignam. Miraculo nobis fuit ex Hispania mulier, vix centonibus satis lecta, tribusque qui comitabantur liberis precarium spiritum tristi mendicitate producens. Forte in Gallorum cœtum inciderat: Et ex his statim unus spectaculo motus; Ego, inquit, ô mulier, hoc te onere ex parte levabo, majorem ex tuis liberis ( & is forte ad decentium pervenerat ) mihi trade: hunc levibus, suæque ætati paribus ad serviendum officiis assuefaciam; ubi adoleverit, meo sumptu curaque hoc artificii genere quod maxime probaverit imbuetur. Ad hæc mulier; Nec Deus hoc siverit, inquit, o mi homo, quanquam pauperem me vides, ut in tantam humilitatem filium damnem: qui aut tu, aut ego, sciamus, in quæ fata sit genitus? aut quam claris virtutibus, subsidium patriæ paraturus? Satiùs illi, si ita fata tulerint, inedia extingui, quam ad servitutem ( sub externo præcipue domino ) egregiis hominibus indignam accedere.

Fallunt tamen Hispani tantorum spirituum specie, quales naturæ sponte, & sæpe incogitantes, effundunt. Nam plerique illorum parca modicaque sorte contenti, ne quidem ad majora fastigia, & supercilio suo digna, videntur attollere. Hinc videas ad arcium præsidia modico stipendio collocatos, velut in patriis laribus, inter impares tam ambitiosis verbis curas; ad senectutem

pervenire. Quod utique minus pati Gallorum animi possint, ad nova subinde omnia erecti; & Italica sedulitas, semper illam quæ ventura est fortunam observans.

In Hispania, studia literarum eo cultu non nitent, quem hæc ætas nudis & squalentibus Musis reposuit, cum periisse videretur ille eruditionis spiritus qui omnem scientiarum partem debet implere. Non enim Latinæ eloquentiæ studium ibi viget, non venustas poëtices, non historiæ, priscorumque rituum utilis & robusta lepiditas. veterem ac pene Barbaram in quærendis scientiis rationem obtinent: Philosophiæ incumbunt, Theologiam amant, non spernunt Legum & Canonum peritiam. Sed illas scientias Græca Latinaque eruditione mitigari indignantur; putantque hoc modo fucum addi, quo virilium literarum lineamenta langueant. Vir nuper non ignobilis in literis famæ, cum ab iis quibus obsequium addixerat, jussus esset in Hispania divinarum rerum scientias profiteri, statim hac potioris doctrinæ velut infamia eviluit, ad motisque precibus supplex, à suæ libertatis dominis impetravit alias sedes, & suæ humanitatis patientes. Præcipua ad Germaniæ morem ibi eruditionis species, prolixis voluminibus pauca complecti; sed & illa plerumque ex aliis auctoribus supervacuo labore decerpta. Et hoc quidem Academiarum malum est. In cæteris, urbibus non adeo frequens est scientiarum commercium (nisi quod in suæ regionis dignitatem, libros patrio sermone conscriptos amant habere) Prorsus ut in militaris nominis ambitum videantur hanc formam severioris in Musas negligentiae quæsiisse.

Reconditæ illis mentes, & ad lenta consilia idoneæ: Hinc longos cuniculos agere, & veluti obsessis in aspectos. Arma & pacem ex suis temporibus sapientissime æstimare. Opibus animos subigere, ab hac invicta arte de fortissimis gentibus triumphare. Maxime autem solemne est, ad parandam reverentiam, nomine coelorum uti, specieque

cique sacrorum subducere ambitum oculis vulgi. Numini suas cupiditates imputant, & veluti pro illo depugnantes, solertissime sibi vincunt. Illa veluti præfatione, in omnium rerum cœpta, tanquam in scenam & tragoediam, intrant. Ferdinandus, & Isabella, hunc jam patrium morem nepotibus tradiderunt. Quippe in hostibus suis inveniebant publici odii causam, adeo ut semper in bellis credi vellent divinæ iracundiæ ministrare. Cum externarum gentium Principibus acturi, non ex Optimatibus Ducibusve Oratorem legabant, sed ab alicujus monasterii solitudine extractum. Ita præter recitos legationis sumptus, fidem quoque ejusmodi feciales & reverentiam negotio faciebant. Equidem dignissimum laude putem, quod Hispani in magna hominum penuria, vastum tamen & dissipatum Imperium suorum civium coloniis aut prælidiis tenent, sui que ærarii famam opulentiæ Indicæ nomine & ingentibus præterea verbis cauta & industria fraude sustentant. Cæterum in Hispanica gente pompa verborum, gestuumque, ideo minus ingrata est, quod non ascititia aut extorta, sed veluti ex Naturæ præcepto intumescit, cujus omnis impetus, etiam in vitia declinans, nescio quo genio decet. Sed nec indignos putes illa specie animi in cothurnos assurgentis. Sordes saltem palam odere, cultuique corporis amant munditie & patritii ritus vestibus indulgere, arma, etiam deficiente penu, tanquam præcipuum in viro ornamentum, & servant, & gestitant. Nihil in illis ineptum (nisi si quid jactatio expresserit) in colloquiis ceteræque vitæ usu: callidis aptique ad omnia ingeniis, nec se ipsa eodem furo ignorantibus, quem facere aliis verborum pompa volunt. Sermonum & amicitiarum exordia per speciem mitissimæ humanitatis adornant, hosti quoque illis initiis optime poteris eadem tranquillitate adoriri; succedentes autem ad fastum, mutua majestate excipere. Si vero te Gnathonem angustior fortuna voluerit esse, timido silentio plausuque satia ani-

mos in suam aut pariae magnitudinem diffusos.  
At tunc quoque nisi quod jam admordeas, tuum  
esse ne duxeris; meminervisque, ut te promissis  
onerant supra fidem ingentibus, largiorem etiam  
quam præstare unquam possis operam, menda-  
cium astringente fiducia, polliceri.

## CAPUT VIII.

*Hungari, Poloni, Mosci, Gentes reliqua ad  
Septentrionem posita.*

**P**annoniam jam nutantibus Romani Imperii  
rebus Longobardi insedere, Hunnique, qui  
transfuso in provinciam nomine Hungariam ap-  
pellaverunt. Huic pro diversis regnantium viri-  
bus sæpe mutata limitum sedes est, nunc illos in  
viciniam proferente, nunc in arctius cogente for-  
tuna. Savo, Tibiscoque fluminibus rigatur. Ister  
jam plurimis fontibus auctus interfuit, capacique  
apud Taurunum alveo excipit Savum. Regio à  
Polonia atque Germania ad Dacas & Mœliam ex-  
currit; qua Illyricum & Dalmatiam spectat. Al-  
pium molibus tecta est. Omni proventu felix so-  
lum. Vberrimas segetes alit, pascuorum ingentium  
fidem exteris gentibus facit, venalibus per Or-  
bem armentis. Paulo minus centum millibus  
broum in singulos annos Germaniæ transmittit,  
illincque in vicinas Germaniæ terras. Partem quo-  
que Italiæ iisdem cibus alit. Vinum generosissi-  
mum est, nec multum illi dispar, quod in Hispa-  
nia gignitur. Cœlum quoque ad valetudinem com-  
modum, nisi quod sub Autumno intemperies mu-  
tantis in horas aëris morbos creat, maxime hospi-  
ribus sævos. Noctes scilicet multo frigore hor-  
rent, ingens æstus succedit, media luce campos  
corpora que adurens. Sub vesperam gelidus aër i-  
terum incautos astringit. Varii generis præcique  
metalla in viceribus tellus habet, aurumque in-  
terdum cum arena fluvii volvunt, feracissimi pi-  
scium, quos ibi nimia copia viles facit.

Indolem



Indolem gentis ideo magis arduum scire, quod hoc seculo horribili clade percussa est, suisque moribus vix relicta, hinc urgentibus barbaris, potitisque magna parte provinciæ; hinc milite ex omnibus Europæ populis ad auxilium lecto, moraque, & multitudine, aliquid suorum morum sensim in illam regionem transfundente. Dixerim, bello & assiduis malis factum, ut vulgus quod in agris habitat, excussa rusticitatis simplicitate in sævitiam plerumque abierit. Nullo discrimine, in suos, atque hostis milites, insidias struunt. Si quibus sub noctem aberrare contigerit, adsunt statim ad prædam, & ingratiſſimo scelere suos milites, sibi opem per omnia discrimina ferentes, non aliter à se quam nudos, & in ultimæ mendicitatis imaginem amittunt.

Nobilibus, ut par est, mens erectior, meliorque frons, & animus ad magnificentiam factus, membra, incessusque compositi ad venustam majestatem. Togis & tunicis utuntur, ad morem orientis, purpureis maxime, aut quæ cœruleum colorem acceperunt. Et hic vestitus egregie viros decet, brevi ut plurimum acinace ad togatum latus appenso. Callidis & ingentibus consiliis valent, parique audacia, præsertim si brevi duntaxat & furtivo impetu opus. Ingentes Proceribus opes sunt; magna quoque, licet in regno, libertatis vestigia. Vnicuique pro opibus multitudo clientium; & illis in patronos ingens fides. Non alia ingentior nobilibus cura, quam ne quid de iis prærogativis decedat, quas tam à multis ætatibus intemeratas habent. Et ideo major armorum pertinacia contra Turcas, qui in unam servitutem omnis claritudinis sanguinisque familias premit. Absque hoc, inclinatio animorum in illis timeretur, aliunde potius Reges quam ex Germania petituris. Quippe Hungaros Germanosque vulgare vicinæ malum, superba æmulatio inter se committit. Probra utrimque in domesticis colloquiis sæva, alterisque vitia curiose aut explorant, aut fingunt.

Hungari equorum studiosi, quos optimos habent; vestes quoque, & arma, ad delicias pompamque exigunt, equis malunt quam pedibus prælium inire, timerique cum ambitu quærunt. Italica ingenia artesque sequuti, ne quidem ab eorum vitiis creduntur abhorre, & vindictæ facinora peragere dicuntur iisdem artibus, parique livore. Ad amicitiam facillimos putes: Sed hæc verane sit aut tuta, nulli melius æstimabunt, quam ii ipsi qui illam inibunt; serio reputantes num amari meruerint, an vero illa gens utilitatem captura, simulatione benevolentiae fraudem paret.

Insignis est apud illos magistratus quem Palatinum dicunt: Is nihil ex se decernere, sed obstare Regi potest quicquam publicum sancienti: cui postquam suo suffragio intercessit, infirmum est quod deinde statuitur. Et hunc plurimi colunt, tanquam vindicem libertatis, oppositumque Regibus, ut olim Tribunatus Romanis Consulibus potestatis modum fecit. Hinc scias, magnos gentis animos, nimiumque tumentes, dura aut soluta imperia pati non posse: nisi (quod in provinciis illic cernas quas Turcæ invadere) ad reverentiam dominorum, acri metu cogantur, & premente spem omnem libertatis.

Illyrici, Dalmatæque, quos Istros Slavosque appellamus, ad Hadriatici maris littora incolunt; illinc qua introrsus terram spectant, in Pannoniæ fines perveniunt. Immanium montium dorso ea regio horret, perpetua hyeme in cacuminibus rigente, quæ in valles demittuntur mitiora sunt, vicisque & arcibus frequentia. Gens alieni juris est; diversisque dominis jamdiu assueta, in eorum plurimum mores, ac veluti indolem, abit. Pars Principibus Austriæ subest; Veneti non pauca ad mare obtinent: reliqua Turcarum Imperio accessere: hinc Germanici habitus atque mores, Italici etiam, ac denique barbari, pro dominorum genio dispensati. Pæne invia regio est, nisi quod in portibus naves interdum excipit, quæ à Venetis in Orientem solvunt, aut illuc in Adriaticum remeantes:

meantes: cætera peregrinos non invitant. Inde lectis militibus fortitudinis & audacię fama est, in Turcarum præcipue castris: paucique præter illos Constantinopoli in prætorianas cohortes leguntur.

Hun ariæ à Septentrione Polonia est, inde ad Oceanum procedens, Russięque contermina. Tot spatiis diffusa regio pæne nullibi in montes assurgit: & à planitie factum nomen, quam Scythico verbo *Pale* appellant, Campi in immensum patent, quos nix altissima hyeme obruit: hac discussa segetes crescunt, non in indignarum tantum usus, sed & mari delatæ, per multa Baltici littoris spacia, sterilibus fundis annisve opem ferunt. Sævæ hyemes terram fluminaque advinciunt, quia violentia Aquilonis, nullis montibus repercussa, liberum ut in pelago cælum rapit: accedit Septentrionis vicinia, & ibi emoriens Solis vis, præsertim cum recessit ad brumam. Natura subsidium admovit profundissimas sylvas, quæ & in ignem datæ frigus expellant, & in suis præterea umbris animalia alant, quorum pelles fulciendis vestibus preciosissimæ habentur. Hac duplici ope utuntur in hyemem. Alio quoque commodo suis sylvis obnoxii. Quippe alicubi immensa examina apum fervent. Agrestia illa sunt, nec cujusquam cura aut pastum aut testa accipiunt. Vacuis quercuum ramis, aut truncis, inhærent; ibi cereas domos extruunt & optimo melle implent. Hinc ingens facilisque in regionem proventus. Ceram mercatores devehunt; ipsi melle conficiunt potū, quem in deliciis habent. Flumina, paludesque, plus justo quasdam provincias obruunt, adeo ut æstate vix possint adiri: concretis per hyemem undis curricula habent, quæ lubrica glacies facile evolvit; ita per regionem feruntur: & hoc est commercii tempus quo externi ad eos commeant, ceramque & pelles mercantur, ac si quid præterea sub tam rigido cælo in precium nascitur. Plerumque lapides extruendis domibus desunt. Lignis ad parietes utuntur, stramentoque operiunt, præterquam

terquam in celebribus oppidis, arcibusque Optimum, quantum illa regio ferre potest excultis. Polonis ut plurimum dura vita cœlo aspero, nec populi moribus factis ad nostri seculi venustatem, & hinc aliquando sæviora ingenia. Diversoria peregrinos excipiunt, longe à nostrarum terrarum ratione. Deducuntur in sedem quæ inanis, & plerumque perfossis ad accipiendum lumen parietibus, ventis quoque & hyemi patet, nulli quibus decumbant lecti, non erecta ad epulas mensa, longo ac multiplici clavo paries fixus est. Illic hospites sarcinas quas habent in ordinem appendunt. Multo deinde stramento sternitur solum; & hoc in illis diversoriis pro thoro est. Itaque per illam regionem processuri, ad iter ita se comparant, quali domum circumducant, cibos, & cætera in alimentum ferunt, lectulos in rhedis collocant, ut nudis illis tectis, excepti sua supellectile, & famem & frigora arceant. Gens est ad ferociam, & licentiam nata, quam vocant libertatem, adeo ut infandæ barbariei legem multis seculis sibi solemnem, vix nunc demum omiserint; Ea scilicet caverant; ut qui hominem peremisset, solveretur metu judiciorum, si in jacentis cadaver projecisset pauculos nummos, quorum numerus eadem lege destinabatur. Nec tam vile fecissent humanæ vitæ precium, nisi sui genii impetu pro levi facinore haberent humanum cruorem prodigere. Ipsum nomen non tantum servitutis, sed & justitiae ac legitimi regni oderunt. Rex ad patrias leges vi & armis adigitur, Nobilitas tristibus prærogativis se ipsa donavit, quibus possit sibi invicem & impune nocere, quippe Principi non satis juris est, ut quod peccaverint ipse vindicet. Maxime sibi credunt; nec major libido est libertatis in moribus, vitæque incivili, quam in religionum & cœlestium rerum sensu; de quibus, ut placet, sine metu, & sentire volunt, & loqui; scilicet immani fiducia sui, quibus sapere alieno ductu pudet. Hinc in diversa hodie scissæ mentes, errorumque omnium lues, quicunque

cumque antiqua secula polluerunt. Quisque in suæ familiæ laudem intentus est; præsertim si in externos incidit. & expertes suarum fortunarum. Sævire quam decipere promptiores, & ipsi magis fraudibus quam vi patent.

Ultra Poloniam Russia jacet, quam obtinet Moscovitarum Princeps. Nomen Imperio ab urbe Mosco est: quam illius Russiæ caput multitudine incolarum, & habitatio Regum fecit. Ab Oceano ad Caspium mare immenso tractu patet. Diversis lateribus Polonis Suedisque confinis est. In aliis ejus limitibus Tartari hærent. Longo frigore & penetrabili, damnata est. Vix profecto jam vere redditur terra, quam nives oppresserant. Inde æstas gravissime incumbit, & quasi redimeret moras quas longa hyems fecit, subito æstu percoquit fructus, non tamen ad nostrarum arborum felicitatem. Pæne supra fidem est ibi quoque pones maturescere, quibus apud nos non flagrant modo soles quærantur, sed & sæpe repetiti. Crebræ sylvæ campos attollunt: in iis preciosæ pellibus feræ; ceræ etiam copia, atque mellis, & hinc præcipuum in illis regionibus mercaturæ commercium. Multi incolæ sunt, neque tamen pro terrarum amplitudine, quas possident.

Servituti gens nata, ad omne libertatis vestigium ferox est; placida si prematur. Neque abnuunt jugum. Ultro fatentur Principi se servire; illi in suas opes, in corpora, vitamque jus esse. Sordidioris reverentiæ humilitas Turcis non est in suorum Ottomanorum sceptrum. Cæteras quoque gentes ex suo genio æstimant. Hospites, sive forte, sive consilio in Moscoviam advectos, in idem jugum damnant, & servire suo Principi volunt: si quos furtim abeuntes retraxerunt, ut fugitivos plectunt. Magnatibus, licet ipsi serviunt, in minores suus fastus est: & vulgus horum maxime supercilium timet.

Fertur populus adeo literarum rudis esse, ut pauci inter illos vulgatissimas preces memoria teneant quibus Numen propitiamus. Bello quam

ocio aptiores : & plerumque in armis sunt : five quo Tartarorum impetum frangant , five alio limite Polonos laceſſunt , aut repellunt : Iſta quoque ætate civilibus odiis inter ſe certaverunt. Accies illis ex equitibus tota : pedite ideo vix utuntur , quod omnium bellorum momenta in celeritate conſtituunt : magno impetu vel impreſſionem adorti vel fugam. Sed ubi pavere inceperunt , ad deſperationem quoque vertuntur. Adeo ut ex prælio fugientes , ſi aſſequitur hoſtis , nihil auſi repugnare , ita ſe victoribus dedant , ut nec mortem deprecantur. Caſtigandis furtis remiſſi ſunt : tamen prædones ultimo ſupplicio ulciſcuntur. Gens eſt cauta , neſtendisque fraudibus apta ; Neque ignorant ideo mercatoribus ſe ſuſpectos ; quos ut placabiliores habeant , interdum in mutuis commerciis aliam patriam ſibi fingunt. Perpotandi ſtudium acre eſt , & præter patrios potus ne quidem adveſta vina deſunt.

Vxoribus longa captivitas , quas domi ſerio continent , dignas quoque majoribus malis : adeo ſervilibus ſupra fidem ingeniis demiſſas eſſe ajunt. Virorum in ſe benevolentiam ex verberum numero æſtimant : nunquam melius ſuo judicio habitæ quam cum in ſeva ingenia inciderunt. Quidam è Germania in Moſcoviam migraverat , vir è plebe , & ſi nomen in tantilla re placet , Iordanes dicebatur. Hæſit ergo in illa regione , & cum ſibi eæ ſedes placerent , inde etiam duxit uxorem. Hanc cum charam haberet , omnibuſque officiis mutuam gratiam affectaret , illa deſectis luminibus mæſta , crebro in ſingultibus & cæteris mœrentis animi indiciis erat. Viro denique ſciſcitanti mœſtitię cauſam ; ſe enim nullis quod ſciret amicitie muneribus deſuiſſe ; Quid tu , inquit mulier , tam egregie fingis amorem ? Num putas latere me quam tibi vilis ſim ? ſimulque largos gemitus cœpit effundere. Ille attonitus , in amplexus mœrentem recepit , rogare perſeverans , nunquid eam offendiſſet ; peccaviſſe ſe forſitan , ſed culpam emendatione deleturum. Ad hæc illa , Vbi autem ſunt

sunt verbera, inquit, quibus te amare docuisti? hoc certe potissimum pacto, maritorum in uxores apud nos benevolentia & cura sancitur. Hoc à Iordane audito, primum stupor continuit risum; mox utroque vanescente, è re sua esse putavit, ut uxorem eo modo haberet, quem ipsa præscripserat; nec multo post arripuit cædendę mulieris causam; & illa fastibus mitigata, tum primum bona fide amare & colere virum cœpit. Nec tenuit ille modum, sed jam ferior quam misera conjunx optasset ad extremum grandicætu dicitur hujus etiam crura & cervicem afflixisse.

Germania, qua Baltico alluitur mari, Cimbricę Chersoneso confinis est, parvoque maris discrimine cæteras insulas videt, quæ idem Cimbrorum regnum faciunt: hodie Daniam appellamus, inde brevis in Suediam trajectus est, cui ad Boream Norvegia adjacet. Et hæc quidem regiones sunt, ex quibus tantę gentes numero suo, victoriisque celebratę, quodam turbinis æstu toti olim Europę infusę sunt. Inde Cimbri, Teutonęque, inde Gothi Vandalique prorupere; per quos Italia, Libya, Hispania, cum Gallię parte afflictæ est. Recentioribus seculis quæ inde Coloniz emigrabant, Northmanni dicebantur, id est, homines à Septentrione venientes. Per hos diu occupata Britannia, in Galliis plurima ferro igneque corrupta sũt, sed illic post varia discrimina pax placuit, & concedentibus Gallis Neustriam insederunt, quam exinde vocavere Normanniam. Adeo nihil in Europa intactum illis fuit, & omnibus formidabiles, etiam vulgo indomiticiensebantur. Vnde tanta hodie multitudo, & velut fons gentium aruerit, incertum est, certe jam minus crebra in illis regionibus oppida, tantumque à mittendis coloniis absunt, ut cum bella ingruerint, externo milite uti consuescant. Crediderim barbaras gentes, cum frugales ibi olim in inculto solo essent, ignaręque vitiorum, multa sobole increvisse. Et quoniam infelicitas terrę numeroso populo alimenta negabat, sæpe dimisisse juventutem novas sedes



sedes quæsituram ; cui se sponte tunc omnis ætatis homines applicabant : Nunc autem insano commessandi bibendique vitio obruisse genitalem vim nec habitatores nisi suis regionibus sufficere posse. Illic Germania propotandi studio superatur. Mane primum excitati stomachum implent ingesto calidissimo potu , quem ab ipso vino igne exprimunt. Sic resectis , missa ad caput æstuantis potionis caligo somni cupiditatem facit , brevis quies est rursusque secedunt ad potum. Vinum tunc bibunt, aut si quibus ut vocant, cervisia placet. Quod inde spatii ad medium diem est, negotiis datur. Tandem ad prandium conveniunt, quod utique sæpe non dubitant continuatis sermonibus in cœnæ tempus extrahere: hinc ut plurimum in thalamos deferuntur, contumelias nec facere prompti , nec pati. Datæ dexteræ fidem non violant. Multa Germanicæ in his linguæ sunt, sed in moribus plura vestigia.

Norvegiam rari incolæ tenent. Ut plurimum venatione vitam tolerant: nullibi commodiores malis, aut navium tabulatis arbores crescunt. Gense est rudis, & apud multos veneficiis infamis. Ajunt venalem apud illos ventum esse , quem inde navigaturi emant , Vlyssis Æolique fabulam vero æquante prodigio. Diræ apud illos hyemes, & plerumque incautis infestæ. Torpens aër , remisso , ac pæne nullo sensu, occupat corpus: ne ante quam perieris intelligas te perire. Memorabili exemplo huic pesti is ereptus est, quem Numen ad regnum Britanniarum destinaverat, nunc unius Scotiæ Rex, Iacobus. Filiam Annam illi desponderat Fredericus II, Cimbricæ Chersonesi Rex: Sed cum illa in Scotiam veheretur , non semel in Norvegiam ejecta est, vi sortium, malisque geniis ad Veneticæ imperium ventos cientibus, quæ aliquanto post facinoris poenas luit. Sed Rex interim amore & juvenia impatiens , ad conjugem deferri constituit , propectaque jam hyeme, illud mare glacie infame ingressus est. Cœlo & tempestatibus luctatum Norvegia excepit, nec multo

multo post quæ eum vexerat navis, velut in aridam delata, ita circumstante glacie immobilis hæsit. Res ad Iacobum delata est; statimque libuit hoc insolenti spectaculo frui: quippe nulla suæ Britanniae littora concretas undas tenent. Sudum erat, neque portus ab hospitio Regis procul: Processit igitur, nec spirantibus ventis, nec acriter, ut videbatur, inhorrente aëre; contemplatusq; paulisper glacie stratum mare in thalamum rediit, nec dum aliquid de perniciæ hyemis suspicatus. Sed dum foco se admovet, ex circumstantibus unus, in dexteram Regis manum, ut forte sit, intuens, advertit vicinum pollicis digitum cæculo & exanguilivore rubentem, peritusque cœli illius, ne tu, inquit, Rex, ad ignem accesseris: nocuit tibi aër, & digitum exanimavit, sic jam affectum, pejus ignis intempestivo calore perdidit, frigoris lues alio frigore pellenda est. Admiratus Rex primum se læsum negat, quippe nullo modo doloris sensu tentatus. Sed non diu dubitavit, quin recte moneretur. Nam stupebat rigens digitus, sensumque cum sanguinis calore amiserat. De remedio quærenti, referunt, certam esse & in promptu medicinam, cujus se salubritas, brevi quidem, sed acerrimo dolore, insinuet. Id pati oportere, nisi malit interciderè digitum tam noxia hyeme contactum: Allatumque est vas subito, plenum nive, non quidem ad ignem domita, sed per ipsum triclinii teporem jam sensim diffuente. Illo Rex digitum inferere ex præcepto incolarum monetur: subitoque ingens dolor per torpentes paulo ante articulos pæne illius patientiam excussit. Remeantis in digitum sensus documentum primum fuit, quod doleret. Eo modo Rex incolumis evalit; admonitoque tam improvise mali facilius postea cautio fuit. vel certe medicina, quippe & post aurem dexteram equitantis eadem pestis adussit.

## CAPUT IX.

*Turca, Indai.*

**T**urcarum ferum genus, & ad urbium, artificiorum, scientiæ excidium natum, nostris vitiis, quam sua virtute felicius fuit. Hæc publica Orbis lues, barbaro impetu, tum multitudine hominum, & austeraparendi disciplina, invaluit. Primum illis à Scythia quam Tartariam appellamus exordium. Hinc sive stipendiarii dissidentibus Persis ad auxilium accersiti sunt, sive ultro inopes patriæ campos reliquerunt, invitati felicitate vicinæ, Ducis quem sibi constituerunt auspiciū mira religione sequuti sunt. Huic se suaque addixere; sive libertatem nunquam viderant, sive ultro projecerunt. Nec in aliis gentibus constantior in modestos & legitimos Principes fides, quam illis in atrocem, cui se damnaverunt, Tyrannidem, nisi quod tantæ reverentiæ impetus sensim creditur jam torpere, sub Principibus illo obsequio minus dignis; Nimis quoque in populo animorum affectibus nunquam diu constantibus.

Per hos primum correpta pars Asiæ quæ olim fluere deliciis dicebatur. Hinc sub Amurathe in Europam, Ligurum ope remigioque, transvectis, illa Græcia, illud Musarum domicilium, concessit in prædam. Ipsi tamen dura indole eluctati humanitatem, in majorum feritate perseverant; prorsus ut intelligas sub mollicælo immania ingenia esse posse. Quandiu in Bithynia hæserunt, aut in Thraciæ deinde littoribus, æmula hinc Græcorum, hinc Trapezuntinorum imperia, per quæ vinci oportebat nisi ipsi vincerent, accendebant sæva ingenia, & tunc quodam primarum victoriarum æstu ferventia. Vbi pudendo nobis bello tantos hostes sustulerunt, Constantinopolim à Mahumete captam habuere in præcipuum regnicaput; diliniti situ urbis, quæ Europæ Asiæque faucibus hæret, & commoditate pulcherrimi portus,

portus, tum famam Imperii, quod ibi multis ætatibus inclytum duraverat.

Quod in Oriente reliquum erat, vel à Soldano tenebatur, qui Syriam, vicinasque regiones, Ægypto addiderat; vel sub Persarum jure erat, terras quæ ab Euphrate ad Indiam late jacent uno Imperio jungentium. Persa palam Turcæ infestus, & de regni limitibus quotidiano odio belloque certabat, Vtrique cum Ægyptio fœdus erat: sed visus Selymo Turcæ Ægyptius id cum Persa arctius & religiosius colere: Et hæc statim causa armorum. Nunquam tam brevi bello parta major victoria, spoliis, viris, terris; & quod est amplius, diuturna earum rerum quæ victæ sunt possessione, quippe duobus justis præliis, unoque tumultuario, omnes Soldani regiones, opes, arma in Selymum fortuna contulit. Hinc ille in Persam gravior: Europæque simul imminens, nostras opes fastidiose despicere. Sed à Syria cum Triumpho redeuntem acer morbus oppressit, eodem illo loco ubi quondam in parentem Bajazetem acie certaverat: velut diris patriam vindictam reposcentibus. Sed statim Solymanus ipso Patre acrior Pannoniam invasit. Rapta Buda, quæ Hungariæ caput est, ausus quoque Viennam Austriæ obsidione tentare. Sensim tamen Bizantinæ deliciæ illorum Principum animos à nostris cladibus averterunt. At nos interstiniis interim odiis & æmulatione gentium fracti, non erubescimus pacis bellicque momenta ab iis expectare, in ipsos nihil spernere audentes, contentique non laceSSI, adeo ut legatos, velut belli redemptores, & deprecatores fœderum, ad hos Bizantii Tyrannos dimittamus; quos illi sive sua superbia, sive religionibus nostris offensi, nullo colloquio, ac vix quidem conspectu dignos putant, rati infra sui imperii dignitatem, suos quoque legatos ad mutuae amicitiae commercium in has oras destinare. Cæterum ut tot victoriarum felicitas, majestatem Principis Turcæ pæne supra humani fastigii cultus subvexit, ita ipsum

populum, cujus manu impetuque partum Imperium, (mirumdictu) videtur afflixisse. Nam adhuc humilibus Ottomanorum Principum rebus, cum pæne suam gentem, quantacunque tunc erat, in castris haberent, certe quicquid dignitatum prædarumque vellent dividere, spargendum in illos ipsos milites erat; nec alios præter hos Scythas habebant, quibus amicitia miscerentur. Auctis nunc opibus, liberoque delectu, ex suis domitisve gentibus, quos malint ad Rempublicam admove, à præcipuis honoribus arcent veteres illas stirpes, illorum militum nepotes à quibus Ottomanica domus idipsum cum imperio olim accepit, ut jam ingrata esse possit. Nescias id fastidio factum, an consuetudine (quæ postquam invaluit, barbaris pro religione est) an secreto ad sui regni securitatem consilio, quod ingentes præfecturæ, tribunalia, dignitates, non aliis permittuntur, quam iis qui ex Christianis parentibus nati sunt. E Dalmatia potissimum, & Illyrico, de sinu parentum abrepti pueri, virginesque, in destinata Constantinopoli claustra ducuntur. Ibi sacra parentum, quæ vix infantes meminere, in vesanas superstitiones mutant, circumcisis genitalibus, & reverentia in Mahumetem imbuti. Et hi cœtus in tam miserabili rapina coacti, Regi Turcæ pro seminario ducum, principumque sunt, quibus corporis sui curam viresque imperii tradat. Hinc præterea spadones, ad intima destinati obsequia, ideoque non vile aut pudendum ibi genus. Hinc Reginae pellicesque & semper tanto Regi regnaturæ post se sobolis mater. Suas quoque amitas, & sorores, ex illa cohorte delectis nuptum dant; sibi patruelles, & nepotes, daturis. Adeoque est in precio de Turcica stirpe non nasci, ut summa in Imperio munera, quæ isti ex Christianis parentibus geniti tenent, in eorum liberos nusquam transeant. Nec alia causa est, quam quos illos in legem ritusque Turcarum ediderunt. Et hoc illa gens patitur, suo quoque iudicio vilis.

Turcis enim rustica ac demissa indoles : neque digna libertate quam non curant vindicare. Rudes animos ne ulla scientiarum humanitate mitigent, Mahumetes lege cavit, quo facilius ignari componerentur in legis vesaniam, quam præscripsit. Gregum, armentorumque, & supellectilis præcipua illis cura ; ædificia vix ad usus, nedum ad cultum extruunt ; sive adhuc Scythicæ originis memores, & vitæ in plaustris errantis, sive quod unusquisque suum agrum precario jure possidet, ad Principis nutum non fundos illos tantum, sed & provinciam mutaturus. Principem ingenerato affectu mire colunt ; umbram hunc & effigiem Numinis vocant. In ea gente sævissimi, foediusque in Christianorum odium intenti, non sunt illi qui longa majorum serie in Turcis sunt, sed qui in eorum ritus à nobis defecere : cæteris mitius ingenium perhibetur, longe tamen à moribus nostris esse. Venena non alibi ingeniosius parantur : & vix credibile, quantis artibus vim nocentium rerum exprimant copulenterque, nec aliter scilicet quam per mirabiles astus, illa lue quemquam tollant ; omnibus quo hanc mortem & effugere possint & tradere, in pari vitio calliditatem quærentibus. Quis credat non gustu, sed ne tactu opus esse, levi aura hanc pestem insinuante, corruptisque vitalibus nec lentam quidem mortem inducente ? Nuper Alepensem præfecturam emerat à gratiosis in Aula hominibus quidem ex illarum dignitatum candidatis. Vrbs est vix bidui itinere à Cilicio mari summotæ, mercatorum frequentia Orientisque commercio gravis, unde merces partim Euphrate, partim jumentis delatas accipit. Inde suis rectoribus ingentium opum causa, tam licenter in provinciam grassantibus, quam profuse illam emunt. Hoc igitur homine in præfecturam misso alius majoribus donis sollicitat fidem eorundem Optimatum, jubeturque illi priori succedere, qui provinciam vix dum libaverat. Is hoc nuncio celeriter amicorum

fide perlato, vehementer, ut par erat, improvisa clade perculsus est, nec dum ulla scilicet præda ambitum emptæ præfecturæ repensante. Igitur amicorum qui aderant consilium advocat, apud illos amissas opes deflet, perfidiamque aulæ queritur, tam foede venalem. Incertus consilii erat, pareretne revocantibus Constantinopolim literis, an successori armatam manum objiceret: audaciæ veniã à Bizantinis proceribus novis muneribus impetraturus; aut saltem publico suo decori, simulque domesticæ rei, superstes non futurus. Inter has cogitationes furem, anxiumque, seduxit fidissimus amicorum, monet ne quid temere audeat; si restiterit ad mandatam provinciam venienti, id Regem pro defectione habiturum. Nullum in sua gente atrocius crimen esse, quam non modo violentis, sed vel remorantis obsequiũ. Tutius, inquit, consultum tibi volo. Accedenti æmulo etiam cum donis occurre, ne tua benignitas sit suspecta, apud eum querendum est, tuarum rerum spes hac intempestiva successione prope modum esse accisas. Tamen nihil tibi antiquius quam parere. Accipiat sane provinciam cui destinatus est; in amicitiae quoque pignus illa munera, quæ hospitali comitate protuleris: iis satis gratiam habiturum, si in Regiam redeunti literas dederit, quibus significet, nihil te cunctatum, imperium, statim ut iussus es, urbem, jura, provinciam tradidisse. In tuis autem donis strophium erit, inquit, quod habeo, multi operis, sed nocentissima tabe perunctum. Hoc si quasi artificii venustatem monstraturus ad illius vultus explicas, sic ut vel minimo halitu perfundatur, spondeo, nunquam in Alepensi urbe regnabit. Utitur sagacissimi viri consilio Præses, longaque & multiplici pompa exceptum successorem in ædes deducit. Ibi inter insidiosæ liberalitatis blandimenta evolvi fatale strophium, auro & serico distinctum. Lætus hospes suæ mortis instrumentum aspexit. Inde divertunt ad cœnam. Sed hic fraudibus agens, simulabat, primo se mane



mer Bizantium versus ingredi velle. Expressit itaque eadem illa nocte literas suorum officiorum testes: Neque enim tam benevolo decessori iste miser perfunctorie indulgebat. Sic exacta noctis parte ad quietem secessum est. Primo mane novus Præses inspirato per stropholi auram veneno impar fuit. Iacebat in strato exanimis, nec tam repentini casus aliis causa patebat, quam illis qui incautum peremerant. Peracto facinore veneficus Præses, Constantinopolim literas destinavit, tam illas quibus successor significat ut optime esset exceptus; quam alias successoris interitum nunciaturas, orantesque tunc saltem imperium sibi & provinciam prorogari. Nec id ægre impetravit, tanto sceleri felicitatem indulgente fortuna. Et hoc sævo & in flagitium mirabili astu, non plus studium venenorum, miserabili subtilitate excultum, suspexeris, quam corruptos in e agente mores, venundatos magistratibus populos, fas æquumque infra pecuniam positum, & cætera ultimæ tyrannidis mala. Vix ambitus, aut repetundarum actio, viles magnatibus injuriæ, ac pæne indignæ vindicari, quibus vulgus affligitur, diuturnitate servitutis, & instructione parentum, non ausum aspernari jam detectæ sortis cladem.

Non aliud in Turcis magis mirer, quam quod homines immortalitatem animorum tam constanter asserentes, ut his inde vilior hæc vita sit, sibi eorum flagitiorum licentiam faciant, quæ etiam absque lege natura refugiat. Tamen in egenorum ac hospitum opem multorum animi illic effusi sunt. Ad hæc humanæ miserationis opera passim ædes extructæ, in quas ægri aut fessi divertant; ibique constitutæ privatorum testamentis & publico sumptu opes. Nos etiam, quanquam canes & credunt & vocant, non arcent à tanti beneficii humanitate. Ingens in parentes reverentia: & si quando molesti sunt, plus recordatio dati spiritus, quam acerbitas injuriæ valet. Multicibigens, & plus curando corpori intenta quam animo.

Omnis autem libidinis quæ sunt infames, mi-

nor his ipsiſ culpa quam foedo Mahumeti, haſ cupiditates maxime innatas mortalibus, ſed Numiniſ pudoriſq; vinculiſ aſtrictaſ, ſua lege exolventi: Ita allicere placuit militarem quidem populum, ſed ut in Oriente ad voluptates molliorem. Inde hiſ vitiis, tanquam concuſſa remiſſione, exercentur, miſerabili virtutiſ inſcitia. Neque abeſt à libidine crudelitaſ, ſaltem in Principe tam ſuorum ſibi ſanguinem quam opes vindicante. Conſtantinopolim Rex Turca obibat, in proximoſ agroſ venatione decreta, cum ad militiſ foreſ adoleſcentulum videt impudice fractiſ oculiſ vibrantem. Accenſa deterrimi Principiſ libido eſt, rapique & in regiam duci jubet. At miles, qui puero aſſueverat, reverentiam amore vincente, non dubitavit pro ſcorto opponere ſuum pectus, ſtriſtoque gladio irruentes miniſtroſ ſubmovere. Sed quid unus in multitudinem poſſet? Ipſe Princepſ, ad omnem ſuorum contumaciam tam pervicaciſ iræ, tamen hanc amantiſ violentiam in crimen non duxit; illum quoque tanquam in precium abrepti pueri, ruſtico prædio donat; & ſtipendium jubet augeri. Neque mora, viliffimi ſcorti amore Rex flagrare, nec tantum in deliciis habere, ſed & in ambitioſæ amicitiaſ locum. Quod miles cum audiret, eum olim ſibi cariffimum aſpicere inter tantoſ honoreſ concupivit. Doniſ itaque ac precibuſ evicit à cuſtodibuſ qui ſtabant ad foreſ, ut cum Rex in hortiſ veſceretur, clam & à Satellitum tergo ipſum accumbentem ſimulque adoleſcentulum intueretur, (nam & iſ ſolebat regiſ conviviiſ adhiberi.) Conſtituto tempore adeſt. Iacebat Rex in tapetibuſ patrio more, neque procul impuriſſimum ſcortum, & nimio impudicitiaſ precio jam ſuperbum. Inter hæc miles incautiſ forte prodire, ſic ut à puero conſpiceretur, qui veteriſ obſequiiſ memòr, ſtatim ad ipſum curſu deſertur, amplexæque dexteræ oſculum ponit. Princepſ in redeuntem inſiliens, fronte oculiſque furore ardentibuſ, interrogat quo vecorſ & inſidiſ di-

vertiſſet.

vertisset. At ille, ad priorem, inquit, herum, Rex, quem à me saltem oportuit salutari. Haud mora, Rex æmulatione insaniens, brevi ferro quo erat accinctus, sui amatoris perfodit pectus. Sed ut labentem vidit, sequutus in terram, suo sinu vulnus fovit, ingemuitque morienti. Iussus statim miles mori; quasi tanti doloris Principi causa: sed ille inter tumultum elapsus, ipso favore satellitum evasit, latebris, & suorum silentio tectus, donec princeps mitigaretur. Adeo nullius amicitiae nexus tuti sunt à tyrannide tam atroci, nec incolumitatem suam tantum, sed & voluptates, supra vitam suorum civium æstimante.

Arma autem, jam cessantibus Principibus, sub quorum aspectu ingens militum audacia erat, modicis in e agente studiis, nec ex parentum impetu, culta sunt. Prætoriani in urbe regia, quos Ianissarios vocant, desueti jamdum vero pulvere exerceri, in ocio & civilibus deliciis ad turbidam sed gnavam audaciam instituuntur. Hinc solvendæ disciplinæ initium superbis militibus, nec laborem, nec felicitatem pati idoneis. Non aliis vitiis olim everfi sub sua mole Romani jacuerunt. Et illud forte Imperium jam deficientibus ventis quibus alte intumuit, suo pondere vicisq; obruetur. Illi tamen qui Ægypto præsident, maxime ad Memphim collocati, veteris militiæ decus cum ingenti laude obtinent; scilicet ab aula semoti, arcendisque prædantium manibus, qui de montium jugis erumpunt in vallem, in quotidianos labores exerciti. Sed in fugientium latronum agmen fortes, tantumque instare cedentibus; si in nostrorum hominum robur inciderent, fortasse equorum celeritate qua præstant, ad salutem non prælium uterentur.

Sagittarum quæ præcipua Turcis vis, jam neglectus ille usus qui olim formidabilis Orbi fuit credo, quia sine longo sudore, corporisque ad laborem obsequio, ad hanc artem perveniri non potest; & hodie milites fracti ocio, & languente

disciplina, tanti non emunt fortes esse. Breves arcus sunt, inflectique nisi à peritis difficiles, cæterarum multo majore impetu tela expellunt, quam quo machinæ nostræ plumbeas glandes ejiciunt. Vidimus quidem ( & fidem oculis nostris tarde habuimus ) chalybem tres digitos altum ab exigua sagitta pertransiri, nec minoris prodigii fuit, destitutum ferro telum in modicæ arboris truncum arcu impelli, & utrimque defigere. Hanc artem clarissimo apud nos viro, cum Constantino-poli esset, tradidit Solymani vetus miles, confessus illam artem interire suorum socordia vix tres esse in tam vasto Imperio quibus curæ fuerit hanc majorum fortitudinem in se producere cæteris laxos arcus, nec aliis quam levis armaturæ hominibus esse timendos.

Quod si Numinis beneficio, & illorum vitiis uti vellemus, quid hac tempestate facilius quam opimas extorquere provincias à barbara gente, suumque impetum, quem pro fortitudine habuit, dediscente? Hoc gementes sub tam feræ tyrannidis mole expectant à nobis Christiani, immensa multitudo. sed ducibus armisque defecti: hoc nostri quoque ritus, & templa, quæ vesani delevere, hoc de illorum Imperio dejecta humanitas, terræque olim cultissimæ nunc velut informes, nec in sui decoris honestatem, nisi nostris auxiliis, reddituræ. Quod si quem moveant experta toties arma, frustra que exhaustæ divitiæ, dum nostri majores à Saracenorum impetu Syriam, Palestinam, Ægyptum, contendunt vindicare, in Turcas etiam ingentibus sæpe copiis moventes, cogitet, eos magis æmulatione inter se, quam hostibus illis victos. Ut omiserim Principes Græcos, semper infestos militibus ab Occidente venientibus, quoties ipsi inutilibus odiis nostros impetus in nos conversi consumpsimus? Non oportet recentibus exemplis nostri seculi pudorem onerare, ac ne quidem curiose recensere veteres clades. Satis erunt ad doloris & cautionis argumentum, Gallorum Anglorumque

in ejus-

in ejusmodi bellis funesta dissidia. Richardus I I, Rex Angliæ, cui ex leonis corde cognomen est, in Syriam exercitum duxerat, ultusque injurias quas Cyprii intulerant, ad ultimos metus Soldanum adegerat, jam Hierosolyma tradere & sic cum Christianis pacisci cogitantem : Cum ecce Gallorum Rex Philippus, quem Augustum appellarunt, reversus & ipse à Syria, & Richardo infestus, cum exercitu in Normanniam movet. ( hæc tunc Anglici juris erat ) & oppida adortus, quædam vi capit, alia metu aut factione subigit. Sic Richardum, tum publicis Orbis rebus intentum, ad rerum suarum tutelam in Europam revocavit, & tunc Saraceni Gallorum manibus Christiano exercitui erepti sunt ; qui postea Anglis quoque beneficium debuerunt. Quippe vix seculum inde effluxerat, cum Philippus cui cognomen Valesto, Francorum Rex, omni regni sui mole ad hæc bella transmarinæ pietatis conversus est. Aderant in auxilium, Navarræ Rex, Arragoniæ, atque Bohemiæ, multique præterea mortales, quos regni magnitudo, sanctitasque bellicoegerat. Iam in anchoris classis stabat quæ quadraginta armatorum millia veheret. Trium annorum commeatus addebantur : Exercitus terra iturus trecentorum millium erat. Sed tam gravem apparatus, tantamque spem mundi, intervêtit Eduardus I I I, Angliæ Rex tunc primum Franciæ sceptrum, tanquam matris Isabellæ hæreditatem, aggressus vindicare. Sic in nostra viscera acti sumus, & à nobis superati, triumphos Saracenis Turcisque concessimus. Tristissimi quidem hic casus ; sed illorum ingens solatium, nobis adhuc vires esse eruendo illi barbarorum Imperio ; ac ne quidem conjurationem nostrorum Principum in hoc quæri : plures ex illis esse, qui soli huic victoriæ sufficere possint. Non innumero exercitu opus est, nec velis immensum mare tegentibus. Vir insignis iudicii animique, & jam longissimo usu rerum Turcicarum peritus, suo Regi spondere non dubitat, si sibi

classis

classis detur, triginta millium exercitu imposito, in biennium stipendia, in annum commeatus, se eo tempore Peloponnesum, Eubœam, magnamque Achaiæ oram, in illius ditionem redacturum. Ni fecerit, idem exercitus qui sibi committetur, decepti Regis exigit pœnas; vindicetque atrocissima morte temeritatem irritæ sponfionis. Eandem spem victoriæ, pæne nec tanto sumptu, ausus maximo Regi ante aliquot annos dare eximius belli dux, opibusque & sanguine dignus, cui tanta expeditio crederetur. Sed mors illius consilia occupavit, incertum an veneno maturata. Vtrisque causa sperandi, ex nostrorum militum robore, bellique disciplina, tum ex Christianorum numero, atque votis, nostra arma illuc ad se vocantium; denique ex languentibus Turcis, qui fortitudinis famam non alio jure obtinent, quam ob majorum suorum nondum expirantem memoriam. Sed agebant isti Duces, in ipsius hostis sinum jaciendam hanc facem; non tutandis limitibus standum, in quibus summum victoriæ præmium est, hostem à patria submovere, mox sævius rediturum, victis autem, & sua, & patriæ captivitas imminet. Ideoque volebant non in Pannonia nos hærere, sed ingenti procurfu in media Græcia, Thraciave, castra metiri. Hanc in bellis inferendis rationem, plerique veterum inivere. Sic in Italia Hannibal vincebat Carthagini: Sic Romanis in Africa Scipio; sic denique ipsi Turcæ quas gentes nunc obtinent, armis in earum provincias prolatis domuerunt. Neque Galliam Franci, neque Normanni majorem Britanniam, lento bello remotoque velut à limine salutaverunt. In ipsas Provincias irrupere, etiam ante victoriam pæne occupata mercede victoriæ.

Quid quod multa, quæ jam sunt ad hæc bella adjumenta, nostris majoribus defuerunt? Hostem ad extrema Orientis quærebant, tunc primo victoriarum æstu ferventem, quem hodie in ipso Pannoniæ sinu, & in adverso Italiæ littore statim invenias, sciasque, plena, & mox recessura fortuna

tuna senescere, vel ideo quod non augeſcit. Patrum quoque noſtrorum erroribus edocti, ea ipſa quæ in illis expeditionibus peccaverunt, habebimus in melioris diſciplinæ cautionem.

Nunc etiam urget hoſtis, ut pæne in hoc tantum deliberare liceat, perdere malimus, an vinci. Juvenis Achmetus, qui hodie tyrannide potitur, ad bellum reſpexit, & Tranſylvaniæ imminet. Sive laſſus ſuo ocio animum ad hanc expeditionem adjecit, ſive apud ſuos reverentiam paraturus, ingens inde rerum noſtrarum diſcrimen eſt, cum languens apud illos militia his ſtimulis exciſcitari poſſit, & princeps hætenus inter voluptates ſegnīs, ſolicitari victoriarum guſtu, atque inde acrius in noſtram pernīciem ardere. Ajunt Carolum, qui ultimus Ducum Burgundici nominis fuit, primam partem egiffe juventutis non expertem modo armorum, ſed & maxime quietis ſtudioſam; mox Gallia flagrante eo bello cui publici boni titulus fuit, adeo in contrarios motus verſum, ut exinde nullum vitæ tempus habuerit quo à militaribus conſiliis vacaret. Abſit in eodem impetus hic Achmetus conſurgat. Sed quis in tanto periculo non præſtabilius credat arma movere, dum illi nondum veternum excuſſerunt, quam expectare ut uſu & victoriis graves à media (quod abſit). Italia atque Germania, nobis ad unam ſervitutem ferale ſignum tollant? Quod ſi Achmetum ſua luxuries revocabit ad ocium, non à nobis extruſum, non in ſuis penatibus arma noſtra audientem, certe hanc pæne turpem pudendamque ſalutem fortunæ debemus, non virtuti.

A Turcis ad Iudæos abire hic liceat: vel ideo quod poſt Turcas illis ſumus. A Iudæo percunctati, de quibus melius ſentiret, Chriſtianis an Turcis, fuit quo frontem hominis miraremur. In nos enim, inter quos erat, vix auſus inclementer dicere, tamen ſenſum non preſſit: & certe, inquit, Turcæ ſaltem genitalia circumcidunt. Gens eſt vagis erroribus diſſipata, nullius provinciæ potens; acris cogendis opibus, ad omnem mercaturam



turam strenua, & per fœnoris flagitium dives: Ubique sit, servit: & jam domitos animos, quondam ad libertatem tam acres, huic sorti assuefecit. Mores passim miscuerunt, & suæ indoli, cui cum pervicacia adhærent, addunt regionis spiritum in qua nascuntur. Pertinax illis superstitionis ingeniū, & vix in nostram pietatem, quantumcunque simulent, sincere mutabile. Eorum corpora olere non sine argumento vulgatum est. Fœda quippe in ipsorum domibus, vestibisque incuria est, & nescio quid insolens exhalat. In summis divitiis non augent corporis cultum, si-ve nostram invidiam reveriti, si-ve inter sœcuman-tes paritatem. Magnum servitutis argumentum est, quod nec arma nec fundos, possidere concessum sit. Recte vires adimuntur hostili populo, & nospejus, si polleret, mulctaturo.

Iam vero enumeratis populis, & veluti ad censuram vocatis quorum animos moresque cognoscere iis prodest qui in publica luce interque homines victuri sunt, ad varia ingeniorum genera & affectus veniendum est: qui ut unam aliquam nationem veluti suo jure non possident, ita per omnes gentes, vagi, multisque ubique hominibus infidentes, virtutibus vitiisque aut semina aut alimenta suppeditant.

## CAPUT X.

*Præter patriæ indolem, dari cuique mortalium suos affectus, atque ingenium. Præcipua investigari posse, non scribi omnia. De ingeniis ad subito jocos aut sententias valentibus. De aliis, qui spontanea eloquentia diffunduntur. De hominibus tardioris lentiorisque prudentiæ. Perfectos demum esse, qui inter hæc duo genera sunt positi. Virum sint præstantiores animi, qui literis idonei, an qui administrandis rebus publicis. Delicata ingenia assiduo aut diuturno minus apta, quam tarda & depressa.*

**V**eluti sub iis syderibus, quæ multo frigore, humentive aëre, solent candidos cœsiosque populos

populos educare, nonnulli haud secus quam in vicinia Solis fusco vultu inumbrantur: in iis autem plagis quæ nimio Sole flagiantes plerumque spissiori sanguine subjectas gentes tingunt, quorundam hominum candor à patria ferrugine recedit: Ita in humanis populis quædam asperæ mentes rigent: aliæ de patria barbarie nihil habent: crassæ aliquæ in tenui cœlo mentes, tenuisque in opaco: Nec ulla est regio, tam prosperis, aut malignis illustrata sideribus, quæ non omnium vitiorum examen, simulque virtutum, in suis alumnis exceperit. Quippe singulis mortalibus præter patriæ suæ indolem adhuc proprium aliquid Natura concessit: prorsusque ingenti miraculo, per tot secula, & nomina populorum, unicuique hominum sua lineamenta invenit, quæ tam frontis quam animi habitum, à reliquorum corporum, mentiumque similitudine distinguerent. Hinc illius mirabilem ludum, tot hominum affectibus animisque variatum, haud quis facilius cogitando assequetur, quam pictor suis tabulis omnium corporum species atque formas incluserit. Licet tamen, tanquam eminentes in condensis silvis arbores, præcipua ingeniorum & affectuum genera intueri, quibus homines agi solent, ac propemodum componi; simulque à cæteris insigni discrimine separari.

Neque superflua cogitatio erit eo modo percensentis diversissimas hominum classes: in omnibus se unusquisque inveniet, &, qualis esse velit, aut timeat, tanquam ex sequestra & aliena imagine, deprehendet. Ac præterea cum nullius ingenii species, tam lubrico, aut vicino vestigio in vitia propendeat, quæ non facile prudentiæ habentis intra tectum flecti possit; nihil quoque tam cognatum virtutibus, quod non pravitas utentium corrumpat, juvabit affectus, impetusque mortalium suis bonis malisque stipatos contemplari, & quatenus aut noceant, aut prosint vestigare, ne deinde aliquos immodice laudemus, vel supra fas & æquum aversemur.

Igitur

Igitur mortalium ingenia recensenti, statim occurrent extemporaneæ subtilitatis homines: Illi scilicet qui quoties loqui placet, subita ac plerunque festiva oratione per susceptum argumentum decurrunt. Hi si iusto pondere, ut solet, destituuntur, nec studio eloquentes, nec sapientes consilio, sed tum demum cum loquuntur, roganturque, Philosophi, aut Oratores facti, possint uno precio cum mercibus æstimari, quæ per se inanes ipso fuce artificii imponunt. Eorum duo genera invenias, quidam in privatis, & consociis sermonibus regnant, brevi nitidoque acumine, & semper veluti in aliorum ineptiam intento. Alii propius ad eloquentiæ dignitatem perveniunt, quandocumque placuerit, statim torrente ingenii, publice, aut inter suos dicturi, rerum omnium quas viderint, legerintve, oportuna subeunte memoria. Vtrorumque pompas ac faciles impetus mirantur non modo imperiti, sed & interdum qui meliori eruditione imbuuntur, dum ab ejusmodi ingeniis multos jocos atque sententias vident facile ac veluti temere effundi, quas ipsi non nisi anxio & severo labore possent exprimere.

Nam quid illis hominibus (ut ab illis scilicet ordiamur) quorum brevis vivaxque procacitas eminet, magis putes ad industriæ simulque leporis imaginem factum? Quid elegantius quam ad omne argumentum sententiolam habere? quid urbanius, quam omnium dicta, factaque excipere improvisis salibus, vel prudentia, quæ facilis, & nata sub manu, ipsa celeritate placet? Huic venustati si accedit corporis gratia, vel hominis dignitas, & præter hæc non immodica sed securi audacia, regnabit ubique illa jociatio, his etiam non ingrata quos laceffet, & veram exactamque sapientiam, in egregiis, sed tardis hominibus, suo strepitu obruet. Sed hæc loquendi felicitas frequenter suis morbis infesta est. Tolle illos de privato consortio, & à subitis fractisque sententiis, id est, à velitatione prudentiæ, deduc in certamen prolixæ

lixæ orationis, tum sterilitatem egenarum mentium, nec sufficientium ad veram longamque sapientiam, haud dubie contemnes. Quod si & illa, quæ in iis miraris, dicta concisa, & veluti brevi fulgure micantia, scriberentur, ut non abrepto & intercepto animo simul incidant atque effugiant, sed ad maturam iudicii severitatem exigi possint, quam sæpe inania aut inepta viderentur, quæ nunc inani præiudicio, & lepore celeritatis fallunt? In iis igitur hominibus, non altum & perenne ingenii flumen, sed Naturæ impetus aliquis, quæ ut exiguas aquas si in sublimi natæ sunt, & iniqua tellure opprimuntur, quo angustior est exitus, eo majori nisu in altum propellit, ita scintillas sapientiæ statim nisi excipiantur expiraturas, magis vivo sonoro strepitu laxat de custodia parvarum mentium & in hanc tantum abortivam sapientiam feliciū.

Alii autem quibus ita in prolixam eloquentiam fusa ubertas est, ut per inexhaustum spiritum verba utique & sententiæ sufficiant, clari quidem apud populum esse solent, si inter publicos cœtus in foro templisve audiantur. Grati quoque in privato usu vitæ, si tam possint tacere quam loqui. Sed cum omnia animalia id quo potissimum valent, arcano impetu sentiant, & eo uti ament, tum isti maxime sua eloquentia delectati, qua una insignes sunt, haud facile modum tenent, quamcunque rem dicendi libido rapuerit; ut mirari jure possis, in tanta imprudentia tam commode dici posse. Solutis deinde colloquiis, quæ importune produxere, cum illos quos loquendo fatigaverunt lætæ & porrectæ frontis vident, non cogitant ab intempestivæ orationis fastidio dimissos gaudere, sed ut per fusos magnifica voluptate, eo omine sinunt abire, ut si in se rursus inciderint, de eodem cibo gustent. Amplæ hæ mentes, & sponte naturæ per omnium pæne rerum seriè patententes: non tamen exactæ neque tinctæ, aut imbutæ, sed singula præcipiti cursu libantes. Et ut Echo neque postremas quas acceperit voces tenere, neq; quid-

quam ulterius ingenio loqui potest : Ita isti omnium rerum scientiarumque primas species sibi à capaci Natura subjectas , facillime , ac pæne nec cogitantes , admittunt ; aliquid autem amplius atque exactius in earundem rerum studiis aut scire aut velle vix possunt. Ingens quidem argumentum esse crediderim , non iudicio animi , sed impetu & veluti fortuna , tantam rerum copiam , ac indigestam venustatem ab iis produci : quod omnino de quacunque re sermonem instituerint illa pari ubertate huic verborum & sententiarum pompæ sufficiet. Ut vero aliquid memoria in ipso orationis cursu subjecerit , ad hoc illico divertunt , inde quoque in aliam , ut forte inciderit , partem ; tandemque per diversa capita diffusi , non sæpe originis meminerunt , unde universus sermo defluxerit.

Ergo isti vagis animis , nec in certam rem definitis , non summam modo illam , sed & vulgarem inter mortales prudentiam , plerumque non vident. Quidam sui ipsius immodici laudatores , alii nec amicos , nec se ipsos , iis officiis juvantes , in quibus sedulus labor , unique negotio inhærens , aptandus est ; leves plerique , & ut passim volantibus rebus varii , ita nec à sententiis , quas videntur imbuisse , in alias trāsire difficiles. Tamen , ut maximam speciem habent cultæ indolis , & per omnes scientias adornatæ , plerumque ad rem & famam promoventes debita uni sapientiæ bona occupant. Maxime , si ut vim suam intelligunt , ita & vitia non ignorent , habilique velut suco se tegant , ne cui , saltem è vulgo , si aditus ad nævorum suorum contemplationem. Id autem potissimum assequantur , si in loquendo sibi impèrent , neque sinant evagari subditas cupiditates , & , quoniam ut aptissimo ad omnia condimento , ita eloquentia omnia auribus conciliantur , varios sermones cum variis callido deflexu instituant , semperque ejus generis quo audientibus possint imponere : Nimirum apud militares viros , aut ignaros vetustatis de divinis rebus agant , de ritibus

tibus antiquorum, de populorum gentiumque origine; & si quid est præterea in scientiis curiosa venustate spectabile: Cum iis quos lychni umbræq; Scholarum rudiores ad civilis gubernationis disciplinas faciunt, de populorum & Imperiorum fatiis, de Principum genio, disputent. Neminem denique in sua arte laceſſant. Neque enim ingratum, in ſociandis interdum ſermonibus ad res iis qui audiunt alienas, aut ignotas, divertere; præſertim cum & nova nos delectent, & de iis quæ neſcimus quædam nos altior opinio, & reverentiæ plena ſubeat: Minus periculi iſtis oratoribus erit, ubi cum humili & anguſto animorum genere agent, cui omnia quæ audaci lætaque facundia effunduntur, tanquam ſacræ & per Oracula editæ voces, placent. Igitur has ubique partes ſuſcipiant, quas ex audientium ſorte ad ſuam famam eſſe crediderint. Quod quidem ideo facilius poterunt, quia adeo diſfuſa ingenia per cunctas ſcientias atque artes erudiri ita poſſunt. Natura præeunte, & modico forte uſu, ut de rebus omnibus non inepte loquantur; cum tamen ſingula magis non ignorent quam teneant.

Scribere autem ejuſmodi Oratori tam arduum erit, & plerumque ad famam exitiabile, quam facile & venuſtum eſt loqui. Raro enim illi ſpontaneæ eloquentiæ additur viſ judicii, quæ ſtilum perenni gratia ad poſteritatem deducat. Quippe promptus, & pæne turbulentus animus, ubi in ocio, quod ſcribentibus datur, ſe ipſum recognoſcit, ipſa rerum quæ occurrunt multitudine oneratus, & confuſus divitiis ſuis premitur: nec ſcribere quæ invenit omnia, nec quæ potiora ſunt eligere poteſt.

Denique tam diverſa eſt à loquendo ſcribendi ratio, tamque alii nervi, ut qui robuſta facundia aſſueverat quacunque libèret decurrere, jam in ipſa ſcriptione evanidos molitur, & veluti in ſomniis ictus. Cœci tamen ſuæque & aliorum adulatione corrupti, nonnunquam gloriam eloquentia quæſitam ſcribendi cupiditate deſtruunt.

Multo magis è re sua facturi. si longam spem suarum scriptionum facere Orbipossint, nunquam autem editis libris in samæ periculum venire.

His cautionibus, ille vivax & per omnia dissipatus animus subducet imbecillitatem suam oculis populi, & in speciem sapientiæ assurget, sive se regere ipsum possit (quod utique frequenter non videas) sive saltem consiliipatiens suadentibus amicis acquiescat: ut qui prima vini caligine domiti adhuc sciunt nec se sapere, nec monitis familiarium pervicaci sua fiducia obfistunt.

Ex adverso ejusmodi hominum, est aliud genus prima fronte tam à specie suæ virtutis alienum, quam isti eloquentes à vitiorum in quæ nati sunt imagine recedunt. Hi igitur, cum subito loquendum est, tardam ægriusve sequentem orationem habent, hærentque sæpissime blandimentis laceffiti, vel jocos, quæ subiti & expediti ingenii homines in quotidianis colloquiis tanquã levia tela contorquent. Neq; autem sola verba ægre expediunt: sed sicubi etiam dicenda sententia, quæ-runt quid sentiant, neq; statim inveniunt. Verum advocato animo, & in sese ad meditandum reducto, in rerum & negotiorum vim idonea subtilitate penetrant, verba quibus utantur apta concipiunt. Vis in illis recondita, utilesque & veræ, non fucatæ, & ex scholis umbratiles sententiæ, &, si eruditio ipsis accessit, ususque scribendi, plerumque dignissimæ quas posteris ipsi tradant. In hoc vero iis fortuna male consuluit, quod angustis retusisque animis ipsa primorum motuum verborumque specie simillimi, iniquissimo præjudicio sæpe jacent, temnunturque. Ideoque ignota magnitudo ingenii non utique habet semper propitiam virorum principum manum, qua ad dignas sua industria curas & honores tollatur. Veluti preciosissimarum mercium decor, si sine titulo intra viles fasciarum nodos latet, non adducit emptores. Iis igitur hominibus utilitatis plenissima ratio est, viam facere, qua ad sui animi interiora adeatur, nebulasque amoliri quas in suo li-

mine



mine natura stipaverat. Hoc porro assequuntur, vel scribendo (nam quid est aliud tabulam animi proponere?) vel assiduo usu excitando lentioris ingenii acumen, ut quantum est tantum esse sciatur; aut denique quam possunt intima longaque familiaritate cum illis optimatibus semiscentes, qui ut multo usu agnoscere robustæ mentis vires, ita agnitas possunt provehere.

Inter hæc nimii ponderis & levitatis mala, posita indoles, & ad humanæ dignitatis fastigium pervenit; huic modica inest, & tantum cum opus est eloquentia, & si tempus studiumve accedat, venustior, in familiari usu vitæ, prompta & nitida, non hærens & turbata oratio, vis judicii non multum involuta, & quanquam acris subito, tamen post moram & consilium validior. Hic est demum idoneus virtutibus homo ad privatam sapientiam & publicam factus, aut si vitiis fœcundum animum tradet, non quotidianæ nequitiae velut moles, in quamcunque partem incubuerit; perniciosissimo casu omnia affligens.

Ampla autem ingenia ab opacis mentibus velut hac nota Natura distinxit, quod hæc dignitatem suam agnoscant, peragantque omnia liberalius, verecundis quidem, sed erectis spiritibus, semperque diffusum aliquid, & vividæ majestatis contemplantibus: Retusæ vero mentes in angustas cogitationes atque consilia ipsæ se damnent, nunquam ausæ à timida humilitate excedere; In parvis interim, & mensuram sui animi non superantibus, ad ultimam diligentiam exactæ sunt; cum scilicet astus quidam illis ingeniis accommodatus sit, non altus ille aut nobilis, sed ut in exiguis & invalidis animantibus videmus, per dissidentiam suis rebus semper intentus.

Sunt quidem ex literatorum numero, qui sive disciplinis suis faventes, sive eruditionis utilitate (quam eximiam esse quis unquam nisi ex barbaris ignoravit?) decepti, negant aliquod ingenium in magnis numerandum, nisi quod possit literas capere; aut ullum ad justum decorem pervenisse,

quod non illis ornatum sit. In hunc modum homines publicis virtutibus claros, natosque regendis populis, si ad literarum subtilitatem inepti sint à veræ humanitatis & magnitudinis classe excludunt pessimo prorsus suffragio ac errore, aut si mavis insania; quandoquidem è contrario verius dicas, neminem esse civilibus rebus parem, nisi in ipsis naturæ divitiis conceptum; multos autem in umbra scholarum etiam ad laudem pervenire, inanes, & superflui acuminis viros; quippe quorum indoles intra metam nescio cujus scientiæ damnata, calligat ad utilis illius prudentiæ lumen cui omnium literarum disciplina donanda est. Nisi forte non verius sapientia illum amabit, qui augurari in populis motus, & tempestivis remediis occupare poterit, quam in Lunæ, Solisque defectibus doctum, Astrorumque errores, & redeuntes in circulum annivices perpetua contemplatione numerantem. Illi ipsi qui adeo importunis laudibus Musas attollunt, non hunc tantum politum aut eruditum vocant, qui omnes scientiarum partes pari felicitate impleverit: Sed satis est in aliqua modo regnare. Vt si Oratore gregius ad argumenta se ipsam torquentis Philosophiæ ineptus sit, aut si non natus ad Eloquentiam Philosophus, si Historiæ aut Poësis rudis, non hunc ideo à scientiæ, aut præstantis indolis titulis velint arceri. Quam igitur laudem pars disciplinarum aliqua ferre potest, cur ab ista scientia audent detrahere, quæ est in regenda societate hominum posita, cæterisque omnibus quæcunque in humanis rebus sunt antecellit? An sapientiam Græce tantum, aut Latine, ac non potius arcano impetu, & omnium linguarum sermonumque conficio, suis alumniis loqui existimes? Parum est præstanti ingenio nasci, si nihil est aliud quam aptum ingenium ad Academicæ eruditionis industriam esse sortitum. Illi primi quos habemus eruditionis Principes, non in Scholis sudaverunt; & erant tamen propitio cælo nati. Condere civium mores, patriam consiliis firmare, in ritus peregrinos  
intueri,

intueri, quæque inde placebant in suos invehere : deprehendere cœli motus, ne anni spatia ad statos & necessarios gentium usus laterent : Hoc tunc scientia erat, hoc nunc nostri literati scilicet imitari arbitrantur. Quippe illi antiqui dum interiore cura rudes populos student mansuetudini cæterisque conciliare virtutibus, statim facta est civili Philosophiæ origo; dum mutua contentione pro-  
vecti hoc vel illud populo persuadent, primæ eloquentiæ nata vis; Deniq; historiarum monumenta illorum veterum prudentiam, atque astus, narrant hodiernis literatis, tanquam successoribus, si & ipsi molem negotiorum ferre possunt ; sin autem animo non sunt ad res civiles idoneo, tanquam custodibus & ædituiis antiquæ virtutis: nam historiam ad solam contemplationem legere, inanis & ociosa voluptas est quæ absque fructu transit : imitari autem laudatos olim viros, vera & publica eruditio censenda est.

Equidem non negaverim illud demum absolutum esse ingenium, quod ad rempublicam simulque scientias factum sit. Tunc quippe mutuo auxilio hæ dotes se in cœlum ipsæ attollunt. Regit enim literas, ne ineptiant, aut sordescant, sublimis & ad sui seculi morem formata calliditas; quam invicem literæ armant, ne expertis tantum rebus, sui que temporis notitia nitatur, sed peritia quoque & laboribus antiquitatis.

Si quis tamen, ut interdum fit, publicæ luci & juvandæ patriæ idoneus non eadem felicitate à Musis amabitur, nihilominus cellioris ordinis & elegantiae censendus est, quam qui duntaxat argutias umbratilis ludi, & quæ cætera in Scholis edocentur, capere potest, inepto ad civiles disciplinas animo, quæ potissimum usu constant. Adeo ut non per jocum magis quam ex Philosophiæ præcepto Pavorinus scientiam Adriani meritus sit ex magnitudine potestatis. Adrianus Imperator famam scientiæ quærebat, & forte in Favorinum Philosophum inciderat, qui ab eo laceffit-  
tus argumentis, parcius, & ut victus agebat, quos

Princeps impune exultaret. Objurgantibus amicis, quod tam facile cessisset; Male, inquit, admone-  
tis: Nam cur non doctissimum putem, qui habet  
viginti legiones? Hæc non sine argumento Phi-  
losophus: cum ex arte tot legionibus moderari,  
sit altioris scientiæ, quam quicquid exercito, &  
per contemplationem sublato acumine, in scholis  
deprehendas.

Cæterum ut omnium rerum, tum ingeniorum  
maxime pulchritudinem, sæpe sui fiducia perver-  
tit. Multi enim suæ imbecillitatis conscii, id co-  
nantur à laboribus impetrare, quod Natura nega-  
verat, & assiduo cultu animum ita mitigant, at-  
que formant, ut deinde supra illos emineant qui  
ad magna feliciter nati erant; sed suarum men-  
tium robur inconsulte spectantes, laboribus, tan-  
quam supervacuis abstinuerunt. Ingens quoque  
inter hos ipsos discrimen est, qui diligentiae sti-  
mulis exercitæ perficiendo ingenio incumbunt.  
Nam nonnulli quamcunque rem sibi ad labores  
proposuerunt, in ejus duntaxat apicibus summis-  
que fastigiis occupantur, ad minora, ac interdum  
necessaria ne cogitationem demittere quidem pos-  
sunt. Alios adversus error habet, qui veluti ac si  
quid à tergo suspectum aut inexploratum relin-  
quant, adeo exigua quæque scrutantur, adeo quic-  
quid didicerint scire volunt, ut nec progredi in  
destinata studia multum possint, nec ad veram &  
liberalem hujus rei quam tam superstitiose am-  
biunt cognitionem pertingere.

Sed nec omnibus præterea ingeniis vis eadem  
ad laborum patientiam, & diuturnitatem, con-  
cessa est. Nam quo subtilior est animus, & in acu-  
men magis factus, eo quidem sibi facilius in impe-  
ditas res viam facit, sed & citius aut magnitudine  
laboris aut longitudine hebescit. Quippe ejusmo-  
di mentium custodiam habent non opaca corpo-  
ra, sed aptata accipiendo cœlorum haustui, mean-  
tibusque sanguinis & capitis spiritibus laxata, qui  
ut aciem subtilius expromunt, ita sua tenuitate  
vanescences, solo ocio & ludo reparantur. Ejus-  
modi

modi vero hominum non modo ipse labor, sed & preciosum ocium ideo erit, quia egestis mentibus novum robur sufficit, ac plerumque solutum, & huc illuc errantem animum altis seriisque cogitationibus implebit. Velut pinguium camporum felicitas, dum cessat à cultu, interdum in plantas sua sponte luxuriat nulla hortorum venustate deteriores. Ita Cosmus Medicæus, idoneus prudentiæ author, sensit, ille conditor florentis hodie in Hetruria dominatus. Placide, & veluti incurioso ocio in altam lucem acquieverat, cum unus forte ex amicis supervenit adhuc inter somnum vigiliamque marcenti: &, ubi, inquit, ille Cosmus, cui tanquam Argo Rempublicam credimus? de die ne quidem oculis utitur, ego quidem rebus meis jam in foro operam, jam domi meæ dedi. Ad hæc Cosmus, an autem putas, inquit, meam diligentiam antevenisse, cujus quies operosior atque utilior tuis laboribus esse solet?

Quidam tamen exempti sunt huic fato, quod eximios à diuturnis laboribus arcet. Pauci illi, & tanquam charissima munera, rebus publicis à Natura donati, qui scilicet altum & penetrabile ingenium in prolixam sedulitatem demittant, non assiduæ moli impares, non diverso negotiorum vultu confusi, adeo ut nati ad imbecillitatis humanæ subsidium rerumque communium tutelam videantur.

## C A P V T XI.

*De fortibus animis: Temerariis, Timidis, Superbis, Sordidis, Languidis & reconditis, Hilaribus, & exertis. De inconstantibus ingeniis, omnia acriter, sed non diu volentibus.*

**I**mpavidæ ad pericula mentes, sui que securæ, ita in hominum societate eminent, ut in campis, coronisve, tori, ac tumuli, cæteris partibus per intervalla superstantes. Est autem illa indoles inter boni malique confinia pari discrimine consti-

tuta; nihil ex se iis quos infedit ministrans, præter impetum, quo insignes sint, siue probis esse placeat, siue ad flagitia divertant. Nam utrimque temeritate, & fortitudine, cognatis quidem, sed dissimillimis affectibus, sollicitantur illi homines in virtutis & vitii partes. Temeritas pæne eadem specie atque vultu cum fortitudine est; adeoque sæpe fallit, ut ipsi qui magnorum hominum censores se faciunt (quod iniquissimum putes) plerumque ex solo eventu eam æstiment. Quot ex vilissimo militum sanguine, quia superfuerunt contemptis periculis, ad scientiæ bellicæ famam, eique destinatum fastigium, creverunt? Alii vecordiæ accusati, quod in eodem consilio, & iisdem periculis, occubuerunt. Tiberius Gracchus dum amore populi, proprioque ambitu, ferendis legibus incumbit, Optimatum conjuratione sublatus est. Eodem fato Cajus frater opprimitur. Ergo illi (inquiunt) inconsultæ temeritatis viri. C. Cæsar popularitate, & largitione vulgo acceptus, ad summum potentia pervenit. Illum ideo dixerint fortis sapientiæ virum. Agis Rex in Ephoros contentione provectus, Lacedæmone vilissimo laqueo extinguitur. Cleomenes audet cedere Ephorum regiam dignitatem sancire; casu an virtute, rem utriusque existimes verti? Sed hoc maxime. Alexander composita jam Asia, exercitus partem continendæ Europæ destinat; aliam, nequi motus in Asia existerent, apud se perseverare jubet. Ignari milites quo Rex consilio suas copias divideret, una face, & publica accenduntur ad tumultum. Aspernati Imperium, non Alexandri conspectu, non voce terrentur. At ille, siue consilio, siue iracundia ferox, è Regia sede in furentes prosiluit, & eos qui loquenti pervicacissime obstrepuerant ad supplicium ipse rapit, eadem majestate in plebendis iustutus, qua in mulcendis vix fuerat. Ex consternatione militum potentium minas, hoc consilium in virtutis famam ivit. Galba autem Imperator, dum compescere milites studet, haud

haud paulo remissius, ut videbatur, quam sub Alexandro agentes, in medio foro confectus est. Fortitudinem, an temeritatem appellaveris? Adeo vicina, & pæne confusa ratio, hanc virtutem vitio miscet: aut ut verius dixeris, interdum cogitur fortitudo ad eadem consilia in quæ temeritatem furor impellit, tumque ægre à vitii suspitione expiatur, nisi vel felici successu sibi reverentiam favoremq; conciliet, vel ille qui ad hanc ineundorum periculorum necessitatem adigitur, longæ prudentiæ sanctitate meruerit, ut extrema remedia, & temeritatem imitantia credatur non temere, sed ex præscripto iudicii usurpasse.

Igitur hunc affectum, cum non satis sibi cavet, severa atque atrox sui fiducia corrumpit, fastidioso velut nutu cuncta despiciens, superbix quoque malis infestus est: In jactationem ferme proclivis, nec placere, aut odia saltem effugere, satis curans, per insanos impetus præceps, donec indulgentiam fortunæ, & temeritatis felicitatem consumpserit. Cum vero tenere modum potest, tunc in virtutem clarissimam evadit, & magnitudinem animi in hoc tantum attollit, ut salutis vitæque discrimina leviora existimet quam deserti officii infamiam, vel prodiæ per ignaviam pietatis. Quod si quis præterea illam vim intrepidæ mentis mansuetudine adornet, & iracundiam possit arcere, (quæ plurimum ejusmodi ingeniorum robur stipat) tum vero eximii in omnem partem consortii erit, & in ipsa formidabilis pace, id quidem ab indole habebit, ne absque cujusdam horrore reverentia cum eo quisquam agat, à moderatione autem sura ut etiam diligatur.

Est aliud adulterinæ audaciæ, sed tutioris genus, & in quo grassari intimæ humilitatis spiritus possint, cum aliquid non nostro sed alieno periculo audemus. Huic propemodum nihil cum ea quam describimus indole, præter appellationem, convenire existimem, tamen haud raro immeritis hominibus ad gloriam & præconia sufficit. Nec alii eam propitiam magis habent, quam

Præse-



Præfecti militiæ, & qui medicinam profitentur, hi militum, illi ægrorum periculo inclyti. Et vero quotusquisque non Principum tantum, sed ex Tribunorum aut Centurionum numero, gloriam suorum sanguine non quæsit? Tristi quidem militum fato, quorum laudes unus intercipit, excusabilis tamen consilio mortalium; cum publice interfit incolumes duces esse, quorum sapientia sæpius hostem quam armatorum impetus evertit, militesque in hanc sortem scribantur, ut emptas stipendio animas, ubi utile erit, Republicæ reddant. At Medicos non Pater Æsculapii Apollo, non satis cum Apolline Musæ excusent, Illos dico, qui ad opes & famam præcipites, non officii sanctitate, aut sociæ mortalitatis generisque affectu, satis ægris placantur; sed eos veluti destinatas suæ gloriæ victimas habent, securo scelere, ideoque & frequenti. Inexperta & suspecta remedia illorum quos curant periculo usurpant, non contenti suæ artis documentis non præcepto antiquorum, sed vetustatis accusatores, & si illis crederetur novæ arti suum nomen daturi. Si hoc modo temeritatem fortuna adjuverit & remedium ab illis, in mortem, aut in valetudinem (nam & utrum sit ipse nesciunt) propinatum, vel forte, vel concedente jam morbo, vel ipso robore ægrotantis profuerit, statim fama velut certæ ac propemodum divinæ scientiæ in vulgus emanabit. Et hanc unius sanitatem sua pernicië plurimi luent; his Medicis jam audacius, & cum pereuntium plausu peccatibus. Sed tristis istius audaciæ non ab illa indole origo est, quæ erectos homines, & sive temerarios, sive fortes, ad acrem & interdum turbulentum impetum agit: quippe audacia aut fortitudo est, in suo periculo non terri, in alieno timere, humanitas.

Ex adverso secuti atque intrepidi animi, ingenium timiditatis consistit: quæ ut nonnunquam ad probitatem facta est, ita sæpe in vitia deflectit. Si enim in ignavos affectus omnino transierit, qualemcunque securitatem amans, tunc inepta

virtutibus, nec privatis aut publicis utilis rebus, in vitium illudque foedissimum, degenerat. Quos autem hæc imbecillitas fregerit, scire, nisi cum pericula instant, idcirco est arduum, quia sibi conscii turpissimi metus, diligenter illius indicia tegunt, etiam adornatis ad audaciam verbis, & discrimina quodammodo laceffentes, cum utique illa absunt; Cæterum injurias, contumeliam, cladem, quam timere tam pati idonei; ad omnem speciem minantis fortunæ horrescere; neq; hæc mala, quæ tantopere metuunt, forti constantique studio, sed dejecto ac ignobili, declinare; virtutem singulorum atque vim, ne quidem tentatam, expertamve, supra suam timide ducere; cunctosque & odisse, & invita ingrataque apud se veneratione mirari. Cum impune autem licet, effusi in crudelitatem; sive quo audaciam simulent, sive foeda & angusta natura in vindictam imminente, denique futurum timorem occupantes, subrutis quos metuere in posterum posset. Benigni tamen vultus sunt, & ab innata ferocia dissidentes: Vt Syrtibus arenisque similes esse credideris, quæ brevibus ac placidis undis tectæ, tamen ventorum impatientes in immensum subsidere solent, & haurire calcantes.

Sed maxime, ubi Principis animus huic ingenitæ formidini damnatus est, servis aut civibus suspecta esse debet illa animi mollities, placere quidē querens, sed nec sibi, nec aliis vel tuta vel felix. Nam & velut in vindictam contemptæ Majestatis, pæne videas tristissime hos perire, qui captivo timentis domini ingenio audent illudere: Et ipse licet ingenito pavore perculsus, quos veretur suspiciat, licet indigno permulceat cultu, eosdem tamen odit, interdumque velut ab effractis ergastulis totus erumpit, tam subito & inconsulto turbine quam se foede illis ante permiserat. Servos autem aut cives illa timendi indole esse imbutos, interdum magno momento est ad securam regnantis majestatem. Tunc vero neque illi nimis solute habendi sunt, ne se timeri putent, neque  
etiam

etiam crudis aut importunis imperiis laceſſendi, omnino ſpernendi, quia etiam de pavidiffimis hominibus acris multitudo cogi poteſt; ubi tumultuantibus univerſis quiſque non ſua ſed ſociorum fiducia omnia audet.

Siquis autem ſic in timiditatem natus eſt, ut fortitudinem tamen accerſere conſilio ac prudentia poſſit, eaque cum opus eſt, ſuos metus temperare, is non modo à vilitate recedit, ſed & ingentem laudem habet, quod imbecillum affectum, & ſæpe noxium, in virtutem coëgerit. Inſigne pavoris exemplum cui hæ robuſtæ virtutes acceſſerant, fuit Patrum noſtrorum memoria vir egregius bello, & cui multum arma Gallica debuerunt. Strenuus manu, ſummusque conſiliis, tamen in ipſo pugnarum articulo, cum in conſpectu hoſtes eſſent, plenus obſervantis periculi imagine, adeo ſolvebatur, ut etiam ſecreto indigeret, quo ſeſe ſubſidentibus alimenti reliquiis, ſimulque pavore, exoneraret. Collectis deinde ſpiritibus, ea erat producendi milites ars, tantus ardor dimicantis, ut dubitates Ducis partes, an militis enixius obiret. Ad extremum etiam vitæ, clara illius, ſed miſerabilis virtus, oſtendit non ſemper à fortitudine triſtem illum pavorem divertere. Quippe ferale certamen ad Ticinum, quod Franciſco Rege capto pæne ſpem Italiæ Gallis eripuit, iſtius quoque ducis ſanguine funeſtum eſt. Prædie cladis Rex advocato conſilio, ipſe quidem pugnæ avidus, tamen ſuos ſententiam dicere juſſit. Iſte ſenex magnopere ſuadebat ut auxilia expectarentur, quæ accita, & jam protinus adventare conſtabat: non in diſcrimen, præſertim non neceſſario tempore, in alieno quoque ſolo, res ſalusque Gallorum conjiceretur. Non de gloria modo Regis, ſed incolumitate agi. Aderat in eodem conſilio acer juvenis, ſed turbulento impetu pugnam incipere quam in ea perſeverare magis idoneus. Is nihil præſtabilius aſebat, quam ut armis victoriam (nam nec de ea ambigendum) quam primum occu-  
parent.

parent. Nimum honorem hostibus habituros, si à tanto Rege, & tam alacri exercitu timerentur. Ipso Regis nomine jam paventesturbine Gallici equitatus proculcari satis posse. Adjecit in hunc Ducem, nihil mirum, si & senex, & pavidus, cunctari juberet, cui animus solitis terroribus quateretur, jam etiam sibi per illa quærentibus viam. Non tulit ille vir immodici joci procacitatem; & . Ego vero, inquit, quandoquidem Rex pugnare decrevit, cras non obscura morte in illius oculis defungar, tu vero temeritatis & audaciæ oblitus, hoc certamen, quod verbis jam accendis, turpi fuga destitues. Hoc triste vaticinium uterque implevit. Quippè juvenem terror ab acie abstulit; & alter quem promiserat sanguinem in conspectu Regis præclaris vulneribus effudit.

Hæc igitur cauta, ac modesta timiditas, non modo prudentiæ jungi potest, sed & illius interdum magna pars est, utilitatis quoque plenissima, cum in eos incidit; quorum nimiam, nec in modum coercitam, audaciam Respublica luere posset. Qui vero suum ingenium ad formidinem factum hac justa & salubri arte regere possunt, ii plerumque mitissima humanitate adornantur; blanda simplici que pietate verecundi, neminem lædere gratuitis injuriis sustinent; etiam in vilissimis hominibus, aut ultima egestate damnatis, ipsam animorum & mortalitatis communionem venerantur. Sed & magis sibi quam aliis hoc insito pavore molesti sunt. Nam & tacitis secum ipsi consiliis laborant, ægrum animum. & non sponte terroribus raptum, virilibus præceptis componere; palam autem, neque decorum arbitrantur hos timores fateri, neque ex inquietæ formidinis impulsibus quicquam amant, sive suum, sive ab amicis commissum, ministrare.

Aliud ab audacia, aut timiditate est, sed veluti in illorum fatorum confinio, superbum animum, sordibusve dejectum nancisci, Superbia pessimi ingenii

ingenii fomes, funestis ac multiplicibus vitiis in diversa prorumpit, odii, amorisque, & super omnia invidiæ suppliciis obnoxia: Nec alii magis anxii aut perpetui motus sunt, quam hominum non tam quærentium laudem, quam hanc sibi deberi credentium. Et contemni se facile suspicantur, & hanc aliorum, ut putant, contumaciam, in se acerbissimis curis vindicant. Iam sua vitia nesciunt, jam virtutes aliorum. Ita captis, pietas, fides, & quicquid in hominibus sacrum, infra famam honorumque cupiditatem jacet. Quantumque successerit, nihil illis in quietem est, sed in novas spes, pejusque animos diducturas. Sed atrocius supplicium non est, quam cum superbia hominem pavidi ac muliebris animi subit. Tunc pudore scilicet atque metu cohibetur insana cupiditas, interimque, per tumorem anxium seque celantem, à seipsa exigit poenas. Cæterum hæc indoles amicitii inepta, & ubique ingrata est, nisi cum fortasse Superbiam crassæ aut territæ vulgi mentes pro erecti animi magnitudine venerantur.

Vide artem & sordidæ humilitatis ingenium, ut nihil magni curat, ita nec aliquid ducit indignum quo suo suis cupiditatibus obsequatur. Cudit autem oculi inertiam, atque languorem, & veterum voluptatum, vel opibus inhiat, tristissimo ardore, & tam partis quam quærendis non utente. His ut plurimum moribus ferri solent abjectæ illæ mentes. Si ad tempus sublimibus excitantur consiliis, videnturque rationi annuisse, statim naturalitè torpore suis sordibus redditæ jacent. In hanc indolem moresque dejecti, non ad imperandum nati sunt; ac ne quidem commodos ad obsequia credideris, cum illis cæterorum virtus invisa sit, quam non amant, capiuntve, quærantque libertatis licentiam, quæ inter sordidos & angustos affectus nullo objurgante marcescant.

Sed vitiis sæpiissime favemus, & in virtutum nomen, quæ proximæ illis sunt, adoptamus. Ita temeritas interdum pro fortitudine colitur, & superbiam erectæ virilisque indolis titulis admiscemus,

scemus, transitque hoc fœdæ humilitatis ingenium in humanitatis colores, & veluti rectæ Philosophiæ simplicitatem. Nulla tamen ingenia pejore judicio solemus æstimare, quam exerta, & semper aliquid velut temere agentia. His enim tantum à modestia abeuntibus; ut plurimum levitatis infamia adhæret: è contratio autem languentibus, & reconditis mentibus, sapientiæ quædam imago populum conciliat, utrinque non modice, sed nec sine argumento peccantem. Aperta igitur, & vigore perpetuo excitata ingenia, non arcanis odiis, non fraudibus satis idonea, ac ne quidem ut plurimum ea procacitate cæterisque vitiis, quorum imaginem referunt, infesta sunt. Quippe in illis magis subitus loquendi aut innoxie lasciviendi impetus viget, quam in vitium provisa consilia. Ocium parum ferunt, siue magnis occupentur, siue levia placeant, serio semper intenti. Ita sordes, quæ segnibus animis per torpentes cogitationes subrepunt, illa sedulitas solet effugere, jocos ne in amicum quidem tenentes; sed plus in illis extemporaneam voluptatem quam ullius injuriam amant. Nam inire amicitiam faciles, nec solvere; illiusque dulcedinis impetu non ducuntur, quæ plerosque in rerum aut hominum novo usu vel consortio, tanquam inusitato gustu, blandissime percellit. Rei cui incubuerint, si non exactam manum summeque felicem attulerint, saltem ex suo genio nescio quid quod placeat transfundunt; maxime quia quod agunt, non anxio labore perficitur, sed ipsa facilitatis gratia eminet; velut spontaneo naturæ ingenio in suum decorem productum. Si quid in litteris quoque tentaverint, nimii sudoris opinione legentes non offendunt, qui in laboris partem pæne videntur cum illis autoribus venire, quos constat non sine unguium vulnere, & pervigilii malo, invitas sententias, aut verba, coëgisse.

His ingeniis nullo fuce obductis, semperque quid agant ( nisi multum intersit colari ) ingenua

confessione prodentibus, ex adverso constituta  
 est indoles, arcano pondere, velut prudentia,  
 suos sensus & animi libidinem tegens. Et his ho-  
 minibus haud pauci nomen virtutis, ac indu-  
 striæ, nihil ultra exploratis ingeniis, concedunt;  
 quoniam ingens modestiæ imago est, parce, nec  
 aliter quam ex præscripto verecundiæ loqui,  
 ad omne vitii nomen supercilium ducere, nemi-  
 mi, saltem palam & professo odio, contumeliam  
 aut facere aut referre. Quid denique propius ad  
 ampli ingenii specimen, quam videri recondito  
 nec cessante commercio cum sapientia loqui? Ita  
 enim dixeris factos, qui in istam quam describi-  
 mus lenitatem, & solitaria consilia, producun-  
 tur. Sed hæc lenta gravisque tranquillitas ingen-  
 tes latebras habet, quibus etiam vitia excipiat,  
 quorum ne nomina quidem ipsi publice audiant  
 absque pudoris horrorisque indicio, (teneras e-  
 nim frontes, & suis animis dissimiles habent.) Il-  
 lud tacitum, intraque se detrusum cogitationum  
 examen, non potest continuis studiis in virtutis,  
 aut industriæ laboriosam imaginem intueri. Nam  
 cum omnium hominum impetus à labore in ju-  
 cunditatem voluptatis declinat, tum vero præ-  
 cipue istorum, quippe mollioris naturæ, & ad  
 muliebrem lenitatem accendentium. Hinc om-  
 nium voluptatū ac vitiorum genera illorum ani-  
 mis subjicit hæc frequens & ociosa solitudo: cui  
 foedissimæ contemplationi ideo securius acquie-  
 scunt, quod sic impune liceat sibi unis consciis ef-  
 se, palam autem non multum operosa pietate, sed  
 ad cæterorum credulitatem idonea, virtutem ad-  
 orare. Sed neque hos semper in sapientiæ, ac ne  
 quidem in vitiorum imaginem esse defixos existi-  
 mes, plerumque tardianimi ideo hærent, quo-  
 niam ininus apte quod loquantur inveniunt. Ipso  
 interim vultu, & nescio quo silentio, seu si mavis  
 pondere, (quo ut gravissimi hominum ita pecu-  
 dum insulsißimæ nutant) integritatis laude & in-  
 dustriæ censentur.

Est aliud ingeniorum genus, pæne cætero-  
 rum



rum omnium discrimina, mira quidem, sed illaudabili varietate complectens, tamen in primis egregium si quam illi impetum tam frænum natura addidisset. Illud est hominum, ut quique affectus impulerint, ad extrema ruentium. Si pietas serio illis placet, & Numinis cultus, quasi nulla hilaritas intercedere tam sanctis officiis possit, fronte dejecta, & ad omnem remissionem irascente, supercilium induunt non duraturæ sanctitatis. Alienæ etiam vitæ superbi censores, cæterorum probitatem ex sua extemporanea severitate metiuntur. Tunc priorum amicitiarum delicias solent abjicere; etiamque innocentem jucunditatem non ferunt, quæ in sapientium vita ad oblivionem vel patientiam laborum solet interferi. Mox nimia intentione fractum animi robur, ubi odisse incipit hanc ipsam cui inconsulte incubuit pietatem, non per gradus & reciprocantis æstus vices, sed in contrarium acto torrente, repetit quem omiserat luxum; Tunc vero tam immodice in voluptates solvi, quam eas inepte refugerant, tunc etiam ipsum nomen severitatis odisse, jocisque, & omni libertate cultoribus subhorridæ illius pietatis, quam modo reliquerunt, illudere. Dum hæc agunt, ecce tibi, revocata pietas adest, tristisque pœnitentia lasciviam rursus expellit, donec etiam illius pœnitentiæ inceperit pœnitere. Nec in Numinis tantum cultu frequens illa, atque immodica mutatio; ubique pari impetu errant. A summi amoris consuetudine eos in extrema odii velut aliquis turbo agit. Nunc assiduus labor placet: statimque sine nervis segnities. Iam miteliterarum studium, jam amorum exultans cupiditas; & quæcunque præterea in contrarios motus mortalium mentes agunt. Loquendi etiam tacendique studium non satis adgubernant: Si incitantur fervore dicendi, quemcunque cœtum iniverint, sermonem universis præripiunt solique audiuntur: Mox hilaritate destituti, quæ in verborum luxuriam diffuderat mentem, ægro silentio contabescunt; se-

cumque velut ad internum colloquium collecti, ita lumina defigunt, ut vix præsentem agnosce-  
re, aut rogati audire videantur; Pari utrobique  
flagitio in humani consortii venustatem, in quo  
& commode loqui & tantum per spatia tacere  
conceditur.

Illis autem hominibus tanti erroris causa est,  
quædam interna suavis cui se totos permittunt.  
Hæc auspice, qui fugiant aut sequantur consti-  
tuunt. Et is motus in quamcunque rem istos agat,  
etiam curis aut labore plenissimam, eam primum  
blandissima specie fictam animo offert: quem mox  
dulci amænaque violentia victum rapit, & om-  
nia credere sibi cogit. Vbi autem ille fucus eva-  
nuit, & hæc mutabilis ac fugitiva dulcedo se in  
aliam partem vertit, hanc etiam isti sequuntur.  
Sunt enim non tantum laboris impatientes, sed  
& ipsius voluptatis, statim ac lenocinium istud  
abest blandientis intra pectus cupiditatis. Est au-  
tem hæc læsi, nec se regentis iudicii, nota: In-  
doles facta virtutibus, sed tantum ad virtutum  
initia: non ad fidem, non ad amicitiam fortis, sui  
dissimilitudine prorsus ingrata. Nec sibi impera-  
re, nec negare quicquam potest. Tristissimum au-  
tem fatum est, & populis grave, si quos natura in  
hanc infelicitatem ediderit, iidem extra metus, &  
propemodum verecundiæ leges, ad imperandi fa-  
stigium producti sint.

## CAPUT XII.

*De animis Amori obnoxiiis. Hos affectus singulorum tempe-  
rari, & interdum mutari, à fortuna, & vel splendida vel  
obscura vita conditione.*

**S**ed in recensendis mortalium affectibus, præter  
fas ac humanitatem esset Amoris oblivisci, qui  
in omnium animis, nisi prorsus barbaris, regnans,  
tamen quosdam vehementius suis curis imbuat,  
sibi que propius addicit. Est autem blanda & ir-  
requieta cupiditas, iis ipsis placendi, qui nobis sive  
forte,

forte, five sua virtute, five nostro denique errore placuerunt. Et iis quidem, velut insidiis, ita irrepit, ut nos ante sentiamus amare, quam instituerimus de amando consilium. Neque arduum in ipsis initiis esset excutere tantum pondus; nisi sensim neque sine suavitate incumbens ita eos ipsos suis lenociniis caperet, quos affligit; præsertim inexpertos, ut putent inhumanum facinus fore, sibi-que omnino incommodum, si influentis mali dulcedinem ausint à se severo imperio arcere. Hoc autem affectu, si institutio recta accesserit, nihil in mortalibus magis eximium. Namq; & omnibus virtutibus quandam ex se venustatem concilians, interdum ipsa vitia excusat. Male nihilominus severi homines Amorem averfantur, eumque fœda & enervi imagine sibi fingunt: quo nihil in humanis rebus syncerius, modo in justis limitibus, & à virtute factis, ardens, non etiam suo incendio quæ vetantur corripiat. Neque in adolescentibus tantum, aut maturæ ætatis hominibus, blanda illa cupiditas concitatur; sed & pueros in innoxiiis sollicitat annis, ut intelligas hunc ignem dignis pectoribus pæne non tam accedere quam innasci. Et quoniam minus se regere, curisque, etiam supervacuis, moderari pueri & adolescentes possunt; ideo magis anxia in ipsis hæc sollicitudo solet incumbere. Indeque illis animus ad eximia confurgit, & suam ætatem supergressa; tanquam ipsis hoc experimento probaturis, an digni sint qui jam ament. Adolescentulus quidam in Scholis agebat, multa cura monitisque magistrorum in pares suæ ætati disciplinas sollicitatus. Sed ingrata litteræ erant ludi ociique libertatem amanti, cum ecce ad idem oppidum forte matrona nobilis, cum duabus ex se natis virginibus divertit; & quoniam necessitudo inter utramque familiam erat, statim iste in diversorium mulieris, ad salutationis officium, deducitur. Nec mora, cum alteram ex puellis intentius mirari, mox inhærere sermonibus, ad extremum eodem ipso die efflicti amare. Tum primum rudis & solutus animus ad

curas adactus est. Itaque postero die repetit ignoti vulneris conscium locum, & ægritudinem suam diu protracto colloquio ita pavit, ut deinde pejus doleret. Nam ut tertius dies illuxit, Matrona cum omni comitatu profecta pæne vivum adolescentulum non relinquit, cui, ne aliquod solatium haberet, premendum quoque erat tanti incendii malum, ne vel parentis supercilium cogeret, vel inter æquales traduceretur. Diu intra se collecto consilio, nihil utilius vidit, quam ut studiis literarum totus incumberet: ita quippe parentem conciliari sibi posse, qui non tantæ in studiis diligentiae suum ludum negaturus videbatur. Ab hoc igitur, in recte collocati temporis præmium, veniam exorare statuerat, visendi celebrem in proximo urbem. Ea erat in qua puella habitabat. Hæc non perfunctorie agitantem, maxime præceptores, æqualesque mirari; subindeque requirere, quæ illa animi mutatio, quis subitus ad litteras ardor, paulo ante ipsum scientiæ nomen fastidiosè damnantis. Quippe adhuc quiescentibus cæteris in studia surgebat, nec aliter quam sæpius jussus secedebat ad ludum. Amoris impetus, cui hæc diligentia dabatur, ita sensum laborum mitigabat, ita Musas adornabat, ut nec cogitans puer illarum dulcedine caperetur. Mox, ut solet, in ejusmodi præcipue annis, cum conceptum de puella judicium, & quicquid ille ignis infanienti subjecerat, longiore absentia jam torperet, hæsit acris sciendi cupiditas; & ipse liberalibus stimulis serviens adeo in hæc Musarum studia subvectus est, ut deinde litteræ huic etiam non pauca debuerint.

Cæterum pertinax Amor, nec qua reliqui motus facilitate sanabilis, nisi in cunabulis pereat, vix aliter submoveri quam tempore potest; dum lassus scilicet expiret. Cum enim in cursu est, semper habet quo sui Imperii atque jugi fastidium tollat. Nam si amanti per ægritudinem, malorumque perpetuam facièm, aliquo modo successerit, omnino sibi crudelis videbitur si illam amœnita-

inœnitatem à se velit abigere. Siñ vero fortuna severior aut spem in longum produxerit, aut hanc quoque sustulerit, tunc etiam dolor placet, & si-  
bi ipsi miserabilis animus suam cladem inter sus-  
piria recognoscens, liquefcit in delicatæ tristitiæ voluptate. Sed maxime tectus ignis duraturo spi-  
ritu viget, siue furto inter duos jurato ipsa secre-  
ti & conjurationis dulcedo placet, siue ne mu-  
tuus quidem amor sit, ipso duntaxat supplicii sui conscio qui sentit se ardere. Nec existimes, in di-  
spari tantum sexu hunc affectum convenire. Nam  
& Alcibiadem Socrates amavit, nec Lyncurgus in  
turpem instituit disciplinam ne quis juvenum  
suo amatore vacaret. Pudicitia Naturæ ad justos  
& egregios amores ducentis sæpe hæc discrimina  
non videt, multosque ex probissimis cernas, ipsa  
juvenum cura, id est, si rectam rationem poni-  
mus, amore macerari. Et hic amor, est quidam  
benevolentia nexus, quem amicitiam, sed arden-  
tem appellaveris; tum morum in iis quos ama-  
mus formandorum studium; perpetua denique  
vota pro eorum gloria ac salute, etiam quicquid  
egerint ne non succedat, timor: & semper quan-  
tumcunque fortuna indulserit, visa illorum vir-  
tutibus esse iniqua. Acris illa est, neque minus  
irrequieta cupiditas quam quæ venustatem alter-  
ius sexus in licentiores usus conciliat. Sed nec  
putes eximiae castitatis exempla inter disparis se-  
xus amantes durare non posse. Licet res pericu-  
li plenior eos ipsos sæpissime fallat, qui paulatim  
se invitis, vel nesciis, aliter amant quam aut ve-  
lint aut credant.

Est autem hominis animus, quem ad aman-  
dum natura produxerit, præcipue mitis, ipsoque  
oris habitu modestiam & simplicissimæ virtutis  
speciem gerens, clementibus magnisque spiriti-  
bus factus: neque vindictam contemnere, neque  
iram supplicibus donare difficilis, cum quid ip-  
se peccavit, in pœnitentiam pronus, humanita-  
tis officia amans, impatiens ocii, & omnium  
quæ in segnitiam solvunt: modo non, tanti

muneris oblitus quod à Natura accepit, suæ indolis felicitatem lasciviæ malis, & veluti veterano, corruperit.

Vanum esset totum Naturæ ingenium in mentium humanarum multiplici sorte ludentis persequi velle. Quæ hic tamen posuimus, præcipuorum fontium instar sunt, unde mox rivuli in vitia & virtutes secantur: ut ex eorum notitia intelligas qui homines regi possint, qui ad amicitias & consuetudinem vitæ apti, denique qui timendi, aut infracurarum gravitatem sua inertia, vel etiam levitate, ponendi sint. Quippe probitas, atque nequitia, veræ aut fucatæ sapientiæ indoles, liberalis etiam & angusta, & quicquid in rebus publicis privatisque potissimum eminet, per horum affectuum fortunam generi humano dividitur. Ex hac autem contemplatione animorum, iusta quædam virtutibus & vitiis merces accedit: Nisi enim curiose in hæc Naturæ penetralia spectemus, sæpe se turbulentum ingenium pro forti atque læto ostentabit: tardus animus, aut inanis, debitum maturæ gravitati aut eloquentiæ suæ precium inveniet: vicissimque jacebit incognita virtus, quam sæpe prima fronte quædam vitiorum opinio, aut imago, infra justî decoris fastigium premit.

Sed ingenium, ut plurimum multo recessu abditum, non utique potest sine longæ prudentiæ sedulitate deprehendi. Ideoque qui ex primis indiciis de hominum moribus ac indole judicare non verentur, ipsi se in longissimos errores plerunque impediunt. Certe ut in gladiatoria arte nihil periculi plenius, quam si cum homine cui torvi oculi exerrant dimicandum sit ( quia quo ictum destinet, deflexis, ut videtur, in contrariam partem luminibus, vix conjici potest: ) Ita cum illis acturus, qui suum ingenium, vel arte, vel corporis beneficio prorsus dissimulant, debet longa severa que disceptatione à se ipse quid de illis sentiendum sit exigere; ne si eos iniquo suffragio, aut inconsulte propitio, æstimet, etiam omnium

omnium primus suæ sententiæ poenas luat. Frontis præcipue imago sæpe in expertos deceptit.

Quam multos truci vultu, ipsoque supercilio timendos, humanitatem credas abigere, quos si propius adire contigerit, jam ex prima colloquii lenitate placatus humanissimos esse non dubites? Alios ipso corporis motu, mensuraque suspensi vestigii, se in superbiam componere putabis, qui ad illam tumoris speciem, vel natura, vel innocenti consuetudine facti, mite ac facile ingenium in omnes humanitatis leges sub hac larva instituunt? Neque in contrarium desunt, in quibus præter corpus in simulachrum virtutis effectum, nihil quod ames invenias; Nunc quietæ lenitatis specimen quam vultu exhibent, tristissima iracundia corrumpunt; nunc vividis oculis impar ingenium subest: denique velut insidiis, interdum vitia collocantur, sub earum virtutum levi bractea à quibus potissimum divertunt.

Hæc autem tam immensa ac perplexa animorum cognitio non potest præceptis definiri, neque aliter quæri, quam ejusmodi hominis longo usu, qui tam sua prudentia, quam erroribus in ista arte promoverit.

Illud vero cavendum est, ne ex una virtute, vitiove, de indole atque animo universe sententiam feras. Multi enim adeo felici ad disciplinarum aliquam ingenio nati sunt, ut quandiu in illa versantur, nulla prudentiæ atque industriæ signa desint: In cæteris autem rebus inepti insulsique, ne bonæ quidem mentis vestigia unquam prodant. Aliis suus duntaxat nævus ita additur, ut in reliqua vita sapientissimi, in una tamen parte aut studio videantur delirare. Ne ex ipsa quidem consortii, & convictus suavitate aut elegantia, de ingenio, aut sapientia judicandum. Sæpe enim in quotidianæ vitæ consuetudine minus offendunt angustæ indolis homines, quam quos magnitudo Naturæ lætioris laxavit; Dum hi scilicet sibi dissimiliter timide custodiam sui agunt, vel æterno studio hos publicos mores (nempe ad majora non idonei)



consectantur : illi autem capaciori ingenio aut hæc vulgaria minus curant, aut admittunt etiam vitia non raro virtutem stipantia.

Sed nec satis est hos Naturæ impetus vestigare, animos mortalium in diversa destinantis. Adhuc aliquid ultra est quo ingenia perficiantur, aut mutantur : nimirum fors vivendi, squalorve, vel dignitas, in quam casu aut virtute unusquisque pervenit. Quot enim ad ingenium rectum ac mite geniti, vitio nimix felicitatis ipsi suam indolem affligerunt ? Quot mentium læta sublimitas & si fortuna sineret, in exemplum omnis virtutis suffectura, ubi pertinaci egestate, aut fortunæ iniquitate premitur, suæ præstantiæ oblita etiam in contrarios affectus degenerat ? Athenion tamdiu mores ad publicum probitatis exemplum componens, quandiu in Academiæ spaciis inter famem & centones pro virtute dicebat, nactus tyrannidem statim cum viliori pallio etiam Philosophiam excussit. Abdolominus quotidianum victum ex hortuli cultu quærere suis manibus assuetus, cum destinaretur ad Sidoniorum Regnum, optavit ut qua modestia inopiam tulerat, ea sceptrum pati posset. Nunc igitur & hos quoque videamus affectus, qui ex conditione fortunarum, & genere vitæ, hominibus accedunt, & nonnunquam enecant mores, quos simplicitas Naturæ nullis obruta cladibus, aut illecebris corrupta tradiderat.

## CAPUT XIII.

*Diversos affectus esse. Tyrannorum, & legitimorum Principum : Rursus Regum qui successionis jure, & eorum qui suffragiis ad regnum perveniunt. De Procerum, qui apud Principes gratiosi sunt. ingenio.*

**P**Opuli qui in neminem jus regnandi contulerunt, licet ab omni nomine servitutis abhorreant, tamen sinceram libertatem non habent. Magistratibus enim opus est, quibus ipsi se tradant,

dant, vim publicam, quam toti genti inesse gloriantur, in paucissimis hominibus adoraturi. Ad eo illic etiam ubi omnes regnare existimes, magna pars servit; arcana rerum lege ita nexus & seriem universi dispensante, ut ad divinitatis imaginem, unius capitis nervis multa membra temperentur. Paulo illustrius in Optimatum imperio elucet hæc dominandi vis, utique paucos amans; maxime autem in regno, ubi omnia unus potest. Illa autem potentiae magnitudo, cui Numen arcana vi mortales subesse imperavit, non in illorum gratiam qui ad hoc fastigium legerentur, instituta est, sed in eorum qui parerent. Itaque vel Regum libidine ad voluptatem & ambitum suæ dignitatis utilitatem corrumpente, vel ignorance populi sua commoda non semper capientis, Regium nomen sæpe invidia afflictum, sæpe in variis regionibus ingenti clade eversum est, ac deinde restitutum. Respublicæ quotquot olim viguerunt, primum Reges habuere; quibus expulsis, & per veræ libertatis imperitiam devotis, successit aut cœcæ popularitatis imperium, aut permissa proceribus potentia, id est, multiplex pro unico quod expulerant regnum. Ac ut membra quæ violentia de naturali sede dimovit, non nisi per violentiam in articulos suos redeunt, ita provinciæ quæ hoc modo ab optimo genere gubernationis diverterant, prius errorem multis cladibus expiarunt, quam antiquæ, & à se projectæ rectitudini, redderentur. Quippe in illis Rebus pub. cives multo ambitu proVecti, siue armis suum nomen inclytum fecerant, siue plebis errore nimis amplis aut diuturnis magistratibus assueverant, sæpe occupatæ Reipublicæ vires ad se traxere, Regesque se dixerunt. Sed necessaria, in novis omniumque odio flagrantibus rebus, atrocitate terribiles, scelere questum imperium adeo cœdaverunt, ut pejus plerique populi de Regibus inde sentirent, nomenque Tyranni, quod olim insigne regnantibus, in publicam infamiam odiumque concederet.

Cæterum in eos affectus inspecturus, quos Regibus fortuna sui fastigii suspirat, non sub uno velut fato omnium Regum purpuram cogere debet. Diversæ ad idem fastigium viæ, non unam omnibus mentem injiciunt: sequelongè aliis consiliis regere solent, qui novas habenas in rudem adhuc ejusmodi imperii populum moluntur, quam qui jam assuefactis gentibus, tuto, & per ipsarum vota regnant. Rursus alius sensus est hominis sceptrum per suffragia adepti (ut in Pannonibus, Sarmatisque fit, & ipso nomine Romani Imperii) alius paternas atque avitas opes tenentis cum hæreditate imperandi. Nova regna, nec constantia populorum nec adhuc vetustate inoluta, Principes suspicionibus assidue perurunt. Adulari illi ultimæ sorti, timere magnates, maxime cum timeri se putant: reputare assidue, nondum constitutas res sub ipso fortunæ motu posse quam conditam facile everti. Neque modo his cogitationibus inquietari quos ad purpuram occupatæ tyrannidis nefas provexit, sed & quibus insuetæ regio nominis, atque imperio, gentes bono jure traduntur. Acrior tamen in Tyrannos hic pavor; quod sive Rempublicam opprefferint, vindices libertatis Optimates timeant, (quos antea sibi pares ægre servire non dubitant) sive in regnum invaserint, iis expulsis quibus illud debebatur, populum in veteres dominos primum, assiduæ cogitationis molestia sibi fingant. Itaque nec amicis satis fidi sunt, quod ad notitiam consiliorum admoti, sciant quoque, à quo latere sua tyrannis peti possit, & lædi; & fidem in nemine expectant, quam ipsi violarint. Palam tamen, & ex composito, sub ornata benevolentia materia, integritatis famam, amorisque in Rempublicam ambiunt. In egenos liberalitatis effusæ. Vltiores vitiorum quorum ipsi exemplum fecerant, legum denique optimarum, onerumque publicorum, ad civitatum ornamenta, vel authores, vel vindices. Ita præsentem invidiam, & apud posteros infamiam, amolitur. Hoc modo tyrannus ut plurimum sortis suæ, non ingenii,

Ingenii, vitio peccat, aut necessitate probus est. Illius animus, immodice austerus; & blandus intuitus, erectus ad omnia, præsertim quæ formidet; synceræ voluptatis ignarus, cuius spe diducitur; vano decore atroces molestias permulcens, velut fuko, & ipse sibi imponens. At justus Rex, seu comitiis, seu sorte nascendi, admotus imperio, ipsa majestatis conscientia elatus, minus in ignobiles metus, aut scelestæ remedia, demitti consuevit: etiam si turbulentum forte tempus, & populi nanciscitur insaniam, cæteræque quæ Tyrannus semper timet. Et hi quidem qui suffragio debent fortunâ Principatus in sua familia non hereditariam, adhuc aliquo modo privati, nempe quæ eos posterorum cura tangit, publica commoda non videntur tam vera totaque diligentia procurare, quam qui suum jam à majoribus regnum etiam nepotibus adornant. Itaque illas curas quæ populo debentur, privatis suorum affectibus impendunt excusabili pietate, modo partita mens se utrinque respiciat, ita cognationis memor, ne obliviscatur & Regni. Quod si aliquem forte ex suis spe votisque in successionem regni destinant, tunc precio & adulatione emenda suffragia, tunc omittenda vis, & veluti supercilium majestatis. Ita serviet per occultam sollicitudinem animus, iis ipsis à quibus publicæ venerationis cultum accipiet. In has suæ familiæ curas sæpe perit absumpta eorum sedulitas, qui publicis antea virtutibus imperare meruerant: Nonnunquam & in pejora rapti suos mores corruperunt, veteris odii aut æmulationis memoriam exercentes: cum scilicet quos iniquos ante experti sint, quorum pro na ad regnum suffragia non habuerint, ex animo minus delent; novaque potentia & seipsam nondum capiens, in ultionem intumescit.

Quod si nulla ex his ægritudine laborant, illos tamen ut plurimum sollicitat magna ac memorabilia audiendi cupiditas; ut per ingentes illas res sibi suisque temporibus apud posteros nobilitatem dent. Tam hi autem impetus incommodi publicis

blicis rebus, quam utiles esse possunt. Nam ut in pomis baccisque, coacta, & præter assueti temporis legem maturitas, insolentia quidem rei iucunda est; cæterum ipsæ arbores, medicamine, aut admoto æstu præcipientes maturitatis tempus, hoc edito spectaculo marcescunt: ita publicis rebus, & præsertim gravioribus, quidam ordo dictus est, quem qui pervertunt, salutem provinciarum videntur enecare. Nihilominus Reges, qui per comitia id nomen adepti sunt, dum æterni nominis ambitione flagrant, aut temere externam militiam, aut intra patriæ viscera novas res esse molitos omni ætate conspexeris; ex sua audacia, & periculis suorum, famam comparaturos, forte etiam æstimantes. Pauci cum Polonorum Rege, Stephano Battorio, quid agant, non ex se, sed ex salute patriæ metiuntur. Extat sententia illius, efficax ad tantæ animi imaginem; Efficiam vero, dicebat, ut intelligat Orbis quam præstet Rex suæ virtutis merito in tantum fastigium à volentibus provectus, iis Regibus quos invitis populis jus successionis obtrudit.

Reges autem, in quos verissime hoc summæ majestatis nomen cadit, perpetuam potentiam quam à parentibus acceperunt in stirpem transmissuri, jam non suffragiis populorum obnoxii à quibus olim omnia habuere, longe alio genio videntur ad regnandum instituti. Sed hanc mentem illorum, se ipsam uni Numini debentem, explorare fortassis sacrilegæ sapientiæ esset, neq; fas nobis deprehendere illos motus, quos ad gubernationem Orbis, & mutationem rerum, ac præcipua humani generis fata, illis divina vis ingenerat. Quærant licet curiosi, an sit utilius Reges à puero in sceptrum venire, & huic magnitudini assuescere, tanquam simul secum natæ, quam sub paterno cognatove imperio adolescere, tantæ demum fortunæ hæreditatem adituros, Num patati, nec quidquam detrectantis populi obsequiū, frangat mollitiæ Regum animos tam securæ potestate luxuriantes, an potius ille amor civibus Re-

gem, veluti patrem familias charissimorum domesticorum officiis conciliet : Denique si averfis civium animis bello occupatus fuerit legitimus dominatus, utrum post victoriam Princeps odio contemptuque grassaturus videatur, an vero experta pericula, nec aliter quam gravius reditura, eum ad alternam placendi solitudinem deductura sint. Vtrinque argumenta exempla non deerunt, quæ (per vicissitudines mortalium rerum) quamquam sub iisdem sæpe causis non eosdem tamen exitus sortita sunt.

Sed frustra est hæc Numinis consilia explorare. Sit à curiosis cogitationibus intactum Regum culmen, ac ut arcana in sacris vetustatis, non nisi ad adorationem suspiciatur. Nam optare bonos Principes pietas est, damnare etiam nocentes religio. Ac cum præterea non tam ipsi se regant, quam ducentibus fati permittant (quæ per illorum effectus Imperiorum inclinationes & incrementa constituunt) omnis ars atque prudentia inspicientium in eorum genium, & de illo conjicientium, sæpissime fallit.

Primus ab hoc summo fastigio gradus est Optimatum, tam horum in quos divisis Regni curis Principes acquiescunt, quam eorum qui summa dulcique amicitia eorundem Principum animis inhærent. Per utrosque, veluti ostia fluminum ad ingens pelagus pertinentia, vota civium spesque feruntur. At ipsi diversis rationibus ad magna producti, ne iisdem quidem studiis nituntur. Illis igitur qui flore ætatis, vel generis sorte, aut vivendi dicendique comitate, se eximie Principibus commendarunt, institutus ad placendum animus esse solet; quem scilicet propriis affectibus negatum, domini ingenio comparant. Mirum quidem, artisque plenissimum hoc genus servitutis, vilem demissumque animum interdum adumbrans, nunc præcax liberumque ingenium. Interdum voluptatem consecrari, jocis, ludisque incumbere, fecundissimi laboris instar est. Etiam supercilio in dominos uti, & pæne regnare (modica

dica tamen nec longa contumacia) Principes haud raro accendit, quam amare volentes tam amari. Quippe Proceres in tam altum lubricumque producti, si Dominum mollis animi esse cognoverint, nec earundem voluptatum consuetudinem ferentis. parce suos aspectus, jocosque, aut quicquid in ipsis illi placet, indulgent; ita dispensante prudentia, ut amor sæpe, & per intervalla, incitatus, nec fastidium sui faciat, nec torpore aut oblivione deleatur. Quod si Princeps facilisquidem sit in diversos affectus amicosque transire, sed quocunque se applicet, ut brevi, ita cœca & vehementi amicitia incumbat, qui ab eo amantur, memores inundari se altissimo æstu, sed in suum Oceanum stata mutatione redituro, quam avidissimis pectoribus de illa felicitate bibunt. Neque enim lassare hunc amorem flagitatis muneribus timent, qui etiam nisi tempestitiva celeritate excipitur, ut vina ætatem non ferentia, inutili veterno consenescit.

Longe alia ratio cum Principibus ineunda, qui amoris torrente non perdit, illi suavitati qua ad amandum impelluntur consilium quoque addunt. Nam hæc vera, & si mereris, perpetua benevolentia, ut nunquam omnia, ita semper aliquid poterit; nec tam spolianda illa arbor, quam carpenda cum delectu scilicet in proventum reditura. Igitur ejusmodi Dominis gratiosi Optimates dare se totos solent, nec unquam in amando majestatem dediscantes mitigare obsequio; jus libertatis in loquendo, aut monendo, verecunde usurpare; sæpius meminisse hos esse Principes, quam se amicos. Iis autem ut est prima & assidua cura, locum quem propitiis gratiis obtinuerunt semper insistere; ita proxima sollicitudo, opes interim cumulare, præfecturas, aut perennes inire magistratus: Ut si à tanto apice excidant, saltem felix pristinae potentiae monumentum ad reliquæ vitæ securitatem duret. Qui vero vel suorum immemores, vel fortunæ confisi, illas opes, & tam splendidae amicitiae quæstum nihil parcente luxu aut incuria consumunt, dignissimos putes qui intempestivum tandem



tandem ludum, in egena senectute, inutili poenitentia damnent.

Est & cautio Proceribus illis ingens, & quæ sæpe negligentes pervertit; non se Domino anteferre, in rebus utique quibus ipse excellere, aut credit, aut contendit. Subtilitatis gloriam amat, eloquentiæ, fortitudinis, venaticæ artis, militaris peritiæ: Non vereatur concedere etiam qui sentit se victorem; ne Princeps in æmulationem exardeat, quæ amicitiam extinguere solet, & præterea pervicacibus odiis foede sævire. Sæpe enim non leni modestaque ambitione, ac nec pro materia, occupatus Principum animus, ejusmodi gloriæ cupiditatibus incumbit, doletque à palma excidere. Nec est aliud, quo certius sibi dominorum animos purpurati isti parent, quam si eos mirari assimulent; sed cum arte, & quæ fidem inveniat. Non enim iisdem adulationibus omnes patent. Ut quisque Principum aut sibi maxime virtutis est conscius, aut vana credulitate elatus, potissimum iis blandimentis decipi amat, aut potest; tot omnium votis ad placendum laudandumque coëuntibus, expugnantibusque verecundiam de se magna credendi. Nec minor ars extorquendæ benevolentiae, est amoris simulatio, quadam Venere insinuante officiosam gratiam, & pares affectus reposcente. Adhuc vivit, adhuc tantæ fortunæ præmiis incumbit, qui incipientem domini charitatem ejusmodi casu felicissime fovit. Princeps cum equo in itinere prolapsus, afflicto latere febriculæ horrore tentabatur; ipse tristi perculsoque, ut videbatur, vultu tota nocte insomnis afflittit. Sive ars, sive pietas fuit, ita domini animum petiussit, ut nemo deinde gratiosior haberetur.

Nec dixeris ejusmodi felicitatis arbitrium (qua tot veluti rivalibus summas illas amicitias ambientibus, pauci quidam suis votis potiuntur) unī Fortunæ credi. Nam ut illa sua sponte non paucos Principibus conciliat, ita multi artificio & calliditate destituti de tanto fastigio solent exci-

dere: Ut quidem fortunæ interdum est, ad hæc eulmina quos placet subvehere; plerunque autem prudentiæ, in ea felicitate positos posse servare. Ideo autem formidolosior res est hoc gradu prolabi, quia ad tantæ amicitiae sacramentum admissi, vix possunt ab eo vestigio nisi in odium, aut certe fastidium, recidere. Non tam quippe aboleri amor solet, quam contrariis affectibus marcescere.

Hi vero optimates, per quos Princeps præcipua momenta Reipub. procurat, quibus externas res, atque civiles credens, in arcanis consiliis potissimum fidem habet, dignitatis suæ nervos longe solent in alios concentus temperare: scilicet ad se sic trahere, ac propemodum suas facere, altas illas, & salutis omnium curas, ut non tam Republica egeant, quam suis officiis deinde Respublica. Hoc autem assequuntur, assiduo in hæc negotia studio, cæterorumque, ac nonnunquam ipsorum Principum, ingeniis ab intima illarum rerum cognitione quam maxime possunt exclusis. Nam tunc quidem tutissime omnia possunt, cum Principes suarum rerum ignoratione & credulitate in ipsos laborant. Sed ignari suæ famæ veras voces non sæpius quam ipsi Reges exaudiunt. Non peculatus, non superbiam invidiam, non cætera facinora, si quorum infamia graves sunt, licet publica indignatione iactata, ante de suis penetralibus emanasse cognoscunt, quam ipso pondere obruti, simul se esse invisos, & castigari intelligant. Vultus ipsis, ut plurimum ad gravitatem compositi; non promiscui accessus, brevia alloquia, tædii que aut maiestatis specie vibrantia. Inter hos pauci, nec negotiis confusos, nec marcen-tes superbia vultus servant, digni hi quidem laude, sed nec cæteri accusandi, qui mores ex dignitate instituunt, & fortunæ suæ accedunt. Quippe necessaria quoque interdum est sublimis hæc maiestas, & de populi commercio excedens, in illis utique hominibus per quos Reges præcipua suæ potestatis momenta exequuntur: cum maxime hæc

hæc aditus loquendique ambitiosa difficultas reverentiam conciliet, quo freno cohibentur vulgi animi, aut timere assueti aut spernere. Sed & illa strictæ frontis asperitas, siue fastus est, siue justæ potentiae iudicium, indulgeri facillime illis potest, qui in tot curarum præmium hoc honoris potissimum ac reverentiæ specimen habent. Etiam perpetua negotiorum serie & fastidio attriti, non utique possunt eosdem semper vultus, nil mutata aut afflicta serenitate obtinere.

Quod si illa potentia, simulque juvandi ac fallendi solertia, in impias mentes inciderit, ac dum se suaque respiciunt, publicæ interim salutis oblitæ: tunc licet in suis flagitiis virtutem solertissime adumbrent, tanquam rei domesticæ negligentes & unum Principem, remque communem, videantur respicere: interim autem negocia eo flectant, unde potissimum suæ dignitati incrementum aut incolumitas allucebit. Si impeditis Principis rebus plurimum possunt: dum eas omni diligentia videntur exsolvere, novis nodis colligabunt, & veluti superfusa caligine imbuent. Quod si in placida utcunque Republica securius regnant, tunc etiam necessario oderint motus, finentque sui temporis pacem in occulta malorum semina adoleiscere, & nepotes fortasse perditura. Quæ denique Reges suffragiis ad sceptrum vocatos, hos quoque Optimates, cupiditates torquent: subita utrinque potentia, nec ut plurimum in sobolem transitura.

Quis eos igitur non miretur, qui in hac immensa potentia tam facile tantoque præmio, si vellent, peccaturi, tenere vestigium tamen possunt, rectæque virtutis meminisse? quales in generis humani subsidium aliquot omni ævo ad hanc orchestram subvehuntur, in se rigidi, candidaq; & innocente gloria omnem ambitum reipublicæ donantes. Sed nec ejusmodi viros illa probitas ab invidia præstare tutos solet. Nam ab ipso dignitatum lubrico (cui duntaxat pauci satis fortes insistant) vitioque sociorum, sæpe eorum vir-

tus infesta est: Neque maledicorum licentia amat ab illis culminibus abire, in quam potest mentisissimo sæpe indicio, nunquam autem sine suspitione grassari.

Fructus porro tam ambitiosæ dignitatis eximius: quod tuti, & extra teli jactum positi cæterorum in se invidiam contemplantur, iis quoque ad se colendum coactis, quos sciunt non aliter quam à maligno pectore, & æmulationem cælante, imaginem benevolentiae extorquere. Nam hæc admirationi conjuncta invidia, & in solam felicitatem exerta, nescio quo sensu ambitiosæ voluptatis solet hos ipsos quos petit permulcere: Quippe eos magnitudinis suæ admonens, & humilitatis cæterorum.

Est & eorum alia, sed multo præstantior, in gerenda Republica prærogativa, posse magnis & virilibus ingeniis, quæ rei familiaris angustia aut aliæ difficultates premunt, propitiam manum dare, & veluti adesse naturæ imploranti. Quod ut illis facere est decorum, ita nec impune possunt omittere, scilicet vel tacita indignatione bonorum castigati, vel assidua exprobrantis virtutis imagine apud se hanc culpam luentes: Cum enim hoc ipso attolli meruerint, quod aut sint, aut credantur, primæ illius & prudentis industriæ viri, quid morantur suam sortem agnoscere, & ingenii similitudine junctos cognata charitate complecti? Nec ignorant qui ii sint, aut unde petendi. Nam ut omnium animalium oculi, nisi cæcitate damnati sint, sui generis consortes & vident & agnoscunt; ita animi caligine exuti, in ingentis indicii felicitatem diffusi, suæ sublimitatis socios non dubia contemplatione deprehendunt. Ac nec dicant se multitudine hujusmodi ingeniorum premi. Iis omnibus neque se, neque rempublicam sufficere posse. Bene consultum generi humano, si tanta præstantium animorum messis esset, ut distributis inter illos rerum publicarum negotiis, superessent adhuc vacui aliquot superfluo & inutili munere à Numine Orbi donati. Multo parcius cum

cum felicitate hominum actum; rarumque in omni ætate ac populo fuit altum ingenii acumen, purum, aptumque omni vitæ cuicunque incubuerit, ex cultum disciplinis, exerta fortique verecundia natum omnia nec quid nimis, audere. Illas mentes cum Optimates vocant in publicæ felicitatis partem, seipsos quidem primum, quasi illius genii participes, commendant, tum Reipublicæ nervos addunt, nunquam pulchrius quam à sapientibus gubernatæ. Sane ut artium quæcunque eminent, famam, multitudo artificum, & imperitia sæpe affixit, plerisque ad ea quæ promittunt rudibus, sed vanum modo nomen quo commendentur quærentibus: Ita sapientiæ gloriam, atque scientiæ, haud raro indigni homines, nec quid minus quam cum Musis aut prudentia loquuti, corrumpunt. Sed incumbit summis hominibus fictæ & adulteratæ virtuti illudere: veram autem industriam imperitorum præjudicio non obrutam, à justissimis præmiis non arcere.

## C A P V T XIV.

*De studiis Aulicorum. De diversis generibus & affectibus eorum: itemque divitum.*

**P**Ræter hæc duo genera Optimatum, jam propitia fortuna felicium, ingens est in Regiis multitudo, novi atque patricii, omnis census ætatisque homines, illic opes, famam, amicitias, quærentes. Et hæc quidem Principum domus, licet ad speciem publicæ hilaritatis luxusque compositæ, nunc choreis exultantes, nunc ad mutationem ludi venatico sudore confusæ; plenæ honoribus, omni vestimentorum pompa & epularum spectabiles; singulis, qui in iis agunt, magnificentiæ specie adornatis, & plerunque suam sortem supergressa luxurie: Tamen diligentius intuenti videbuntur nundinarum instar esse, ubi homines laboriosissimum negotiationis genus exerceant. Quot artibus quotque molestiis constet hæc vita,

quot curas simulatio miserrimæ frontis obducatur, ne ii quidem satis dixerint, qui diu suos ambitus illis malis luerunt. Neque ullus in hoc freto portum meretur, nisi qui adeo intelligat sibi curam laboremque assiduum esse debere, ut hæc ipsa quæ in ejusmodi vita (ut solet) molli jucunditate blandiuntur, in severos usus flectat, & semper in illis deliciis inveniat industriæ curarumque materiam. Nam ut acerrimus quisque labor sæpe ad oblectationis dulcedinem mansuescit; (ut cum immodica venatio, aut studia plus justo pervigilia, acrem animum, nec habenas scientem, delectant) ita ludus etiam omnis potest severiori intentione temperari, ut divertat in justis laboris gravitatem. Igitur illa remissio atque ocia, quibus aularum luxus vibrat, non tenent eorum prudentiam, qui minus egestatem ambitumve expleverunt, ne inter hæc fugitivæ felicitatis simulachra, obliviscantur se felices nondum esse, omittantque fortunam, quæ ut plurimum non se tradit, nisi in mercedem impigræ fortisque diligentiae.

Quæris itaque, quo vultu aut quo more illas Seirenes excipiant, ne vel auditæ noceant, vel si ab iis rustice contemnantur, hos proscribant tanquam intempestive Philosophos? Non opus est truci vultu, barbarisque præceptis. Si ejus conditionis sunt, ætatis, habitus, ut per has pompas & lepiditatis nomina felicius credant emergere, tunc arte hanc magnificentiae speciem adgubernant, queruntque comitatus publicam famam; ad illum quoque luxum suam larvam inflectunt qui potissimum Principi placet. Sed nec egestis patrimoniis longæ spei misérias emere debent, nec frangere animum lenocinio tam lubrici motus, & voluptates imitantis: qui inter hæc assidue monendus est, se venationi, non prædæ incumbere. Cæteri autem qui ad hanc deliciarum speciem non eadem fortuna invitantur, (seu corpore, seu moribus, aut generis sorte ad eam incommodis) illo errore se capinon sinunt, qui sæpe incau-

incautis persuasit, non posse fortes esse, aut in aulæ cultoribus numerari, nisi qui emineant per audaciæ titulos, vel omnem ociosæ voluptatis luxuriam. Sciunt alios & securiores aditus illic ad opes honoresque per ingeniosam virtutem aperiri. Quippe consciis hominibus suæ sortis, ac indolis, eique absque fūco aut superbia obsequentibus, multo certiorē apud Principes reverentiā esse, quam ambitiose effingentibus mores, quos suo censui corporive fortuna negaverit. Hanc igitur moderationem illi prudentes tenent, ut qui ad istas illecebras, velut ad aliquam artem. coacti sunt, his utantur, non fruantur; quos vero fortuna tam luxurioso sumptui non damnavit, has si placet ad sobriam voluptatem delibent, sed veluti in requiem curarum graviorum, magisque ut spectent, quam ut ipsi impleant scenam, his denique quibus jam facta res, siue sua sedulitate, siue majorum, fas est consecrari pares illas suo fastigio voluptates.

Neque mirum si hic ad magna sint inepti, quos velut aliquo carmine attonuerit ignava, & se unam contemplans luxuries; cum non alii magis vitæ, quam quæ in Regiis ducitur, necessaria esse soleat, vigil quædam, nihilque omittens sedulitas. Nam ut plantas arboresque, exigua semina concipiunt, & modico saltu ingentes fluvios emetimur in fontibus: ita sæpe ad felicitatis incrementum in Aulis sufficiunt parva initia, & quæ oculos facillime lateant ludo aut ocio intentos. Metellam jam imperantis Syllæ matrimonio conjunxit, quod theatrum pertransiens, & ad sedentis humerum leviter manu nixa, addiderit, velle se cum tanto viro in felicitatis partem vehire. Adhuc jacenti Mario primos animos addidit fortuita Scipionis oratio, illum ad militaris scientiæ fastigium, velut aliquo vaticinio destinantis. Scivit enim audientium animos illo præjudicio sibi paratos acerrima diligentia servare, nascentisque illinc famæ magnitudinem implere. Adeo sæpe levi, subitoque susurro,



admonemur commodi venti, qui, si audiamus, navem impellat ad vota supra spem ac pæne invidiam sublimia: Illos juvit viro illustri occurrisset per soluta & incuriosa gaudia diffuso, & ad primam quæ obvia fuerit amicitiam aperto: hos aut sententiam aut jocum tempori invenisse: indicium fortitudinis vel industriæ temere elapsam, aut laudatio fortuita, nec juvare credentis sæpe grandis auxilii vicem obtinuit.

Est igitur in dignis hominibus qui Regiam propitiis fatis colant, non præceps animus, non impatiens lentæ ac multiplicis spei, sed compositus, semperque in Fortunam intuens, ne incuriosos effugiat, si quid illa etiam perplexe annuerit. Sed nec expectant in ocio, donec ultro illa felicitatis semina occurrant. Magnis artibus juvant fortunæ favere volentis industriam: quarum fortasse præcipuam dicas, quamplurimos amicitia complecti, aliquem autem mutuo cultu demereri ex iis quos Princeps ad gratiam primæ familiaritatis admo-verit. Nam & illa succrescendi ratio apertiori invidiæ est subducta, & sæpissime regni opes minus Regis quam suorum amicorum beneficium fiunt. Sed sit ille cui se addicunt ejusmodi qui clientes publicis commodis possit attollere. Privatas enim opes neque volent purpurati effundere; nec si velint, tanti ex illis rivulis æstus exudent, quanti ex ipsorum Principum mari.

Ex his illum quem sibi propitiaverint, nolint fatigare frequenti aut inutili voto, ne jam ei graves sint vel ipso conspectu, quasi novam subinde per preces molestiam allaturi; aut temere, & in exiguis rebus favore consumpto multum ipsi debeant (utpote ad preces annuenti parumque fortunæ. In fabulis quoque videmus illius prudentiæ expressam imaginem. Neptunus Theseo filio tria optare indulserat: sanxeratque summa religione deorum in iis compotem voti fore. At ille bis experta jam numinis fide, cum restaret ultimū munus, adeo non prodegit certum nec redditurum beneficium, ut inter Plutonis vincula, cæsoque Pirithoo,

Pirithoo, non invocaret Patrem ad promissæ opis officium, timeretque (quasi aliquid ulterius morte esset) tanto pretio salutem redimere.

Est & alius in Regiis labor multa utilitate spectabilis; versatilem animum in diversa componere, & motus affectusque quicunque juvabunt, saltem in speciem, induere posse: quod vix tamen commode ullus unquam perfecerit, absque sedula austeraque diligentia, aut summo in suas cupiditates imperio. Ea arte multis hominibus parta res, atque decus; sive in liberis civitatibus, in quibus una virtute aut vitio tot dominis non placebis; sive in Principum familiis, ubi non modo simulatio ad eorum studia flectenda est, sed etiam ambiendi qui gratia apud illos excellunt; quos sæpe varios ingenio diversis obsequiis mitigabis.

Hæc & similia anxie diligentie studia sunt illorum quos spes & præcepta rectæ prudentiæ tenent in aulis: cæterum eadem aut illic non videt, aut pejore quam cæcæ malis juventus inconsulta aspernatur, & sæpe parentum indigna laboribus, à quorum opulenta modestia luxurioso & mox egeno ambitu divertit. Illis pulchrum ipsum Regiæ nomen, & in proceribus numerari; credo, maxime quia hæc prima libertas est. à Scholis aut magistrorum supercilio exeuntium: neque desunt, qui hos novitios ad inexperta vitia propellant. Quod si illos perfunctorio Principis nutu, aut verborum comitate, beari contigerit, tunc vero solutis superbo gaudio articulis pæne labare: qui adfuerint, quos tantæ gratiæ testes habuerint, vix se tenentibus oculis perlustrare. Sed maxime lasciviæ ludorumque famam amant, quasi in nobilitatis, & quidem jam virilis, indicium. Nec pro sua se fortuna, sed ex magnatum sumptu regunt. Ita cursum supra se euntium æmulati, nec vestigiis tantis pares, exhausto spiritu deficiunt. Hinc interim alieni acerbitas æris, & indigni questus in Principes ab his ipsis qui peccarunt: quasi suorum omnium ingeniis sapientiam possint infundere, debeatve sacrum ærarium, &

per hoc Respublica, tantæ libidinantium, insaniae poenas dare. Sunt non in Regiis modo, sed in omnigenere vitæ, diversa quam divitum tam egenorum ingenia; Egenos autem putem, non modo quos inopia ad vestium ciborumque miserabiles curas adegerit, sed quibuscunque opes desunt ad illam quam institerint vitam, & à cuius claritate, nisi pudenda confessione paupertatis, nō possint recedere. Igitur ex inopibus aliqui apertis doloribus gemunt, & queri de iniquitate suæ sortis, quam excusare aut tegere eam malunt. Ita magno calamitatis solatio, palam possunt fortunam objurgare, fugiuntq; majus inopia malum, simulare divitias. Etiam assuescere incommodis suis possunt, professisque laboribus remedium quærere in egritudine quam non tegunt. Et hi quidem sunt, vel humilitate parentum ita facti, ne ad egestatem erubescere jure possint; Vel (quod vitiiis pæne annumerem) iniquitate fortunæ velut verberare domiti, nec spirare altius ausi; Vel denique pulchro rerum humanarum contemptu, nequaquam eam sortem indignati, in quam à fatis collocantur; & magna regere idonei, & in parvis non dejecti.

Est aliud egentium genus contumaci Spartanaque patientia ictus fortunæ ferentium. Hi anxios animos, curisque divulsos, læti vultus imagine obducunt; visi quoque sibi felices, si hoc aliis videantur. Ita ad suarum miseriæ silentium obstinati, verecundiæ poenas luunt, de publica solliciti fama, nec de domesticorum voce securi, quibus hæc privata vulnera magis patent, & interdum ferenda sunt. Qui ex illis inopibus in vicino opem vident, & certa (quod interdum ad obsessarum urbium pertinaciam sat est) auxilia. ubi aliquamdiu paupertatem ficta hilaritate contexerint non modo non insimulandi superbiam, sed ingentis virtutis conscii, dignique sunt in quorum auxilium felicitas festinet. Hi vero qui in sua paupertate, perpetui supplicii imaginem quidem vident, vix aliqua exspectatione fortunæ spem sal-

tem

tem subvehente, possunt tamen in hunc modum suas opes dispensare, ut inter domestica mala semper ad hanc publicam divitiarum larvam sufficiant, miseratione prorsus digni, illum ambitum quem tot angustiis emunt, certe absque invidia habent. Sunt denique quos tanquam in extemporeis torrentibus aquæ, ita opes per hanc inanē, & suis rebus imparem magnificentiam tandem in totum defecturæ prætereunt. Ingens illorum animis supplicium subest, & amentia sua dignum, neque est alius majoris piacti furor, quam nolle de certo exitio declinare matura confessione tuarum fortunarum, quas dum sumptu non diu suffecturo vis à populo summas credi, in perpetuum sic affligis, ne vel possint in mediocribus deinde consistere. Hic magnatum juvenumque præcipue error est, in paternas succedentium opes, acerbis adhuc ingeniis, & nescientibus frugalitatem, vel supra rem fortunamque majorum ex profusis divitiis quærentium famam.

Iis animus longa tæbe inquietus, & sæpe ab ea quam præfert magnitudine excidens, quippe vix ulla humilitas, ac non nunquam fraudis genus, in quod non se secreto dimiserint, si inde intercipi nummi possint, quos postea publice per turbinem inconsultæ temeritatis profundant. Neque quidquam periculosius, quam aliquid publicum illis ingeniis credere, omni precio redimentibus inopiæ moram, quam anxia, sed poenitentiam abnuente, sui erroris notitia semper expectant.

Nec pauciora sunt in opulentorum sorte quam egenorum discrimina. Quidam scilicet in cumulatæ à majoribus opes nascuntur. Sensim alios divitiæ attollunt, docentque paulatim esse felices. Horum utrique nec se mirari solent, nec immodice exultare, scilicet per ipsam consuetudinem pæne fracto quotidianæ lætitiæ sensu, quæ & nunquam nimia est, ubi per gradus expirat & assurgit. Sunt denique qui repente prodigæ felicitatis munere inundantur, uno curriculo viam in cælum è terra emetiti. Et hi inassueta dulcedine

cedine sui quoque; obliti, deducuntur in superbum  
sortis illius de qua exiire contemptum.

Nuper fuit ut ejusmodi animum adhuc recen-  
tibus bonis ebrium liceret contueri, & visa res  
quæ referatur digna; quoniam ex unius pictura  
plurimorum imagines possunt effingi.

Adolescentes duos earundem scholarum com-  
mercium non vulgari necessitudine conjunxerat.  
Nomen huic Mellæ, illi vero Cœpioni, in cujus  
patria hæ scholæ, amorisque exordium. Exactis  
temporibus quæ in ejusmodi ætate litteris dan-  
tur, recessit in patriam Mella, arctis primum fœ-  
deribus in æternitatem amicitiae cum Cœpione  
compositis. Nec virilia deinde studia hunc ado-  
lescentiæ animum mutaverant. Crebris litteris,  
invicemque arcana prodentibus veteris amicitiae  
consuetudinem alebant. Interim Cœpio-  
nem in opinata hæreditas in altiore extulit  
sortem. Et Mella in Cœpionis patriam quibus-  
dam negociis vocatus est, quem ut Cœpio ad-  
ventasse audivit, non tam amicitiae memor, sed  
testem felicitatis habiturus, haud mora visere  
properavit. Mellæ syncerus amor erat, nec pari-  
bus machinis expugnatus à fortuna. Fit igitur  
bona fide obvius Cœpioni, amplexumque salvere  
multum jubet. & cætera quæ post longi tempo-  
ris absentiam primo impetu amici meminerunt.  
At Cœpio tardos oculos graviter adgubernans,  
arguta quoque voce, tanquam diducere timeret  
compositi oris formam, pæne œccœpit modulari.  
Invitatus in triclinium succedere, ad quod, ut in  
modicæ fortunæ domibus solet, utcunque angu-  
sti gradus ducebant, Quid tu, inquit, Mella, in  
carcerem me an thalamum rapis? Offenderat  
Mellam tam contumax majestas Cœpionis, sed  
ne ex adverso quoque peccaret, se in conducto  
habitare respondit: Limen, gradus, triclinia, ad-  
venis tam toleranda locari, quam utenda. In cu-  
biculum pervenerant, cum Cœpio in lectum ne-  
gligenter procubuit, frontemque permulcens, i-  
terum in commodos ædium gradus rustica urba-  
nitate

nitaterisist: elicitque indignationem Mellæ, quā tamen (veluti Cœpioni annueret) alio risu texit. At ille ubi cubiculi cultum circumactis oculis, tanquam perfunctori gravitate, lustravit, convertit ad ipsum Mellam vultus, visisque ocreis, Equū vero, inquit, habes, an potius equos? Iis quidem est precium qui à vobis advehuntur, nec aliis perniciosius fugam cervorum in nemoribus meis premo. Abnuente Mella sibi patrios equos esse; quippe avectos quidem à se, sed nescio qua tabe sub inassueto cœlo interiisse: Cur igitur, refert, ocreas geris? Mella contemptim, has sibi in hyemem esse quæsit. Hic Cœpio, Rheda autem quam sub primo liminis tecto vidi, scis cujus sit? Cum suam Mella assereret, At tibi (ait Cœpio) negabas equos esse: Patrios negavi mihi esse, inquit Mella, sed me putas tantæ urbis compita peditem posse obire? Germanicis ad rhedam equis utor. Bigæ ne, subjicit Cœpio, an quadrigæ rhedam hanc trahunt? Iam fastidium indignationi accesserat, sed voluit Mella in totum huc scenæ sufficere, itaque placide, se bigis vehi dixit, nam quadrigas illis beatis, qualis erat Cœpio, relinquere. Dic autem, inquit Cœpio, Regi tuo sæpe ades? quis agri tibi modus? num habes tui juris oppidanos? Ad hæc Mella pæne professo risu, nihil aliud quam se majorum fortunas ita regere, ne aut illis dedecori, aut exitio posteris vivat. Iterum qui annui census essent importuna sedulitate rogatus, dixit hos sibi, & interdum amicis sufficere. Hinc se divitias potissimum metiri. Sed cum obrui torquæstionibus tæderet, tandem onus respondendi in cupidissimum Cœpionem rejecit, cœpitque rogare quot domesticis ad familiaria obsequia uteretur, tum de equorum numero, & quam esset in aula gratosus. Nec ille de se moderatior, quam in alios prudens. Sed præcipue de studiis aulæ egit. Procerum multos ineptissimum genus esse; Hos se non multum operosa calliditate tenere: alios suæ fortitudinis gloria capi; jam bis enim descendisse in arenam: alios gratia qua apud Principem

pem valeret adductos, quicquid in eis est in amicitiae precium polliceri. Stupebat attonitus Mella, tantae dementiae verba nisi à furioso posse effundi. Tædio igitur in admirationem, & voluntatem, verso, instare acrius cœpit, & sponte ruentem, par insanas quæstiones præcipitare. Forte modica quies erat, utroque post tot deliramenta in silentium composito, cum Cœpio, tanquam acri subeunte memoria, exclamat, At quam putas ingens esse ferarum desiderium canibus meis? Nam hos vetui in sylvam me absente produci. Accipitres quidem jam opportune cessant, abeuntibus hac anni tempestate, & in successionem renascentibus pennis. Nec interposita mora. Sed jam flectit in vespere dies, inquit; Papæ! me jamdiu Principi adesse oportuit; habeo abjurgatorem desidiae, quod in hoc lucis protraxerim absentiam meam. His dictis velut altiori amplexu in procumbentem Mellam incubuit, invitatumque domum, fastu ad blanditiem accommodato, rogavit, fidissimae amicitiae & favere cupienti, saltem si quid opus haberet, postulando ne deesset. Experturum beneficio, nihil pollicitationibus suis integrius esse. Hic fuit colloquii finis, quod attonitus Mella, impense subitas divitias devovit, si cogerent ad hunc modum insanire.

Huic vitio immodicæ jactationis videntur obnoxii, non ii tantum quorum sapientiam subitis muneribus fortuna obruit, sed & qui militares disciplinas in præcipuam partem gloriæ ponunt. Rudes enim ut plurimum animi, & vel in castris eruditi, vel inter hos qui castrensibus vitiis ipsam pacem imbuunt, nihil credunt præstantius quam timeri; fidem autem facere de se quoque dicentes, insulse arbitrantur. Inde jactationis audacia, tumorque verborum, quasi omnium gratiam & credulitatem à ferro suo impetraturus. Hinc Pyrgopolinices, hinc Thraso, instituti in veterum scenis, in documentum ferociæ, plus tormento verborum, quam inter vera bellidiscrimina vibrantes. Sed in senibus præcipue,



pue, & quidem ducibus, securius, & majori venia, hic procedit; factis illis ad gloriam animis, sed nonnunquam inconsulta vanitate errantibus.

## C A P V T XV.

*De Magistratibus. De causarum Patronis.*

**A**B Aularum Principumque fastigio statim prima est Magistratum dignitas, quibus fortunæ litigantium sunt commissæ, fontiumque ultio, & quæ munera jam in judiciis numerus candidatorum, & quærendæ pecuniæ causa, in varia nomina exegit. Hi plerumque vel nihil dissimulata emptione, in hos gradus ascendunt; vel, ubi hæc mercatura de publico arcetur, privata, & sæpe rigidior cum Proceribus pactione, illic quoque qui Rempub. vendant, inveniunt. Tanto, & sæpe immodico sumptu provectos, palam est ambitionis studiis, aut spe prædæ attingere. Nam duntaxat Reipublicæ velle prodesse cara illa & patrimonium destruente sollicitudine, non istius seculi virtus est; & nec forte, post Curios aut Fabricios, quærenda. Sed quoniam nullam virtus gratis & ob suam pulchritudinem colitur, sed unaquæque suis præmiis conciliatur hominibus, ideo hæc bonorum opumve in Magistratibus libido facile ferri potest, modo contenti publico & veluti permissio more peccandi, synceris deinde animis in munus quod emerint incumbant.

Cæterum ut ab illo quod ineunt iugo, moderari subjectis gentibus possunt, & si placet, illudere: Ita nisi maturis ingeniis, & quæ non pro solo tribunali sapere possint, cupiditates castigent, ne ipsi quidem ludibria aut convitia effugiunt; sed hæc testæ, & maxime in absentes ingesta. Palam enim adulantium verbis sollicitantur in superbiam, sui que inanem fiduciam; tot litigantium turbis, multo cultu, sed non diu duraturo, illos propitiantibus; cum nemo in discrimen fortunarum

narum vocatus. supplicare Iudicibus dubitet, & vel torvos asperosque mulcere, vel dulcedini ambitionis apertos, multa laude, & venerationis gestu, tanquam cibo aliquo satiare. Iam olim illam artem Roma monstravit, cum reos, sordentibus togis, neglectuque comarum viliores, Iudicium pedibus reverentia metusque affunderet. Sed ejusmodi supplicum cœtus, in quemcunque deinde exitum dimittantur, ubi primum extra judicantium conspectum possunt consistere, hanc timidam placendi larvam ponunt, & quas adhibere blanditias interdum nec modico risu inter suos recensent, etiamque illorum quibus adhibebantur credulitatem. Iudices enim succedentium clientum agminibus semper pleni, se haud raro ex eorum adulatione metiri non dubitant, omnesque revera suo fastigio concedere arbitrantur, quilibi composita humilitate eorum animos parant. Illos iudices dico, quorum ambitio nostri seculi moribus & callidioris vitæ peritia destituta est; five nihil viderint præter Scholam, Curiamque, illic nugari assueti, hic habere cultores & decipi; five angustis aut inanibus animis ad facilitatem facti sint, ut pro se dicentibus avidè credant. Sed tunc maxime populari risu jactantur, si tanquam suæ sortis puderet, in militares animos & sermones erumpant, si in corporis cultu aularum adumbrent delicias, cæterasque voluptates consecantur, togarum & tribunalium majestati non concessas; Quæ nonnunquam vitia inexpertam adhuc fallunt (nam & sæpe ad has dignitates subvehitur) juventutem.

Sed nihil publicæ utilitati magis infestum, quam cum Magistratus, Iudicesque, oblitum nominis Deæ illius, cujus titulis, & veluti vicaria fide, jus dicunt, ex magnitudine munerum aut litigantium gratia, affectum componentes, ipsis legibus imponere non verentur. Nec facile dixerim, utra pernicies Rempublicam pejus infestet, cum amicis, aut cum pecuniæ indulgent. Quippe illa facilitas nihil familiaribus negandi, Iudicis animum impie-

impietati aperit, per hos flagitiorum gradus ita assuefactum, ut excusatis specie amicitiae sceleribus, postea ubicunque odium aut spes impulerit, peccare non dubitet, id tandem pro se ausus, quod amicis primum indulsit.

Quod si acriter divitiis incumbunt, si quærunt de populi malis opes, tunc omnino Reipublicæ corpus sub illis medicis plus remedio quam vulneribus laborat. Pauci tamen aperto facinore audent vel suæ cupiditati, vel amicorum servire. Sed est lentior pestis, aut si mavis modesta crudelitas, & jam ipsa consuetudine excusata, longis scilicet nodis impedire productas in forum suum causas, & infinito, ac veluti religioso ordine, ad exitum sero producere. His artibus regnum suum producunt in miseros; & vastandos uberius ministris suis tradunt; patronosque, & jam magnam illam gentem, quæ clientum miseriis saginatur, perennipastu implent. Quis ferat & quorundam malas artes? Iudicia quæ ipsi vendere palam timent, sub aliis sectoribus prostituunt; Ministros suæ domi, à memoria, à scriptiõibus habent: qui digerere, qui servare relata ita in scriptis disceptantiũ argumenta & instrumenta litiũ solent. Hos autem ad tam ambitiosam servitutem non ante admittunt, quam ingenti, & per licitationem crescente pecunia, servire meruerint. O ludibrio habitas fortunas miserorum, qui se tribunalibus credunt! Ministraturos iudicibus non operam suam locare, sed & magni emere in familiam, & ad servilia officia illic admitti, quid est aliud quam veniam scelerum comparare, ut furtivis inde prædis grassentur in supplices. venditisque suffragiis, & libellis vel collatis, vel obtrusis, ipsi domino, aut æquitati ausint imponere? Multis tamen Magistratuum candidæ mentes, potiorque tam avaris artibus sanctitas & iusti honores, mercesque quam leges constituunt. Graves illi, & intra fortunæ suæ magnitudinem modeste compositi, neque hos magis adulatio implorantium opem, quam justitiæ & famæ pictas

scientiæ & verborum pompa vibrans sufficit ad lepidam; nec omnino ociosam voluptatem; qua perfusus, tamen securis suspiriis ad aliena mala interdum ingemiscēs.

Quippe animus, & fors ipsa Patronorum (ut genus humanum etiam sua auxilia in perniciem detorquet) longe à prima tam officiosæ pietatis institutione divertit. Causas apud Iudices orare, & vel nocentes accusare, vel adesse sordidatis, olim magnificum & liberale munus fuit, etiam hominum quibus summam rem in castris aut Senatu Respub. credebat. Non sæpius in acie Pompejus, quam sub Iudicibus stetit; Primique Cæsares, cum jam omnia possent, tam reis interdum advocacy malebant, quam summæ auctoritatis suffragio, adesse. Merces autem, præter gloriam, magnificæ rei adeo nulla erat, ut afflicta deinde illius nobilitatis reſtitutione, & Oratoribus jam operam nec occulte locantibus, leges primum rogarentur, quæ tam periculosam mercaturam infamia notatam arcerent; mox publico vitio hos quoque obices proriente, saltem modum constituerent, certamque pro mercenaria eloquentia pensionem. Iam insaniente Orbe, & in immensum litibus auctis: gens illa quæstiosa, etiamque populosissima, vix ferendo agendoque clientibus sufficit, suas exuvias ad certamen tradentibus.

Patronis causarum, ut ubique unus spiritus, ad opes famamque properandi, ita pro conditione regionum sunt varia studia atque gradus, per quos destinata perficiant. Leges ut plurimum, non nudo & candido gennio perceptas, quo ducebantur qui illas condiderunt, sed deflexas per innumeros anxiosque calliditatis articulos, in præcipuæ scientiæ partem habent. In iis aliquid invenire, quo eludi simplicitas possit bono jure utentium, gloriosissimum putatur. Apud plerosque populos illa jura obtinent quæ Romani sibi olim condiderunt, & civilia appellamus. Et quoniam eæ leges à peritis olim authoribus sancitæ, robu-

ab externis quieta terroribus, seipsam contentionibus fori, haud multum impari cladi, permisit: At cum præterea eximii magistratus in præmium illius scientiæ destinantur, nil mirum est ingenuos adolescentes ejus studio capi; adeo ut nulla sit patriciorum gens, quæ non cognationis jure à quo in litibus sublevetur inveniatur. Ejusmodi Advocatis, vestis est in specimen suæ artis, ad pedes pertinens, toto margine, quantum in conspectum prodit, gentilis cuniculi pelle suffulta. Hanc & domi subsidium, & ornamentum publice habent; nec dubitant in publicum ocreati procedere, etiam calcaribus verberantem pulsantibus togam.

Gallia aliis virtutibus, vitiisque, suarum causarum oratores instituit. In Academiis nomine Iurisprudentiæ aliquandiu degunt. Illic quidam literis propitio genio incumbunt. Alios putes in veterum, aut immodestiam natos. Vtrisque (proh tempora!) inde abeuntibus idem honos, eorundem titularum promiscua merces. Qui enim inutili lasciviæ aut torpore luserit, nihil minus modicæ pecuniæ ope ad munus advocationis perveniunt; emptis scilicet Iurisperitorum suffragiis, quibus de discipulorum eruditione testantibus, Magistratus & Iudices credunt. Iam olim ita tradito more, ut is honor ejusmodi testimoniis haberetur, nondum eruditorum & quidem jura docentium animis ad facilem & promiscuam mercaturam prostantibus. Et hi immerita dignitate sublatis, in ignobilibus deinde coloniis agunt, & inter parem animorum cœcitatem, obscuro tribunali ad miseram clientum advocationem sufficiunt; vel si inter divitias nati sunt, paternis opibus statim excepti, proh nefas! & in Magistratum quoque excrescunt. Qui vero lætum ingenium Iurisprudentia primum, mox eloquentia perficere, si sua virtute totum ordinem Patronorum in amplissimam laudem attollunt. Vix in aliis hominibus tam sincera humanitatis studia, tanta cura aut tam felix literarum; adeo ut simplicitatem

tem Musarum (quas austeri, rudesve Philosophi, pæne rusticas extra hominum consortium tenent) erudiisse videantur ad civilis vitæ astus, & deductas de suorum montium secretis, veræ luci aptavisse. Quidam tamen ex illis nimie eloquentiæ studio peccant, & juventutis stimulis, aut gloriæ ferventes, à commisso patrocinio deflectunt. Iudicum quippe & auditorum auribus ad voluptatem servire adeo curant, ut ex omni numero, neminem minus juvent quam clientem, & quod Poëta olim risit, dicturi de capellis, amant ab Hannibalicis ordiri furoribus, luctumque Cananarum, & rubentem Romano sanguine Anfidum memorare. Alii exercitis per fallendi consuetudinem animis regnant, venalemque in quodvis patrocinium fidem, malo innocentiae excercent. Ita obruere veritatis indicia, ita magna specie inanes induere umbras, & plus juris in foro, suo ingenio quam legibus facere, documentum tam publici mali; nullæ lites, nulla in iudicium vocata flagitia, quæ non Patronum inveniant; modo sit advocacy pretium, cui tanquam omnis patriæ charitatem vincenti obsequium nunquam deest.

## CAPUT XVI.

*De divinarum scientiarum peritis: deque Præfectis Religionum.*

**E**Ludant ut volent majestatem Scientiæ, per contemptum atque jocos, quidam barbaris aut incultis ingeniis horrentes, & hunc deridum virilem animum & nobilitate dignum existiment, qui Musas omnes, ut viles ineptasque, refugegit; certe nihilominus sub ictu literarum per omnia pæne regnantium hæud raro res eorum sunt, & in iudiciis (quæ utique ex præscripto scientiæ regi debent) tremere solent, suæ audaciæ & stirpis oblitæ. Sed & alia præterea, majorque vis, eruditionem toti generi mortaliū præfecit: Reli-  
gionum

gionum scilicet & Sacrorum procuratio, quæ ex-  
cultis inter studia literarum ingeniis creditur, &  
plerisque hominum animis vere imperat; cæte-  
ros necessaria simulatione impietatem tegentes,  
non minus in obsequium sui tenet. Nec tam ulla  
demissa, seu paupertatis, seu ignobilitatis fortu-  
na est, quæ arcere hominem à celebritate famæ  
possit, qui supra probitatis aut nequitiae vulgus  
semet religionis specie atque argumento extule-  
rit. Et ne usu, aut effectu, hanc literatorum po-  
tentiam carere existimes; quam facile inermium  
hominum, & inter solos valentium libros, no-  
mina percensebis, qui hoc seculo sub angustis  
compositi tectis, & de religione certantes, hos ip-  
sos scilicet superbos Musarum contemptores in-  
ter se commiserunt; Principibus, populisq; velut  
signum ferentes ad exitiabilis belli cladem, quæ  
necdum consumptis acerbitalis seminibus (ut vi-  
detur) nostris malis in totum contenta est?

Nulla igitur utilior animorum inspectio, quam  
eorum qui in hac Orbis tam multiplici tempesta-  
te ad religionum clavum sedent. Et hos optime in  
varias classes distinxeris. Quidam veluti duces,  
novis sacris initium faciunt, sive veram sapien-  
tiam habent. sive ambizioso errore præcipientes. Ita  
ille qui ab Ægypto Iudæos remeantes acceptis à  
cælo legibus composuit. Ita postea Sanctus ille  
terrarum ac siderum Author, qui hominibus  
sponte annumeratus nostro generi sua morte ad  
vitam iter sanxit. Et ( quoniam non hic tantum  
probitatem, sed & fortunam, qualis in humanis  
rebus ludit, describimus ) proh nefas ! ita ille  
qui Arabas primum & Syros postea quicquid ab  
India ad Hellespontum jacet, & nunc inde omnes  
terras ad citerioris Pannoniæ fines, suo scele-  
re amplexus Lybiam quoque pæne quanto am-  
bitu circumfusa maria extendit, sacrilega super-  
stitione corripit. Et hos quidem quos vera & cœ-  
lestia auspicia ad eam legum ferendarum maje-  
statem deducunt, nobis haud licet nisi ad fidem aut  
adorationem suspicere. Cæteris qui nomine cœle-



stium in re tanta abuti non verentur populisque imponere, eum animum esse necesse est, qui nec ipsis suis legibus, nec omnino de divinis quidquam credat, non virtutibus parcat non flagitia, nisi ad speciem forte, refugiat; Id quidem potissimum curans, ut sibi venerationem conciliet, legesque quas condit ad libidinem vel superstitionem suæ gentis inflectat. Neque (ut in aliis sceleribus interdum fit) qui sic peccant, decipi ipsi possunt, & vel suæ sententiæ, vel rerum amore quæ in quæstione versantur, cæcari, sed suæ improbitatis conscii, se impios, & pestes mortalium non ignorant; maxime cum ad persuadendam populo insolentiam tam seriæ novitatis sit subtilis ingenii exerta procacitas; sed & mentiri multa oporteat; Visum scilicet, vel auditum sibi Numen; communicata cum illo consilia, & quæ cætera pestiferi nugatores laborant astruere. Sed hæc non omnium sæculorum labes est, pauci enim, neque semper cum successu, ad tanti flagitii audaciam provecti sunt. Est aliud hominum genus, longeque frequentius, profitentium non abire à patriis sacris, neque aliquid novi afferre; sed tantum errores, humano vitio, & præter authorum mentem, in Religionem illapsos purioribus documentis velle excindere. Et his quidem magnifica species probitatis, ingeniorum reverentia (nam qui tantam rem nisi industrii subtilesq; audeant?) denique ipsa novandi, & à cæteris dissentienti cupido, pæne semper sequacium hominum turbam invenit. Ejusmodi interpretū lites Ottomanorum gentem multo acerbius diversitate superstitionis, quam æmulatione imperii, in Persas incenderunt. Sed quid interest quo potissimum modo pereant illi populi, qui quamcunque elegerint suæ legis semitam errabunt? Nos ipsos in lucem, quæ hominibus una est, missos, quis non maxime indignetur his eruditorū discordiis tam funesta perniciæ posse rapi? Quippe sedecim secula, quibus nostræ Religiones viguerunt, plus centum ingania peperere. novandi studio, & no-

stris

stris deinde malis insignia; quorum quidem exitus ut nunquam excusum. (quippe nimis pertinacis vitio à justo & qualem exorsi videbantur modestia aberrantes) ita primos impetus odisse non utique semper licet. Nam & opes, & veternus, omniisque securitas, sæpe solutam apud nostrorum aliquot disciplinam impotenti superbia & aliis plerisque vitiis obruerunt: & inde tam indignatio peritorum excanduit, quam specie pietatis dissimulata inquietorum hominum superbia exarsit. Quidam enim justis doloribus victi detonnuerunt. Alii seculi vitia tacito ambitu amare: quippe occasionem suis questibus & secessioni præbitura. Vtrisque idem initium esse solet. Parce primum neque multa exagitant, votis quoque & exhortatione optimorum provecti: nec tam videntur irasci quam monere, & gemitibus dolorem profiteri. Sed ubi ad factionis magnitudinem processerunt, tunc & ipsi laceßere inimicos impuni, & utrinque partium studia æmulatione accendi. Tunc vero nec tantæ celebritatis fortunam satis regunt, nec in vestigiis hærent, per quæ antea ire ad pulcherrimum facinus videbantur. Sed majori supercilio assurgentes, plura in adversariis & atrocius damnant. Sive quo suum nomen illi sectæ quam affinxerint miserrima ambitione relinquunt: sive quod olim agitatum tantæ defectionis consilium nisi sensim prodere non sunt ausi: vel denique odio in illos incitati, qui prima, & adhuc sancta illorum consilia, nimis acri & intempestivo certamine exceperunt. Ita multos piis initiis in hanc emendandi provinciam ingressos, deinde superbia, vel æmulationis accerbitas prodidit.

Sunt denique quibus vera fortisque sapientia mentem dedit ea vitia insectandi, quæ nescio quam ipsis religionis umbram faciunt, culpa Mystarum. Iis tam casto impetu à modestia non aberrantibus, sublimis fortisque indoles esse debet, & quod rarum est, nihil pro se, sed pro publicis commodis laborare; Contumeliis, inimicitiiis maledictis, nec in odia rapi, nec à coeptis abstinere.

Eximium prorsus munus, arduæque virtutis. Raro enim qui ab iis sic carpuntur deesse suis vitiis videas, aut æquo animo pati censores. Sed flagitiis fucum inveniunt, vel quod pejus est, ea quoque importuno patrocínio tueri non dubitant; conanturque hos ipsos monitores, licet intra iusti officii pietatem compositos, apud populum perpetrati sacrilegii opinione evertere.

Cæterum ut nascentium Religionum ritus, suorum Autorum industria & genio nituntur: ita postquam à populo probatæ sunt, Præfectos suos habent, per quos rite dispensentur: Hos alia aliaque gentes diversis nominibus insigniunt: nos Pontifices, Præsulesque & cæteris in eum sensum vocabulis appellamus Servandarum religionum non alius utilior illo regimine modus; qui etiam à cœlesti præscripto est. Ex iis qui eruditæ & laboriosæ virtutis sunt, re ipsa Sacrorum incolumitatem sustinent; improbi, saltem specie & virtute dignitatis. Munus quondam laboris plenissimum, & dum publicæ leges nostra sacra vetabant, etiam in extremum periculi excurrere: mox domita extinctaque inimicorum sævitia, congestæ passim opes in tanti officii reverentiam, pæne causam reverentiæ extinxerunt. Nam additis ( & addi quidem decebat ) ad illa divina humanis opibus atque officiis, tantum onus vergere in terram cœpit, eorum vitio quibus in hac utrarumque rerum mixtura tellus potior cœlo fuit. Triste afflictæ probitatis argumentum est, quod tanti laboris curarumque provinciam, quæ olim ministros quærebat, jam multo ambitu sibi deposcunt homines nihil minus quam de pietate & laboribus cogitantes. Ita hæc eximia cœlestisque dignitas plerumque suis ipsa opibus & ornamentis concedit; Et animum ad hæc munera applicare, est ut plurimum in splendidæ illustrisque opulentia cupiditatem incumbere. Tum potiti tam ambitiosi nominis, illas gazas in humanitatem hospitii, & spem egenorum collatas permittunt privatæ lasciviae, nunc inanipicturarum studio,

Studio, nunc cumulatîs variorum artificum laboribus indigne ludenti. Nam has opes prodigenter per pejora scelera nequitiam, modesti doloris verecundia omittit. Cujus autem dementia putes, non modo tantorum facinorum audaciam habere, sed & sæpe quantum peccent, ignorare? Habent quippe præscriptas ad Numen sibi preces, quas effundant in quotidianæ pietatis officium, sanctas has quidem, neque illis omittendas; sed tantillo penso defuncti, credunt se nihil cœlitibus debere, opesque suarum insularum bono jure sibi emptas. Larvæ illæ, & vecordium furor! quod munus assiduo labore ægre perficias, id credere levi & perfunctoria opera rite absolvi. Quod si suas delicias hac saluberrima cogitatione distinguerent, se in specula positos, dicique pastores, si quæ ovium sua ignavia in prædam concesserint, in extremam sui perniciem hoc futurum, fortasse interdum devoverent illam ipsam qua exultant ocii lasciviæque licentiam.

Sed non omnes paribus deliciis, & ignavia marcent. Nonnulli devolutum sumptu detrahunt quod in literatos collocent, ipsi quoque literas brevi impetu, tædiumque non ferente, vel in speciem saltem colunt. Alii ad eruditionem perveniunt, felici mentis impetu evincente ignaviam. Sed & ipsi in nulla re magis eruditione utuntur, quam asserendis illius qua potiuntur dignatis prærogativis. In infinitam sui libertatem argumenta inveniunt, facitque dissimulata cupiditas eloquentes. Eo modo videntur unum cœlum intueri, unius causam agere; tunc etiam à terra vix recedunt.

Qui vero hæc mala eluctati, in dignam suo fastigio mentem consurgunt, & publico splendore, ad commodum populi, decusque Sacrorum, uti amant, (& vero nunquam ejusmodi defunt) illi nec sui ordinis libertatem sustinent violare, nec extorquere alienam; quantum possint, quantumque debeant sollicitat contemplatione conjungunt. Et hi demum sunt ad priscae sanctitatis imaginem

nem facti. iisdem curis, vivendique ratione, quæ priscis temporibus opes meruit quibus hodie perfuuntur. Absit omnis invidia, hi demum sunt antiquitatis beneficiis & nostra veneratione dignissimi.

Populus Antistitum voce, ut est eorum exiguus numerus, non satis semper potest de cœlestibus erudiri. Hinc doctorum hominum ingens turba, & ubique divinarum scientiarum candidati, quorum aliqui vere, ac cum sapientia, ei quam profitentur scientiæ insistant. Cæteros verius dixeris pro factionibus suis quam veritate depugnare, adeo torrentis animi æstu rapti omnis generis patrocinium probant, quo Religionis sanctitatem possint populo commendare, amantq; pietatem etiam impia ratione provehere. Suas igitur sententias asserturi, pulchre, & cum laude decipere credunt, etiamsi evidentibus argumentis illi rei faciant fidem quam duxerint esse veram. De adversariis porro dicturi, vix sincere illorum sententiam produnt, sed deflexam in odium, & pæne de sensu auctoris exeuntem. Vesana autem repugnandi cupiditas eo æmulationem deducit, ut à quibus dissidere inceperint, in omnibus divertant; & hoc solent in pietate numerare. Tum quasi nihil probe aut astruere ii homines possint aut carpere, qui semel erraverunt, nefas quoque existimant ejusmodi adversariorum judicio proditos in se nævos agnoscere, & salubri mutatione eluere. Hæc itaque propugnando quæ non posse defendi satis constat, iniquissimo præjudicio onerant justam in cæteris rebus litem.

Magni nexus inter omnis eruditionis partes sunt, & affectus qui divinarum rerum peritos exercent, sæpe cadunt in cæteras Musarum disciplinas, maxime illa consuetudo litterarias lites, ac pæne odia, agitandi. Iurisconsultorum quidem rixæ etiam ad inhumanitatem verborum descenderunt, nostro sibi seculo scuticam flagellumque minantium. Abiit in sectas Medicina, magis etiam pervicaces: quod illis non in gloriam tantum

tum fama, sed & in opes quærat, & vix unquam ludicrum aut ad solam voluptatem in ea arte certamen sit, ægris quodcunque isti male senserint immerita calamitate luentibus. Cæterum omnium litteratorum genus in duas rite classes distinxeris: quarum illa sit hominum multa quidem eruditione feliciū, sed qui præterea civilibus disciplinis imbuti, incuriosam scholasticorum morum vilitatem effugerint: alia vero illorum qui animum unis literis impenderunt, diutius inter extinctæ vetustatis rudera quam cum suo seculo viventes, ut plurimum foris inepti, & domesticis sordibus viles. Neque etiam aliam elegantiam aut noverunt, aut curant, quam illam solitariam, qua à Musis ad contemplationem accepta frui quam uti magis possunt. Et hos tamen maxima utilitate colueris, si scias ab hac cruda informique arena exprimere aurum, & nitere illo ipso ornamento, quod in iis velut multo pulvere obrutum, lucem amisit.

## FINIS QUARTÆ PARTIS.

## P A R S V.

## A L I T O P H I L I

## V E R I T A T I S

## L A C R Y M Æ,

## S I V B

## E V P H O R M. L V S I N I N I

## CONTINUATIO.

H E N R I C O B O R B O N I O  
G A L L I A R V M P R O T O P R I N C I P I,  
Alithophilus perpetuam sclicitatem.

**C**ommendo tibi Veritatem, quam hominum malitia  
nescio qua iniquitate, & ad malum pravitate natu-  
ra, damnavit exilio. Vt possis assimilare, quantum te  
amice

amet Dea illa Iovis filia qua tibi tantum supplicat : Arre-  
 cere fugitivam ad magnas spes dextera tua fulminantis ro-  
 bur, vigor animi, & ingenii felicissimi liber impetus, qua  
 tria solum parva imperio suo Galli habent. Sensisti quibus  
 injuriis emeretur rarissima mortalibus Veritas, qua suis mi-  
 serabilis, non alias magis oblectat cultores suos, quam cum  
 per calamitates venit. Si reddideris libertatem quam nou-  
 dum inter cades & supplicia totam projecit : dabit tibi pra-  
 ter immortalitatem nominis quam jam tuis factis meruisti,  
 gloriam restitutarum Musarum qua una cum Veritate du-  
 dum exulant : effato nimirum & intermoriante ad studia  
 avo. Non possum amplius indignationem infra me tenere,  
 & dolorem meum continere, quem graviozem illud maxime  
 facit, quod libere queri non liceat. Quod si tu quondam Ve-  
 ritatis partes sequutus, audeas imperare manus suas & ar-  
 ma promittentibus, qua hodie in processu sunt vitia, post-  
 modo velut in solitudine & situ jacebunt, adoratura virtu-  
 tes, qua nunquam magis fulgent, quam cum Veritatem co-  
 mitantur. Quid enim aliud totos homines includit tumulto,  
 quam mendacis infamis historia, qua laborantem in secta-  
 tione veri posteritatem ad ludibrium antiquitatis astringit,  
 dum miracula describit & fabulas etiam pistrinis indignas.  
 Ideoque male vivimus, quoniam savi mores, & insensa tem-  
 pora, vera dicentes non tolerant. Sed lachryma, suspiria, &  
 querela super ejusmodi malo haecenus frustra ! cum jam-  
 pridem disciplinarum studiosos ( quibus etiam suam famam  
 bene nati principes debent ) aspernentur, & pervicaci consu-  
 melia videant melioris litteratura sectatores, quorum tan-  
 tum beneficio ipsi vivere diutius possunt. Vetus sane in hoc  
 regno malum ! Unde mirum est, inter magnatum inscitiam,  
 artium, linguarum, & eloquentia contemptum, posse te in-  
 veniri qui scientias ames. Adeo pauci sunt qui Musatum  
 decus, & Apollinis sequutores possint sustinere. Sic in mo-  
 numenta & libros clarissimorum virorum alias non parce sa-  
 vitum, cum nomina eorum typographorum loquacitas vul-  
 gasset, aut audacia scribentium, quos bona conscientia con-  
 temptores fecerat comminata necis. Igitur, AVGVSTI S-  
 SIME PRINCEPS, tua ista partes erunt, erro-  
 res publicos, ignorantiam, & mendacium deprimere. Verita-  
 tem à servitute vindicare, fugare dolentis maestitiam, terge-  
 re lacrymas, levare planctus. Pro quibus officiis famam vo-  
 cabimus



cabimus in laudam tui, qua virtutes tuas differat pectus  
tum terrarum orbem. Mutuo ista sunt, iuvabimur, si ju-  
veris. VALB.

**Q**Værebam quod miseriis meis finem face-  
ret, nam & hilarior fortuna vultus jam-  
pridem suos in perniciem meam condide-  
rat, & vix inveniebatur numen aliud quod Ali-  
tophili meminisset: adeo etiam Veritatis nomina  
Dii odere. Cum vox inter sylvas convalles au-  
dita, à solitis querimoniis, importunis terrori-  
bus, & erroribus inexplētis, calamitosissimum  
hominem ad nescio quod solatium vocavit: si  
conjuncti gemitus, & iniqua miserorum paritas,  
Fatorum acerbitem, & invidiam mortalium, a-  
liquo modo lenire possunt. Turre erat tam con-  
juncta lapidum serie, ad æternitatem durata, ut  
etiamsi Iupiter aurum esset, illum tamen incor-  
rupta non timeret. Crebri ferreorum radiorum  
nexus, & quibus cum sua Venere Mars turbulen-  
tior inclusus, nec armis suis locum inveniret,  
nec fugæ. Non illam suis brachiis æquoreus Ne-  
ptunus cinxerat, aberant fluviorum Dii om-  
nes, nymphæque tremulæ loci horrorem fu-  
gientes lymphas suas alio deduxerant. Dura so-  
litude exesos telluris amfractus, & tenebricosas  
voragines habitabat, sola, nisi quod senex mulier  
hac quotidiana querela sanctam simul caniciem &  
solitarium silentium rumpebat.

*Quod possum, furtim lachrymas male invida mater  
Nate tibi comitique tue, fero, confesco, dono.  
Te patria pietas, te livida turba potentum,  
Te veri sincerus amor, justumque, fidesque,  
Perdedit, hanc tua fors: ambo periistis in uno  
Crimine, si scelus est qua quondam numina fecit  
Immanis probitas. Sed non periistis & ambo,  
Aut libertatem melior sententia reddet,  
Aut si fata negant, adeone relanguit ardor  
Quo geminam gemino partu dedit Ilia prolem,  
Quo facundum uterum generoso semine nuper  
Conjugis implevit Mars Gallicus, ut sua damnet*

*Fasta miser, timeatque sua superesse querela,  
 Qui rediuviva suis restauret Pergama Gallis.  
 Nescio quid spondet mansurum hac turris imago:  
 Iam ferit Illyricum remis velocibus aquor  
 Tyrrenusque sinus, illum Galathea salutans  
 In tenero vultu vultus miratur averum.  
 Ardet, amansque sui tum deserit Acidus ignes,  
 Ille quid? in dubio est! ejus connubia poscunt  
 Mille Dea. Vellet cunctas, & in omnibus errat.  
 Hinc Arethusa suis suspirat blanda sub undis,  
 Illinc Stymphalides malesano vortice currunt,  
 Et Melas, & Cyane, nymphæque Simatidos amnis.  
 At parte ex alia turrito vertice Divum  
 Vesta parens, lento incedens per littora passu  
 Volvitur ante pedes, supplexque affata silentem est  
 Innuba restabam, sed tanta potentia forma  
 Virtutisque fuit, Protagonis imagine capta  
 Succubui, sensit victam, thalamisque recepit;  
 Post illum, mi ercede, places, sed tada jugalis  
 Non patitur sincera duos, tua cetera sunt  
 Elige de multis. Tibi jam sua brachia tendens  
 Mitior occurrat discusso Roma pudore,  
 Hinc Solime matura thoris, at vestibus atris  
 Et laceris petit amplexus, cui proxima fulget  
 Parthenope, & roseo spirans Bisantia vultu,  
 Innumeraque urbes, quarum vel mania quondam  
 Borbonidum fregere manus, vel bellica virtus  
 Cognita disjecit trepidis à civibus hostes.*

Dum loquitur, mentem fatidicus furor, mem-  
 bra omnia sui motus deseruere. Nusquam post  
 verum de Evandri successu vaticinium altiore  
 somno Carmentam Tyberino in littore Deus op-  
 pressit. Accessi, qua manus brachio committitur,  
 indicem admovi, defecerat omnis arteriarum  
 pulsus, succedensque in ejus locum glacialis su-  
 dor, pertinaci glutino totum corpus irroraverat.

Ecce dum sudorem extergo, frontem frico,  
 pectus detego, deficienti spiritui ventorum spi-  
 ritus præbeo, superveniens militaris cohors in-  
 turrupit humanitatem meam, & quasi non lice-  
 ret esse pium, in ignoto damnavit officium quod

Romu-

Romulus olim civica corona sine plebiscito donasset. Interim marcentes oculos quæ jam jacebat aliquantulum allevans reviviscere cœpit, sive illam tumultus hostilis, sive frigidioris aëris libertas excitabat. Tum dēnum convertens in me pallidos vultus nutu servitii mei continuitatem interpellabat, & voce nondum firma ut sciret cui beneficium debebat, de sævitia præsentium quærebatur. At illi maritimis saxis surdiores, & crudeliores Siculorum tyrannorum satellibus, ne supplicantis quidem voto responderunt, sed infestis manibus ori oculisque impositis, vocem simul & nutus cohibuere.

Trahitur publica via caducum annis & mæstitia corpus, exitium virtutis, & regni ingens plaga, cum sub justo principe severitate dominantium ne verba quidem & lacrymæ impune essent. Et ne me lateret tantæ ferocitatis causa, inventus est aliquis paululum à turba seductus (dum matronam mœrentem & crines cum veste lacerantem alii advehunt) qui stuporem meum hac oratione discuteret.

Nullum unquam seculum hoc isto pluribus vitiis restagnavit verum, cum cæteræ virtutes pari fere sententia exulant, inventa est una Veritas quæ catenis onerata, flammis tosta, rotis collisa, oleo ebullita, in perniciem suam subtilissima quæque ingenia invitet & acuat. Mirum tamen, tam cruenta virtus cultores invenit. Iam plures familiæ sanctis parentibus desolatæ, Deam colunt, quam in publico damnant: aut suis testis exclusæ, in sylvis delubra extruunt & aras, *Veritati*. Iam rari nobiles piis scæ libertati qua maxime Gallia commendatur, non valedixerunt: hujus funus plangore & veris fletibus persequi, ne potentioribus quidem sæminislicitum est. Hæc justissimi mœroris impedimenta, quæ miraris: ipsæque, ut audisti, regii sanguinis semina saxeo carcere serviliter inclusa, exemplo sunt, quam periculosum sit hoc tempore Veritatem sectari. Et ne me putes in depravatos sæculi mores illegitima in-

vectiva excandescere nondum repertus est, qui  
 uberiori suorum sanguine Veritati parentaverit.  
 Capiluporum gens, integritatis suæ fama totam  
 Germaniam impleverat: & quod rarius est, bo-  
 nam mentem comitabantur nobilitas, & ingeniū.  
 Avus meus cum corpus iuum ubique terrarum  
 circumtulisset, nihil inertius tot insolentibus va-  
 riisque monachorum sectis iudicavit. Itaque cen-  
 tone è Virgilianis carminibus confecto, monasti-  
 ca otia, simulatam sanctimoniam, ingluviem, ava-  
 ritiam, libidinem, ambitionem, petulantiam, & re-  
 liqua religionis prætextu in ultra scelera stylo alie-  
 no solertissime confodit. Plebs, quam nulla catena  
 arctius superstitione constringit, non tulit ejus  
 authores mordaci dente lacerari. Ruit impatiens  
 iræ, caputque varidicum Rheno merfit. Exti-  
 mit fluvius, proque sanguine timidas aquas con-  
 trahens, pallentes submitit fluctus, & Orpheo suo  
 pepercit. Hic postmodo relicta patria, cum duo-  
 bus filiis in Galliam venit: sed & illa Germanica  
 contagione vexata, nuper Mendacio sacrificave-  
 rat. Non potuit tamen, vir innocuus, inter tot for-  
 tunæ minas, & ingruentia undique pericula liber-  
 tatis suæ non recordari. Igitur, conversus ad an-  
 tiquæ Satyræ morsum, doctissimo & jam suo ver-  
 su Veritatis hostes perstrinxit. Cujus exemplum  
 filii sequuti, pertinacissimis argumentis Romanæ  
 lasciviæ bellum indicendo, videbantur immorta-  
 litate digni, cum idem ventus & navigationis au-  
 xilium, & naufragii causa fuit. Breves & mutabi-  
 les sunt humanarum rerum vices, & conditionis  
 nostræ Fatum rector nunquam simpliciter indul-  
 get. Celebritas nominis, invidiam parit, invidia,  
 inimicos; mortem, inimici, & nihil est tutius,  
 ignorantia. Parcite dolori meo victrices umbræ:  
 hæc lacrymas, desiderium vestri; hæc suspiria,  
 posthumi pietas foras evocat! Absit, ut gloriæ ve-  
 stræ invideam, quæ plus posteritatis est, quam  
 vestra. Pro Veritate cadendo, fecistis ut hæres  
 laudis, non bonorum, essem. Sub oculis meis, a-  
 vus, pater, avunculus jugulati, minus amicorum  
 officiis,

officiis, quam inimicorum crudelitati debent. Illa, vitæ incommoda mitigaverunt: hæc, mortis ludibria simul abstulit, & immortalitatem largita est. Quid faciam? si Germaniam repetiero, ut extraneum, abdicabit. Quisquis enim miser à suis solatium exspectat: nescit quam levi momento mutantur hominum ingenia: & quam repentino ab animis absentium memoria deleatur. Si in Galliis diutius moravero, ipsa me meorum funera docent quid timere debeam! nemo bene vivit inter parricidas. At ille optime Fortunam adversam sustinet, qui calamitates suas abscondit. Nullum solum infœlici gratius, solitudine: in qua, nec parricidæ inveniuntur, nec alius, qui misérias exprobet.

Hac deliberatione ferox, tantis casibus adspirantem reliquit; sed dum fugit, nescio quæ vox auxilium implorantis fugam ejus inhibuit. Conversus itaque ad notissimum sonum, videt amici corpus vulneribus lacerum, & tam continuis fustium ictibus intumescens, ut ne Chiron quidem attonitus ad tot ulcera, homini pessime affecto auderet sanitatem polliceri. At ille qui jacebat, undique circumlatis oculis, ubi in Capilumpum incidit, quis crederet? tam pertinaci constantia in Onosandrum declamavit, ut facile esset conjicere, eum plus de ultione, quam de salute propria cogitare. Potens, & efficax nomen est, vindicta: quod quisquis amat, & vitam simul spernit, & bona Fortunæ. Male sine stimulis satyras scribimus; admovenda sunt Poëtis infœlicibus calcaria, & atrocibus injuriis excitandus furor. Pace tua Botris, quod nuper Onozandrum poëma arguit, enervi, & flaccida facundia languebat: nunc, quod offensus exclamas, mirandum sapit, & aliquid majus, Hipponactis carmine. Cæterum, quoniam hoc, & illud typographorum curiositas in publicum misit, hunc libellum aliena sarcina exonerare volui, ne quis aut extra rem procaciter immissa poëinata putet, aut Onozandri odio invidiose deductum opus, iam vulnera

declamantis frigefcente sanguine recruderant, jam pallor suffusus totum corpus occupaverat, & qui jam victor adversus iram Deorum placebat sibi, intercluso spiritu, in sua potestate vocem non habebat, qua constantiam suam extolleret. Proh superi! quam facili ratione barbaris etiam precantia verba necessitas suggerit. Ille, ille Capilupus qui colloquium meum, & amicitiae nascentis jura contempserat, ut primum Botrida expiranti similem vidit, tam humano sermone, & miserabili gestu, perfricuit indignantem animum, ut ne dubitaverim quidem subvenire auxilium meum suis & amici miseris imploranti.

Dum semicadaveri fletu magis, quam fomentis succurrimus, inter plures domos ad verto chirurgi tabernam, & è fenestris dominum ædium subterlabenti fluvio purgamenta ejicientem, qui ut ad indicis vocantis signum cucurrit, tam facili medicamento fugientem animam, sensusque morientes revocavit, ut æger confestim salubritate toto corpore percepta itineri suffecerit, quod ad beatas ædes salutaris hominis ducebat. Vbi, jussi consedimus, tum novus ille Æsculapius ad nos.

Hactenus humanæ felicitati quodcunque illud est inimicum numen quibus suppliciis potuit desæviit: tum demum ferocitati suæ habenas iniecit, & minus hostiliter peccat, & occidit. Levis mors est, quam gladius alienus infert; at illa miserabilis, & deploranda maxime, quæ alium percussorem præter moriturum non invenit. Biddum est à quo hospitem extuli, quem sua manus repugnantibus fatis abstulit. Causa violentæ necis, Veritatis amor. Et ne vos alioquin sititores novitatis male texta narratione diutius detineam, hæc epistola (è sinu chartam producebat) quam ad amicum scripsit, antequam suis vulneribus generosum efflaret spiritum, totam tragoediam curiosos docebit.

PERCAS EUPHORMIONEM  
ultimum salutat.

**V** Tinam & Fibullius conditioni meæ invidisset, & ego libertati. Aliquid erat, inter serviles notas quas olim fronti tuæ, jussus, inussi, quod festinantibus divitiis anteferrem. Irarum ministros dominorum favor, dum evehit, strangulat. Ambitio, & luxuria, & libido scenam desiderant: scena, catastrophæ. Non inus in servitutem, sed cadimus. Tamen inter sordes & paupertatem securitas habitat. At quidquid in altum casus elevat, aut alienis dolis concessum in dubio manet, aut statim festinat ad ruinam. Non primum tantum iter est ad interitum, sed & præceptum. Felicioribus etiam lubricum. Neque enim, corpora modo, sed & ingenia, illis debemus, quos sequimur: & nulla est deterior servitus, illa, quæ nos crebris muneribus, & iniqua secretorum vulgatione obligat. Alienum est, quod gerimus. Consilia nostra, & res per nos foelicitate gestas, jubentium potentia sibi vendicat: injurius est, quisquis agnoscit quod suum est, & ut infidelæ mancipium poscitur ad supplicium, rapitur ad pœnam. Quo tandem (inquies) tuæ querelæ? Anemon à Callione injuriam acceperat. Provocatur Callion ad certamen. Dum dubitat provocatus, ire, an recusare malit: solus invenitur Percas qui evidenti periculo, Anemonis generositati pro Callione objiceretur. Scis, opinor, quam æquis lineamentis utriusque faciem Natura distinxerit. Pari igne oculi fulgent, frons armatur ad severitatem, aduncatur ad audaciam nasus, & reliquæ oris partes dum in utroque simili proportionem noscuntur, non invenirent qui sine errore à Percante Calliona sejungerent, si capillorum & barbæ color unus amborum vultus confunderet. Hæc nimirum restabat ut Callion essem; & sola pilorum caducitas, canescentisque calvitiei squalor horridus, ignobilem à nobili separabat.



parabat. Itaque novo capillamento quod colore Callionis crines referret oneratur innocens caput : & barbæ fictitia supponitur barba, deducor in arenam, componor cum Anemone, in statu sto, petor, excedo, persequor, non animo, non arte vincebam ; casu vici. Anemon quippe verum me Calliona existimans, dum magno impetu ictus ingerit, attrito in lapidem pede, excussisque è manibus armis, in terram ruit. Non insolenter usus sum victoria, contentus hostilibus spoliis, sine cæde domum revertor. Timuit Callion, ne vulgata pugna, nomen suum ad infamiam vulgaret. Summoveor domo, & prisca familiaritate in odium versa, hoc mihi cum multis commune præmium fuit, ut satis esset fugitivo si viveret. Quam repente rerum facies immutatur ? ecce victor supplex à victo vitam petit. Ad Anemonem confugio, & illi ut deciderant singula fideliter exponens veniam merui, & quod venia dulcius est, amicitiam. Iam non servus, sed comes, & aliquanto etiam Anemone major, si ad illius humanitatem meæ in ejus domo perpendatur authoritas. Tum denique inquirentibus quænam fors me cum Callionis hoste conjunxisset, placuit mutationis meæ causas ad hanc historiam referre, ne quis aut ut malæ frugis servum contumeliis lacefferet, aut Callionem ut Anemonis victorem laudaret. Non distulit rumor timiditatis suæ testem ad Callionis aures inconsulta diligentia perferre. Tū demum vehementissime exarsit, & ad fugitivum persequendum crudelissimam lictorum manum misit, quæ captivum quia comperta & vera narrasset per tormenta laceratum, cruci infringeret, & publicum spectaculum ad crudelitatis etiam satietatem rotæ impositum populo exhiberet. Non hostem indignantem, sed potentiam indignantis verebatur Anemon, qui sacrum jus hospitii ad ultimum servasset, nisi Callionis domesticos, & affeclarum numerum timuisset. Vt ergo, & nomen meum morti eriperem, & corpus barbaræ multitudini, derelictus ab omnibus, à meipso tan-

dem petii auxilium, ut doceam omnia illi patere, cui aditus restat ad Mortem, modo in extremo libertatis osculo velit expirare. Hæc ista qua ad te scribo manus, ut epistolæ simul & vitæ finem faciam invitat, & armata ferro, atramento deficiente, dum sanguinem poscit, solum hoc permitti ut inferam. Vale.

Adhuc extremæ tabulæ à legentis dextra pendebant, cum cubiculum in quo eramus senex canus intravit: hunc clypeata publicorum satellitum phalanx, cum plebis infimæ turba miscellanea sequebatur. Tum ille proclamare cœpit, majestatis reum hospitem nostrum esse, qui tabernam suam contra Divorum Marci & Commodi edicta fugitivorum asylum fecisset: se, legis Favix & Senatusconsulti Modestiniani autoritate ad Percantem inquirendum missum. Nec quæri, an domini pecuniam servus interverterit: constare è voluntaria fugitivi nece, majus admissum crimen. Nimirum, maleficum, proditorem, non tantum Callionis vitæ insidiatum, sed & in gloriam famamque integerrimi & generosissimi hominis imprudentissima calumnia inductum. Illum, & scelera simul sua, & supplicia quibus destinabatur, transtulisse in fautorem & celatorem nocentissimi mancipii.

Dum rabiosa voce in transfugam, & hospitem transfugæ perorat, injectæ chirurgo nequicquam reluctanti catenæ, & in proximos hortos impetu facto, nuper inhumatum Percantis cadaver cum hospite quondam suo publico plaustro, quo damnati ad supplicium vehuntur, barbara feritate imponitur: interque nostras, & bonæ vicinix lacrymas, eodem funere, mortuus & vivus inferuntur. Cui demum (inquam ego) futura est securus quies, ubi fato functis denegatur? quæ tranquillitas sapientum animis, ubi locus non invenitur, quem tuto incolant? umbræ felices ab Elysiis eruuntur, & inter beatorum sedes nondum Veritas effugit poenam? Blandum subrisit Botris, & exclamationem meam oratione tam placida

suscepit, ut videretur Phœbus inter nubes niti-  
 dum coruscare, aut in tempestate tranquillum  
 Neptunus apparere. Et tu etiam (inquit) ex illis  
 es, qui mortalium crimina Deorum exemplis,  
 nesciunt in virtutis locum transisse? hodie non  
 meretur hominis nomen, quisquis erubescit cum  
 Diis peccare. Authores scelerum facimus Deos,  
 & nullum numen superstitiose colitur, nisi prius  
 hominum nefariis cupiditatibus, suis vitiiis au-  
 thoritatem fecerit. Impii parricidæ Saturni ex-  
 emplo delirant, perjuri amatores Iovem imitan-  
 tur. Venerem improbæ meretrices, Mercurium  
 oratores ampullati, Apollinem multiloquaces  
 Poëtæ, Æsculapium impostores medici; & quicū-  
 que in hanc lucem blandiente. Fato venit ut ali-  
 quid male faceret, nihil unquā sine suffragio Deo-  
 rū immortalium fecit. Desine mirari incredulis satis  
 esse ad mendacium fidei, ubi fabulæ ad religionem  
 simul, & ad præsentis vitæ felicitatem conferunt.  
 Hic, luctante lingua osculum illi adfigit, quem  
 mox occisurus est: ille dum demum Fidium in-  
 vocat, amicitiam violat: alter, effuse moeret ad-  
 versam in alio Fortunam, quam ipse dedit, & se-  
 ra indicia ambitiosi affectus, à lacrymis querit:  
 sævi iudices eodem momento quo cuncta liti-  
 gant promittunt, mendicitatem minantur: ad-  
 vocati, nunquam sine spe clientes: suos deci-  
 piunt: illudunt credulis procuratores imponunt  
 Theologi omnium animis, docentque nulli ti-  
 mendos esse Deos, hoc dilemmate: Si Dii sunt,  
 inquirunt, & ipsi salulares, nemo nisi furiosus ve-  
 retur salutaria: Si non sunt, stultum est timere  
 quod non est. Quid plura? ad eum gradum per-  
 vicax seculi perversitas venit, ut humillimi etiam  
 spiritus homines in perjurium loquaces sint, &  
 in alienum damnum facundi. Inter male sana pa-  
 rentum præcepta crescimus, pueri auditione fa-  
 bularum delectamur, senes narratione: inter lu-  
 sus & seria inserimus falsum, & tantis injuriis e-  
 mitur ambitio, ut sine homicidiis leves sint rapi-  
 næ, & extorsiones sine querela, ubi miseris etiam  
 omnia

omnia præter vitam eripiuntur. Avidum est humanum genus, & invicem sibi obstat; quicunque rapuit, alienæ aviditati exponitur; nulla felicitas in tuto est. Pessime quippe cum virtute vivimus, & quisquis in solitudine sibi contigit, languere in otio dicitur, & inertī animo ea de causa tranquillitatem quæsisse, ut se civilibus negotiis eriperet, & imminenti tempestatī timide subduceret. Negant mortales cæteri philosophum illum esse, qui a terrenis animum dimisit ad divina: & inter plausus quibus mendacium excipitur, luget Veritatem nondum postliminio rediisse. Dialecticam eam tantum admittunt, quæ luci tenebras ingerit, ut fallat: quæ ratiocinationibus, ut vocant, suis obruit rationem, & intentum vanissimis syllogismis auditorem ad decipulam ducit. Laudant Physicam è nugis Poëtarum ortam, quæ dum solo Naturæ spectaculo respirat, non invenit Deum: & à feris, quas suus instinctus ad omnia movet, didicere violentiam, cædes, furta, & alia scelera quibus maligna mortalitas ubertim restagnat. Quid dicam? de Metaphysica, quam ideo recepere, non ut Deum esse ostenderent: sed ut simplicitati delirantis populi obscurissimis nominibus, & nunquam intellectis insidias struerent: & ideas materiam, formam, transcendentia, introductiones formarum essentiam, & similia, vitiis suis accommodarent. Quæ omnia facilius creduntur, quia non videntur: & fortius inconsultas aures implent, & rapiunt quoniam humana fragilitas ad dubia & falsa sua sponte inclinat.

Accedit ad ea, & quartum genus Philosophiæ, quod Morale appellatur: & cum multi sint, qui variis præceptis tenera formaverint ingenia, solus Theodorus in pretio est, qui affirmat, omnia crimina, in sapientem etiam cum laude cadere posse: oris & habitus modestiam, famamque affectatæ sanctitatis, non modo sceleratissimos excusare, sed & contentiose antequam fata poscant, adscribere eos cælo. Improbos mores tristitia vultus, & religionis obtentu quasi tenebris obvo-

lutos per virtutis speciem expirare. Tegenda obsequiis frequentibus odia, ut per servitii & familiaritatis jura tutiori fraude quodlibet perficiatur scelus, cui & ipsa Fortuna peccatrix foelicitatem solet indulgere.

Hæc ut palam prædicabat, publicum odium in se convertit, neque enim magistratus tantum cum sua turba hanc declamationem cum fastidio audiebat, sed & quisque in eam rabernam confluerat spectator pendentis exitus, aspernabatur importunū oratorem. Iam murmur, jam clamor, minæ, injuriæ ictus, & quidquid aut tumultus, aut furor, iratis suggerit. Tardum est, differre, quod expedit. Inter tot hostes Hercules sine vindicta cecidisset; & quicumque alius à suis viribus auxilium expectasset aut à mora, hellebori potione sanandus erat. Igitur fugimus non inviti, sed ab ingruentibus undique periculis invitati. Per amfractus deinde obscurissimos, & deserta sylvarum egressi, in eum locum descendimus, quem Apollo, si viveret, præferret Parnasso. Nemus præ altis densisque frondibus umbrosum, nivatas fontium lymphas, & numquam sitientes arenas, sua opacitate veluti propugnaculis tegit, exclususque dies dolet lumen suum ad interdictum venisse. Sparsi tamen flores, qua subtilissimis radiis Sol penetrat, viride gramen prætexunt, & Zephyris dulce errantibus odores præbent quibus nutriantur. Præterea, arborum radices musco circumlitæ suas vires adhærente humiditate temperant, & erumpentes certatim truncos lætioribus ornāt brachiis. Tota sylva arguto lusciniarum cantu perstrepebat, quem simul aura levis commotione foliorum, & placide manantium fluviorum loquacitas suavi murmure interrūpebat: quibus cessantibus, sub platano quæ in immensam altitudinem surrexerat, bonus Tamas hac cantilena antiquis delirantium Amorum flammis valedicebat.

*Adhæsi quondam domina vultibus*

*Servus Cupidinis.*

*Solus vinculis satis est. Imperas*

*Invenis*

*Invenit exitum.*

*Beatus quisquis placido naufragus*

*Dat vota littori,*

*Procellas temnit Veneris perfida,*

*Ridetque turbidos*

*Amoris fluctus. Metus ut spes abit :*

*Nec liber invidet ,*

*Amantum veris querulus gaudiis,*

*Hinc pulcher ingerit*

*Cupido lusus : valida dextera*

*Illinc necem ciet.*

*Facessant arcus, pharetra, & spicula*

*Sava libidinis.*

*Proxax juvenis reperit torridis*

*Fervoribus modum.*

Tam leni concordia ad vocem pulsabat resonantes cytharæ nervos, ut Sirenum contemptor Vlysses, arbori navis alligatus, vincula dirupisset etiam cum periculo novum Ariona propius auditurus. Oculi ad sinistræ manus motum adherentes addebant canenti gratiam, Musarum & Charitum dulcetemperamentum. His, aut similibus modis à Deidamia gaudium Achilles extorsit. Tum demum languente brachio cytharam demisit in terram, complicatis deinde pedibus, & dextero cubito genui impresso, sic ad Daphnidem (qui sub ejusdem arboris umbra sedebat) cum lacrymis infit. Mille nos casus quotidie collidunt, sed generosus animus concitatus ad honesta, aut nihil timet, aut si ad aliquid expavescit malum illud est. Nescio an adolescentiæ meæ vigor, an naturalis impetus, ad libidinem proclivior fuerit. Iam sero immo statim, immo vero jam nunc, stultitiæ meæ me poenitet, & pallido horrore ad omnia blandimentorum nomina contremisco. Sed quoniam jubes me Daphnis delirium meum meminisse, vel iratis etiam Cupidinibus, & mirum & sævum sine mora memorabo.

Ilium ex negotio petebam. Forte Pæstoli fluminis in ripa Ilienses mulieres Iunoni sacrificaturæ exierant muris; omnes si non Deæ, creditamen

di tamen poterant: & forsan inter tot calentes formosarum fœminarum sinus, melius quam in Cypridis gremio nondum satis defletus Assyriis Adonis latuisset. Cunctis eximium pulchritudinis aureæ decus, amantius tamen in una nitebat. Vtpote cujus genis nix inhærens purpureo madefacta sanguine, extingueret rosarum & liliorum nativos colores. Collectam frontis modestiam duplici semicirculo instar crescentis Lunæ æquabili meditullio supercilia nigra cingebant; radiata lumina imminebant naso, & veluti è vallo in aggeres, inevitabile Amoris telum vel & in innocentem spectatorem sine delectu torquebant. Iam crines ad captivitatem flexi, quot orbibus vibrabantur ad gratiam, totidem laqueis hominum libertati insidias fecerant: & ipse purpureus in labiis color, videbatur, humani cruoris continuo potu in tantum ruborem venisse. Cervix alba, & sine gemmarum fulgore satis suis deliciis ferox. Infra, gemini folles Cupidinem undequaque spirantes, incentivo & ad pruritum etiam frigidos invitante motu sororiantes pulsabant papillulas, & à suo subsultu lumborum levitatem indicabant amatoribus. Nihil vetabat advenam cultorum turbæ adscribi. Etenim sicut divinitas, sic forma (cœleste donum) laudatorem nullum à cultu suo semovet.

*Contremus, sensere novas præcordia flammæ,*

*Hæsit & in vultu, qui fuit intus. Amor.*

*Haud aliter nivea depastus amore juvenca*

*Taurus agit spumas, & pede saxa ferit.*

Nec mora, stimulatus ardore, accessi, atque ita compellavi. Ciede mihi domina, fax retens ad illud incendium parat se. Quod si negligis, vel post morulam non poterit extingui. Quod si peregrini vota admittis, ecce tibi duo magna Numina concilio: Amorem scilicet & Apollinem. Illum tui oculi è cœlis ubi æque ac in terris imperat, eripuerunt, ut mihi traderetur, & ego illi vicissim. Hunc vero tua ista facies formata ad invdiam Dearum litigantium in Idæo monte è con-

sortio



sortio Musarum ad laudem suam vocavit, ut scires, tantum speciei miraculum unius viri custodia regi non debere: nullum esse bonum, quod commune non sit: & formositatem ideo dari à Diis, ut à pluribus ametur, & plures amet.

*Quocunque aspicias, nil toto majus in orbe  
Collucet Phæbo: tamen hic communia vulgat  
Lumina, & incertis inconstans ignibus errat.  
Aureus huic color color est, & sunt argentea Luna  
Cornua, uterque tamen non a quo lumine flagrat,  
Vertentemque suis definit cursibus annum.*

*Lympha fluit, formosa fluit, seu dadala rupos  
Findis, & irato pertundis marmora fluctu:*

*Sed tu prava rigas, Cerevemve inducis in arvis,*

*At formosarum tamen est communis aquarum*

*Vfus, & astricta nulla sub lege vagantur.*

*Sola nocens, ingrata viris, ingrata puellis,*

*Perque nefas, & triste decus, male ficta, reliquit*

*Lex thalamis speciale malum, quo frigidus olim*

*Tutior in domina conjunx amplexibus esset.*

*Hac inter morimur, sevaque Cupidinis ira*

*In vetitum ruimus. Nam quem non improba carpit*

*Forma, vigorque animi? sic Tantalus imminet unda,*

*Qua refuga ora senis nullo pro crimine ludit.*

*Impia quid damnas tam justas Iulia flammæ?*

*Quid terras fidei & probitatis imagine vana*

*Femineam mentem? Furor est, concedit, & offerda*

*Qua quia jussa negat, cur sic se jungis amantes.*

*Et concedentem secludis barbara cunnum?*

*Quem fastidito demulcens rore maritus*

*Ad plenos acuit coitus, opitataque furta.*

*Quid non cessantes custodis in arbore fructus*

*Dure marite, ferox, & saevo seviror Euro?*

*Ille tuus selectus ager sulcatus aratri*

*Pluribus, uber erit, non illum deteret usus.*

*Deperit inde nihil, contra fecundior alto*

*Imbre tumet, largoque potens in semine surgit.*

*Quam misera est natura hominum? mortalis iniquitas*

*Cura dedit leges, & quod tot furta Decorum*

*Ostendunt, audire pudeat. Sic Iuno Tonantem*

*Insit, & accepto decepit adultera flore.*

Qui flos in teneris secretus fingitur hortis  
 Impragnasse Deam, & thalamos lassisse pudicos  
 Mentula erat, duplici turgens plus cornea bulbo :  
 Lactens huic caulis, sed quem pro stipite posses  
 Accipere, & firmum duris aquare compressis,  
 Aut nisi purpureo vertex fulgeret ab ostro  
 Totus ebur nitidum, cujus vel lilia possent,  
 Intactaque nives tantum cupiisse colorem.  
 Cuncta Clio nosti, tu qua Iunonis amores  
 Vidisti, narrare velis, quo Iupiter igne  
 Arserit, an stricto traiecerit ilia ferro.  
 An frendens fulmen dextra libravit ab aure.  
 Setosamque fevox injecerit Æaïda tergo.  
 Risit : & immunda tractando virilia palma,  
 His quoque furta placent, conjux, ait, utere donis  
 Qua natura dedit : non sum tam tetricus, ut quos  
 Sensi ignes, damnum : brevis est injuria nostri  
 Et secreta thori : meus est genitricis in alvo  
 Imperfectus adhuc infans Tu nate parentem  
 Aut sequere, aut penetra Stygias injurius undas.  
 Dixit, & in medio placidus consedit Olympo.  
 Tantorum miseri cur non exempla Deorum  
 Mortales sequimur : cur non communia tecta,  
 Communesque thori, sacrum de corde dolorem  
 Depellunt, demtisquesolers clementia sulcis  
 Zelotypas mulcet frontes ? Hoc itur ad astra  
 Limite : quid Divum donis fœlicibus obstas  
 Iulia ? & ingratis servas tua jura maritis ?

Ad hæc illa. Bono animo esto, inquit : neque enim huc sine Numine venisti, en, & Amaryllis Tamizæ mutuo amore mancipata est, & jamdudum pari cupidine ad integram voluptatem suspirât. Facito ut probus miles ad excubias hac proxima nocte in conniventi lumine agendas cum armis venias ; non ultra differo, quod petis : Veneri sacrificaturæ minima est de Iunone cura. Effice tantum ut memineris domicilii mei quod peto, ne cum abierit dies & tu sine lectulo vigiles, & ego sine amatore. Processit deinde per amplissimam civitatem, pererratisque pluribus vicis, ingressa est domum tam multis insignem ædificiis

difficiis ut oppidum sola facere posset. Quod si ab ædium fronte interiora conjicere licet, in his majus erat aliquid aurea Neronis domo.

Commodum Sol ad Oceanum cursus præcipitabat, & minori lumine inter diem & noctem Vesper nitebat, cum felices tenebræ intenderunt se cælo, & patentes fores in ipso limine mulierem excepere furtivo susurro, & qui tamen audiri à vicinia posset, Tamiā appellāntem. Non dubitavi me meamque fortunam ad vocantis arbitrium credere. Nimirum Amor ex hominum animis timorem expectarat. Illa manu prehensum ubi per flexuosos sinus amplissimæ domus pertraxit non repugnantem, eo se mecum cubiculo inclusit quod luxus, credo, speciale sibi domicilium elegerat. Ibi nive candidiores cerææ faces sua multitudine immiserant diem, & eas brachia per ditissima aulæa exerta tota ex argento sustinebant. Ebore candidissimo testudinibus cupressinis, & jaspide, summa parietum refulgebant. Lectum circumdederant parapetasmata phœnicei coloris, aureis limbis ad immane pondus onerata; aureæ quoque fimbriæ stragula cingentes totum fere tegebant pavimento, quod varii marmoris solerti conjunctione ad Veris etiam invidiam & reddebat omnis generis flores, & servabat. Adeo vitia ad virtutis speciem ornantur, ut qui quondam in Cincinnatis & Fabriciis Virtus fuit divitiarum contemptus, ille hodie inter luxuriam sæculi usque ad nauseam calcantium regnet.

Tum mensam illa quæ mihi itineris dux fuerat ante focum erexit. impletamque selectissimis belariis, & poculis Liberum patrem spumantibus, indixit postcœnium: interque mutitationes Veneris hortatrices, cui serviret, exposuit.

Iam octavus est annus, à quo Amacho ditissimo homini, sed ad fastidium stolido, Amaryllis nupsit. Caveant puellæ quæ foelicitatem suam ad numorū mensuram metiuntur, ne inter devotam amatorum turbam eum conjugem eligant, quem splendor auri, non virtus, non ingenium, non  
ingui-

inguinis indefessi grave pondus etiam ultra desiderium commendant. Inter aurum & argentum jacet Amaryllis, & in nuptiis vidua, ignorat quem habitura sit hæredem. Tamen, castissimamulier, tanto ardore ad quæstionem liberorum fertur, ut nihil sinat intentatum, quo prægnans uterus expectatissimo partu aliquando successorem resolvat. Absit, ut de tua forma tantum præsumere velis, ut credas te ab Amore ad tantæ foeminæ amplexum vocari! quoties ardere se dicit, toties fumum dat, non fidem: scilicet ex ambitione audientis, non ex cupidine suo jurat; neque enim habet pulcherrima mulier quod diligat; nec magis formosa quam pudica, sine crimine oscula dat, & accipit; interque varios concubitus non invenit adulterium, quod non coitus, sed ad libidinem æstuantis mulieris voluntas facit. Pridie dum ante aras staret, & mellita oratione sollicitaret in auxilium suum salutare Venerem, visum est Deæ simulacrum annuere voto precantis. Crepuscule injectæ focolaurus, & splendidissimo nitore colluxit templum, subridensque amico numine Venus, nunquam minus dubia voce hoc oraculum expressit.

*Qua largus diti restagnat Pæstolus unda,  
Et qua luce Dea Innoni sacra parantur,  
In Tamiæ savi flammæ jaculabor Amoris,  
Cor grave vulnus alet, subitus rubor ora notabit,  
Præbetque suos ad verba precantis vultus.  
Sustine; quodque p. tet, facilis concede precanti,  
Non ante exerto sua cornua Luna reducet  
Vertice, quam tumido tua viscera pondere crescent.  
Mater eris, gravisque tibi Lucina favebit.*

Nemirere igitur, amatorem te tam cito receptum, quem Dea (sub cujus tutela totus orbis agitur, & quæ jura pariter cælis & terris dat) jussit in pudicos thalamos admitti propagandi generis humani causa. Cura Numinum si non maxima, tamen aliqua sumus, & quodcunque sine illorum arbitrio fit, inutile putatur. Amachus infautis omnibus quo die Amaryllida duxit, frigidando con-

do congressu interfecit cum virginitate fœcunditatem. Succedere in illius locum quatuor fratres, & Amachum dum à sterilibus thoris arcent, conturbatis seminibus illuserunt sorori. Istorum impotentia totam familiam in solatium vocavit; sed inter tot futurorum millia nondum inventus est, qui desideratæ sobolis imprægnatione repararet labentis domus ruinam.

Ea adhuc loquente, in cubiculum in quo eramus præcipiti passu venit Amaryllis: excussæ fores stridenti cardine converterunt ad sonum suum oculos narrantis facundia pene obseratos in somnum. Collucentes faces ad ejus conspectum visæ sunt majoribus flammis ardere. Nimirum ipsos etiam ignes geminus ille ocellus mortalis nymphæ urebat. Quæ postquam moras suas importunitate mariti, & familiæ vigilia excusavit, Amatores, inquit, & tenebras quærunt & secretum. Statim reducti postes, & janua admotis repagulis ad securitatem laxata, omne deinde nocuum lumen extinctum, & rorans balsama lectulus ad gaudium semiapertus. Crediderim illum poëtas olim speluncam fecisse, in qua Dido tantum Æneam sustinuerit. Delectata illa ancillæ sedulitate multum risit, & brachiis huic collo injectis, & ad osculum sese ore ultro offerente, Thorus, inquit, iste latebras suas debet hujus vernæ officiis: at tu, dum quas sensurus es flammæ imperat abscondere, illis silentiū. Hoc dicto sævit atque citius in amplexum, & hiantibus labellis tremulam linguam in os stupentis condidit, interque gannitus pertraxit in thorum amatorem jam cadentem.

Scis, Daphnis, quæ bella tanta libido lasciviente lumbo suscitet, qua amantum voluptate succubæ mulieres crebris subsultibus & lubrico spinæ motu amoris indulgent, quæ petulantia ad reciprocos morsus soleat in ipso profluvio seminum jacentes efferare, quæ salacitas varietate congressuum Spintriarum inventa superet, aut Elephantidis libros? Crede hæc omnia in thalamum nostrum venisse, & tandem longo & repetito certamine

tamine fatigatos, in altum somnum descendisse: postera die, refectas cibis vires, ad huiusmodi colluctationes conversas, & durasse ad confinia mensis voluptatem solidam, donec in foetum obstipato Amaryllidis utero Veneris oraculo fidem fecerim. Ipsa tandem consuetudine satur petitionem, cum illa & languorijam meo irata, & puto ad novitatem erecta, quod petebam etiam ultra expectationem facili nutu concessit. Addita hac monitione.

Si, inquit, tam prospere Dii tecum egerunt, ut possis inter virtutes tuas taciturnitatem numerare, invenisti, quæ fidelitatem silentij tui insperatis honoribus aliquando remunerabit. Si vero tua ista lingua importuno motu secretum revelaverit, scias te certissima nec ejus temeritatem luiturum. Longæ sunt manus & implacabiles mulierilæ sæ, utpote quæ nunquam torpent nisi post excidium provocantis excitatur desuetudine furor, cumque alij mentis impetus, & violenti affectus animi, tempore, longaque absentia, veluti tectus ensis, rubiginem contrahant, sensimque minuantur, ira cui loquacitas male sani amantis causam fecit, non invenit in foemina modum. Et ne me putes ad minas inanes & fictum supplicium descendere, advocetur hic Hippocomus, ut traductus lanienæ, doceat Tamiam quid timere debeat. Pervicax est in famam meam Fortuna, & in ipsa domo dudum invenit qui pudicitiae meae noceret. Nimirum quem è stabulis, & ab Hippona, ad domestica servitia contuli, quem in hunc recepi thorum ut per luxum & illecebras conditionis suæ oblivisceretur, gratiam meam tradidit, & nefario sermone tot meam se beneficia ingratiissimæ loquacitatis scelere polluit. Adeo etiam in serviles animos virilis sexus consuetudo descendit, qui ubi ad satietatem libidinem explevit, ludibrio habet amatam, & superbo fastu negligit Cupidines nuper pernoctationibus, lacrymis, suspiriis, & exitiali pæne inedia quæsitos. Lentius in Africa queros ad medelam corporum inter Auroræ rosas  
è coelo

æ cœlo salutaris cadit, ad primos nascentis Solis  
radios expirat.

Sub isto fine sermonis perductus est Hippoco-  
mus, homo lascivæ frontis, oculis petulantibus,  
nigro crine, barba primula, & nondum ad men-  
tum delicato & tenello vellere descendens. So-  
lum pectus, quod ad inflatorum utrumque speciem,  
protuberabat, deformaverat formosissimum cor-  
pus, quod Doris ministra ubi ad infelicem tra-  
bem arcte colligavit, egit retro cubitum vestes,  
& alte succincta supposuit patientis pedibus ar-  
genteum labrū. Nec mora quem tenebat gladium  
tam alto vulnere in Hippocomi pectus condidit,  
ut sanguis erumpens uno impetu pæne totum la-  
brum impleret; mox inter ciuorem evulso corde  
aperuit os nil reclamantis, & extracta viscera car-  
nifice manu præbuit ut manderet. addita etiam  
hac imprecatione, pari nece damnatum spiritum  
ejiciat, quisquis impudicam quam fecit insolens  
diffamat probris, & in bonam amatæ famam dedi-  
gnatur mentiri. At ego ut eram semi mortuus,  
eamdem crudelitatem frigido horrore expecta-  
bam, eratque summum trepidantis votum, mors  
mitior, quam in pretium præcipitis obsequii serio  
advocabam, sciebam quippe raro subsistere lassam  
feritatem, pantheræ in modum, quæ plusquam  
exigit fames, devorat. Cum sæva Amaryllis, &  
sævior Doris Amaryllide, monitum meminisse  
Hippocomi supplicii, expulerunt domo.

Tandem resumo animos, & domicilium Cir-  
ces & Sirenum insulis crudelius pernici fuga re-  
linquo, quæsitoque diversorio & invento, per to-  
tum triduum inclusus quæ videram idem talem  
replicabam. O Dii! rem perditam, matronarum  
noctes morte emimus, aut exilio omni nece pejo-  
re. Inter delicias eo sensu venit homicidium, ut  
ad illud publicus minister pallefceret. Quid me  
crudeles foeminæ jam Stygiæ paludi innatantem  
momentariæ luci restitulistis, ut sævius post-  
modo peream? Hæc vestra benignitas inofficiosa  
est, quæ dum parcat differt supplicium. Permit-  
tite



tite me in quietem, & sine mora expectanti orco paratam victimam reddite. Quo enim pertinet Hippocomi poenæ novitas, nisi ut moneat, impudicam dum formam pròstituit, ad omnia scelera sine lege ferri? Atenim ille in tormentis non modo vocem sed & gemitus habuit in potestate: præcipiti cursu profluens è visceribus sanguis inter saniem tabumque elapsus, veternum olebat. Audaci ancillæ dextera cor extractum, minus humano erat, & pectora cum acuto stridore rupta, fidem etiam istis oculis negant. Omnia hodie in mendacium effinguntur: mutuatam personam ne quidem ante Deo sexuimus, & nisi quod humanæ fragilitati divinitas accommodatur, jam pridem vacua fulminibus manu inter nubes innotuus Iupiter spectaret crimina, non puniret.

Hæc ut sæpius repetebam, exsonuit ostium, mira res! præbuerat aures querelæ Hippocomus cujus funericondolebam, jam non cruentus, nec gibboso pectore; cætesum timidiore vultu quam nuper evulsionem cordis viderat: qui ut deprestanti similis sese ad genua mea incurvavit. Parce, inquit, in tantam foeminam invehi, cujus iras & ipsa coelestia corpora sentiunt. Minus est, quidquid de Medea dicitur; etiam in cogitationes hominum furtive irrepit, & absens audit absentes. Quod ante peractum alieno sanguine, & sine vulnere in ostentationem venit. Quippe pellis ovivis innocuæ, cum visceribus, cruore, & corde suo, firmo adhærens ad hoc pectus glutino, & cultum Doridos excepit, & dissimulatum Amaryllidis furorem in exemplum luit. Dii melius quam ut fictum supplicium vera cæde caput tuum respiciat: nescio quid in salutem tuam hoc amico ore Deus agit, admonetque veloci fuga certissimam necem vitare. Neque sum tam effera barbarie ut patiar eum quem fata eodem amoris fructu satiarunt, indignissima morte perire. Quis scit, an ille Amor qui nos in eundem thalamum compulit, ad eundem tumulum aliquando feret?

Gratias egi inexpectatæ hominis humanitati, &  
verbis

verbis ad communem urbanitatem expressis, ubi vitam monitioni suæ debere me longa confessione monstravi, juravi illam redditurum quando-cunque voluisset: & data invicem acceptaque fide, in hanc solitudinem veni.

*Ad istum modum suam Fortunam memorabat Tamias: ecce dama famelicorum luperum rabiem fugiens, visa est & nobis auxilium deprecari. A cursu anhelabant pectora, & os supplex extremam lassitudinem despumabat, quod lacryma ab oculis cadentes sine missione humectabant. Dum surgimus, pedum attritu quæ jacebant folia fragorem fecere, qualem Zephyrus arboribus obstrepens in sylvis amat. Ut vero in eam in qua eramus partem contemplationem Daphnis injecit, quasi monstro perterritus dirigit: laxata postmodo voce, tam validum intonnuit, ut crederes ad imperium Iovis fulminantis totam Mundi compaginem divelli. Quæ tandem (inquit) causa in has terras descendit Alitophilus? quæ illum numina reddidere quondam misero, nunc demum beato Daphnidi? longam moram fecit properanti amicitia quisquis Deus tam amica lumina istis oculis tandiu negavit.*

Non erat dilectus sodalis tantum sibi, sed exilii sui tædium spargit in amantis corda, & maximam partem miseriarum quas sustinet transfert in absentem. Teneo te Alitophile, & nunc osculis tuis ad satietatem fruor. Venit simul in amplexus tam arcte hærentes ut spiritus libertati tormentum facerent. Excepit alios liberali salutatione Tamias, & sinuato corpore ubi utriusque vestigia inutili urbanitate pæne vultu pressit, invitavit ad proximos lares.

Iamque illis præcedentibus, è collo meo Daphnis brachia dimoverat, languidumque corpus eo liberaverat onere, quod nec Atlas ferret, nec Hercules humeris suis imponi pateretur.

Dum præeuntes sequimur, advertimus causam, quam in Philemone Iupiter damnaret, & Romulus inter pauperiem nascentis regni fastidiret: tamen Daphnidis & Tamiæ domicilium. Rami pingui argilla obducti muros faciebant, ad eandem æqualitatem dispositi junci palustres tectum

fecerant, imbris repentinis decursum, & quottannis renascentis subsidium hiemis. Ianua pluribus palliis simul junctis stabat, ventorum ludibrium, & quam suum limen nondum senserat. Intus vero variæ picturæ, ea manu natæ, quam Apelles quondam suæ prætulisset. Supra tabulas pittacium erat cum hoc titulo.

## LABORES ACIGNII.

In prima ille dolorum artifex suam vestem indutus, superstitioso passu religiosam majestatem tentabat. Sol nunquam magis lucidus vultus hominis quasi persona tegebat. Micabant in omnem partem contorti radii, oculosque ingentis turbæ suo fulgore perstringebant. Hic, elatis in sublime manibus ascititiam gravitatē mirabatur: ille, pronus in ora: alius genuum flexu: quidam, votis: erant etiam qui donis & humili cultu quasi Deo supplicarent. Præcipue sordidæ conditionis viri, effœti senes, simplices puellæ, puerique ferulis objurgari soliti: Adulteræ quoque matronæ, lenones impuri, spintriæ famosi, & quisquis alius aut aquis ablui crimina putat, aut tralatitia confessione tolli. Infra isti versus legebâtur.

*Quid solis radiante Veritatem*

*Flamma fugis? iniquus es, Deam illam*

*Iam pridem gemina Deus catena.*

*In calis retinet, negatque terris.*

In secunda tabula, subigebat Acignius clune agili & crissantibus lumbis nequicquam reluctantem Deam. Reliquerat flammeum pudicos oculos, & aridam terram dirumptum sparserat. Circa geminæ lances inæquali pondere arenam urgebant, & omnia quondam Iustitiæ ornamenta velut in fornice jacebant. Mirum! Protagon eo vultu quo quondam serenitatem nubibus dabat, & tranquillum pelago, spectabat inter malignum robur & leges iniquas, virginis ejus infamiam cujus ope nuper avitum regnum receperat, & vim male imperatam cum proceribus & senatu ridebat, In ista breve carmen erat,

*Olim*

*Olim Poeta Themida jurant virginem,*

*Sed mentiuntur, passa jamdudum est nefas.*

Tertia notissimorum hominum etiam ultra naturam reddebat imagines. Dolæus, Robertus, Durantius, & Martilierius, hiantibus labiis putabantur declamare. Scribebant Carmina Douzæ, Scaligeri, & Lermæi. Ad solutæ orationis licentiam calamos torquebant, Casaubonius, Pascasius, Barclæus, Grotius, & Hogerbeetzius. Pyramidē cadentem sustinebat valida manu Servinus. Torquebat fulmen in subjectas aquas Arlæus, & per Styga jurabat nunquam se permissurum quidquam de Senatus amplissimi fama diminui. Agebant alii alia. Interim vertebatur in fontem pyramis, & expatiatum flumen in maris speciem spargebatur. Solus Acignius obtentu virgæ quam dextra tenebat, imperabat æstuanti undæ, quæ videbatur mandatum ejus audire, & iratis fluctibus indicere reliquis exitiale bellum. Vnde fons incipiebat, hæc literæ erant, **AQVA VIVA.** A latere vero ejusmodi epigramma.

*Hic vere est Moses dum saxis exprimit undam,*

*Et frangit sava Gallica jura manu.*

*Sancta patrum decreta jacent, Deus author in illis*

*Laditur: offenso quis dabit arma Deo?*

*Vos estis fortes anima: Vulcania tela*

*A vestra tantum sunt fabricata manu.*

*Excute infestis hostilia specula dextris,*

*Victima non fuerit gratior ulla Deo.*

Aperiebatur in pratum quarta, quod penicilli luxuriâ diversis floribus impleverat. Hic serenæ tempestates disjectis nubibus reseraverant diem, qui ab excussa terra candidissimum lilium accipiebat. Erumpenti flori imminebat Acignius, & jam duobus attritis, irascebatur in obitorum loco pullulanti. Hoc erat in ista scriptum.

*Gallia suspiras tacito collisa duello,*

*Et neglecta tuis fascibus orba jaces.*

*Same animum, renova fessas sub pendere vitas,*

*Et tua vesano lilia deme pedi.*

*Iam periere duo ; de tot modo floribus unus*

*Restat, & hostili sub pede colla refert.*

*Vive precor, Clodovae, tuis maturior annis,*

*Et repara nutus facula nostra tuo .*

*Si peris, ecce perit tecum tua Gallia, saltem*

*Si tibi nolueris vivere, vive tuis.*

In quinta, ingeniosus pictor efferaverat raræ magnitudinis leopardum, qui pæne extincto igni capacissima urna injiciebat aquas. Inter hæc volvebatur mons in Ætnæ formam, & per Oceanum sua mole tutus urgebat obstantes undas. Infra, reciprocante fluctu excussa alga vicinum littus candidissimo humore texerat. Supra denso fumo & velut in nubem coagulato atramentum obscurissimum tegebat lucem, nisi quod cessabat nox à dextro latere, & dubiam diem admittendo præbebat oculis hanc lecturam: **SUPER EST ADHUC SCINTILLA QUÆ ARDEAT.** Quam sequebantur isti versus:

*Quod cupit est : facies velox mutatur in omnes*

*Qui modo fons fuerat, tam cito flamma furit.*

*Flamma furit, violenta furit, facibusque cruentis*

*Indicit bellum Rex Iacobe tibi.*

*Desegitur crimen, fluctuque immergitur ignis,*

*Et tamen ultrices videt iniquus aquas.*

*Scilicet ille doli fabricator & improbus hostis,*

*Diis terra pariter jura dat, atque maris.*

*Quoque refert fumo nubes mortalibus agris,*

*Vrit, ut indicio est proxima flamma latens.*

Post hanc picturam, serico fune ducebat Acignius victum leonem, cui alter jubis inhorrentibus servitium fugiens, terga dabat. Pars adhuc catenæ dirupta sequebatur collum, perque os fulminantis attrita videbatur ad annulorum excussum spectantium aures vocare. Adeo ad omnem sensum ducitur pictura, & præter oculos, invenit auditum cui placeat. Non deerat huic tabulæ suum epigramma.

*Belga quid expectas ? tenet heu, tenet ecce leonem,*

*Ni fugis, istius protinus alter eris.*

*De geminis saltem servato leonibus unum,*

*Optima*

*Optima vindicta proxima quaque dies.  
 Diffusa victus crescent, crescetis & artus,  
 Quique suos hostes terreat, unguis erit.  
 Ille erit, ille tua salus & tutela senecta,  
 A forti, non sic, Hercule, tuta fores.*

Septimam plures Italiæ civitates impleverant. Venetia placido natatu Oenotrium mare findebat, quatiensque, sanguineum flagellum jactabat se de Acignio sumpsisse pœnas, eumque exillio mulctasse. At ille vulneribus suis gaudens inter pulcherrimas nymphas beatus conviva discumbibat. Lances onerabant, muri, castella, propugnacula: fontes vero, flumina, & mare ingentibus poculis servabantur: hæc, ad sitim, illa, ad famem insatiabilis hominis levandam. Quæ omnia depilabat avidissime, perque tot fercula potusque grassabatur innocue. Pro bellariis, mitræ, redimiculata pedæ, & galeri coccino tincti. Pro ministris, præsto erant Fortuna, & Abundantia, quæ dudum curiose providerant ne quid deficeret. Circum sedebant, Ferraria, Mediolana, Florentia, Luca, Ancona, Parma, Placentia, Genua, Verona, Bononia, Sena & Parthenope, duodecim celeberrimæ nymphæ, quæ virgineo pudore permittebant sua munera depasce, nihil sibi præter paucissima palatia reservantes, & quæ è virtutibus suis in præceps posita minabantur ruinam.

Supra caput Acignii, hoc erat: **PLVS QVAM SPERO.** Infra, istud.

*Non est forma satis, Sors blandior omnia donat,  
 Sis licet ingrato corpore, gratius eris.*

*Vna negat, visit volucer cum matre Cupido.*

*Proque illa, dixit, jam tibi mille cadent.*

*Nil metuas, molles venient tua prada puella,*

*Injicientque tuis basia longa genis.*

*Maniaque, & turres, & quodcumque hospita porta*

*Terra, dabunt, dic mi, num placet exilium?*

In proxima super stemmatibus Hispaniæ exonerabat ventrem, cum hoc disticho.

*Monstrat quam late diffusa potentia regnet,*

*Stemmata dum occidua concacat Hesperia.*

Sequens pennis labentibus aquilam humile volantem, laqueoque pedibus inserto monstrabat. Demiserat caput Acignius, genibusque flexis dum repugnantem prædam sine missione trahit, permittebat exire ab ore suo tria verba, NON SVM DIGNVS. Hinc isti versus,

*Excute diuulsas bellis Germania plumas,*

*Et filum validis frangito verberibus,*

*Si perstas misera vires attundere pugna.*

*Exuvias de te qui ferat hostis adest.*

*Qui cum se dignum prada negat esse, severus.*

*Attrahit immiti lubrica lora manu.*

*Sic meretrix certo cuius mercabilis are,*

*Se, capiendo, negat quod capis, accipere.*

Accedebat istius lateri tabula altera, in qua ille idem rotundo pileo, & qui pilis nigricantibus asurgebat in tumorem, grave caput incluserat. Collum, linteum amiculum in sese pluribus nodis complicatum, & in formam radiantis Apollinis effigiatum, cinxerat. Pallium, tunica ensis; Cracovitarum vestitus & arma. Dextera vero torquebat hastam, qua circumjacenti telluri & Neptuno videbatur inferre bellum. Dabat se curiosorum oculis hoc epigramma.

*Sarmaticis victor spoliis exultat, & inde*

*Moscovios, Turcas, Herciniosque petit.*

*Menti avida facile est montes contemnere, sylvas*

*Tollere, & irato mittere vincla mari*

*Illius omne solum est, illi nimbique geluque,*

*Flamina, tempestas, flumina, flamma, patent.*

In penultima cessabat ingens illa regnorum aviditas, premebat resolutis pedibus acervatim jacentia sceptras, coronas, paludamenta, innixusque fortissimæ arboris trunco tergemina coronam ab eminenti cacumine crebris succussibus petebat. Vacillabant potenti motu excitati rami, & incurvatis brachiis, dubitabant an fructus suos permitterent æstuantis desiderio.

*Regna jacent, steriles prada: contempta colorem*

*Ponit, ab insano purpura pressa pede.*



*Sola per hostiles petitur tua Petre thiava*

*Succussus, minimum est: si cadit, ipse cades.*

Claudebat extremum parietem ultima pictura, quæ Acignii validis humeris sphæram totius orbis imponebat, mille vestes oneraverant hominem, & Sol nunquam magis fervidus flammatos radios in ambulantem vibrabat: inter hæc sine sudore, sine anhelitu, sine labore, contemnebat onus suum, & Solis flagrantis invidiam cachinnatim ridebat. Aderant & isti versus.

*Invalisus restans Atlas sub pondere cæli,*

*Sudat, & Alcidem poscit in auxilium.*

*At ego quem Phæbus, quem millia plurima vestis.*

*Terra, Polusque premunt, omnia vinco, ferens.*

*Ambitio humanas cum lancinat improba mentes,*

*Omne onus, omne nefas, dum fruitur, patitur.*

Dividebat in æquales partes labores duodecim tabula lignea, medio infixâ parieti, quæ encausto literata hanc inscriptionem reddebat.

### A C I G N I O.

Neque viro, neque mulieri, neque hermaproditio, neque seni, neque juveni, neque puero, sed omnis ætatis Deo, neque mortali, neque immortalis, qui neque cælo, neque terra, neque mari, neque inferis, sed ubique regnat, sine diademate, sine sceptro, sine bilance, sine lege. Theopolitanus Daphnis, neque hostis, neque necessarius, neque flens, neque ridens, hoc neque marmor, neque monumentum, neque trophæum, sciens & nesciens cur hoc fecerit. *q. non P.*

Dum singula perfunctorie delibo, ecce caput humano majus, sine humeris, sine pectore, querulo stridore subjacentem huic inscriptioni aram percurrit. Tremulo motu subsiliebant labra, dentesque inter se collisi minabantur morsum. In fronte hoc erat malleolo & celte incisum:  
**OS VERITATIS. Circa collū vero istud:  
TANTVM HOC MENDACIA PVNIT.**  
**Et**

Et ne quid sine linea vacuum esset, superiorem  
aræ marginem hoc distichon implebat.

*Curatum Verum pater est, materque doloris,*

*Qui caret hoc, malus est, qui tenet, hic metuit.*

Inferiorem pone basim, sequens.

*Seu sequeris Verum, seu damnas, pessime viris,*

*Odia Divorum contrahis, aut hominum.*

Ad singula velut ad miracula stupebam, & jam  
venerat in mentem inquirere quid ultima vel-  
lent, cum me meus Daphnis hilari intuens vultu,  
excitatum benigna manu invitavit ad paratas da-  
pes, postera die satisfacturum se curiositati meæ  
promittens.

Iam dici senium indixerat Vesper, & geniales  
tenebræ irrepentes suadebant voluptatem. Iam  
lautiores epulæ, gannitus, musitationes, som-  
nus, nox cadens, horæ matutinæ, & quidquid à  
Tithoni thoro Auroram vocat. Tum demum ju-  
vit repetere Veritatis oraculum, & à Daphnide  
rei rarissimæ narrationem extorquere. Nec istud,  
inquit, potens Dea sinat, ut sine illius nutu de-  
tegam mysteria Eleusinis taciturniora; annue sa-  
cratissimum Os orationi purissimæ, & in Alito-  
phili favorem redde te expectantibus propitium  
numen; bene est, contortis molliter oculis appro-  
bat religiosum propositum, inque desiderium no-  
strum descendit, & puto veniret in familiare col-  
loquium, si ultra reges inveniret quem dignaretur  
alloqui. Vnum illud quod nobis vel inviden-  
tibus fatis restat, exequamur; digitoq; indice hoc  
sacro sancto ori inserto illæsi probemus vera om-  
nia esse quæ sumus dicturî. Si fallo, sæviant ut  
solent justissimi dentes in exitiales morsus, & te-  
mere mendacem meritissima pœna puniant. Ac  
primo de Protagone quod bene memini referam,  
postmodo vobis qui hic sedetis audituri miranti-  
bus, pandam calamitates quæ vitam meam conti-  
nuo nubilo turbarunt. Sed antequam causas ju-  
stissimi doloris accersam, quid sollicitanti fatum  
suum Protagoni nondum adhuc barbato quon-  
dam responsum fuerit, edocebo.

Ante

Ante hanc aram pronus in ora jacebat longi  
 temporis abſtinentia purus, cum placuit tibi, ô  
 veredicum caput, obſequium generoſiſſimi regis,  
 & in illius potentiam per frequentia verba jura-  
 ſti. Orbem terrarum Borboniacę genti jampridem  
 fatum debet, ſed Fortuna Virtutum inimica non-  
 dũ ſe illi tota permiſit. Ivit quondam in avorum  
 tuorum ſinus per partes velociffima Dea, & nun-  
 quam ex integro cucurrit: tandem contumaci re-  
 bellione laſſata, te in regnum Gallię, & filios tuos  
 ad Imperium totius Mundi vocat. Io tunc exilia,  
 io cędes, io luſtus, & quidquid inquietũ Numen  
 ut tot heroibus obſiſteret, contrarium invenit.  
 Poſt turbidum mare placidi fluctus exiipiũt navi-  
 gantes, bellis pacem ne neceſſitas alligat, & melio-  
 ribus auſpiciis finitur victoria quam inchoatur.

*Sed ante valida bella tractabis manu,  
 Pavebit amplas Coltraſus turmas videns,  
 Primaque cinget hoc tuum lauro caput.  
 Virtus jacebit principis Ioiſii  
 Toto ſepulta flumine, hinc ferox Iber  
 Periturus amnes diſcat & fontes tibi  
 Prabere fluctus, & tuas partes ſequi.  
 Iam video, ſcuta commovet, proſert, quatida  
 Et bella ſumit infidelis Allobrox,  
 Fervent minaci milite Alpium juga  
 Fato jubente, poſtmodo victus cades  
 Cruore multo purpurans patrias nives,  
 Tuſque cedit Gallico Chiron Herculi,  
 Quem fulminantem vidit irata manu  
 Arquenſis acies. quemque Lothavenus feri  
 Obſcura ſenſit regna complentem Diis,  
 Timuere cunſti, quoſque ſupremus cadens  
 Apollo luſtrat, quoſque radianti face  
 Ad ſolita naſcens opera de thalamo vocat;  
 Dubiumque an idem preſſerit Deos timor.  
 Poſt tot labores, parta Pax regnum premeus.  
 Gallica quietis reteget arva meſſibus.  
 Venient vocata Numina, Cupido puer,  
 Zephyruſque Veris nuntius, Charites, Venus,  
 Et Iuno forſi conjuges jungens jugo,*

*Cynthiaque & Hymen, eumque Partumna potens  
Vacuna, & omnes praesides partus Dii,  
Iam vota properant; Hernicis exit vadis  
Maria Medices. Francicum litus sonat  
Frequente plausu: gaudium lacrymas habet  
Quas fecit amor, haud aliter excussus cadis  
Ros ante radios Solis instanti die.*

*Nimum moramur, uterus optata tunc  
Iam prole, totis lateribus rimas agens:  
Aurata crescunt lilia, hac pater pius  
Miratur, & fecunda mater sex Deum.  
Quos inter annis major infanti manu  
Pertractat arma patris, & gladio ninax  
Amoris ore Martis abdit impetum:  
Sapiunt Deorum filii ante annos quoque.  
Cunisque ab ipsis inferunt caput polo.  
Illo decenni, Parca properanti tuos  
Secabit annos dextera, bino cades  
Confossus ictu: causa tum cadis latens  
Alto stupore territum Mundum premet,  
Hostisque fama victus haud credet neci.  
Di nempe terris Numen humanum invident:  
Hinc te à beatis Iupiter cernens locis  
Populo quiete iura praeblem tuos,  
Sui reposcet aquas in partem imperi:  
Cælum nequirit. praebeuit pavem Iovi  
Gallica patiens terra populatrix poli.*

Non passus est Botris Daphnida Protagonis  
victorias diutius memorare, sed postquam negavit  
tantis præconiis satyram convenire, iussit  
narratorem sui promissi memorem ad secundum  
experimentum descendere, & liberiori stylo A-  
cigniorum crimina confodere. Fecit quod jube-  
batur Daphnis, sed ante in profunditatem mar-  
moris patentis immisit digitum, permittensque  
vultum suum ruborem (indicem pudoris, qui  
formam ejus egregie decebat) palam facere, su-  
stulit è terra modestos oculos, & moderatissi-  
mo gestu, insigni facundia, suam historiam in-  
gressus est.

Raram facit mixturam cum foelicitate forma,  
adco

adeo malenati sumus, ut si quid in occasionem superbæ Natura dedit, Divorum invidia, aut injuriis hominum soleat excæcari. Non sum quidem tam temerarius æstimator mei, ut de me ultra quod est, præsumam. Hæc ista facies nondum decore suo Venerem movit ad amorem, nec Gratiæ accivit ad cultum sui. Et tamen, proh pudor! placuit ultra quam debuit, & quod maxime mirum, etiam me invito Cupidinis improbi imperium exercuit, & in adorationem sui mortalium scelestissimum vocavit.

Studiorum causa Theopolim Veneram, in qua pater meus plurimos magistratus cum laude gessit; enimvero quod æquis iudicibus solet, pauper mortuus est. Poteram tunc temporis ejus ætatis esse, qua fabulantur Poëtæ raptum Ganymeda & qua plerique hodie mancipatione corporis præcipuos honores, & maximas opes lucrantur. Forte, ut mos est Acignis qui inanibus spectaculis illudunt populo, juventutem ad theatralem majestatem induerant. Argumentum fabulæ erat, NATIVITAS CUPIDINVM. Cui turbæ multiplex causa me dedit: nam præter natalium splendorem & integritatem patris quæ mirum in modum civitati placebat, ætatis quoque delicatæ flos primævus, & jam ab illa die Sors maligna, inter eos pueros locum fecere quos vere Venerem peperisse non pœnituisset. Itaque corymbio caput adornatur, cujus aurei capilli calido ferro vibrati in undas, imaginem præbebant inquietimaris; vossellis in semicirculum æqualem ad confinia malarum finguntur & producuntur supercilia; cerussa delinitur facies; purpurisso, in rosæ matutinæ colorem genæ labellaque premuntur, lacteas cervices cæsaries vario unguento fragrans, & liquore pretioso madida pererrabat: aureæ pinnulæ, phætra ex auro, & sagittæ aureis pennis ad impetum effictæ, circa humeros sonabant, mutua lascivia tremulum resultantes; oneraverat sinistram arcus corneus, dexteram, fax igne corusco splendida.

Quis

Quis inter tot arma sævientium Cupidinum sine ictu ab ipso spectaculo & scena remeasset domum? Quidquid in contrarium nuditatis amatores ingerant, juvant nos ornamenta, & ipse habitus cultior multum addit ad formam.

*Inde mali labes, nostraque injuria gentis.*

Hoc telum fuit quod Nometum Acigniorum præfectum fixit, huic ille cultus animam abstulit, crines emptitii servitutem fecere, vultusque fucis blandior dedit audaciam jam per se satis impudenti suas flammæ ad ostentationem traducere. Non habet verecundiam qui inverecundum Cupidinem suscepit hospitio; non enim putat se peccare, quoniam sui incendiû habet authorem Deum. Passim itaque regnant amatores. & sine timore Orphei sacra colunt. Quod si atrocitate legum, & vigiliis judicum, vindicaretur scelus, otiosi juvenes aut supplicii metu abstraherentur à culpa, aut aliis exemplo essent quam funestum foret ultra fœminas peccare, quas in sodalitium nostrum Natura dedit ne periret.

Ac primo ingredientē theatrum, Platonico dogmate invitavit me, actiones verbaque omnia ad corporis elegantiam metiri; pulchritudini favere Gratias, & morosiora quælibet Numina currere in auxilium formosorum. Deinde, ut intellexit me totum pensum peregissem, extra scenam non reluctantem in secretum traxit, tabellasque serico filo obferatas condidit in puerilem sinum, mentitus in his natum sub manum carmen in laudem meam scriptum; cæterum amoris nefandæ indicia continebant.

Nondum inlidias senseram, itaque inter nolle & velle, qui mos est virginum, subducebam importunam manum, cum ipsa colluctatio accendit pereuntis desiderium; dicunt enim ab ipsa rixa Amorem vires sumere. Utitur occasione solitudinis Nometus, & postquam oculis libidine marcidis super faciem meam diu hæsit, forti amplexu corpus meum misit in obsequium sui; addidit petulantia verba, intempestivum murmur, crebra oscula,

oscula, petulantes gestus, & quidquid impatentiam Veneris notat. Iamque paulisper inguinum laciniam removerat, officium corporis extorsurus, cum ego ad tantum nefas exhorrens exclamo in auxilium, nusquam infamiam passurus.

Commodum inter altercandum sodalium aures verberavere voces querulæ, fit concursus, relaxantur claustra, & januæ repagula ad primum impetum dirupta admisere venientes, sed inter inquisitionem clamoris evalit futurus ille corporis prædator. Quid facerem? domum peto, patris genua complector, & per Naturæ jura, per ubertim cadentes lacrymas, per familiæ decus, & innocentiam deprecantis, de vindicta sollicitudini meæ solatium posco. Statim rumor percrebuit, venisse exitiosum Acignii diem, eumque orbi universo lætum & salutarem. Sævit vulgus, & ad novum spectaculum converfis omnium animis, ædes undique vacuantur, complentur rostra patensque Curia populi frequentia laborat. Iamque sublimi suggestu multo magistratu residente, produxit me in mediam orchestram pater, & illo ore quo sæpenumero plebis furorem compescuerat ita declamavit in Acignios.

Scitote P. C. hoderina mala quæ me infeliciter premunt imminere capitibus vestris, & familias vestras pari contumelia respicere. Clausum est Acigniorum malignitati non mihi tantum sed & urbi universæ ad antiquam libertatem suum iter. Quare magis congruit, singulos vos & universos pro salute vestra serio providere, ne sceleratissimi homines tot damnatæ libidinis stupra commiserint impune. Perierunt omnia, ubi quidquid potentia suadet, indulgentia permittit. Vnum hoc communes misérias solatur, quod diu non perdurat imperium quod multorum damno exercetur. Faveat quantum voluerit Fortuna, rumpet plurimorum metus odiosam felicitatem, & quod à singulis fieri non potuit, teretur per turbam. Vivunt etiam nunc alieni raptores honoris, & saginati beneficiis quæ nos ipsi largiter



injecimus, uxoribus liberisque nostris inhiant. Miscetur in unum utriusque sexus cupido, & jam post habito foeminarum pudore, nova luxuria litant averse Veneri, & formosiusculorum adolescentum pudicitiae attentantes, multos Pigiciaeis sacris initiant. Taceo Ralladevii, Rillarvii, Naimurdi & aliorum notissimas scortationes; ultra calamitatem publicam pungit me domesticum malum. Hic filius, qui propter, me, fletu madens, adstat, in se unum sensus meos trahit, & animum alioquin boni publici superstitiosum amatorem, sanguinisproximitate praevertitur. Expectatis ut palam faciam inique tentatum scelus? desint senectuti meae verba quibus nefas coarguam: ab hac epistola (porrexit epistolam quam ad me pro carmine scripserat Nometus) lascive obsignata, causae meae sumite argumentum; satis illa pro me loquetur, dum Nometum nefarii sceleris reum à sua manu damnabit.

Cum isto fine sermonis, resolvit vincula amatorias tabellas, non sine luxu sub secretum tenentia, & altiori quàm antea voce, quod sequitur legit.

### NOMETVS DAPHNIDI S.

**V** Strina tua major est flammis Cupidinis, enimvero te dissimilem Veneris filio fecerunt. Fata inter vos nihil convenit, nisi quodæque formosi sine delectu spectantium pectoribus passim & ubique atrox movetis incendium. Sed ille sævus Deus aliis ignem suscitatur, tu tibi. Numquam Amori contigit amari: te vero amant quos amare torques, nec fugit ille, quem figis, sed delectatur vulnere suo, & ab ictu tuo gaudet perire. Moriar si quod sentio, scio; adeo fel tuum, mel est: & illi flammæ oculi tui, ex occulto dulce lædunt. Hoc unum te tamen efflictiim deprecor, ne mortalis hominis illius obsequium fastidias, qui pro te paratus assari, omnem alium cultum ponit in fastidio. Vale.

Interim sævire vulgus, & injuriæ atrocitate in  
seditione

seditionem ferri, ebullit murmur, & inconcin-  
næ voces vario fremitu rostra feriunt. Cum ille  
qui senatuipræerat, postquam mutuis susurris à  
circumstante magistratu suffragia excepit, jussu  
silentio, prætextu noctis adventantis in crastinum  
diem causam distulit. Ah, quam securus est, quis-  
quis nocere potest ! istæ induciæ Acigniorum  
potentiæ suffragantur ? istis, impunitum manet  
scelus, & liberum iter reo ad fugam relinquitur ?  
Vfus est judicum benignitate Nometus, & per  
tenebras elapsus eripuit se pœnæ. Quærite nunc  
qua parte terrarum Iustitia regnet ! cum in illa  
urbe in qua major Divorum turba sibi domiciliū  
selegit, judices in facinus non modo consentiant,  
sed & in auxilium facinorosorum impias senten-  
tias & senatusconsulta sceleratissima pronuncient !  
Quicumque ab hominibus justitiam expectat, ne-  
scit à quo tempore Themis ascenderit cœlum.  
Nimirum, humana fragilitas ut inclinatur in vi-  
tium, ita in gratiam vitiosorum inique clemen-  
tiam induit, & nunquam severius insanit, quam  
cum dicendum est in probitatem.

Hæc res bonos omnes movit, qui etiam si se  
non norint, exercent tamen amicitiam concilian-  
te virtute. Solus pater inter manifesta scelera  
seculi immotus restat, & illo animo quo fœlici-  
tatem solebat accipere, eodem infamiam familiæ  
suæ sustinet, & à causa sua ad patientiam respicit.  
Neque defuerunt Poëtæ qui in istos judices scri-  
berent. Cæterum è tot carminibus unica satyra  
venit in hanc manum, quam assidue mecum por-  
to, quamque hæc argentea pyxis, huic collo su-  
spensa, & à furto vendicat, & ab injuria tempo-  
ris tenuissimam papyrum surripit : in qua sint  
licet plures versus, non dubito tamen quin om-  
nes placeant. Iam pyxidem veluti cistam secre-  
torum Palladis capacem Daphnis revelaverat,  
jam explicaverat chartam, jam satyrælectionem  
inceperat, cum Tamias : Et quæso te Daphnis  
absiste conviciis quibus insanum carmen judi-  
ces nostros lacerat, quos commune Eleutheriæ

malum mille criminibus damnavit ab eo die quo magistratus & clavus latior ad licitationem venerunt. Cum & habeam quæ de Nometo tuo referam, & pati nequeam contumelias quas insolens poëta in parentes meos invenit, dum in omnes Theompolitanos senatores malo temperamento vitia digerit & ministrat, ne fervidus stylus aliquem videatur omisisse non confossum.

Nuper cum in illa urbe forem in qua Rhodanus novissimos Araris fluctus præcipitatis aquis frangens subtrahit nomen nobilissimo amni, & à bibliopola quærerem librum, quo Garassus umbram Paschasii misere premens, in clarissimi viri monumenta jaculatur fulmen, quod statim defecit authoris invalentia, & argumenti fœditate, intravit mecum bibliothecam scholasticus, qui Petronii Arbitri satyricon peteret. Miratus inquisitionem nobilis pueri, petii ab illo quibus præceptoribus instrueretur tam teneris annis & tantæ formæ? Ad hæc ille, Dubia, inquit, & languida Philosophia invenit tandem validam soliditatem, & in hodiernos homines tam altum penetravit, ut jam antiquam animorum noctem clarissimis facibus resolverint. Summum mirandæ scientiæ, reciprocus masculorum amor! quo quondam Orpheus muliebres blanditias, & imperfectam libidinem abdicavit. Hujus doctrinæ memorant authorem Iovem, qui Iunone contempta in plumatam aquilam mutatus durum oris cornu intrivit Ganymedis ori, & petulante lingua osculum fixit melius ave. Apollo deinde contemptam philosophiam coëgit recalescere ex integro, & resumere impetum fractum omissumque, dum spretis Daphnidis ignibus in Hyacinthi vultibus exarsit. Invidere Dii philosopho, & amicum necavere. Inde deserta habitanti, tristes diræque noctes in memoria amissi pueri vigila-  
tæ, & mala vita æternitatis munere pejor. Taceo Heroas illos, Herculem, Agamemnona. Achillem, Alexandrum, & alios, quibus ista scientia plus ipsis imperiis placuit! Quid putas Socratem fecisset

fecisse? quid Platonem? quibus Philosophi immortalitatem suam debent, dum rigidam hætenus scientiam certis legibus vinxere, & raram in amicitiiis fidem consolidavere mortalitati, animosque agrestes certis formaverunt præceptis ad bene beateque vivendum. Quantus de prioris sinu Alcybiades surrexit, robore, virtute, ingenio? Qualis à posterioris amplexu Phædrus ille, cujus nomine libros suos nobilitavit. Et ut cæteros omittam philosophos qui mentes hominum ad perversa degenerantes ad virtutem reducere, unus Arbiter instar mihi omnium! ne me putes inepte quæsisse eum diligo. Hic pro Aristotele in Acigniorum scholis hodie legitur, interpretatur laudatur; non temere & ubique (neque enim omnes ad hoc genus exercitationis accedunt) sed inter privatos parietes selecti ad audiendum adolescentes, quos facile ingenium & formosum corpus ad omnes humanitatis leges detorquent. Et si me nondum nosti, Philolophus sum. Plerumque enim solers gymnasiarcha pueris adhuc nascentibus induit philosophiam, & adolescentes juvenibus mixtos eadem vivendi regula componit. Nomen gymnasiarchæ ubique locorum celebratur, adeo cum luxuria sua manifestum fecit. Nometum appellant. Homo ille quidem rigidi vultus, & corporis obesi: ceterum inter Acignios amore puerorum, & professione venerabilis doctrinæ notissimus. Hinc Philosophorum ordinem triplicem statuit, audientium, profitentium, docentium: quorum tria exempla in uno Petronio putat imitanda. Pueros & adolescentes, quos in auditorum numerum reponit, ad Gytonis mores instruit: In eo laudans officiosam pueritiam, cum se servilibus inquinaret obsequiis ut fratri suo placeret. Patientiam, qua viderat sine murmure Quartillæ Circesque concubitus. Audaciam, qua cum virgine luserat. Generositatem, precesque, & lacrymas quibus Ascyli, Eucolpii, & Eumolpifregerat iram, discordiam sedaverat. Blanditias, quibus cum offensis redi-

bat in gratiam. Formam, qua excæcaverat nautas. Mollitiem, & nequitias, & quidquid ephebos ad patiendum gestientes commendat amatoribus. Juvenes & agere & pati doctos, Ascyllon & Eucolpion imitari jubet, & profiteri virtutes quas olim in cinædis & exoletis antiquitas rudis vitia putabat. Et primum in his fortitudinem extollit, qua dispositis ad præliandum gradibus currebant ad mortem, nisi intervenisset Gyton. Mox constantiam qua mutationem & injurias fratris sustinuerunt. Sagacitatem præterea, qua tuniculam recuperavere, simulque vitaverunt judicem, & leges quas grassatores nocturni timebant. Humilitatem tandem Eucolpii qua defectus suos apud Circem excusavit. Seniores vero quos magisterium decorat, ad Eumolpi vitam reformat: Simulationem in eo commendans, qua ubi de usu formosorum mentio incidisset excandescerebat severa tristitia, neque violari aures suas sinebat impudico sermone. Subtilitatem, qua Pergamensi puero gaudium extorsit. Sapientiam, qua populi contumelias & missos in se lapides contempsit. Robur, quo in insula M. Mannicii concursus iratæ familiæ, & hospitem armatorum impetus retudit candelabro. Solertiam, qua serviles notas, ingenuis vultibus inscripsit. Eloquentiam, qua Licæ & Triphænæ furorem compefcuit. Facilitatem, qua mendacia & inveniebat, & promebat. Prudentiam, qua & conjugii damnationem laudabat, & pœnas uxoratorum. Solertiam, qua personam principis viri sustinebat, & divitis, & sapientis: donec cumulatus ingentibus divitiis illuderet Crotoniensibus.

Sic apud Orpheotelestas omnes virtutes invenit, quibus melior Philosophia constat; legesque in Petronio, & præcepta, & exempla salutaris scientiæ.

Inde Celtarum, Cretenesium, & Chalcidensium philosophorû legitima in scæminas odia magnis encomiis noster Nometus celebrat. Melius quidem fecisse Thracas qui ulciscetes Orphei necem  
stigma-

stigmata mulierum frontibus inusserunt. Spartanos, Romanosque masculam Venerem coluisse. Ludos bene celebratos apud Megareses in Dioclis puerorum amatoris honorem. Multa per sacram Thebanorum cohortem felicissime gesta. Athenienses libertatem suam Harmodio & Aristogitoni debere: Agrigentinos, Charitoni, & Melanippo quos idcirco fortunatos Delius dixit, quod cultores & duces fuissent divinæ & optabilis amicitiae. Solos Tyrannos vetuisse puerorum amorem, quia virtutes odissent. Meruisse statuas & sua templa. Cratinum, Argynnum, Antinum. Hinc cum Zenone Cittienli concludit, Amorem ejusmodi Deum esse, liberalitatis, amicitiae, concordiae largitorem, & procuratorem: auxiliatorem in his quæ ad Rerum publicarum, & Imperiorum salutem pertinent. Fortem, eloquentem, & prudentem. Vnde & illi statua una cum Pallade, Mercurio, & Hercule in Academia & gymnasiis. Eundem vitiorum hostem, virtutum hospitem, formosissimum, omnipotentem: sine quo nec Mundus esset, neq; stare. Inventorem legum, morum præceptorem, & disciplinarum; per quem & vitæ tranquillitas quæritur, & mortis timor adimitur. Fæminas, imperfectum animal, secludi ab istis bonis, quæ eo citius petentibus occurrunt, arctiusque adhærent, quo perfectior est quisquis ad tantam Philosophiam enititur pervenire. Viros indignos nomine suo, ubi muliebribus blanditiis permittunt se, & inquantur amplexibus; cum ad eum finem nati sint, ut ad meliora semper suspirent, gaudeant æqualibus, inferiores contemnant. Neque solum pulchritudinem corporis expetendam, sed & animorum quos sapientia plurimis dotibus feliciter asperfit. In hac formarum mixtura habitare summum mortalitatis bonum, quod vel amans ingerit amato, vel amatus amatori, vel in reciproca spirituum communicatione nutritque & accendit corporum contrectatio: juxta illud antiquorum dictum, Inter amicos omnia communia.

Cum hæc ingentivolubilitate verborum scholasticuseffudisset; Et ut video, inquam, multum etiam impubes profecisti, qui tam alte, tam perspicue novæ Philosophiæ partes enumeras, & declamatorio stylo nihil omittis eorum quæ hætenus inauditum sapientiæ studium commendant. Minime, inquit ille; utinam maturius ingenium meum ad tantam disciplinam misissem, quæ eo blandius nos delectat quo pauciores tot virtutum oblectamento delectantur. Totum quidem tam puer, tam formosus & quidquid volueris addere absolvi satyricon, hoc est Philosophiam: sed adhuc me decipit carmen, & Heliconis asperitas terret qua scientia nostra sustinetur: neque enim unquam melius ducitur Amor quam Apollinis manu ad loca pura & innocentia, quæ Dii habitant, & mortales in quorum pectora nostrum sapientiæ studium influxit. Vix dixeris quam facile Poëtæ ingenii sui viribus ad magnas spes pervenerint, & nisi Eumolpus tentasset versum, nunquam illum Eucolpius audivisset, adorasset Triphæna, aut Crotonienses ceu miraculum sapientiæ spectassent, & tot ephebi attoniti ad austeritatem rigidi vultus sua corpora summisissent imperanti. Iam vero quæ in publico species, quæ veneratio? coire populum & circumfundi, & accipere affectum quemcunque jusserit: sive ille Tragicus iterum capiat Trojam, aut civile bellum heroicus canat, ceu sudat Lyrico, aut mordeat epigrammate. Unde non mirum si Musas & Gratias comitari Cupidinem Hesiodus scribat, & Pausias redimtum lauro & cytharisantem pingat. Si enim ab Amoris oculis detraxeris velum, putabitur esse Apollo; aut iste Amor, si illud flammeis luminibus applicaveris. Quid enim aliud magis amantes facit, quam Poësis? aut Poëtas, quam Amor? Orpheus, Sappho, Ovidius, Catullus, & alii quod vivunt, quod leguntur, quod laudantur, Amori debent, sicut iste quod celebratur Poëtis: adeo rovide & prudenter æqualem æquali, impube-



rem impuberi Deum Deo necessitas conjunxit, ut mutuis egentes auxiliis, nunquam nisi mutua & in reciproca concordia perdurent. Hoc jamdudum Nometus sciebat, qui postquam totam Philosophiam expedivit, statim scholasticos suos ad licentiam carminum detrussit, implevitque auditorum pectora pulcherrimo Musarum furore. Nam præter Eumolpi versus sua ingenuitate fluentes, etiam Petronii fragmenta notis instruxit, descenditque ad Cathalecta, hærentique & attonito similis hodie à nobis petiit sensum distichi; quem si dederis, adorabo te: nam & illud totam scholam in incerto detinet, & ille qui invenerit, solidum amplexum accipiet à magistro. Cum me Oedipum jactassem, sumpto libro invitavit ad lectionem, tam abstrusi ut putabat carminis. Hoc erat:

*Dum loquor, una mihi peccatur littera, nam T,*

*P, disco semper, blaspheque lingua mihi est.*

Paravi, inquam, multo dilucidius epigramma, à quo hujus distichi lucem facilius eripias quam Prometheus olim ignem de cœlo.

*Susceptus nuper superis Acignius oris,*

*In Ganymedais vultibus omnis erat.*

*Altum stertebant consumptis Numina mensæ,*

*Et positæ circum secubuerunt thoris.*

*Non est passus Amor prima mala tadia noctis,*

*In teneris pueri clunibus inguen agit.*

*Vt sensit non esse Iovem puer, excutit illum,*

*Fit sonus, illatis ignibus æsta patent.*

*Hunc prædicantem Lethæas misit ad undas*

*Iupiter, ut Stygium rumpat amore Deum.*

Contraxit Scholasticus frontem, & ô clamat mendacium mendacissimum! nunquam enim Acignius pervenit in cœlum: sed cum in Capitolio per Pontifices inter alia Gephyriorum numina nuncuparetur, recusavit divinitatem, & ante oculos spectantium cum via sacra (qua quondam Claudius Imperator visus est ire ad Deos) trahe-retur in altum, ipse sua sponte delapsus ab aëre, humanas voluptates prætulit immortalitatis bo-

nis. Remunerabo te nisi fastidis totidem versibus,  
ne aut tu ingrato possis beneficium exprobrare,  
aut ego non probare quæ dico.

*Quod vnit è prima cælorum Acignius arce,*

*Non fuit hoc sortis, sed pietatis opus.*

*Dum pietas decepta, Deos, & sidera donat,*

*Fit pius, & superas sponte recusat opes.*

*Impius ante obitum, pius est post funera, cælo*

*Decidit, & casu noluit esse Deus.*

*Quantum humilis simplexque fuit, data sidera tenuit,*

*Et non concesso maluit esse solo.*

*Roma cave, nostrum cælis qui prætulit orbem,*

*Romanum mavult quam Iovis imperium.*

Risu excepimus Tamiæ de scholastico narra-  
tionem; cum Botris veluti lymphatico percussus  
morbo, se extra tugurium Daphnidis misit, &  
cum silentio incepit præire sequentes: eo trucu-  
lentiore, quo & Acigniorum scelera tolerare non  
poterat, & timebat Onosandri potentiam quam  
extra Eleutheriam risurus erat, si illum Dii in  
aliena terra servatum vellent, & nos nihil o-  
mitteremus ab officio, & sacramento quod nos  
una vinxerat.

Declinabat Sol diem, cadentibusq; radiis sum-  
ma montium libabat instabili fulgore. Proxime  
antrum fecerat Natura eo aspectu, ut crederes in-  
de erupturam Sibyllam, quæ quondam Æneæ  
posteris fatum fecit. Vertex in præceps positus  
mox casurus putabatur: Hunc densum vimen te-  
gebat, & inter caducitatem veteris saxi uberes a-  
quæ volvabantur, quas gramen excipiebat, tam  
lento strepitu, ut nec cadere quidem eas putares.  
Intus tenebræ sepulcralibus formidabiliores, nisi  
quod in intimo secessu apparebat exiguum lumen,  
& inter fragmenta rupis, vivum cadaver.

Hærebamus ante aditum speluncæ horrore  
noctis, & novitate rei stupidi: cum sese exeruit  
homo senex, humano major; gracile corpus, &  
adeo decrepito squalore incultum, ut tacitis con-  
catenationibus singula membra moveri videren-  
tur. Testudineos & vacillantes gradus sustenta-  
bat ba-

bat baculo: tristis vultus, oculique sulcatis per ætatem genis, disco, quo fingunt olim Hiacyanthum cecidisse, grandiores: spissa barba & ea iluvie obsita, ut inter album & nigrum esset. Os deductum, apertæ nares & musco horridæ: glabrum caput; tota denique corporis compages quasi signum pictum in pariete ad terrorem puerorum. Quis fuerit, & quid dixerit, accipite.

Novi jamdudum (inquit) quibus tempestatibus acti, reliquistis mare, quod hi soli navigant, quos humana caducitas delectat, & servitutis exitiale jugum. Fœlices animæ; quæ fucis relictis, ultra humanitatis leges præoccupastis cælum, & in Deorum beatitudinem ante mortem venistis. Enimvero metuunt omnes, & nullus est qui verum sciat, nisi qui seipsum negligit. Parum est minas ferre; prævertistis supplicia, & tormenta velut exhibita in theatralem scenam resistis. O liberi liberalium artium liberi, qui eas animas quas dudum precarias inter aliena vitia traxistis, parati estis in extremo anhelitu morientis libertatis exhalare: ô constantia: plures hodie Hispanæ nominantur, pauci Gallicæ restitistis: Ingredimini penetrabile istud, & secretis meis participes futura discite.

Divinum putabamus, & si falcem habuisset, erat in animis mirantium pro vetere Saturno venerari, nisi quod fabulis non credimus. Cæterum colore eodem quo nos viderat, placido vultu, quieto pectore, non tumultuarie ut Bacchantes & Deliæ, postquam baculo quem gerebat rupit funem quo sustinebatur lapis qui latum speculum tegebat, in quo plures imagines videbantur; sic ad nos.

Omnis anima Dei filia cœlos habitat, sciens eorum omnium quæ hic, & apud superos sunt: mox corpori inclusa, in capacitate organorum languet. Tepet in pueritia, oppressa contrario calore: in adolescentia, per ratiocinationem enitescit: in virilitate, crescit per judicium: in senectute, per prudentiam emicat: post senectutem  
tandem,

tandem, seipsam reminiscitur, & excusso servitutis humanæ jugo, quo minus corpori debet, eo excelsior fertur per aëra, & quidquid ubique fit uno instanti pernecitate sua videt. Hinc illæ frequentes in decrepitis vaticinationes. Etenim spiritus promptior est, quo tardiora membra, & carnis titillatio est. At præter ista quæ mihi cum ejusdem ætatis hominibus communia sunt, ipsa solitudo & silentium, à quibus Monachonis nomen mihi restat, alas addidere ad futurorum cognitionem, quam per repræsentationem earum rerum quæ passim aguntur, ex isto quod videtis VERITATIS speculo, accipio.

Anus mulier, quam hic cernitis longo morbo & ætate macilentam in lecto jacere, in cujus salutem aliquot medici pharmaca miscent, GALLIA est, cujus membra per diversas seditiones distracta antiquum robur videntur amisisse, & Proserpinam expectare, quæ jam sua vetustate cadentes crines impavida secet. Aliquot regna fœlicitas loci tutata est: multagentis robur in sublimē erexit: sunt quæ prudentia in consiliis servavit: Alia opibus suis debent quod perdurant: nec desunt quæ senectutem Fortunæ beneficio retineant. Nimirum ab externis ruinis surgunt imperia: primis duobus sæculis adolescunt, totidē crescunt, totidem integre & cum gloria servantur, septima & octava ætate labant, nona & decima fatiscunt, cadunt, pereunt, & cinis est, ubi Troja fuit, Pauca excessere mille annos, & illa sine decore, frigidis viribus, pigro situ, & quotidie novis doloribus aggeratos dolores ad ultimum spiritum ferentia. Subitum Mortis venenum est, nihil stabile quod in Mundo, nec perpetuū quidquid mortalium luminibus videtur. Hispania augeatur ambitione & constantia. Roma quod claves hodie etiam habet, facit superstitio. Reliqua omnia dehiscunt in Europa, & singulis paucæ Olympiades restant pro termino. Italiæ principes timore vinciuntur. Veneti vicinis propugnaculis coercentur. Cotzii paupertate, Subalpini sanguinis

nis proximitate domantur. Rheti largitionem sequuntur, rupturi foedus ad Hispanici auri fulgorem. Belgæ hostili exercitu teruntur indies; pavet Anglia; Germania discors in præda est. His omnibus inhjat Hispanus, & brevi, si Deus sinat, franget. Fatum est in partibus illis. At promptior Galliæ ruina imminet, florentissimum regnum, & nisi quod viribus suis rumpitur super alia duraturum.

Hactenus evitata favore Deum pericula & succussus, historicis relinquo, sola mihi de futuris cura, ut & quæ prævideo sciatis, & tantum Imperii corpus naufragio & sepulturæ detrahatis: Sin minus, idem vos æquor fluctibus mergat, ne patriæ vestræ dedecori superstites servitutem, quam fugitis, inveniatis.

Dudum est à quo Hispanus peregrina libidine ad furorem usque æstuat, obliviscitur Ibericarum formarum, & in una Galliæ patentibus voti suspirat. Nihil auro efficacius, præsertim in amore, ubi & Cupido aureus nominatur & aurea Venus. Vfus est communi amantium remedio, & pecuniis per servos & ancillas matronæ vetulæ attentavit pudicitiam. Major pars corrupta cessit juvenis petitoris dolis, & ipsi quorum tutelæ Gallia committitur proditores veteris castitatis vendunt dominæ secreta, & suis inimici, hostium amici fiunt. Adeo in exitium nostrum feroces sumus, degeneres fidelitatis antiquæ, & corruptione sæculi ad omne scelus parati. Hinc domesticæ exasperationes, & inter potentiores dissidia, cum alii pro libertate pugnarent, alii privatis commodis publicam utilitatem postponentes in patriam suam arma tollerent.

Neque tum exciderant omnium animi, restabant sublimia ingenia quæ nullo pretio delinita sustentabant deficientem Galliam, donec gliscente adulatione, & timore mortis deterrerentur. Minima turba & ea fugitiva rixata diu cum incommodis suis callum per injurias duxit, & adhuc infracta malis de genu pugnât. Multi ad vir-

tutem nati ne pauperes esse cogerentur deferuere naturam. Aliqui quia probi esse non poterant, sequuti sunt perversitatem, & in commune malum juravere. Illos ambitio ad magistratus evexit, quoniam per scelus compendiarium via est ad honores, longa & ardua virtuti. Istos ad avaritiam impulit Larium necessitas. Hos pauperis nobilitatis titulus, & gloria proavorum hæreditatibus major, Postuertæ addixerunt. Plures pugnandi aviditas, & incerta vitæ securitas, armavere in regnum, ut certius & citius perirent; cum ab his qui res imperii administrabant, ne sperare quidem strenuo militis esset, beneficium quo gloriosis vulneribus posset mederi. Omnes in diem vivunt, & stipendiis suis exuti cum nihil accipiant, rapere coguntur.

Iam vero reducite oculos ad speculum, & tripitem istum Geryona qui ægrotanti Galliæ medicipallio tectus affidet, curiose contemplete. Ille est, qui tot sanguisorbas adhibuit ægrotæ venis, ut sine sanguine membra restent, simulatis medicaminibus vexata ad desperationem salutis. Ille, ille est, qui in propositum vestrum accenditur, & Veritatem foras migrare iussit, quæ vos aliquando cultores sui numinis insulæ suæ longis peregrinationibus fessos excipiet.

Ecce autem nascitur Hercules, & victor tot laborum, fautorem Hispaniæ Geryona clava cædit. O ineluctabilis Fatorum vis, o fœcundum germen ad spem nostram natum, o restituta libertas, & brevi, favente tanto principi fortuna, ab exilio reversa Veritas, & sedibus suis restituta! Quid igitur patrio sanguine cruentamus manus? quid paucorum crimina innocentum punimus suppliciis? Quorsum bella civilia & prætextu religionis impune patrata cædes ad barbarorum etiam fatietatem? Societas Gallica fornicationi simillima est fatiscit detracto lapide, & in unius aut paucorum nece volvitur in ruinam. Cur non succurrimus vicinis, & facta concordia in peregrinos iras transmittimus? cum sciamus nostrorum cruo-

rem in nos verti, & illum salutis suæ male consulere qui proximi vitæ non consuluit.

Hinc Geryon innocenti gladio & nunquam evaginato quasi Iupiter alter funestum tonat. Hūc ingens corona nobilium & popularium cingit, à quibus veluti rerum author & naturæ tam crebris precibus in favorem supplicantium vocatur, ut & templa vacua sint, ædes publicæ non secus ac in pestilentia desertæ, & ipsæ celebres olim curiæ, sine voce, destitutæ potestate sua serviant alienis imperiis.

Eia quis percussor pessime authoritate sua utenti manum præbet? quis everforem Galliæ humi sternit, & Plutoni consecratum mactat? Herculem video clavæ suæ pondere monstrum umbris immolantem, tollite Galli victorem, canite Pæana Galli, & conservatorem vestrum rapite ad triumphum. Rideat jam fortunam Virtus, interque sacros lares, & ultra Pyreneos montes eniteat, tanto acrior, quanto suppliciiis & opprobriis fuerit amplius fatigata.

Hæc ut dixit, lassæ senectute poplites relinquere membra, animus quoque vacuum calore corpus in conspectu nostro reliquit. Dubitantibus nobis quo hypogæo fati functum condereamus, supervenit adolescens figulea lagena & peraquæstuariis cibus turgida onustus. Qui postquam levibus suspiriis mortuum prosequutus est, tam constanter peroravit ut nec ipsi Dii æquiore animo mortalium casus ferant quam iste sustinebat senis expirationem.

Vitio, inquit, gentis humanæ ad improvisa deficitis, vultibus ad marmoris tincturam pavidis consideratis novos casus, & veluti monstro turbati qui sitis vix recordamini. Scitote igitur me hic favore Deum venisse, ut & ægris mentibus solatium adferrem, & vacuis jejuniis corporibus precariis ciborum reliquiis auxiliarer. Quid timore supervacuo exulceratis pectus, & notem deducitis inter lacrymas & stuporem? Omnes eodem cogimur, sed plures alieno ictu mortem



tem, puellarum animi: rescribit regi, & Monas-  
sonem rogat ut epistolam suam ad Protagonem  
perferat, quæ de nuptiis loquebatur. Erat autem  
ejusmodi.

## LVCILLA PROTAGONI S.

**L**Aus minima est decepisse puellam, nunquam  
fortuna tua aut gloria crescet ab Amoris lu-  
dibriis. Si vis uxorem, habes me longa tibi obse-  
qui laude cognitam. Sin minus, fugiam ego à  
vultu tuo, ut per meam absentiam oblivium mei  
te sequatur. Deforme nomen est amicæ, præva-  
luit jam atrox fama, & nisi me ad thalamum tuum  
vocas, vocabo te ad tumultum meum. Vale.

Postquam legit Protagon ambitionem mulieris  
hæsit aliquandiu. Mox conversus ad Monaso-  
nem; Abeat, inquit, insolens mulier, ruptum est  
vinculum quod me illi ligabat, & quoniam dulce  
numen meum sustinere non potuit, discat per-  
ferre contrarium.

Tunc Monason cælibis vitæ incommoda ar-  
gumentis pluribus regi demonstravit: eo illum  
inter hominis loco esse, ut quidquid fuerit actu-  
rus singulos tangat. Seligendam quidem uxo-  
rem quæ legitimis amplexibus vagum amorem  
retineat, det liberos se & conjuge suo dignos. In-  
ter nobilitatem vetustissimi regni plures fœminas  
aspirare ad tantum matrimonium, quarum om-  
nium quæcunque semel degustaverit imperium,  
alienaturum à principe insolentia sua subditorum  
animos. Nunquam bene universis Gallis impera-  
turam quæ inter mediocritatem Penatium vix  
duabus aut tribus ancillulis etiam male impera-  
verit. Diverso ambitu ardere principes fœminas;  
virginesque, pudicitiam, modestiam, majestatem,  
& pulcritudinem, cum maximis dotibus ab om-  
nibus Europæ partibus allaturas. Seligeret modo  
quam vellet: has scilicet regni fortuna dignas,  
quæ præter probatos mores ab ipsis cunis didice-  
re quid esset imperium. Oblivisceretur interim

Lucillam suam, & cæteras formas, quarum corpora lex illi eadem subdebat, quæ regni Gallici habenas tradiderat.

His monitis ad novas curas accingitur Protagon, dedignatusque rescribere Lucillæ, se ipsum consulit quam ab exteris regnis in partem regni & curarum suarum deduceret. Iam Lucilla Protagonis animum à se alienatum senserat, fraudeque Monasonis comperta, iram suam consulebat qua ratione ulcisceretur injuriam. Desideriis nostris quæcunque illa sint præsto sunt studia & ministri, sceleribus aliena ingenia accommodantur; nimirum certa sunt tum veneficis, tum percussoribus præmia; sola virtus sine pretio est.

Erat quidam Pantomorphus miscendis venenis; falsis accusationibus struendis, necandis per ferrum hominibus æque solers: hujus opem cum Lucilla mercari destinavisset, amore simul & iracundia ferox, scripsit ad eum litteras, per quas Monasonis vita veluti subhastabatur, nullum nisi sceleratum emptorem repertura. Dudum me pater meus Lucillæ tradiderat, longa illius cum Protagone familiaritate adductus in spem maximæ fortunæ, quæ nunquam nisi sælicibus appareret. Creduntur mihi scriptæ ad Pantomorphum litteræ, neque enim habebat Lucilla inter famulantes liberos quem præ me diligeret. Vix ædes reliqueram nescio quomodo etiam errore meo sævus, occurrit mihi Monason, & postquam in celeritatem meam inquisivit, lenocinantibus verbis fregit fidelem pertinaciam, extorsitque à manu mea secretas dominæ litteras. Ille ut sibi parari insidias cognovit, exiit sub honoribus laborantem nobilitatem, & sibi deinceps victurus, vocavit me in sodalitium suum. Verebatur Protagonis cum Lucilla redintegrationem, sciens iram in amoribus flammæ augere, & fœminas vindictæ appetentes ubi semel consensere in unius mortem, eadem contumacia ad sepulchrum usque deferri, nec unquam parcere illis quos semel timere. Ah! quam honesta res est paupertas

tas læta ! quam nubilis fulgor eorum qui reges sequuntur ! Ridiculum est mortali inter tot vanitatum ludibria perpetuam felicitàtem expectare; vocant nos undique in amplexum suum molestiæ, & inter delicias semper aliquid sævi nos strangulat. Nulli contingunt magna bona & diuturna. Ridet fatum quos subito evexit, & si non misereatur rapit. Pertinax est qui non cedit fortis suppliciis, neque eam excusat quæ perpetuo movetur. Habemus solatia miseriarum nostrarum illius inconstantiam, & quod ad omnes injurias nascentes exponimur.

Vixdum secretum hoc speluncæ silentium ingressi eramus, cum Protagon conciliatus Lucillæ suis quoque incommodis lætabatur, præsentium cupidine accensus, & oblivione amicitiae qua nuper Monason gloriabatur etiam in illius damnum velox. Inimica magnæ potentiæ res est, nimius erga dominos amor, & nulli miserior vivunt, quam qui maxime regum suorum non modo incolumitati sed & gloriæ student. Quæritur ad omnia tormenta Monason, non quia peccaverat, sed quia expeditivisset peccasse. Nimirum omnes hodie Cares sumus, & veteris conditionis obliti, degeneres majorum libertatis sponte nostra deposuimus Gallicam licentiam. Iam superstitione obiciebatur absenti Monasoni, jam ille damnabatur odii in illud imperium cujus tranquillitatis partem suo sanguine fecerat, jam philtis traxisse regem in amicitiam suam dicebatur, obiciebanturq; ejusmodi alia scelera, quæ quondam virtutes fuissent. At Monason sua conscientia securus ridebat atrocitatem famæ, & nihil aliud Deos rogabat quam quod felicitàti Protagonis arbitrabatur conducere. Vtpote cui flebile fuisset deserere tot per annos continuum vitæ ordinem, finemq; suum novis simul vestigiis & motibus polluere. Excusabat velocium Cupdinum motus, & nihil minus querebatur quam exilium suum.

Interim rediere priores animi Protagonis, reminiscitur Monasonis prudentiæ, fidelitatis, roboris,

Nimirum præsentem virtutem odimus, ardemus in absentem! O acies, o fulgor! nictant ad illius aspectum mortalium palpebræ, & oculi veluti radiis æstuantis solis tacti, triste putant lumen, quod ubi amotum est videre gestiunt. Debebat hoc patriæ officium Monason, ut Protagone iustis nuptiis victo, regiam familiam generosa conjuge, mox liberis augeret. Nec mota exerit caput è latebris, acceptamque ab Etruscis Regiam thalamo Protagonis locat, primo partu Clodovæum Galliis daturam. Hoc, & aliis beneficiis obligatum regnum reliquit, priscaque solitudine lætus jamdudum cavit ne novis aulæ incendiis implicaretur.

Pronus erat ad vesperam proxime præteritus dies, cum Monason repentino somnio turbatus insolitum excussit torporem, & magna voce appellavit me in opem suam. Tandem ut ægre proximo gramini incubuit, sudore manu deterso, Iamdiu (inquit) Philesitære sumus experti, quos foetus mentes criminibus gravidæ in manus obstetricantis invidiæ mitterent, quo aculeo foderent incautos, qua fraude & insidiis circumvenirent eos quibus palam blandiuntur. Cecidit Tolmites ejus perfidia quem sibi amicum credebat, & vix placide quiescit Ajacis umbra in hoc concussu regni motu. Desiderabimur aliquando etiam à pessimis, ubi Parcæ suo ictu imperaverint mori. Ibo inter hæc obviam morti pervertenti ordinem naturæ, & minorem fratrem major annis sequar. At postquam Iovj liberatori, & Proserpinæ libavero, suadeo, Philesitære, ne spem tuam desperatione dones. Venient verarum virium viri in defensionem tuam, & illa turba Veritatis affeclate cum Pinotidio in tutelam suam accipiet. Illa sapientiæ præceptis animos tuos componet, illa blandiloquo monitu severos mores mitigabit, & innato jam pridem in vitia odio à conscientia tua indefessam probitatem extorquebit. Incipe itaque eorum providere receptui, quos præptores habiturus es, & à proximorum hortulanorum

norum liberalitate quære convivium peregrinantibus.

Hæc ultima ad me Monasonis verba fuere, neque ego dubito quin singula eveniant, cum à præsentia vestra in partem jam Veritatis inquiram. Omittite itaque pavorem, & sine funeris sumptu, sine pompa, mortuo subvenite, vacuum animo corpus tralatitia humanitate tumulaturi. Prævisum exitum fortiter tolerate, ne constantiam defuncti impatientia vestra maculetis. Relinquire Præficus commendatitios fletus, cum sciatis verum dolorem lacrymis indicere ne cadant, & egesta muliebriter suspiria detrahare de generosissimi ducis laudibus. Vocant ad se Dii quos amant, subtrahuntque eos hominibus, ut & nomen eorum ab oblivione vindicent, & permittant eos à cælo securos inquirere in laudes & præconia sua, & patientiam nostram.

Igitur composuimus tumulo Monasonis corpus, & lapidibus quos solos crudelis fortuna fugitivis reliquerat aggressimus sepulcrum. Iam manes ultimum proclamati in Elysio fruebantur fama sui, jam ad solitas operas reducti modestis vultibus desiderium tegebamus absentis. Vt enim solet discussis imbribus redire pristinus ætheri nitor, sic fletu detumesciente nova tranquillitas roseum colorem revocavit in genas, quem nuper pallor mœstitiæ comes expulerat. Nimirum nimbæ foelices tranquillitatem amant animorum, quoniam ipsæ in tranquillo sunt, delectat illas ex alto bona nostra respicere: cæterum illæ nobis nusquam condolent, quoniam beatitudini contraria est condolentia.

Commodum, multiformes dapes fecerant Hecates cœnam, hinc placentarum lautæ reliquæ oneraverant terram, inde frustra secundarii panis, cum vetusto caseo, & nucibus & castaneis pæne moretum fecerant. Hæc omnes copia lætati destruebamus congestos temere cibos, cum colonus quidam furtive speluncam nostram ingressus ad Philesitærum sic ait, Plures Monasonis

æquitatem ante has fores opperiantur, nam & nostri illius beneficiis ad servitutem usque devincti tanti hominis famam ultra miraculum posuerunt, unde hodie quasi ad sacrarium Veritatis immixti plebejis, rusticisque, nobiles ad illius tribunal ab omni terrarum parte studiosa celebritate congregantur, malis suis, & jurgiis à divino Monascon ore remedium petitori. Laudata Philesitærus clientum frequentia, proclamabis, inquit, Monasconem nobilitatem animi deduxisse in cælum quod longa probitate vivens meruerat, mecum tamen esse juvenes qui occupare possint vacuū Themidis sedile, orbisque totius discordias certo judicio componere. Abierat rusticus: neque Philesitærus expectavit invitationem audientium, sed lætissima fronte antecessit curiositatem nostram. Quoties (inquit) Diana cursum suum æquali semper invectione perfecit, junctisque cornibus reparavit orbem, toties Monascon circumfusa villicanorum multitudine cinctus varios casus audiebat, & è Veritatis speculo quid decerneret accipiebat. Quisquis enim ante ora veteris cavernæ sedens judicaturus oppositum sibi consulit speculum, certissima lege mendacium à veritate discernit. Quippe in eo verissimi vultus, habitusque loquentium accuratius exploranti referuntur, exuunt omnes mutuatam personam, & ementitos cultus ponunt. Cæterum suus color veracibus permanet, quem confundit mendacium, & fuligine teterrima maculat in speciem Mauri. At glaciæ speculi puro fulgore nitida imitatur tranquillitatem maris, ubi Veritas fabulis obtegitur, & velut ventis undique cessantibus tacita fileat. Quod si levibus mendaciis verax narratio coinquinetur, differtur aliquantulum serenitas, & exiguis nubibus speculi candor obducitur, donec iterum erumpat Veritas, quæ sicut flabris spirantis Zephyri impurum aërem, & pestiferam contagionem suaveolenti flatu depellat. Restat, ut judicem sortiamur, qui expectationi confusæ multitudinis respondeat, & constanti judicio admirationem

tionem mortalium simul trahat, & sequatur Monachonis famam.

Necdum finierat, cum Tamias inclinavit in electionem meam. & quamvis ignorantiam timidissima deprecatione damnares, accessere ad illius sententiam cæteri, simulque consensere in auctoritatem meam. Dum efferor sodalium manibus, dum propter puteal Libonis componor, dum mihi saxea sedes pro sella curuli paratur, dum Veritatis speculum ante oculos vicina in nocte figitur, & cavetur ne prima & male fida umbra speluncæ dicturis secretum detegat: memineris (inquit ad me Daphnis) ô Alitophile Prætoris gravitatis, ut & tardo sermone ascititiam hodiernorum judicum majestatem possis testari, & insolentem severitatem vibranti supercilio fingere. Ista, plures judices fecere, quam scientiæ aut probitas; quarum illi consuetudinem eo insolentius ejuravere, quo jactantius æquitatem mentiuntur, aut sanctitatem profitentur in publicum.

At ego veritus ne coeuntium clientum animi longiore mora solveretur ad confusum murmur, eriperentque mihi impatientia sua libertatem ex præscripto judicandi, tacui ad querelam Daphnidis, ut & alienis querelis me permitterem, & operam meam litigantibus addicerem gratis.

Vix pro tribunali sederam, cum juvenis rusticus ad eum quem manu ducebat. Heus, inquit, commilito, cavetis ne dicentem interturbes, nam & tu crassis auribus, & tarditate loquutionis jampridem meruisti ut taceres. Tum alter, At tu ne absurdâ mentiendi narrationis veritatem inani fraude jugules, nam & amitteret oratio leporem suum, & ab una lite veluti ab hydra litium mille capita succrescerent. Isto accepto responso, subjecit alter, Viderit cui contentionis nostræ judicium permissum est, ne contumaci corde respuat orationem in speciem Græcanicæ fabulæ compositam: quam tamen si bonis oculis & aure fideli exceperit, inveniet omnia, licet



primo supra captum cogitationis humanæ ardua videantur factu facilia, auditu grata, eruditione plena.

In Arvernâ quæ collibus asperioribus assurgit, ursus & asinus, hic calce, ille unguibus infesti, in mutua vulnera sæviebant. Forte viator tam immanes feras miseratus ad extremum vitæ periculum ferali bello deduci: Avete (exclamat quo maximo poterat nisu) fortissimi Martis clientes, & generosæ bestię, ad imperium etiam hominum lætis sideribus advocatæ: horret animus contemplando fortitudinem qua libentius lethiferos ictus corporibus excipitis quam aurum alii utraque manu. Nec me putetis huc sine causa venisse; fœdus inter nos perpetuum sanciturus. Ad hæc quieverunt bellaces feræ, & reductis in suam gratiam superciliis, hinc asinus prævalidæ juven-ta, inde ursus suis unguibus fidens placati audiebant consulentem,

*Sic ubi stelliferum linquens Cyllenius axem  
Per totam descendit avum, cognata reponunt  
Numina funereas iras, tristemque remittit  
Quisque metum, bellicque sui medicamine viso  
Miratur virgam, qua vincula ferre leonem  
Cogit, & imbelli tygres albescere victu.*

Neque ille tardavit reliqua adhortationis suæ pertexere. Postquam, inquit, Doromifus Fortunæ Iliensis templum deseruit, omnia in deterius mutata artes hominesque sine mercede reliqueret. Suffectus est in illius antistitis locum tardissimus equus; Tasticium vocant. Hic grato hinnitu quos meliore vultu Fortuna respexit salutat, & gazæ regiæ malus administrator non nisi bestiis felicitatem ostendit. Nam neque thesauros sibi commissos gloriosis militibus, aut probis iudicibus dispensat, utpote qui stoliditati suæ male convenient: sed è sylvis, stabulisque, & stercore eligit bruta sibi simillima, quæ in contumelium Bellonæ & Apollinis deducat ad divitias & honores. Quid vetat & vos ad hunc beatorum umerum adoptari, cum cætera animalia mem-

brorum

brorum fortitudine præcellatis? Hoc dicto ingressus in horrorem vicinæ sylvæ ursum asinumque reliquit magnis cogitationibus spes suas ad ambitionem torquentes. Tandem inter utrumque convenit, ut asinus per villas, oppida, & urbes ursum suo tergo deferret, hæc novitate stipes aliquot æreas argenteasque in mutuum subsidium aggesturi: ea conditione, si ursus ad fortunam festinans expectatas opes à Tasticio acciperet, ut in asini quoque lucrum æqua pars cederet. Itaque, aggrediuntur iter quod ad Eleutheriam ducebat. Ac ut primum stetere propter Ligeris aquas qui præcipiti cursu instabilem volvit arenam, & incerto alveo spaciosas planicies percurrit, metu horridi imminentium calamitatum omen putavere occursum irati Dei, qui tum etiam vicinorum terras sua colluvie deterebat. Neque ego, inquit asinus, ominibus crediderim qui interest infelicibus an fluctus absorbeant perituros? An melius nos excipient terræ si fatorum acerbitas peregrinis indixerit mori? saltem crurum longis voluminibus ligatos, juncta mors ferret, umbrasque felices uno cymbæ tractu portitor Charon Elysiis reddet, ubi magni spiritus bestię laureta, & victricibus palmis loca confita obambulant, & à Plutonis imperio summotæ inter amoris leges & delicias melioris naturæ indulgent immortaligenio. Aude aliquid natalitiis tuis dignum: nam aut necesse habes cum insaniēte furere, aut malo augurio detentus frangere propositi constantiam, & audaciam tuam subita verecundia destruendo, priscas latebras repetere, ubi lento otio saginatus damnes primam ambitionem. Nihil te morari debet; magnanimi est adlatrantes Scyllas contemnere, & exemplo Lunæ quæ dispendiis Phæbi lucet nocturnos canes irridere. Etece nihil aliud expecto quam communionem periculi, imo præcedo te, & si me vectorem non fastidis, mihi Ligeris pro Hellesponto erit, asinus tibi pro ariete, forsan in Eleutheria Colchidem inveniemus, & in æ-

de sacra Fortunæ Iliensis, vellus aureum.

Incredibile dictu qua audacia bonum socium ursus superascenderit, qua levitate sessorem per rapida fluentia minacis fluvii asinus vexerit, quo impetu cavatas prioribus ungulis undas fregerit, quam molliter crura in ulteriorem ripam reposuerit. At posteaquam de fluctibus extulit se pæne ad necem laceratus unguibus urfi (qui ne arietem suum inter undas novus Phrixus desereret, fortibus uncis adhæserat asini tergo) vulnera fortunarum ingentium prænuntia existimans, nihil de sævitia sessoris conquestus, ne alter exprobraret ignaviam, fortiter casus suos toleravit.

Inter hæcausis ulterius progredi omnia ex spe proveniunt, agrestes oppidaniq; desertis velut in solitudine ædibus, intentis ad lætum spectaculum, animis, variis muneribus onerant ursi geruli dorsum, gratis asino ponderibus, qui ad miraculum simul incedebat & thesaurum.

Ad istum modum à singulis aliquid corradentes Eleutheriam, mox Ilium perveniunt, ubi largiore quæstu gravati, & fœcunda accretione læti pinigero diversorio se suaque bona commiserunt. Vt intellexit stabularius causam quæ utrumque ad amplissimam urbem vocaverat, delectatus novorum hospitem contubernio in hæc prope verba cœpit.

Novissimis temporibus quando Protagon per mortalitatem commeabat, patebat in honores merentibus via: nam & Doromisus artes amabat, & similitudine morum Protagoni gratus malebat emere ingenia quam corpora. At hodie qui regnat Geryon simulatque præfecit ærario non suo Tastidium, ostendit noluisse Virtutem auri gravitate onerari, aut inquinari sordibus male cumulatae pecuniæ, quæ homines scarabæis similes facit, quos fimi gustatus vitiat. Quicumque igitur ad summa vota properant, ut inter cultores Fortunæ reperiant locum, ad illud tantum studium sese applicant ut sentiantur se nihil scire. Hoc præceptores, hoc parentes liberos do-

cent; & si quando ignorantiae fortior natura repugnat, otio & præmaturis voluptatibus sepe-  
liunt incautos, & magnos spiritus per se ad æter-  
nitatem assurgentes instabili divitiarum fulgore  
præcludunt; existimantes in eo summam doctri-  
næ consistere, ubi elementarius juvenis infideli  
lectura literas in syllabas, syllabas in verba coa-  
gmentat, aut componit. His stat in templi sui li-  
mine felicitas, & ultro blandiente nutu in oscu-  
lum ignavos pariter & stolidos applicat. Plerique  
inter mortales diversis ætatibus ante fores tem-  
pli Fortunæ liberalis præcepta chartis mandant,  
serviuntque bestiis, quibus pro manibus pedes,  
pro digitis obtusæ ungulæ dudum fecere ut scri-  
bere nescirent. Nam in collegium sacerdotum  
quidant operam sacris inconstantis Deæ, muli  
tantum, asini, equi, & boves ascribuntur: fe-  
ras quippe non patiuntur tam mansueta animalia,  
sed eas ad bellicas dignitates servant, & superva-  
cuos honores supra summum cum sideribus ele-  
mentum micantes.

Pro Fortuna in sublimitate aræ stat monstrum  
ferocius Ægeæ, qui centum ensibus minabatur  
Iovi cum Titanes affectarent cælum. Huic pedes  
sex diversis motibus instabiles, ita ut facile hinc  
detrudi posset si aliquis inveniretur quem fati-  
garet vita ad desiderium laudabilis exitus. Toti-  
dem manus vario gestu accipiunt ingentia mu-  
nera, aut exigua concedunt. Multi nobiles con-  
fusa vestium permistione deformati in speciem  
pumilionum quos annuo prælio grues infestant,  
aut errantes Geryonis pedes ad stabilitatem com-  
ponunt, aut podicem lambunt novissima exone-  
ratione ventris foedatum; simulque cum ex-  
crementis aurum liquatum combibunt, neque  
enim aliud metallum calidus stomachus sustinet  
& concoquit. Multi à sura pendent, à tibiis alii;  
beatiores de genibus expectant crepitum defluvii  
aurei præclursum. Nunquam scilicet grata ex-  
pectantibus tempestas erumpit nisi ante collisæ  
nubes dulce personaverint.

Hic ubi placatur supplicantium precibus, concutit triceps caput, & statim in orantis sinum tænia serica neptunii coloris descendit. At quod signum Tasticus paululum in pedes assurgens, priorum crurum vinculis implicat exornatum, aurasque hinnitibus crebris pulsans, aut cum vacuas sedes occupare imperat, aut è templi tholo inter fartim pendentia nobilitatis insignia rapere equestrem torquem qui solus nobiles bestias facit, atque illo vincire collum quod melius ad scalas gemonias, & deforme bustum, plutonius funis strangularet.

Finierat diversitor, & jam nox altior suaserat somnos, cæterique sub eodem tecto quieti se reposuerant: neque tamen cum alii hospites altum sterterent, sollicitæ bestię membra lassitudine fessa lecto permisere. Damnabant Auroræ moras, & Lathmo tenebris ultra Cimmerias inhorrente abdicabant diem, quod tamdiu inter rubentis Deæ amplexum Cephalus retineretur. Longum est omne compendium, & tardum omne momentum sperantibus: ipsæque voluptates timentur ab his quos cupido, & desiderium expectati eventus ad impatientiam obligat. Neque longe lux aberat, mota est Aurora sollicitudine bestiarum. Præluxerat jubar, & ingentem Phœbum abundis Hispanæ Doridos eduxerat. Quis, inclamat ursus, stabuli fores janitor absolvit? summus dies est; etiamnum tacent cardines, & nullus est qui januas referet? Vbi chlænici, sartores, lacernarii, subucularii, solearii? Accurrit ad illius imperium numerosa familia: hic, præpeditum multiplici penna pileum imponit capiti immanis feræ; ille, carbasum æqualibus spiris & sinibus rotundum orpamentum collo aptat: alii caligas conchyliatas, holoberum thoracem, enses balteum, tibialia, periscelidas, calceos, palliumque è purpura bis cocta auro intertextum induunt.

*At parte ex alia generosa stirpis afello*

*Auribus è geminis circum cava tempora pendens*

*Auro durata phalera, cui plurimus ore  
 Ostri fulgor abit, fulvum sub dentibus aurum  
 Manditur, & rigidi gemmis micuere tapetes  
 Infrati dorso, non fortius athera lustrant  
 Solis equi, quando fraternas languida flammæ  
 Luna fugit, mergique vadis luctantia contra  
 Sidera, & immenso condit sua lumina Ponto.*

Itur ad constitutum templum sequentibus mercenariis satellitibus, cum fœcepopuli prosequenti conductitiam pompam; quæ ubi pulvinaribus sese intulit, ursus humi projectus adoravit Geryonis statuam, & votum quod spes incitabat per tot pericula constanter servatum fortunæ tacti numinis persolvit.

Perte ego fœcundiores Amaltheo cornu dexteræ, per Danaës imbrem deprecor, per messes aureas, per tot exempla felicitatis quæ ubertim circa pedes tuos repullulant; patere bestiam in hoc tuo sacrario subsistere, & inter tot famulantium greges ursum numerari, qui rictu cruento nihil nisi invidentium tuæ gloriæ cædes despumabit, &, quod hic apud vos nobiles multum æstimari intelligo, qui per fas & nefas iram tuam vindicabit etiam innocentum suppliciis.

Numquam humanior fuit Geryon; continuo cærulea fascia evolavit in supplicantis sinum. Sensit ursus divinæ providentiæ beatitudinem, & illico equestri torque donatus deseruit testudinem templi, novis honoribus tumens, & ab innocentia sylvarum voluptate levissimi muneris corruptus, in superbiam & insolentem fastum degenerans.

Dum hæc agebantur, asinus è spatiosa porticu contemplantur scribarum veloces manus, qui sedentes in atrio, Fortunæ præmia variis voluminibus inferebant & alia omnia, qualia omnino divisor descripserat. Invitatus locorum splendore, & prolectante spe optimæ hæreditatis quâ jam tacitus devorabat, propius accessit; mox paulo fidentior, intra limen fani sese faciens, nixus posteriori genu, priore vero amplexatus aram, sic adpre-

ad precatur. Tu qui Parcarum fila, & imperia factorum pro arbitrio regis, qui exemplo crescentis Iovis inter pastorum casus educatus parentum inopiam pæne sceptro mutasti, & nunc benefactorem Saturnum de cœlo deturbare cogitas; Tu qui libertatem hominum longa annorum præscriptione super animalia cætera superbientem extituli servitio premis; Qui tot insignes bestias sub quarum onere circumjacentia tribunalia gemunt humanitati præfecisti: Veteris fœni & segnium carduorum cibo remoto asserere me in aureum convivium tuum, & istis bestiis immanitate corporis, tum Arcadicis etiam grandiolem asinum, ascribe in cultorum tuorum gaudia, ad quæ non modo se favens Fortuna, sed & hominum quoque studium inclinât.

Non segnius dexter Geryon asini devotionem optata tænia comprobavit; assurgunt Fortunæ antistites, detractisque hyphippiis sacerdotium cum tribunali asino dari jubent: quod ubi per scribas publicis instrumentis relaturn est, confusis ruditibus, mugitu, atque hinnitu antistitem novum salutavere, junctisque cum fide pectoribus, tumescentia palearibus pectora, & osculum simul miscuere.

Cæterum suis muneribus fors lassata (quæ nunquam magis clarescit quam per publicam aut privatam calamitatem, bonæ stabilitatis impotens) ursum ad graviores priscis miseras improba manu reduxit. Etenim sicut inanum spicarum cassi vertices per ventorum ludibria ubi semen amiserunt cœlum suo cacumine spectant, ingrata altitudine agricolarum simul studia & turbinum impetus deludentes: sic illi quos paupertas inter inutiles honores implicat, nullo divitiarum pondere gravati inferunt quidem sideribus caput, sed tam molesta dignitatis fulgore, & superflua magnorum nominum messe ut nihil aliud præter auras & infortunia redivivo ad miseras corde percipiant. Inde, plerique cum incommodis suis pertinaci modestia luctati, permittunt se communibus



munibus vitiis, & vitam suam ad alienas injurias, & sicariorum officia præcipiti commodant. Hoc sensit ursus, quem familiarium rerum necessitas inter steriles nobilitatis titulos opem nuper vectoris exoptulare coëgit; neque enim poterat longis jejuniis extenuatum corpus ad extremam necessitatem durare. Verum asinus mutato genere vitæ mutaverat mores: & quamvis aurum modio metiretur, malebat accipere, quam dare.

Querebatur ursus ruptam tam cito societatem, quam volebat leges semel contractam non aliter quam mutuo consensu resolvi. Eam conditionem qua vocaverat vectorem suum in partem sperati lucri si à Fortuna reciperetur, reciprocam intelligi, & tacite cautum ut asinus pari obligatione teneretur, si spes decepisset ambitionem suam, & ille vector asinus expectatam Fortunam occupasset.

Mirabar superficiem speculi pererrantes umbras, faciemque dicenti eandem permanere, diverso tamen habitu, & vestibus longe aliis quam uterentur hi quos rusticitas ad stivam & boves damnat. Etenim de cæruleo serico per latus columba aurea discurrebat. Micabant circum simplicem avem aureæ quoque flammæ, quæ fluctus suos vario lapillorum colore crispaverant. Eodem insigni coruscabat notabile pallium in ea parte qua capulus argenteus ingentis gladii sinistram manum superbe suspendit. Hoc ludibrio mens attonita dum diversas species concipit pæne oblita est quod suggereret. Revocavi tandem spiritum ad tot miracula fugientem, & judicium velut ad Philadelphicam Pharon, aut Herus lucernam, in hanc sententiam decenter retorsi: videlicet, non teneri asinum pro socio, cujus servitium curasque cæca etiam Dea æquissima liberalitate donasset: lucra penes eum esse debere qui incertam foelicitatem & nullo voto conceptam per certissima mala quæsiuisset animis ad calamitatem obstinatis. Videri tamen tum demum  
ad bo-

ad bonorum communionem vocandum ursum ab asino, si summitteret corpus asini obsequio, & pari viarum laborumque discrimine quo nuper fuerat exceptus, sustineret sessorem.

Tunc vero recepit intermissam orationem ille idem qui paulo ante loquebatur. Et, Per fidem (inquit) in conditionem bestiarum sincerum iudicium fecisti. Nam cum inter has altercationes asinus ad Gephyrium nescio cur legaretur, promissit in urfi manum se omnia quæ à Gephyrio acciperet fidelissima sorte inter utrumque partiturum, modo se tergo admitteret duraturo obsequio donec ad eam terram venissent quæ quondam erroribus Æneæ requiem posuerat. Etiam generosas mentes sortis melioris expromissio ad servitutem domat; omnia fiunt ut paupertas fugiatur: nec iste regii ordinis ursus recusavit extremum servitii genus quod in miserrimum canterium torquum equitem ignominiosissima metamorphosi vertebat. Venalis est omnium vita, etiam eorum qui se à libertate vindicarunt: infamiam consuetudo sustulit. Neque dedignantur Sabæorum reges, ubi odorata messe camporum hilaritas exultat in fimeto consistere.

Cum ergo pars eorum qui asino serviebant præcessisset, ut diversoria in adventum celebris legati quam humane pararentur: Alii itineris impedimenta auream argenteamque suppellectilem, peristromata, mensas, lectos, & quidquid ad magnificum apparatus luxuria & ambitio invenerent, mulis, plaustriisque inveherent: Nec deessent qui comitarentur insidentem urso legatum; Commodum, superatis Alpium jugis (ubi nives illudentes calori Solis frigore suo radiorum flammantium impetum retundunt) ad Rubiconem Venere fluvium.

*Qui Gallica certo*

*Limite ab Ausoniis determinat arva colonis.*

*Tum latus in niveis fuscum deponit arenis*

*Vrsus, & obstantes infringit pectore lymphas.*

*Inde abit ulterius, mediæque per aquora tantum*

*Tamen*

*Ur-  
Inde m  
Ur-  
Ur-  
Ur-*

*Torrenis defert equitem, qui pallidus ora  
 Verit ad oblatum litus, pedibusque recurvis  
 Vrsi terga premit. Stant circum brachia collo,  
 Cornea qua iuvro devinxerat ungula cornu :  
 Succutiturque tamen, nec certo pondere fluctus  
 Sustinet : & membris victoris lubricus errant.  
 Quid faciat nescit. Multum post terga relictum  
 Fluminis, & totidem fallaces computat undas  
 Ante oculos, Tentat suprema pericula mortis  
 Evitare miser, flexisque utrinque lacertis,  
 Inter gannitus, vastum genitale natantis  
 Condidit in clunes, femori quo junctior esset,  
 Haveretque magis : rabidoque hac addidit ore.  
 Hi tibi sint fluctus multa pro Ligeris unda,  
 Proque tuo amplexu crura hac, proque unguibus inguen,  
 Ausonius addisce pati nexusque jocosque,  
 Queis robustus Amor, queis gratia mascula forma,  
 Et melior Cypris falices ingerit ignes.*

Interrupit dicentem adversarius qui hactenus tacuerat, tam blanda oris severitate, ut sævientibus Iove & Neptuno in varias tempestates posset indicare pacem. Noli, inquit, suggillare vitia mea. & inutili deprecatione exigere à iudice invidiam. Iampridem litis hujus infamiam sustulit procera potentia. Sic ut napelli aut aconiti flos lethalem torporem inter rosas & liliaperdit, sic inter suaveolentes divitias non invenit foetens scelus supplicium. Quidquid supra nubes exivit Naturæ aut Fortunæ imperium, placide regnat, & quiescit; infra nocuum frendent fulmina, corrugat aëris frontem spissius cœlum, aut cum grandine lacrymas exprimit. Ista non tangunt Deos, quos humana superstitio timere. Quidquid Poimenarchi peccamus, castigat auri fulgor, & occupatæ per temidam mortalium pietatem vires, quibus etiam in animas iniquissima pœna sævimus. Non dedignabor mores meos ad censuram traducere, & summoto fabularum velo aperire scenam vitæ meæ. Statim reliquit rusticas vestes, ingens pallium cum purpurea tunica defluerat in pedes, perasoque capiti imposito, & com-

positis circa pectus sericis nodis qui de pileo tremulipendebant, postquam expuit longa tussi marcorem, omissum sermonem sic retexuit.

Quod alter sub asini nomine ludit, transit illud omne in partes meas. Illuxit nascenti mihi pestiferum sidus, & contumacem ignorantiam animis ad scientias obductis iniecit. Sed nihil est ab omni parte miserum. Pro solertia ingenii floridum corpus, & membrorum omnium gratia benevolentia sortis minor, quæ literarum gloriam pertinaci mendicitate vendens, eos tantum amat, quos solutum naturæ robur ad Musarum & Apollinis odium reliquit. Hinc inexpectatus honor divinæ ad Gephyrium legationis, & subitus in me Geryonis favor procacem ad opes aviditatem antecedens. Hinc servile Philoceni officium, quod ab equite regio necessitas, & anhelantes sub paupertatis pondere nobilitatis tituli extorserunt. Satis sub urfi fabula & persona villici delituit: prodeat jam totus & suus in theatrum, ut ante istud Veritatis & Iustitiæ sacrarium agnoscat me indulgentissimum patrem, festinata adoptione præoccupantem Naturæ leges, & prodiga liberalitate parentales curas prævertentem. Nam cum ex Eleutheria discederem, oneravi eum ingentibus donis, & ingratum juvenem ad partem lecti recepi, in his locis, in quibus olim Cæsar maluit occupare Imperium Mundi, quam relinquere. Nemo dixerit deformem rosam quia colorem suum induerit à cruore insidiosæ matris Cupidinis, sic neque vituperaverit puerorum amorem quod ubique fœminæ sint. Nam neque corrumpit amabilem puerorum formam usus, neque illud exoticum scelus vitiat duras Naturæ leges quæ ultra Græciam utramque masculum cupidinem truculenter fugavere.

Perit Gratiarum pulchritudo quando Vulcanus atra fuligine obsitus ministras imperitantis sibi Veneris quærit ad amplexum, & nihil est quod homines magis à beneficiis deterreat quam ingratus accipientis animus. Plures hic turbo de sub-

limitate

limitate Fortunæ discussit, quam ignavia, aut ignorantia. Non cessavi tamen immerentem amore simul & munere prosequi, prætia voluptatis externæ, quæ raro Eleutherianis nisi per insolentiam & crimen placet. Vt vero me Gephyrius pallio coccineo donavit, Flaminemque fecit Dialem: quæstuosissima quæque sacerdotia in Philoceni linum congeffi, quorum redditibus insolens inter nobiliores regni in laude & gloria vivit; cum apud eos divitiæ inter potentiam & virtutes numerentur. Deridet tamen alumnus infelix liberalitatem meam, præscriptosque ambitioni suæ fines superbissima temeritate contemnit. Petitque hanc purpuram (quæ de Regum imperiis disceptat) in auctiorem & licitationem subterni. Vt hoc ultimo beneficio saginatus nomen meum traducat ad infamiam, & celeberrimam authoritatem per confragosa paupertatis præcipitia ad exemplum innocentis Hippolyti raceret.

Nullæ nubes exasperaverant splendorem speculi, & constans loquentis imago quidquid postremus dixerat demonstrabat à Veritate comprobari. Sed jam juraverat Philocenus in benefactoris obsequium, fidemque: exhortatione mea adductus ad aliquam rei familiaris curam, vitaturus deinceps prodigalitatis scopulos, ad quos plures juvenes impingunt quam cadaverosi senes in avaritiam.

Tum vero movit obstantem turbam validis pulsibus Acignius, & corpus inter frequentiam audientium impeditum velut è vinculis expediens celerrimo cursu sese intulit in os spelancæ, proculdubio præda insequentis militis horrendæ proceritatis, & qui pannucius totus nihil magis ostendebat præter ossa extuberantia quam gladium quem obducta ad crudelitatem fronte intentabat in Acignii latus, nisi rusticus æque laceris vestibus percussus fuisse militem ad aliam pugnam revocasset: qui novam cædem videbatur factururus, nisi astantes respexissent ad pacem, &

impetus furiosorum repressissent : Non aliter æris sonus incitatos venantium clamore canes à morſu feræ reducens , ſævire eos ultra latratum non finit. Prior temperavit ab ira ruſticus, & candida fame labra ad hanc querelam deduxit.

Vt in corpore invalidum membrum continuis fluxibus debilitatur, & in lacunam omnia purgamenta peſtiferæ domus ingeruntur : ſic nos quaſi ſentinae & debilia regni membra contagione & morbis civilibus atterimur ; mortuum mare ſterile ſibi ! undas nobis inutiles ſummittimus alienis navibus , & ambitionem magnatum augemus noſtra ruina. Vetat hyems prominere herbeſcentes ſegetes , aut obterit eas ingrata glacie, aut immoderatis imbribus annuo naufragio mergit. Gemmas quas in vitibus benigno flatu excitavit Zephyrus, naſcentes urit Aquilo, vel adultas grando proſternit. Spes omnes noſtras aut rubigo vitiat, aut Syrius conſumit, aut venti prote-runt, aut lues tabida corrupto cœli tractu enecat. Vt in domo vetere omnes lapides excidium minantur, & amnium cunctorum curſus ad Oceanum : ſic nos innumeris malis affligunt mutationes temporum, & hominum ad aliena ingluvies cœli injuriis major. Pro crimine omni paupertas nondum ſatis extrema. Præter tributa & decimas quas injurii domini pro reditu habent, damnamur ad inſolitas operas, & ad culturam alienæ glebæ inviti deducimur. Dum ſquallent pauca agrorum jugera, antiquum patrimonium, quod nondum omne perdiderunt avaritiæ pacis, & licentia belli. Sic nos miſere ſervientium animæ ignobili morte deficimus, nec aliud effuſi toties ſudoris, ſanguinisque pretium expectamus, quam virgas, ſecures, cataſtas, cruces, & alia pro minorum ingeniis ſupplicia, quæ humana malignitas inferioribus intrivit.

Accedunt damnosa fœnora, quæ pecuniæ cumulandæ cauſa intulit ingeniſa nimium & ſollers in ſplendorem ſuum ambitio, quorum fœturis citius otioſi in civitatibus diſceſcunt, etiam  
his quos

his quos cupido gloriæ, aut utilitas mercium ultra Herculis columnas advectarum rapuit ad aliquam fortunam :

*Hec usura vorax avidumque in tempora fœnus.*

Post hæc, inæquali sorte exactiões crescunt, modo per capita, modo pro censu inferuntur, inveteratum malum, & quod in singulos dies fit robustius, dum speciosis nominibus venena ista teguntur, quibus minus vetus imperii ærarium quam paucorum qui male sub regibus regnant polluantur arcæ : qui falsis titulis suam crudelitatem avaritiam, rapinas ; remedia, subsidia, vectigalia, & erogationes vocant : nota publicarum cladum nomina. Hinc fit, ut princeps pecuniis destitutus sine autoritate restet, quæ nunquam bene servatur, si desint Virtuti suapræmia, & militibus ex laboribus spes. Aurum enim in Republica idem est quod in humano corpore vitalis spiritus, quo cum sanguine egesto membra omnia in mortem patent. Tot in exercitu millia sub paupertate laborantia onus sunt & prædæ. Tum demum ærarium incuria & prodigalitate exhaustum per scelera supplendum est. Empti milites instabili in imperantes fide, ubi stipendiis fraudantur, feruntur in furorem : & si qui denique probi sint, illos contagione sua ad insaniam rapiunt. Nostra bona, quasi hostile spoliū, venumdantur. Fœlices qui gustavere tot mala, nondum autem fœcem omnem ebibere. Omnia sunt in bellis civilibus misera, sed nihil est miserius quam bene partis non posse frui. Gemunt percussi securi boves, & inexpletos diurno labore novalium sulcos implent cruore suo. Pelluntur oves à pastu, & nusquam reddituris vestibus exuuntur jugulatæ. Relinquunt sub ipsis caulis dulces animas nutrices pauperis familiæ vaccæ, & ab uberibus suis lac extremum suffundunt. Cuncta deniq; velut pulcritudo floris matutini uno momento vaneſcunt, & nihil miserorum oculis superest ultra cinerem & favillas.



*Quid non mortalia pectora cogis  
 Auri sacra fames, & amor sceleratus habendi?  
 Non tantum segetes alimenta que mitia poscunt  
 Ad jugulum gladiis, scrutantur viscera terra,  
 Quasque recondidimus, St ygiiisque admoimus umbris,  
 Effodiuntur opes, irritamenta malorum.*

Nec iste miles tot damnis meis satiatus peper-  
 cit liberis: temperavit quidem à mucrone, sed  
 tam improba humanitate ut spiritum adempto  
 victu lento effugio tenuatum pejus solverent  
 quam si eos ensis dedisset neci, Diis infernalibus  
 votum. Vtinam tam in potestate mea esset acce-  
 ptarum cladium oblivisci, quam tacere! vel si  
 negaret recens dolor silentium, vita me infelix  
 cum voce nihil profectura relinqueret! Similes  
 sumus serpentibus quorum morsus torpent sub  
 frigore; nos nostra imbecillitas arcet à nocendo,  
 & nunquam nisi cum anima exertum aculeum  
 relinquimus, quem aliena injuria in sui ultionem  
 expressit.

Ad hæc miles. Quod, inquit, in oculo primum  
 mobile, hoc apud nos Acignius civilium motuum  
 causa omnis & origo. Alii istius agitatione insa-  
 niunt, hic sua: nunquam cessaturus nisi Eleuthe-  
 riam in ditionem Lippii miserit. Etiam in su-  
 du pacis grassatur inimicus ignis varia face, quæ  
 flammæ suas in plures species mutat, & multiva-  
 go fulgore coruscans pro tempore colorem induit  
 & cum tempore deponit. Iactamur interim civi-  
 lium bellorum tempestatibus, & ut in irato ma-  
 ri sit, diversis flatibus turbarum seditionumque,  
 quæ prudentibus eo apertius videntur, quo te-  
 guntur secretius. Neque enim moveri potest &  
 contundi hoc imperium, nisi ante cives cum ci-  
 vibus concertarint, & sic defessi ac exsangues in-  
 hiantibus Iberis tradantur. Relinquo annorum  
 præteritorum tristia monimenta, hoc luctuo-  
 sissimo exemplo contentus quod me ad pauper-  
 tatem duxit per eandem viam qua reliqui re-  
 gni nobiles ad certissimum exitium inconsulto  
 præcipitantur. Quid aliud Retarius ad Gephy-  
 rium

rium missus legatione sua peregit, quam ut invicem bellaremus? Quid aliud Acignius cum Geryone, quam ut Eleutheria gignendis inimicitis per se nimium fœcunda ignotæ potentia subderetur? Pudet referre aviditatem innocue prædantis ad quam nauseant etiam hi qui ignominiam consumpserunt. Hoc, quodcunque est, Acignius fecit; siue ille Geryonem ad odium vocare voluit, & Liphippum ad regnum: siue male quæsitæ potestatis fautor, maluit Eleutherianos perdere, quam servare. Verum est, aguntur bella istius ductu, & nondum tamen infamia pessimi excidii cessit in authorem. Per hunc, Geryon regnat; per hunc Geryonis parentes affinesque assequuntur periculorum præmia etiamsi periculis non affuerint. At reliqui magis inopia quam laboribus fessi in scelera ruunt, cumque videant interclusum sibi ad honores & divitias iter, credunt innocentibus aliquando licere nocentes esse. Hinc seditio, libido, sævitia, & quidquid privati hominis nomen supra principem elatum contumacibus in gloriam animis immittit; impatientes obsequii ubi eum imperare vident quem ad servitium & dedecus natura genuerat. Ab eo fonte ira & questus, & postquam non subvenitur, quisque sibi remedium quærit à licentia, ad quam facile ducuntur juvenes quos penuria à virtutibus sejunxit. Eos amici pariter & inimici per colonias, municipia, urbesque, atque oppida dispersos nunquam tuto excipiunt: spoliant, rapiunt, non sacro, non prophano abstinere: feruntur in omne nefas, cunctis obnoxii. Non enim habet legem necessitas, & jejunos stomachus, & corpus petatum sæpius telis, quod pestilentia & fames citius hoste corrumpit. Hæc si me (ô Alitophile) ab accusatione rustici non liberant; si nocens est, qui non sponte est nocens; si paupertati frænos imponitis quicumque aut auditores hic adstatis aut judices; si auxilia vitæ miseris militibus erepta, etiam merentibus denegatis; si vobis ignotum est,

*Quid cade calentibus armis,*

*Quantum ira liceat, motusque quid audeat ensis,*

*Si vobis sceleris tanta est injuria nostri :*

*Mergite me fluctu, vel si suprema recusant*

*Fata moras, juvat hoc scrutari viscera ferro.*

Demiserat interram capulum, compositamque  
aciem gladii ad pectus tentabat, cum sic orsus est  
Acignius.

Quotquot orbis terrarum reges tenet, hos omnes  
Gephyrio subdidit religio, & fortuna in il-  
lius imperium obstinata. Metus, & terror & se-  
veritas, vincula sunt authoritatis, quam in om-  
nes principes sparsam dudum agnovimus, exuta  
libertate, & adempto per inquisitiones loquendi  
audiendique commercio. Sic paulatim refracto  
pudoris claustro in populorum animos irrepsit  
adoratio Gephyrii, & eos in Imperatores arma-  
vit quibus audacia fuit recusare servitutem. Data  
deinde imperia, & immutato ordine naturæ Ge-  
phyriani ad externa sceptrata vocati: inter quos  
etiam vetere instituto delectus fuit. Ut enim a-  
quila pullorum generositatem experitur ad ra-  
dios Solis: sic Gephyrius principes, prolem suam,  
si ad lumen religionis male fideli oculo con-  
ni-veant, præcipitat è Solio regali, veluti adulteri-  
nos & degeneres. Vnde fit, ut ille plerunque in  
primogeniti jura succedat, cui reverentia major  
& constans in patrem obsequium. Et jamdiu est,  
à quo minorem natu Liphippum fratribus præ-  
posuit. Frangit nimirum naturæ leges paternus  
amor quem gratia filii, & pietas, & probi mores  
fecere. Eateor, vehemens olim fuit in Eleuther-  
iam Gephyrii affectus: sed ut solent mobiles es-  
se hominum voluntates, illius inclinatio in Li-  
phippum cessit: pro quo laboramus, ut fractis  
per bella civilia Eleutherianis, irrumpat in floren-  
tissimum regnum Europæ caput. & si sorti pla-  
ceat post paulo umbilicus Ibericæ dominationis.  
Nec iste miles & rusticus quod querantur, ha-  
bent, tot actos labores, tot damna passa: quos pro  
religione bellantes æternitas excipiet, & certissi-  
ma feli-

ma felicitas, quæ tantum illis patet, quos ad utilitatem Lippii, & Gephyrii nomen mors funerata est. Non sustinuit insolentiam Daphnis, sed Acignii intempestive mentientis vultum excussissima palma percussit: justisque injuriis incitatus, in alias quoque corporis partes sæviisset, nisi Acignius relicto inter manus verberantis pallio, per mediam turbam fugere cœpisset. Neque diu moratus Daphnis relictum pallium in militis faciem misit, hostile spoliū. Sed & hic, ut justam rustici litigantis querelam leniret, abstinuit Acignii pallio, & reliquis permisit judicium.

Tunc Botris pro præcone agens, si qui, inquit, restant litigatores, hos universos & singulos ad hoc tribunal sisto. Nec mora vir quadragenarius ut apparebat, paululum semotus à turba, ejulans, ac dilanians impexos crines, ut ante me stetit, in hunc fere modum declamavit.

Quod adhuc spiro & vivo, fecit mendacium: quod hodie vobiscum morigestiam, Veritas faciet. Intus est accusator qui me ad tribunal vestrum traxit. Lancinat me conscientia mea, & internas lites movens, petit à justitia vestra supplicium dignum criminibus meis. Cruentus ensis jã super impia cervice pendet. Omnia lacera sunt, perditæ omnia, si semel semoverimus probitatem, & ab horrore imminentis necis subtraxerimus corpus alias pro Veritate moriturum. Neque ego à benignitate vestra licentiam dicendi deponcam. Licet enim magnitudo rei grandia verba detrahat, quibus deberem loqui, ipsa tamen historiarum novitate securus, judicio meo demerebor silentium.

Nondum Clodovæus Typhone percussio exuerat servitutem: nondum imperium Protagonis receperat: & jam tamen nuptiæ, jam prolis spes, & omnia futuræ regni felicitàti accommoda: Circenses ludi, scenicæ artes, & loquaciæ per lationes & mutos motus tripudia. Inter quæ nobiliores Eleutherianorum equis invecti Sybariticam saltationem explicuere. Intentæ sublimioribus

palatii tectis nubes spatiosam aream tegebant :  
 Pone fenestram è qua spectabat cum conjuge sua  
 Clodovæus theatrum vacuum erat. Ac p̄fimo si-  
 mulata fulmina cum strido re è ceraunoscopio ex-  
 cussa : mox disjectæ nubes loco siderum varia  
 lumina aperuere. E summo deinde perjactu ver-  
 satiles machinæ descendentes Venerem cum Cu-  
 pidine suo, Gratiisque, Polhymnia, ac Pallade,  
 vacuo hætenus theatro tradidere. Nec mora a-  
 cido cantu cœlestis turba hoc versu regni numi-  
 na salutavit.

*Nos vestro famula iugo  
 Orbis quidquid habet congerimus Dea,  
 Et palmis tegimus thorum,  
 Quem non tempus edax destruet, aut sequens  
 Ætas. Iam veniet cohors  
 Multa gente gravis, fertilibus comis  
 Excussura ferociam :  
 Qui Syrtes Libycas, qui Tanaim colunt,  
 Aut tigrim rapidum bibunt :  
 Parthique, atque Arabes, Æthiopes quoque,  
 Et Pœni fragili fide.  
 Hos nunc vestra vocat copula, non mala  
 Vestris abstrahet imperis  
 Sortis lydibrium, non necis impetus.*

Sequutus est cautionis dulcedinem tubarum  
 streperus clangor, & in hippodromum cum equi-  
 tibus suis educti equi, revocantibus interim Par-  
 cis cantatrices Deas in suum theologium. Hinc  
 Assyrius eques compositus in majestatem equum  
 suum ad concordiam præcinentium tubarum re-  
 gebat. Proxime laxatis frenis in speciem pugnae,  
 volitabant Maurus, Medus, Parthus, Arabs. Non  
 deerat equiti Persico quem Tolmites, non Ibe-  
 ro quem Ajax, non Germano quem Enebre-  
 vus repræsentabant, gentilitius tumor; Scythæ  
 veloci actu percurrerebat omnem aream. Tardum  
 Suevus ititabat. Lasciviebat Gaditanus. Convo-  
 labat Syrus cum Turca. Finiebant agmen Græ-  
 cus, Thrax, Polonus atque Italus: omnes ad  
 eundem concentum momentumque diversis iti-  
 neribus

neribus ad varias figuras revertentes, tam facili equorum recurſu, ut putares univerſos agi ab eodem rectore. Diverſas quippe ſingulorum actiones, motuſque, ſub iſdem indicationibus ultimus numerus terminabat.

*Iamque humiles, jamque elati ſublime videntur  
Aera per vacuum ferri, atque aſſurgere in auras :  
Nec mora, nec requies. At ſulva nimbus arena  
Tollitur, humeſcunt ſpumis, flatuque ſequentum :  
Tantus amor laudum, tanta eſt victoria cura.*

Tandem ad carceres ſuos revocati glomeratis greſſibus equi, documentum ſpectantibus præbuere, generoſum animal ideo ſocium hominis nominari, quod polleat ratione, Martis ſimul, & Muſarum cupitor.

Hic finis ſaltationis Sybariticæ præbuit initium proditionis in Enebrevo ; non aliter quam peſtilens ventus civitatis minatur deſolationem ubi ab exciſione unius familiæ funeſtus incepit. Singuli eadem perſona in qua ſaltaverant ſuas domos petiere, uno Ajace excepto, qui audito lucis propinquantis gallicinio in proximo angiportu quo reliqui noctis duceret elegit Timandræ domicilium. Erat illa nationis Iberæ, tam commendato ſermone ut ſpecioſiſſimam etiam formam extingueret mirabilis facundia : neque uxor erat Ajaci, nam & Monafonis ſoror quam juſtis nuptiis ſibi junxerat nuper reliquerat vitam. Ut Enebrevus cui ſola Ajacis gloria ad honores obſtabat hominem contrarium fortunæ ſuæ vidit tenſis dudum retibus implicatum, ad palatium recurrit, monetque regis oculum, (ſic ille vocabatur qui ſtipatoribus corporis regii imperabat) infidum Ajacem eo cultu, quo Liphippi cultores uterentur, Timandram nocte intempeſta petiſſe ; proculdubio infidias ab utroque in Clodovæum ſtrui, nec aliud agi in tam ſcelerato colloquio, niſi ut Gallia Iberis in prædam caderet. Statim viri fortes qui pervigili cuſtodia fores palatii ſervabant, irrumpunt in Timandræ domum, divellunt clauſtra, & reſiſtentem inſultantibus  
Ajacem

Ajacem vario vulnere confodiunt. Includitur robori Timandra, & illi robusti latrones postquam ædium omnium secreta vestigavere ruptisque vestibus in quibus saltaverat, imaginem Liphippi inter thoracis futuras inveniunt, in ea parte, quam si viveret, concuteret cordis spirantis subsultus. Sed neque existebant qui Ajacis fidem labefactam, corruptumve ad scelus pecuniis animum dicerent. Vnum illud mortuo obiciebatur, familiaritatem cum Timandrar imaginem Liphippi intra vestes inventam, & quod inter tot larvatos Iberico habitu visus esset in celeberrima saltatione. Cuncta, si abfuisset invidia, vix digna levi castigatione. Sed Enedrevus Typhonis gratia subnixus singula in deterius vertebat. Hinc inscio Clodovæo faucibus obliis Timandra cum Ajacis cadavere deturbata in gemonias.

At Tolmites Monasonis frater exasperatus supplicio profratris, & imminentis exitii intelligens si negligeret bonam mortem, juravit se omnia potius toleraturum quam se summittere per execranda facinora quæsitæ Enedrevo felicitati. Potuisse cum per oscula & complexus insidias suas tegere, jampridem aulica consuetudine exercitum celare odium fallacibus blanditiis. Ajacem pridie quam necaretur cœnasse apud Enedrevum, post cœnam induisse Ibericas vestes, quibus per famulos suos Liphippi imaginem insuere potuit Enedrevus. Hactenus infractam fuisse Ajaci erga principem suum fidem, in eo virtutum & ingenuarum artium perfectam fuisse collectionem, inque cultas urbium insidias, incultarum villarum intaminatus affectus, & ingenium ad bonum natum. Semper aliquid habere ex iniquo omnem necem justam aut perpetrata de nocte, sine legibus, sine defensione. Neque jam dubium erat Enedrevi fraude interemptum Ajacem. Itaq; Tolmites spem in virtute sua ponens, & salutem in victoria, jubet me appellare Enedrevum ad singulare certamen. Assistebat ei Tarsias, quidudum Typhonis voluntatem beneficio quælierat; hic casum



casum eundem cum Enedrevo poposcit, deformi humanitatis jure, quod nos vitæ commodis junctos, ad idem genus mortis vocat. Ridebat uterque periculum ad quod ducebatur. Sed neque Enedrevus naturam suam exuerat, comiextrinsecus ingenio, & eo etiam jactantius generosiorē quo facilius tegeter novæ fraudis destinationem. Ac primo Tolmitis quasi amici dextram complexatus, juravit se puris manibus ad invisum certamen accedere, malle tamen fontem existimari quam supplicem. Experiretur, si vellet, innocentiam loquentis; recepturum se arma in tutelam fidei suæ quoties provocanti placeret. Tum securior de facilitate credentis, addit amplexum, quo impeditus Tolmites certius caderet: quippe clam educto pugione Tolmitis transadigit latus, nihil ejusmodi in tanta ostentatione amicitiae metuentis. Nec ille mortali vulnere accepto sine vindicta cecidit: irruit in Enedrevum, fortique iñtū ensem evaginatū perfido pectori condidit. Statim expressere spiritum, & simul inter homines agere desierunt.

Ecce, dum in auxilium Tolmitis convolo, insequitur Tarsias, & à tergo incautum transverberat. Solutæ venæ egressere maximam partem vitalis spiritus, & nisi hyems frigida coagulasset per profundum patorem erumpentem sanguinem, paricum Tolmite exitu lethæos tentassem fluctus, & Cerberi latratus audivissem.

*Sic cochlea contis*

*Torta retorta gemens tardantia vina repellit  
Qua capiant laxo pendentia vimina labro,  
Fit fluvius rubei laticis, quem lenta refundunt  
Torcula supposito lacni: stagnantia donec  
Munera Divorum desertis uva racemis  
Comprimat, oppositu molis qua mollius altas  
Vimen agit rimas, quo Bacchi defluat imber.*

Hic fortuitus casus pro medicina corporis fuit, & membrorum omnium ignavus torpor animi solatium. Tandem velut somno excitatus intelligo me Tulliano clausum. Dum vulnera mea obligata,

gata, dum carcerem miror, dum surdis parietibus insidias Enedrevi detego, dum me indicio sceleris relictum conqueror, proxima grabatulo in quo jacebam januatenui stridore referatur. Intravit in cubiculū miles ignotus, & adducta poste, pef-  
sulisque firmata, silentium in hæc verba rupit.

• Via unica est, Pinotidi, qua effugere potes alioquin inevitabile supplicium. Semper leges in duellatores armavere se atroci sævitia, sed illis nunc edicto Clodovæi exasperatis metuentior metus, cūctaque, & cruce mors violentior. Ut umbræ terminus lucis est initium, sic timoris excussio, libertatis. Nusquam bene liber est, qui robore tenetur. Aude aliquid animo tuo dignum, & spiritu meis monitibus excitato, subtrahe te à forcipibus jam capiti tuo imminentis Proserpinæ, & à Charontis cimba refer pedem. Certum est, fatales Parcæ undequaque imminet, sed fugienda est crudelitas, & tortor, & rota. Valet etiam apud posteros memoria honesti exitus, at omnis poena manu carnificis publico spectaculo inflicta, semper aliquid habet ab ignominia. Neque me tibi implacabilem faciat quod Tarsiae amicus sim: causa vestra separari non potest. cum in eadem nave tentetis acroceraunia, eadem vos Scylla, eadem Carybdis aut absorbebit, aut evomet. Quis in judicio innoceniam Tolmitis ab Enedrevi fraude sejunget? Quis Tarsiam percussorem dicet, absoluto Pinotidio? Veritas in judiciis nunquam nisi testibus quæritur; reliqua vana & reo nusquam profutura, maxime ubi generosioribus etiam exitium jus præscribit. Nemo miser mentiri recusabit, cui ex mendacio supererit spes. Hoc unicum iter est quod te ad salutem ducit. Finge ergo, male præviso Enedrevi & Tolmitis certamine accurrisse te, animos exulceratos ad amicitiam reducturus; cæterum, malo tuo fato invenisse in netem furentes, adeo ut te amicorum vulnera impedire volentem demerso per costas gladio capulo tenus prosternerent. Excipiet loquentem Tarsias, jurabitque

rabitque visa sibi fuisse terna cadavera, cum in eum locum venisset quo duellum inter Tolmitem & Enedrevum rumor popularis vulgaverat: nec potuisse uti animo suo ad amborum concordiam quando conatus suos antevertisset fatum, utroque jam mortalitate exuto. Cui judici videberis falsa dicere, verisimilia proferendo? eritne aliquis damnaturus jactatam amicitiam? quænam tam efferae leges invenientur quæ supplicium bonis civibus inferant? nimirum paribus tu qui mortem contemplisti ne alii perirent. Iam libertas in arduo montis supercilio attollit signa, claroque tubæ sono ad osculum suum te vocat, I, erige te: & horrore carceris mortisque fugato restitue te tibi, & in spem melioris vitæ utili mendacio marcentem animum demulceto.

His dictis, reliquit cubiculum, & me sititorem liberatis in suas rationes traxit, quibus mitigati iudices, me, Tarsiamque, per eandem mendacii januam incolumes dimisere.

Statim ab ipsa Pinotidii querela ignari Acignii irarum multa militum manu cingimur, quam offensus ducebat Acignius per licarios Geryonis vindicaturus injuriam suam. Undique stricti gladii comminabantur mortem. Cesserat omnis miseratio indignationi, & nihil inter tot imminentes necescitius ad salutem fuga. Primi omnium clientes manifestis ictibus attriti suo damno sensere quantis periculis Veritas quæreretur. Mox explicata latius pestis in socios meos grassata est varia clade. Quippe hostilium amorum diversitas diversum vulnus fecerat. Talis in Pirithoi nuptiis pugna fuit, ubi non una nece centauri cecidere. Et jam nescio quis immensi corporis miles vitam meam elato mucrone pretium sceleris sui petebat: Deus, profecto Deus, divertit ictum & nondum Veritatis aris debitam victimam ad novissimum sacrificium servavit.

Commodum Acignii crudelitatem aliquantum evaseram, solus: nisi quod timor, & pallor, & trepidatio, & in fatigato per ardua montium  
& lu-

& lubrica vallium corpore horror necis, nondum deferuerant fugientem. Defecerat membrorum robur, & cespes in ignotis agris ad lassitudinis solatium pone fluvium thorum fecerat. Assurgebant humili fastigio ad dextram colles in quibus generosissimis vinetis Bacchus triumphabat. Quæ campus æquior, flavescebat messe spississima Ceres: eo formosior, quoniam à pluribus annis jejunium posuerat quod olim indixerat raptus Proserpinæ. Neque minore cultu fonticulos dulces manantes sequebatur Flora, quæ florida veste in suavissimam sessionem nymphas invitabat.

Lucebat tertius post fugam meam vesper, & ut alter Hercules pluribus catenis attonitum facundia populû, sic ille præcoci lumine sequentia sidera trahebat. Nec jam instabili face fulgebat Luna; coierant in orbem suum cornua, & sine nubibus in speciem dubiæ lucis coruscabat. Neque somnus dulcedine soporis inquietas palpebras gravabat, sed eas ventorum susurri, & foliorum motus ad perpetuas excubias aperiebat. Dum ausculto si quid solitudinem loquacitate sua frangeret, & arrectis auribus ad omnem strepitum vigilo: proximus sonus pavidam mentem confudit. Donec inter virgulta enituit virgo, tam facili cursu, ut aut Camillam, aut Peneiam, aut Atalanta velocitate superaret. Insequebatur festinantem piscator in senilem ætatem jam vergens, qui labore anhelò lassitudinem poplitum ad victoriam corripiebat. Vt me aspexit: Ne, inquit, quisquis es, mendacem foeminam sine pœna permittas elabi, quæ datam fidem ideo violavit, ut & sibi libertatem profligandi pudoris faceret, & misero mihi moriendi necessitatem indiceret. Remisit illa de celeritate sua: &, Si, ait, huic placeat de causa nostra cognoscere, extra invidiam crimenque nomen meum ponam, & validis rationibus promissum meum liberabo. Cum annuissem de patientia mea, collegit altius spiritum, & mox verecundos gestus in hæc verba composuit.

Ratum erat in litem nostram Monasone pro  
 judice accipere, aut alium quemlibet ad antrum  
 Veritatis populis responsa dantem. Sed illi qui  
 inter solitudinem sapientiam quærebant, per Ac-  
 ignii potentiam in excidium petiti, & plerique eo-  
 rum semineces, fracti alii, fugatique festinatione  
 victoriæ relictæ.

Geryon Albam obsederat; Albanique per ex-  
 ploratores acceperant, partem exercitus ad vin-  
 dicandam Acignii injuriam deseruisse castra. Eru-  
 pere omnes per obsessæ urbis portas, & incautos  
 hostes trucidavere, onustique præda redierunt  
 victores in urbem suam. Iratus Acignio Geryon  
 quod milites sine imperio suo de vallo & aggere  
 traxisset, putavit eum acceptæ cladis causam, &  
 insolentem hominem, qui de fortuna sua tantum  
 licentiam usurpabat, jussit à vultu suo secedere.

Videbatur oppressa Veritas sub Acignii autho-  
 ritatem, resumptura vires, & desideratam tan-  
 diu pacem oculis amabilibus prospectura. Sed ob-  
 stitit Geryonis furor, cujus sævitia veluti pro-  
 cella concussi Veritatis sectatores qui Acignianam  
 feritatem effugerant, sub vinculis habentur. Ista  
 bonum hunc piscatorem ad impatientiam obliga-  
 vere, qui petiturus erat à Veritatis judice, aut  
 mortem suam, aut nuptias meas. Cæterum plerique  
 Deorum etiam extra cælum suum regnant, ne-  
 que omnes qui verum amant sacrariis Deæ reti-  
 nentur. Patet omnibus coruscans numen, & si  
 quando aliquid distulit, tandem cumulate repo-  
 nit. Quandoquidem autem te diva illa (quæ lar-  
 vales impetus & mendacia comprimit) sortis suf-  
 fragiis selegit arbitrum causæ nostræ, permitte  
 narrationi meæ tuas aures, pro qua laboraturus  
 sum ne non placeat.

Hominem me natura creavit, ejus sanguinis,  
 quem si vellet renasci Iupiter Saturni antiquitati  
 præponeret. Sed nemo ab omni parte foelix de  
 cunis suis surgit; insipientia fortunam antever-  
 tit, aut sequitur: & nisi ista sint, quoniam nul-  
 lum præcoquum durabile est, cito virtutum se-  
 mina

minacrescunt, & nunquā perveniunt ad frugem nisi per injurias aëris & hominum invidiam.

Hoc, & ætatis simul paritas Clodovæo me junxit. Enimvero nullus inter ambitiosos & invidos bene quiescit. Et quia principum amicitia lente augescunt, subito extinguuntur, ubi insusurrare inimici in regis aurem, ut adolescentis admonitus contemneret, statim regno depellor & avidis imperandi successoribus juvenem principem relinquo. Diu per Italiam exilium meum circumtuli, per Tuscum tandem, Siculumque mare, de vectus Melitam (quam perpetuum bellum supra omnes Europæ insulas evexit ad famam) ibi primæ militiæ stipendia sub Apolide merui. Dein auspicio facto, votisque in littore Neptuno reduci solutis, armati ingredimur navem, numeroque potiores hostes primo congressu foelici temeritate superamus. Non durat ad extremum fors faventior, immutat vultus, & maligno aspectu terret, quos celeri gradu ad læta promovit. Aurum & gemmas ad ima viscera telluris fæx obducit, & nunquam bene fulgent nisi istas & illud ignis examinaverit. Inhorruit æquor, adverso flatu verberati fluctus impediunt remos: nunc velut è scopulo pendemus, nunc reductis undis arenam pulsamus, & ipsa Tartara trepidi intuemur. Donec diu per Acroceraunia jactatos ad Locrorum terram impulere venti. Iam ratis laxatis compagibus aperuerat costas, & per plures rimas acceperat mare. Cum Apolis imperterritus Tyndaridas in tempestate ostendit, tempestitiva oratione animos suorum militum ad tranquillitatem reducens.

Scitis (inquit) non aliis hostiis placari Phæsiū Apollinem, qui hic pietate cæca colitur, quam humanis: & his masculis quos aut fortuna belli, aut ventorum iræ permiserunt Locris. Tantum externæ fœminæ in oraculi fidem servantur, quod ab amplexu Locrorum regis & alienigenæ muliere dudum prædixit nasciturum principem, sedem imperii orbis terrarum aut Ocean-

then aut Argon Eupaleam facturum. In eam spem ab omnibus universi partibus conquiruntur puellæ & matronæ expectatam sobolem daturæ. Quærendum est effugium quo Cyclosum carnificinas, & Phorbantis implacabilem sævitiam vitemus. Certum est; videbimus Tænarum, & vitæ infelices antearas Apollinis sine vindicta jugulabimur, si recusetis consilium cujus salubritas non aliter quam per exitum comprobari potest. Quotquot hic viros esse ostendit barba, induite illico mercatorum habitus, & fingite vos per sinum Crisseum in hanc oram sponte descendisse, ut speciosissimas formas per varia maris terræque pericula quæsitæ addiceretis emere volentibus. Nos, quorum vultibus tenerior ætas nondum virorum notam in se vit, mitellis colligabimus crines, annulis aures onerabimus, & varia mulierum veste ad exemplum servientis Herculis fortia evirabimus membra. Sic vostiulo negotiationis tuti ad mercatum cæteris expositis, mox vænumdatis, reparato navio invasitis iterum amicas terras, mox plurima nave selecto milite facta, reduces vindicabitis servitutem nostram, & periculo imminentis necis commilitones vestros præcoci celeritate & intrepida virtute liberabitis.

Simul raptim ad hanc simulationem immutato habitu, compositisque gestibus ad faciliorem propositi successum, pars impositam mercatorum personam mentita est, reliqui muliebrem lasciviam induimus. Tum vero invasere littus Locri, sciscitantes quod genus hominum & unde essemus. Cum asseverassent simulati mercatores sponte se in illorum plagas incidisse pretiosissimas merces sub hastam missuri, formas nimirum quibus liberi homines parerent: expediunt decepti hostes pretium servitutis ingratae & mecum Apolide aliisque imberbibus sociis (qui e mentito sexu foemineis vestibus delitescabant) emptoribus tradunt. Sic captivi Danaï in voto latentes stipabant equi Trojani recessus, ut per fraudem



dem finito decenni prælio aliquando Trojam caperent,

Iam nostri mercatores artis fallacis prospero eventu lætati, & pecunia satiati quæ nos servitio proscripserat, vela ventis dederant. Iam Locrorum regis hortis inclusi expectabamus commilitonum reversionem. Iam singuli custodum moliebamur gratiam, ut relaxatis claustris mutuo alloquio servitutis tædium possemus eludere: & si ita expediret, juvare nos consilio & ope reciproca.

Adventabat sacrificii dies quo Phæstio Apolline humano sanguine placato per sortes eligenda erat inter captivas fœminas quæ prostitutione sua parentaret oraculo. Quid debent expectare scelerati, ubi innocentes ducuntur etiam Deorum jussu ad pœnam? Intellego nihil magis obesse duraturæ fœlicitati, quam prudentia, aut castitas. Hoc argumento incidi in miserrimam conditionem, quæ me in proximam noctem de turba captivarum selegit contra naturam, ut masculus parturiret. Cæterum benignior ventus distulit recens propositum, & miseriarum pelago vagum ad humaniorem portum per varios anfractus deduxit.

Erat inter principes regni corporis mei custos Gnosius quidam, qui longa mecum assuetudine amorem hauserat, deceptus muliebri stola, & in omnem patientiam ad imperium meum contumax. Non passus est vocari me ad alienum complexum, & ut fugæ prospexit, præcipiti deliberatione quam libido faciebat ante ipsum Apollinem Locrorum regem molestum rivalem immobilavit: acceptoque fratre cum pretiosissimis sarcinis miserum me criminis sui præmium paratæ ad fugam navi reddidit. Scilicet plerique hominum irascuntur illis vitiis quibus suum sæpissime nomen maculant, & omnes præposterius motus nunquam bene sustinent alienum exemplum. Volunt soli peccare, quibus insolitum scelus pro gloria est, aut ipsa potentia, impunitas. Sic recedente paulatim

pausatim littore in altum componimur, incerti quo nos fata ferant, & ubi quietem ad colligendum spiritum promittant. Septimus Sol Dianam innumerabili siderum caterva comitatam relegabat Lathmon. Gnosius amoliri à se fratrem cogitabat, & sopitum somno de puppe in fluctus deicere; facilitate credendi, quæ zelotypo persuaserat eum qui amat ne fratrem quidem tuto sustinere posse. Cū diu per diversa maria jactati innotantē insulam prospeximus, nullis fundamentis tellurico hærentem, sed communibus radicibus avulsam, fluctuantemque, in modum Delus Latoniæ: Haud mora ingressis errantem terram, mira omnia provenere. Deposuit Gnosius cæcæ libidinis vulnus, & fraternum odium in amicitiam vertit. Neque ego illi amplius interni causa morbi, aut spes incolumitatis: momento scenilis flamma disparuit, & me non dominam, non Vindocinam, sed socium & Vindocinum cœpit appellare; ignotum illi hætenus nomen, & quod ultra natale meum meum solum sine reverentiâ est. Fecit idem & hic piscator, qui hodie me in thalamum poscit, & connubiales leges. Nam cum inter insulares pisciculos vimine inclusos, aut hamis dependulos, duceret in littus: occurrit stupentibus nobis, singulisque nostrum suis nominibus salutatis, agnovit hominem eum quem hodie nimium pertinaciter credulus in uxorem ambit. At enim nondum Lethæos fluctus potaverat, qui illi dudum mei sui que cognitionem subtraxere. Reddideramus salutem, & ille, miseratus stuporem nostrum, humanissime visa miracula, & quonam terrarum essemus exposuit.

Nondum, inquit, hæc Veritatis insula eruperat in mortalitatem quādo Saturnus incolebat terras. Homines Diis æquales ignorabant vitia, usque dum scæcundum malis vas male curiosus Epimetheus in humanam perniciem aperuisset. Tum demum mortalium contubernium dedignavere Virtutes, & paucis hominum secum raptis (quos nondum auri fulgor ad omnem pravitatis licentiam

obcæcaverat) separavere has terras à continente: quas in speciem ratis vagas incertis curfibus agunt venti, & undæ sub tantæ molis pondere laborantes. Hac nave, prudentissimi mortalium vitavere cataclysmum, cujus damna Deucalion cum sorore jactis post tergum lapidibus reparavit. Inde inter utramque sobolem mira disparitas, & dissimilitudo. Pars, incrementa saxorum prodigiosa pullulatione quotidie crescit in immensum, & nunquam nisi ad scelera movetur. At hi, quos Veritatis insula in probitatis semen nutrit, paucissimi numero, conservant aurei seculi gloriam, & nunquam nisi ad rectum suspirant. Tuti, sine legibus, quoniam sine scelere viventes æmulos patientiæ & constantiæ omnes accendunt, & hominum mentem ad perversa facile degenerantem suo exemplo ad rectum detorquent. Fit tamen aliquando ut longo discursu insularibus actis, vel morte diminutis, ad novum germen sponte sua insula ista cohæreat continenti, mox probis incolis exulta, recedat ab alieno agro, & antiquam navigationem interfuso mari repetat.

Ac primum impacta Pyreo continuo terrarum tractu occupavit Græciam: quo tempore celebres illi septem sapientes orbis miraculum credebantur. Hinc aquis restagnantibus oppressa pars Siciliæ, & Brutium solum à Trinacria divulsam. Post Socratem tandem & Platonem rediit Ionium mare, caviq; arenarum gurgites recepere fluctus, qui supernatantem Veritatis insulam quæsitis diu terris Latio stitere. Suscepit lassatam Tyberis, & vicini ponti spretis imperiis de perpetuo tributo aliquantulum remisit.

*plenas capit alveus oras.*

*Subsidunt lymphæ, colles exire videntur.*

*Surgit humus, crescunt loca decrescentibus undæ.*

Vivebant hoc seculo Curii, Fabriciiq; & nisi Iulius occupasset regnum, etiam Catone fatis functo, in celeberrima urbe permanisset Veritas, neque hodie distracta à Romanis sedibus vaga tellus,

lus, ageretur ad Neptuni libitum, & ventorum licentiam. Sed ubertas & affluentia antiquissimam civitatem totius orbis dominam enervaverunt, ubi maxime urbanitas fuit & eloquentia, sustinere mendacium: antea scurrarum vitium, quod postea Consulibus etiam in laudem & lucrum cessit, ubi Imperatores proborum studia adulantibus postposuerunt. Postremum delata qua Rhenus prorumpit in Oceanum, Gallicum littus subiit regnante Philippo Pulchro. Post paulo levitatem gentis exosa deseruit Belgas, & locum quo nuper adhæserat permisit incrementis liquidæ Amphitrites.

*Intremuit, motuque vias patefecit aquarum.*

Nunc quo se sistat, non habet, adeo nationes omnes ad verum nauseant. Hoc unico remedio reparatur, si inter profundum descendant in hanc insulam navigia, & onus suum fluitanti terræ committant.

Sed neque durat omnibus Veritatis amor. Animus à pueritia corruptus malis semper delectatur, & ad omnem virtutis splendorem expavet. Plerumque initiorum acerbitas delicata ingenia deterret. Alii, paupertatis tædio quæ hic religiosissime veneratur, steriles terras, & importunis senticetis horrentem insulam, ad commodiorem culturam relinquunt. Aliqui in tantum profecere, ut contra mundi illecebres audeant attollere oculos; sed non pertinaciter. Cedunt innatæ imbecillitatis vitiis, & dubio itinere inter bonum pravumque ducuntur, oppressis aliquantum affectibus, nondum tamen bene firmatis; ad perseverationem veri. Paucissimi à pravitate naturæ degenerant & temporariam quietem æternæ commutantes, per corporis incommoda animi tranquillitatem emunt, quibus est quædam paupertatis suavitas, & solitudinis solatium humanis negotiis non sollicitari. Isti excedentem ab orbe ingeniorum fertilitatem sustinent, & lento tepore non augent literarum nomen, sed conservant; mortē omnibus ab utero æqualem oblivio-

ne apud posteros, aut posthuma laude distinguentes. Soli omnium sine timore pœnæ sequuntur rectum, solis mortalium recondita quælibet patent: ut enim quisquis venit in hanc insulam perpetuus incola futurus, simul induit omnes scientias; & qui sint, quid velint, unde veniant qui hic rate devehuntur, certissimo norunt. Revelat nimirum Veritas cultoribus suis secretiora, ut non ex oculis, sed ex mente judicent.

Præter hæc quæ tunc narrabat piscator, notavimus insulares unum tantum Deum agnoscere; cultumque tanti numinis incorruptum nunquam ad statuas & inania simulacra translatum. Non ibi aræ, non templa, non sacrificia; abhorrent ab illis ceremoniis per quas superstitio animos hominum ad terrorem devincit. Orientem adorant Solem, & in illa luce authorem universi æterna sobole humanum genus propagantem. Vivunt aut vento chamæleontis in morem, aut herbis lethaliter amaris, quas tellus arida inter arenas & vepres emittit. Alii maris & aquarum vapore saturantur, tam pestifero halitu graves, ut ne Mephitis quidem foeditius oleat. Multis pabulo sunt scarabæi, fuci, cicadæ, formicæ, vermes, & alia scetilia. Plerique loligine, sepiis, polypis, ozena, locusta & aliis piscibus vescuntur, qui sanguine carentes, vel rara carne sunt, vel tenuitate pellis conspicui in modum crysalli translucent. Omnes, aut abstinencia solvit, aut sua mors trahit in tumulum. Summa macies renudat ossa, alimentique penuria quidquid de corpore deducit impendit in animi vigorem. Et quia maxime laudari merentur, nulli patientius reprehendi sustinent, neque mitius alienis criminibus irascuntur. Cunctis unica toga, & pileus unus: hunc & illam initiatorum exemplo nunquam deponunt, nam quod vetustas absorpsit centonibus resarciunt; velut olim Argon Æmoniam Athenienses, quam perpetua reparatione conservatam ter mille annos post Iasonem durasse historici tradunt.

Ibam per totam insulam lento gradu, & corpus jejuniis grave modo per arenarum deserta, nunc per squalentes littorum sinus circumferebam: cum intentum piscationi & scaphæ inhærentem implacabilis ventus distraxit in mare Fugerat à longe natans tellus, & nihil aliud in conspectu meo reliquerat fortuna præter cœlum & undas, & istum, qui nunc importunus litigator prisca solatia in injuriam vertit. Ecce! omnia alia timebam præter homines: cæterum plerumque initium calamitatis est securitas. Expedit se de fluctibus nova insula, visos intravimus recessus, & per flumen (quod ibi aquas suas æquori maritabat) devecti, in ripam secessimus. Ut vero bibit iste argenteas lymphas, oppressit eum ferrea oblivio, & in stupida ignorantia statim conquievit. Putares Cydni qui Ciliciam interfluit liquore diriguisse, si aut Alexander fuisset, aut rigore fluminis frigidum corpus summovisset spiritum. Contra vitalis calor crevit, & me (novo monstro turbatus) fœminam existimans populante altus flamma incaluit primo, mox junctis mala fide pectoribus si negligerem succurrere furori, videbatur ruiturus in mortem.

Terrebant me, solitudo loci, & sine rectore futilis cymba, si desperarem insanientem amato-rem. Promisi nuptias meas, modo resumeret vires, & me natalibus oris redderet. Hac conditione placuit piscatori matrimonium. Fecit quod promiserat. hodie fidem meam poscit, & à te cui data est causæ nostræ cognitio, inutilis stipulationis utilem expectat eventum, quem impossibilitas negat, & fiduciam delusi hominis in irritum transformat. Ardet nimirum mas in marem, & furiosum amorem desperatione auget, cui promissis meis Natura potentior, & cœlicolæ, qui facta impia detestantur, remedium recusant.

Finierat. Contra piscator respondit. Non esse omnino circuitu agendum, maxime in illis caulis in quibus veritas factò staret. Produceret adversarius partes quibus viri sumus, & ab oculis suis

quæreret sibi iudicium. Nec minus alter revelatis cruribus sexum suum aperuit, manumque dexteram ingenti femineum sarcina complevit. Hoc aspectu verberatus piscator in proximum gurgitem quem vicini fluvii rapidior impetus faciebat sese non tardatus immisit. Percussi recanderunt fluctus: discessere primo in exiguos orbes, deinde in latiores, qui post paulum evanescentes in planitiem fluentis aquæ soluti sunt. Exeruit postremo naufragum caput ab amne, qui repetitum circumactumque infestis vorticibus corpus sicco littori reddidit.

Promittebat domorum vicinitatem circumjacentium agrorum cultura ad proceritatem segum vinearumque luxurians. Humeris piscatorem imponimus, iter ad ostia fluvii carpentes; ac momento temporis in humilem ascendimus collem, è quo vimine obducta tecta prospicimus, tuguria agrestium quæ sequuta fluvii amœnitatem ripis insistebant, in monticulo sita, & clivo adeo fallente assurgentia, ut alias quam cum ascenderis, non sentias te ascendisse. Stabant ante fores mater & filia diurno penso fusos implentes, qui filo tenui de proximis calathis subinde ducebantur. Sed filia suum opus morabatur, intenta carmini quod suavissima voce canebat.

*Oschara qui placido cursu, crispantibus undis.*

*Volvis lapillos aureos:*

*Et dulci retinens defessam murmure Lunam*

*Ad litus invitas tuum.*

*Carpere seu malis somnos, seu cluno procaci*

*De nocte nymphas ducere*

*Ad numeros agili ferientes ter pede terram,*

*Hæc inter attriti gemunt*

*Per riguum nati gramen sub pondere flores*

*Quos undæ nymphis educat.*

*Venit & ad turbam satyrorum lata juvenus,*

*Meroque Silenus gravis.*

*Quique colit vineta jugis innata propinquis*

*Lyæus invecit cado.*

*Et succincta caput flava Trinactia melle,*

*Num*



*Nunc iuvit & me ponere*

*Quas Amor accendit duras in pectore curas*

*Molla sub alga littoris,*

*Quod ver perpetuum vestis florentibus herbis ?*

*Hem duco mecum numina,*

*Per quorum jurare faces arcusque severos,*

*Mortale formidat genus,*

*Cum videat non ferre pios sua vulnera Divos,*

*Si scire qua sint expetis,*

*Durus Amor, comitesque Dei, luctusque dolorque,*

*Hacturba lecto me trahens*

*Exeunt è somno, & secum mea gaudia desert,*

*Vrst medullas acriter,*

*Et flammæ animi repetitis ignibus anget.*

*Quid lentus expectas tuam*

*Si nunc fata sinunt Alitophile visere Chlorim,*

*Multum furem funderè*

*Quidquid habet rabidi flammarum in sanguine amoris*

*Laureque myrtum jungere ?*

Vt exposuimus piscatoris casum orantes extremam defuncto humanitatem, sexagenaria mulier minus polita quam sincera responsione animorum perturbationes fregit.

Raritas conciliat rebus admirationem ; sub oculis posita solemus negligere, pro incertis maria transmittimus, & in extremo orbe stultitum mentis, tum corporis ægrotationibus, quærimus remedia quæ Natura ante pedes posuit. Seu quod omnium rerum desideria languescunt ubi vicinitas & occasio utendi facilitatem fecere, seu quia differrimus videre quod quoties placuerit possumus. Permulta in solo nostro nata negligimus, quæ si portentosa servaret Ægyptus, aut Græcia miraculorum ferax, singula jamdudum lustrassemus, longinquorum nimium curiosi. Quid juvat currere per Ionium mare ut Amoris flammæ extinguere possis, premere Deucalionis exemplo Actæas aquas, & præcipitem se dare per sinum Ambracium, quem in similitudinem jacentis rotæ Leucates promontorium circumscripsit ? quid Anterotos numen agnoscere, & apud Eleorum

Gymna-

gymnasium sacrificare oblivioni? Melius Selemniqua præterlabentis Achajam fluvius iste ab amore liberat, & Cupidineis affectibus abstinenciam inducit, coërcetque suo frigore voluptuarios motus. Hoc docebit vos iste, qui mox cum somno relinquet antiquos ignes, ostendetque nondum se mortalium numero decidisse.

Vt flores relaxata hyme in tepore inchoantis Veris frangunt terram, & debili fastigio micant, postmodo calefacta humo vernant, surgunt, aperiuntur: Sic piscatoris pectus extolli primo coëpit, & spiritus alte conditus emergere, postea fortius egeri, pulsari salubri pulsu tempora, assurgere demum cadaver, & ut antea solebat, loqui: nisi quod omnia alia meminerat præter amorem, cujus flammæ inter nivales aquas venerabilis fluvii reliquerat.

Tacentibus nobis ad hoc miraculum, repetiit mulier quod omiserat. Et nihil magis, inquit, in Poëtis condemno, quam quod fabulis Naturæ providentiam tegunt, & occultas vires cuncta moventis ad inanes causas & ridicula facta referunt. Sic Selemnium in Argyræ formā æstuantem deformatum in flumen fabulantur quod Cupidineos ignes fugat. Sic Salmacidem oblaqueatam amore Hermaphroditi Cariæ fonti mollitiem dedisse. Anigrum induisse pestilentiam de cruore centaurorum quos Hercules interfecit. Clitorium abstemios facere de facto Melampi Amithaonis filii. Arethusam Alpei flammæ vitasse mergendo se in specum, ut per obscuros terræ meatus concavasque partes errando, insinuante se fluctu telluris angustis, adveheretur Ortygiam. Citius anhelos equos æquore Phœbus tingeret, quam Poëtarum figmenta super ejusmodi fluminibus dicto assequeretur. Fragilis & laboriosa mortalitas in Naturæ secreta raro pervadit, ideoque miracula putat illa quorum rationes causasque ignorat, & cum veritatem occupare non potest, recurrit ad fabulas.

Sic fractis publicorum ingeniorum aculeis hebetantur

betantur mortalium sensus, & cum ultra capacitatem suam inquirant, contra Naturam furente zelo torquentur. Ridet ejusmodi deliria sapiens, quæ pervicax superstitio & scrupulus innocens invenere. Aut enim veræ rationis scaturiginem novit, aut alium novisse existimans, ingenue fatendo inscitiam suam, non erubescit hæsitare ad abscondita. Habent omnia proprietates suas, & ab illo momento quo creata sunt, summi numinis munera conservant, quæ per experientiam & tempora in apertum proferuntur. Pauci anni sunt, à quibus istius gurgitis mirabile frigus quod Amorem extinguit, hoc casu revelatum est.

In faucibus Pyrenæi montis qui inter Hispaniam & Gallias jugum suum extendit, nivesque & nimbos sublimi vertice suspendens inculta vastitate horret, spelunca collibus affixa respicit mare, qua Gades & Calpe Euripi angustiis includuntur: domus Eurybati infamis piratæ, vicina maria terrasque deprædantis: cruentarum prædæ receptaculum, & spoliis infœlicium ærarium. Infra, plures sinus errore multiplici per concava telluris currentes. Supra, os arctatum, decrescens paulatim itinere quod ab imo ad exitum cavernæ ducit. Hinc Eurybatus injecto in intima terrarum fune, Stentorea voce, Alliga captivos. Atrax, quos hesterni diei fortuna victori permisit. Statim de abscondito tenebrarum recessu educti adolescens & adolescentula, tam fœlicipulchritudine, ut putares inter arenas surgere lætissima rosarum liliorumque vireta, nisi quod demiserant in terram virtices, quos captivitas languidos fecerat. Tunc invocato prospero eventu sic ad adolescentem victor.

Soror tua inter catenas & vincula libertatem sibi fabricata est, & victorem me traxit in sui adorationem. Vbi Zephyrus tota rupe sepultus dudum temperavit à flatu, irascitur Æolo, & motu suo terrarum itinera interturbans, blanditur Veneri, quam ad fontium murmura, & graminis lasciviam vocat. Cessant nimbi, pruina, glacies, &  
meliore

meliore vultu collucet serenitas cœli. Non es primus, cui maximæ felicitatis exordium Fortunæ crudelitas attulit. Parum absunt ab extremis calamitatibus inexpectata salus, & gloria, & divitiæ. Ego vero, quamquam alias imperare possum, deprecor in matrimonium sororem tuam. Si facis hoc, utere omnibus quæ in potestate mea sunt, & famosissimum ducem, tibi amicitiam & duraturum obsequium conciliantem, dignare affinitate tua.

Non vacabat respondere ad cuncta timentî, lingua quippe vim suam perdit in eo qui ultra spem beatus est. Silebat adolescens, cum sic ad Euryhatum adolescentula. Immoderatas miserrias excipiunt plerumque tranquillitas & lætitia; non habent extrema modum. Fulmina prærapida celeritate excussa dissipantur illico, & eo minus perdurant quo ferocius micuere. Tot casibus calamitosissima capita inundantibus succedit Amor, nostris injuriis iratus, & quam conditionem in libertate sperare non audebam: captivis ingerit. Nunc securâ libertatis, ad genua tua deposito capite compendium breve necessitati deponco: liceat uxoris nuncupationem sacrificio prævertere. Silentium fratris pro consensu est, qui fugientis comes, & infortunii socius gentilitiis ceremoniis totus incumbit, & Iunoni jugali meditatur votum. Accendere tædas, constrepere hymenæum, immolare victimas Eurybatus coepit. Simul clamoribus inquietis miscentur omnia, sævit armatorum manus feroci eruptione, festique diei hilaritatem in horrendam faciem transmutat.

Liphippi recens edictum, impunitatem, bonam famam, reversionemque in patriam latronibus piratisque concesserat, qui piratæ latronisve abscissum caput detulissent in curiam. His præmiis excitatus Celadon Melandriorum secundus terror, suam infamiam aliena morte liberare voluit, & commilitonis cæde salutem emere. Tentata itaque militum fide validiorem prædonum

manum

manum armavit inducem. Crudescere interim seditio, & ab inconcinno murmure ad gladios & tela transire. Pavens Eurybatus, & ad repentinum tumultum desperabundus, timensque ne quod etiam post suam mortem spoliū rebellibus relinqueret, quæ natura trepidantium est: intentusque captivæ nuptiis, inter ancipitia belli pactam uxorem perdere maluit quam Celadonti reservare. Commeavit ad novam conjugem, & inter ultimum osculum inseruit ensē amato pectori, idem bonus maritus, & cruentus percussor. Tum vero omni timore calcato, & eo generosior quia jam charissima quæque perdididerat, irruit inter spicula gladiosque hostiles, certus effundere spiritum, aut retinere per virtutem. Adest plerumque temerariis victoria. Cecidere cum Celadonte rebelles, & valida manus quas ad erogandam stipem aperire non potuerant, post ereptum spiritum armatas ferro retinebant: ea etiam cura prædonibus honesti exitus fuit.

Cæterum Eurybato Martis Dei blanditiæ pro se vitia erant, & hostium cædes, invidia. Ejulare, singultibus assiduis ilia quaterere, dolere, lamentari, nemo latronem crediderit, nisi prius in barbaris adoraverit humanitatem. Frons, oculi, vultus, persæpe mentiuntur. Domat feras mentes Cupido, ubi ab aureo arcu dulces sagittas decussit. Immitem Polyphemum ad suspitia coëgit pulchritudo Galathæ, & inter horrorem sylvarum, Deorum contemptum, hominum necem, à puella victus fletus uberrimos ab oculo misit.

*Cadis amor, feritasque, sitisque immensa cruevis*

*Cessant, & tuta veniunt abeuntque carina.*

Traxit ab inferis Plutonem Proserpina, Tantaloque atque Ixioni remisit pœnam.

Agitur novis furiis Eurybatus, & lymphatico ritu torquet se ad insanos motus. Perit, quia perire non potuit, & inter victrices palmas renuntiat salutis. Tinctus hostili sanguine, suum amisit, totque infestis spiritibus ad Acherontem missis,

missis, non retinet suum. Ut vero ad mortuam (quæ ante ora speluncæ in cruore suo jactabatur) rediit, questus de crudelitate factorum laceravit vestes, amplexatur avide corpus exanimatum, furentique osculo adhæret cadaveri quod ipse fecerat: & tanquam suum crimen excusare vellet, dedit domum suam conditorium defunctæ, positoque ad antri aditus immenso lapide, diu multumque defletam dimisit, & casum suum insana voce queritans, egreditur de Pyrenæis montibus, solatium in ignotis terris præsumens, inque horrida solitudine pii sceleris supplicium. Vagum tamen hominem comitabatur luctus, & quia cum aliena defereret inferebat sese, amor conjugis, & furor, & insania trepidum pectus occupabant; adeo pauci sunt qui se in potestate habeant, & facilius est totum populum servitio premere, quam erigere animos supra minas & tumultus fortunæ. Tandem post errores diuturnos venit in has terras; & extructo in proximis collibus tugurio, radicibus diu pastus corpus semivivum ægre licet traheret, ægrius tamen mentem, cujus ærumnas cumulabat tempus, & otium, & amissæ conjugis desiderium. Vnde & hodie in limine eremi simulacra Mortis & Amoris, hic arcu protenso, illa concussa falce, ad æternam facti memoriam stantia visuntur. Legiturque hoc Eurybati epigramma, nam & ipse componebat carmina ubi aliquid de impetu suo furor remiserat.

*Quid fugis, ah demens, comitantes pectora flammæ?*

*Sævus habet pennas, spicula sævus habes!*

*Prævertit celeri fugientes improbus ictu,*

*Et volucris penna quod fugit, assequitur.*

*Si vitare velis durantem in vulnere dextram,*

*Ad qua confugas brachia Mortis habes.*

*Vna est, & verax summa virtutis imago,*

*Vivere cum possis, non timuisse mori.*

Concluserat epigramma; subiit intemperans humor, qui sensibus immoderata insanix permixtione vitiatistotam mentem præcipiti & extremo corrumpit exitio. Non potuit pati diutius in-

domiti

domiti malivulus saucium pectus : domesticis Eurybatus concitatus furiis egit se de saxo, quod impactos vicini fluminis fluctus elidit. Vastis ruentis fragor aures nostras invasit. Accurrimus, occupaverat jam canum littus exangue corpus, cum mox inter oblustantis animæ moras, & crebros singultus, jam sanus & foelix, experientiam fecit aliquid esse quod insanos Amoris affectus sanat. Hæc aliquando Apolidi narrabam juveni nobilissimo & formosissimo, qui casus nostras hospitio suo dignatus fortunatos nos solebat dicere, qui remoti ab ambitionis studiis otium & vitæ tranquillitatem sequeremur unico mortalitatis incommodo à Deorum vita discrepantem. Tam ille, post longa suspiria & lacrymas in Eurybati casum miserabiliter ejectas: Hæc, inquit, vis vorticis quæ cupidinem in frænis habet majore diligentia contemplanda est, & ad aliquam naturalem causam indagatione solerti deducenda. Hanc ego de frigore natam ausim asserere, quod rigore suo contrarium ignem depellat, & pæne cum amore summoveat animam.

Sub ipsis fluvii aquis exprimuntur gelidi fontes, qui pluribus venis eluctati acceptas virtutes & potentias receptaculis suis inferunt. Saturnus, sive plumblum viscosæ materiæ impactum nexumque, subtilibus fibris quod minus concretum est eliquat. Illud si præteriens unda secum trahat, proculdubio qualitates induit Saturni, qui siccus & frigidus fugit coitum, & maligno aspectu Venerem premens ostendit odium quo in sequiorem sexum crudeliter inclinat. Similiter argentum de sympathia Lunæ quæ frigida & humida est pruritibus venereos enecat : unde & casta Diana à Poëtis vocatur, & abscissa Saturno genitalia fabulæ referunt. Itaque, si per minera plumbi aut argenti colantur fontes qui occulto itinere subeunt terras, statim exuunt nativum saporem, & insertas metallorum potentias verberatione crebra motuque suscipiunt, rigorem materiæ per quam fluunt, beneficio trahentes, frigusque Saturni



turniaut Lunæ, aquis in quas descendunt penetrabili gelu inurunt. Hinc contra faces Cupidinis virtus, & frigidus torpor, & insperata quies æstuantis animæ concessa. Quod apertius videtur in lapidibus quorum vires utrumque sidus auget recondita communicatione aspectuum, qui procul à sublimi ætheris vertice discretas gemmas celeri transcurso corroborant. Inferiora quippe superioribus per mutuam applicationem copulata miraculorum speciem exhibent. Hinc turchesia, androdamas, chalcedon, enydros, exebeus frigidissimi lapides, de utriusque sideris aspectu amentis amoris medentur, & libidinem frænant: cum ex mixtione terreæ qualitatis in concoctione sua nihil obtineant de qualitate ignea. Hæc conservat terra, & emittit. Videamus quid aquæ ut medicatæ sint sorbeant ut excludant desideria libidinis & omnem pruritus titillationisque affectum.

Vestiunt aliquando fluminum fontiumque ripas gramen, & herbæ, cupidini medicamina: inter eas, hastula regia, sabina, ruta, vitex, sylvestres lactucæ, cunila, & nymphæa. Quæ omnes aut vires suas transmittunt, affunduntque fluviis per radices ad ima subeuntes, aut folia, floresque, ventis & autumnis excussos permittunt subjectis fluctibus; quorum humore corrupti ponderibus suis deprimuntur, hos unda tandem devorat, quæ novis succis imbuta, pari cum littore suo medicamine superbit.

Erat aliquid quod ultra malorum meorum partem inquirerem; laborabam in Apolide, & ipsa cupiditas sciendi quis ille esset, fletus meos, & lamenta tardabat. Prævenit Vindocinus desiderium meum, & ad anum, Rogo, inquit, mi parens, noli destituere cupidum adolescentem sua spe, perge ulterius, & istum Apolidem describe mihi, ut sciam an sit ille quem quondam apud Locros in scæmineas vestes insertum & absconditum deserui. Pluris hoc faciam, quam si omnes ab occulto latentes Naturæ potestates in apertum

tum exercitata subtilitate produceres. Istæ, inquit puella, meæ partes erunt, si lassata mater subsistat & scenam mihi longioris calamitatis permittat extendere. Concessit mater. Tum illa: Mediocris Apolidi statura, moderatus gestus, singultus frequens, capilli nigri, & in modum corporum quoties ad solem convertuntur deflexi, varie pro sua nitentes agitatione.

*Sic picturato pratexens æra limbo*

*Ducit ab adverso speciem Thaumantias astro.*

Frons porrecta, arcuata supercilia, cærulei oculi, & fulmina subinde torquentes, nasus neque recurvus in frontem, osculum quale Venus blandiebatur Adonidi; genæ, mentum, cervix, manus, rosarum liliorumque cognatione notabiles. Hem! adest, exclamat Vindocinus: agnosco duces meum, & jam reducem lubens amplector. Prope etiam erat ut exclamarem, Et hæc quoque Chloris mea est, nisi recepisset interruptum sermonem virgo; &, Hoc, ait, in posterum probatæ humanitatis erit si sine exclamationibus facili patientia loquentem velitis audire; ultro etiam vestros affectus excuso qui ab auribus ad oculos deduxerunt audita & præsentis vultus finxerunt quos à nobis tanta maria & circumfusæ terræ revellunt. Parvum imperio, tum illa factum silentium historia memorabili remuneravit.

Tantæ pulchritudinis adolescens istius domunculæ latebras inviserat, illudit Cupido simplicitati meæ, & rusticam puellam sævientis face irritavit. Cessabat antiquum in tædas jugales odium, & modo quæ tot petentes eram averſata, nuptias ultro petebam. Restitit Apolis, & blandiente dicto revocare me ab inutili amore conabatur. Ignis repulſa crevit, & in imo corroboratus membra omnia in maciem & languorem trahebat. Mortuit tandem ut propinqui vorticis experire potentiam, & morbum quem sanare non poterat aliena medicina expellerem. Ratum erat uti consilio temere amati si ultimam querelam contempſisset Ingredior de die Apolidis cubi-

culum, cubabat ille meridie, & solis æstus humenti somno demulcebat.

Invado dormientem effusissimo amplexu: & Teneo te, inquam, qualem jamdudum petieram. Dimovit ille somnum, & obstantes libertati suæ manus de pectore suo decussit. Dii boni! quæ rerum facies? quod formæ monstrum? Pendebant è collo inornati capilli, & sideribus similes oculos velut inube tegebant. Pars avulsa candidissimos flores ad miraculum aperuit. Protuberabant gemino colle lactei sinus qui nudi ementitum sexum cum stupore meo vulgaverunt. Vix me suspexerat, consedit prior impetus, servataque suavitate purpuræ quæ fecerat ira innatam modestiam verecundissimo rubore notavit, & quas ad supplicationem porrexeram manus suis interserens, Vides, inquit, ut miserabili ureris flamma, quam virilis habitus mendacium suscitavit. Ardebas hætenus in muliere virgo, & nisi prodigioso cupidini medelam casus attulisset, manebat te tristis exitus, & adductum ad desperationem vivendi tædium.

*Quid sis nata vides, nisi te quoque decipis ipsam,  
Et pete quod fas est, & ama, quod fœmina debes,  
Spes est qua capiat, spes est qua pascat amantem;  
Hæc tibi res adimit.*

Quandoquidem autem tibi sexus meus pate-scit, nolo te fraudare majore cognitione vitæ meæ, cujus recordatio præteritorum malorum gravitatem obruit, & lento torpore solvit molestiarum sollicitudinem ad quam miseram me Fortunæ crudelitas reservat.

Nolens deducta de viri manu ad invitum totum, postmodo sum experta quas inimicitias male contracta matrimonia parerent. Quam injuste lex regni divortia sustulisset, & impiique vinculo retinisset quos hymen male invocatum funerali facelustravit. Multi hodie miriti vivunt pudoris illius beneficio qui raro sexum nostrum nisi cum virtute omni deseruit. Illos tamen creberima vota pulsant ad tumultum, & nisi nos reverentia

rentia famæ contineret, plures Medææ, & Clytemnestræ, quam Alcyones & Alcestes invenirentur. Omnino disciplicebat maritus: sed neque tunc erat alius qui placeret. Post quinquennium viso Alitophilo exarsi, & nondum corpore adultera innuptam me desiderabam, ut amatori meo præter ætatis florem totam me & ex voluntate traderem. Cæterum intempestivo connubio sociatæ sola corruptarum nuptiarum vindicta supererat. Adjuvabat desiderium soror mea provectioris ætatis, quæ marito meo infensa per reatum meum quærebat illius contumeliam.

*Sed si jam vellem fines transire pudoris*

*Hic major culpa causa futurus erat.*

Marito castellum fuit ad Oscharæ ripas, quas altiori culmine tegit. & pressos lapides sublimi mole patefaciens in palatii superbiam elevat. Illic sæpius convenimus conciliatrice sorore, quæ eo ardentius sequebatur Alitophili partes, quod aliquando simili adultero mancipata, delectabatur adolescentis imagine, qui vultu, & voce, & gestu amatorem suum referebat. Interim, si quid ab amplexu vacabat, scribebam versus, qui absentem Alitophilum revocarent. Hinc illi quos habes à manu mea, & quorum concentus dulcedinem si servaveris, habebit aliquid Arion quod invideat.

Timendum erat ne voluptates satietate languerent, providit casus ne impune liceret esse beatis. In suspicionem quippe Alitophili maritus meus nescio quo modo inductus ultionem parabat. Expugnaverat zelotypiæ dirum venenum otiosum hominem, & incertum spiritum ad crudelitatem verterat. Nactus deinde occasionem vindictæ homicidio quod cogitarat accingitur. Vtebatur adolescens contigua domo. Ecce, dum de nocte dormitionem capeffit, improvisum adoriuntur armati, & circumfusi per latera male resistentis insiliunt, premunt, vulnerant: & nisi prostratus moribundo similis pedibus pulsasset terram, nunquam ficarii temperassent ab ictibus; contra glomerata procella procidisset a-

matum caput, & ad necem non dubiâ vapulasset.

Hujus cruentifacinatoris fama totam civitatem pervagata, non alium nocturnæ cædis authorem quam maritum meum faciebat, eo manifestius, quod in fuga inter jacentis pedes pileum reliquisset. Hoc, ut infœlicis aures percussit, denegatæ voluptatis indignatione furens, incensos animos ad scelus acuebam: cum litteræ mihi ab Alitophilo redduntur, in hunc modum scriptæ.

### ALITOPHILVS CHLORIDI S.

**N** Ondum me pœnitet usurpatæ per furta licentiæ. Firmissimum vinculum erit geminatæ affectionis, si nos dissociari non sinas. Minus me mariti tui vulnera quam tua cruciant. Ista, æterna erunt: illa, jam evanuerunt. Adeo Marte acrior est Cupido, & periculosius ferit. Præcluserit aditus rumor in castellum tuum, opportunum tamen clandestino colloquio locum inveni, si nihil omiseris de amore tuo. Cras me reperies in templo Veneris Etæræ quod ultra urbem est. Illic consilium quod utrique expedit aperiam. Omnia salutaria & commoda si mature veneris. *Vale.*

Placuit invitationem sequi, cum jam expectatione turbida etiam de momenti mora conquereretur. Decessit nox, & ut sequens dies Solem Mundo reddidit, sacrario Veneris illabor. Prævenerat Alitophilus diligentiam meam, & ante pulvinar Deæ procumbens, solitariam complexatus statuam propitium consiliis suis invocabat numen, & hoc votum inferebat saxo quod divinam imaginem sustinebat.

Dea, quæ flaminibus siccis inducta fugas nubi-  
la, quam cum gaudio elementa omnia suscipiunt,  
quæ tempestates revocas, coërces inimicos ven-  
tos, desolatam terram reparas, extinguis discor-  
diæ semina, concordiam ingeris, permitte nos  
aliquando quieti nostræ, & cœptis meis aspi-  
rando famulos tuos conserva quos ferventior  
in nu-

in numen tuum cultus ad odium mortalium crudeliter exposuit. Si tuis precibus, Deorum Deorumque iræ remollescant, invisemus saluberrimam illam tuam ædem, quam Pyrenæus in arduo montis suspendit, & initiati sacris tuis, soluti voto quod sincera fide signamus, docebimus, alios, per te solam genus humanum conservari.

Vbi nos voti reos fecit, deseruit stylum, & lento sermone cunctabundus ad me; Vt, inquit, mea Chloris, effugiamus mortem, tibi moriendum est. Cum devovissem caput pro salute loquentis, ille pauca quæ ad rem nostram pertinebant, sic profatur.

Ea volui scire, quæ non modo ab Europæ terminis desjuxit Natura, sed & secreta illa quæ ubique terrarum penetralibus suis reservat. Cum enim denegetur nobis diu vivere, discendum est aliquid quo nos vixisse testemur. Cita morte præoccupati terram relinquimus. Minus tamen queruntur hi quos philosophia ad reconditarum rerum miracula vocavit. Hoc adminiculo multa percepi quæ vitam melius sustinerent, & mederentur periculis, quæ reliquos ad desperationem per compendium ducerent. Videmus firmiora quælibet præcipiti velocitate labi, & ortus occasusque intra momentum temporis revolvere. Perficiendum est, ut purgata caligine, qua mortalitas hominum mentes inficit, serenitatem subinducamus, & imminentium malorum revocata per prudentiam procella conquiescat. Inter alia, vires herbarum occultas quæ de telluris gremio surgunt apprime novi, quarum spiritus nescio qua contagione naturam ipsam videntur corrumpere, & ad humanum exitium noxaliter nasci. Ejusmodi venena sunt, quorum frigore velut hostilibus flabris inhorrescit sanguis & animam indignatione vehementi verberatam de corpore suo plenissime discutit. Inveniuntur tamen herbæ succis minus noxiis, quæ gelato quidem rigore speciem mortis inducunt,

& elisis pulsibus inferentes torporem medicatos  
 homines mortuis similes reddunt: cæterum, post  
 longum somnum refunduntur per membra vita-  
 les spiritus, & torpente veneno depulso, ereptam  
 pro tempore cum motu & sensu remittunt ani-  
 mam. Hac potentia nobilitatur inclusus huic  
 pyxidipulvis (porrigebat pyxidem) cujus vim  
 soporiferam quicumque per suffitum hauserit, to-  
 lerare non potest; Sed statim solutus in som-  
 num, per totum biduum obdormit, donec re-  
 meante per artus calore qui circa pectus servatur,  
 iterum resurgat. Fit autem ejusmodi pulvis, de  
 lactuca sylvestri, absyntio, crambe, melanthione,  
 papavere, rosa, narcisso, croco, ligustro, bacca-  
 re, hedyphnoide, & cytino: pinnis dextris vituli  
 marini cum corallio & melle demersis in ollam  
 ad ignem ferventem. Hunc, si aspersum ardenti-  
 bus favillis olfeceris, confestim succumbent oculi  
 venienti somno, tam arcto torpore, ut interclusi  
 spiritus non vini odore, non aspersione aquæ, non  
 fomentis ullis in venas remeare possint. Sic Orci  
 victima credita, funus eris, feralem pompam pro-  
 sequente populo, & exoso illo marito tuo tum  
 multis amicitiae & pietatis supremæ nominibus,  
 tum moerore squallido, & immoderato planctu  
 ad sui spectaculum spectantium oculos evo-  
 cante. Providendum tamen est commoditati no-  
 stræ antequam ad sepulturam & manes descen-  
 das. Conficies testamentum sorore tua hærede  
 nuncupata, ea tamen prius clam admonita, ut bo-  
 norum tuorum semissem ad te procuret pervenire  
 quocumque rediviva jufferis. Cavebisque speciali  
 mandato, ne illa ex ornamentis tuis quidquam  
 detrahi permittat. Velle te inferri sepulturæ tuæ  
 pretiosissimam vestem, margaritas, monilia, &  
 alia mundi muliebris quorum affectus ultra mor-  
 tem etiam ambitiosis perdurat. Ut vero gravitate  
 somni discussa sese in venas refundet renascens  
 calor, & recuperabit vires vigoremque suum cre-  
 ditum nuper cadaver, revolvam ego de monu-  
 mento tuo lapidem, & te desiderium meum de  
 Acheron-



Acheronte revocabo in vitam. Frustra quæ subsequuta sunt per partes narraverim, ne tristi & mœsto sermone veluti pestifero alimento patientiam tuam detineam. Accepi pyxidem, deferui Veneris templum, feci quæ dixerat. Obdormio, ornataque gemmis deferor meorum manibus ad nobile sepulchrum, quod solutæ jam in fœtorem parentum reliquiæ formidolosum fecerant.

*Non aliter Dido summas in sede sub auras  
Erecta ingenti, crinem de fronde coronat  
Funerea: pendent gemmata monilia collo,  
Involvit tum compta comam, mortemque serenis  
Depascens oculis, varios per brachia flores  
Texuit; arsisque committens ignibus artus  
Sidonio projecta thoro. Stant corpora circum  
Educti tenebris manes, & funera lambunt  
Telluris permissa sinu, descendit ad umbras  
Infelix anima, & populos per inane volantes  
Mæsta timet, trepidatque novis simulachra figuris  
Cernere, nec notos olim cognoscere vultus.*

Is honor ad tumulum per alienos pedes eunti fuit, adjectis corpori ornamentis quæ in nuptiarum superbiam venerant. Sic officiis feralibus peractis, & imminente hora salutari, qua recuperare vigorem suum corpus debebat, redituræ salubritatis expectatio Alitophilum campo steterat, in quem extra civitatem de Senatus consulto Duelliano quicumque de familia nostra finissent mortalitatem non sine pompa deferrebantur. Ut venit ad tumulum revoluturus saxum quod aditus obserabat, patere jam sepulchrum offendit, & intus murmur, quale latronum spoliantium sepultam. Quo percitæ mentis torquetur furor? minimum malorum mors illi est qui semel contempsit mori. Descendit ad imas tenebras, & fulgore gladii, facisque, quæ omnia utraque manu simul rotabat, umbrarum & tumuli violatores ad trepidum pavorem perstrinxit. Sic arbores vibratæ vento tremiscunt antequam fulmine feriuntur: illud enim præmittit spiritum, & agit ante se dum rupta nube pervolat. Cecidere de

manibus impiorum novissima defunctorum spolia, & territas suo scelere mentes fortuitus horror turbavit. Improvisa raro moram patiuntur ad recolligendum se. Reliquere arma nocturni grassatores quibus sepulcrū ruperant, & ut effugerent poenam quam Constantii & Iuliani leges ut sacrilegis minabantur, deseruere naturam suam, horrendumque propositum quo manes inquietaverant, inusitata verecundia & incognito metu mutavere.

Nondum bene exierant, pertentat Alitophilus partes omnes subterranei specus, & ut me dormientem aspexit, totum se labante spiritu super meum corpus effudit. Inter hæc allevatis luminibus agnoscere amplexantem incoepi. Iam mihi, jam illi reddita refici, & relaxata potionis vi ad superos remeare, nisi quod adhuc claudebar tumulo. Rediere quoque vires Alitophilo, assurgimus; & ornamentis quæ passim circa cadavera jacebant (nuper spoliū latronum) requisitis, sublatisque, mortalitati nos reddidimus. Putares Eurydicen de Tænaro tractam Orpheum sequi, si aut Alitophilus tenuisset cytharam, aut ego relapsa sub umbras & iterum obvia Cerbero ad gemitos irascentis latratus palluissem.

Sic ab inferis remeantes, obducto tumulo soluturi votum antelucio petebamus ædem Veneris Pyrenæis jugis sacratam; & jam multum itineris emensi eramus, cum latronum (qui sub Eurybato militabant) manus effera decepit pietatem nostram, & incautos catenis oneravit.

Infidebant sublimioribus locis incultorum montium prædonum reliquorum examina, & veluti piaculares damnatæ sollicitudinis victimas de rupibus dependuli immitti lumine spectabant, quos in carcerem & tenebras celebri supra noxiorum reatum ignominia socii pessimi trahebant.

Præibamus nostris vinculis triumphum gravem, & suspensos ad lenta supplicia spiritus torpore magis quam metu premebamus. Tunc ego non inscia periculi quod utrique imminebat, osculo Eurybati genu adorato, præcocia fata & salutarem

salutarem sola celeritate mortem mihi fratrique (sic Alitophilum appellabam) deprecata sum. Eurybatus expalluit ad constantiam meam, & blandiore vultu ne desperarem de pietate sua monuit: vocatoque Atrax imperavit ut utrumque diligenter procuraret, & eximium (ut agebat) par formæ in crastinum reservaret sibi. Sed jam Atrax conceperat flammæ, & subitæ miserationis affectione permotus, miserescere se simul & amare sensit. Amor enim plerumque à miseratione venit. Vt in tristem & ignavi frigoris plenam speluncam descendimus, per obliqua devexa in imum deducti, cedente solo instabili vestigio, & refugo lapsu onus suum male sustinente: Atrax qui nobiscum descenderat nostris miseris ad suspirans, & nobis Cupidinis ignibus ad misericordiam motus, sic incipit.

Coacti estis vela venienti tempestati aperire, & iratos fluctus sequi quamcunque vos in plagam detulerint. Miseret me conditionis vestræ! & vellem, si liceret, mille pœnarum indagine irretitos etiam meo sanguine liberare. Nisi credideritis suadenti, sero lamentationes illicitas refrigerabitis, & ad cruentum supplicium expositi, nequicquam movebitis ad redemptionem vestram prædones, quos mixta tabo, sanieque, & plantibus carnificina suavius unguentis delectat. Palam est, Chloridem amat Eurybatus, & occulta libidine demorsus, per vestrum ludibrium quærit irritatis ignibus facietatem. Videris Alitrophile an malis sororem tuam concubitu quam justis nuptiis exponere. Ingeniosus est ad medicinam suam Cupido, semper aliquid honesti prætendit, sub quo lateat inverecundus furor, excitatus ad approbrium verecundissimi sexus. Plures puellæ nuptiarum spe delinitæ prostitutiuntur infelici patientiæ, quam lenonum astu fornicibus inter sellas & meretricios titulos, quibus captura sua nisi postquam deceptæ sunt manifesto apparet. Deposcet Eurybatus in iura maritalis thori sororem tuam. Cæterum nihil aliud quærit, quam

quam perditæ & jam sibi expositæ corpus obijcere publicæ luxuriæ, militesque suos in prædæ partem & novissimas delicias vocare. Sed si tibi placeat melioris fidei nec minoris vivacitatis volens volentem adoptare fratrem; habes me meditati ultorem opprobrii; sine vestro periculo sumpturus de barbaro duce pœnas, & vos incolumes quocunque jufferitis deducturus. Sanguis ille ab hostilibus venis tractus, cementum erit perpetuæ affinitatis indefessa thalami copula inter nos coalescentis ad perfectam concordiam.

Talibus dictis, stetit mutus, & similis alta cogitanti. Cumque mentito sermone approbasset Alitophilus affinitatem suam, osculatus est dexteram victoriam salutemque pollicentis: laudatæque pietate propositi, socium quocunque sese facinori appareret humanissima urbanitate obtulit. Nec mora conclamat Atrax mitterent in subterraneos recessus funem. Statim ab alto arripuit demissum, & simul de nocte speluncæ rediit ad Solis lucem.

Erat Celadon corpore vastus, strenuaque manu, & ad quem, si Eurybatus non fuisset, communi consensu ducatum latrones detulissent. Vique terrarum invidia regnat, & ipsa imperandi licentia inter prædones æmulos habet. Illum Atrax in solitudinem traxit, ne aures alienæ venirent in secretum, & inconsiderata prudentia in exitum, consulentium verteretur. Obsequium, inquit, quod arctissime tibi devovi, non patitur silentii crimen. Ne Mercurius sinat ut quod revelatum gloriam tuam spectat dissimulem. Quæ scio, timeo. Et hoc pii timoris officium erit, si illud impia taciturnitate non corrupero. Fraudare te præda tua Eurybatus destinat, & quam captivam fecisti, suam facere. Ut intelligas, quam nullam occasionem ostentandæ ambitionis licentia contemnat. Procedit in dies immodestius, & male data autoritate, vitiisque, melius ducem agit, quam justitia, & virtute. Sic impunita, luxuria, vel dissimulata incrementum accipit ut  
colle-

collegium nostrum tyrannica potestate oppressum, nihil jam aliud quam humilem servilemque metum suspiret. Ita dum Eurybatus in eundem hominem non putat convenire potestatem & moderationem, duas res diversissimas juxit, contemptum, & temeritatem. Nunquam bona valetudo est in corpore tyranni, perpetua febris venarum temperiem perturbat, micant in vultu novi subinde flammarum fluctus, audiuntur suspiria, & anhalitus laborantis, aut aliorum quos ipse ad luctum cogit. Amat expressas metu voces, & coactam laudationem sui ubi multum risit, nec remuneratur. Sed solvit tandem sacramentum omne, & sodalitatis vinculum, tristis illa patientiæ ancillantæ necessitas: & licet indomita potentia aliquot horis regnet, postmodo tamen debilitatur & frangitur, ubi generosi spiritus bene concitati laxavere tempestatem, & indignationis suæ ventos, dudum timoris carceribus clausos ad libertatem emisere. Macte animo; expiabitur si jusseris cogitata contra prædonum leges voluptas: unco, laqueo, & ignibus, & strage sua, si volueris, Eurybatus publico latronum generosissimorum gaudio litabit.

Non dissimulavit Celadon sibi placere ejusmodi consilium, quod laudabilem audaciæ suæ mortem aut imperium intra momentum temporis promittebat. Simul cum amicis super ea re clandestino colloquio differuit. Quibus ubi periculorum societas, & loquentis gloria placuit; Martiæ cohortis majore parte ad concionem vocata, vim & robur circumstantium laudavit, apud eos spes omnes suas & salutem residere. Si annuerent de bello quod parabat, proximum diem Eurybato extremum futurum. Plus esse fiduciæ & socordiæ quam magnitudinis emollito per delicias duci. Quo sublato, prædas omnes & spolia communia fore. Sibi nomen imperii, illis laudem concessi, & fructus relicturum. Pararent desides manus, & gladios rubigine infectos ad pugnam accuerent, Neque se injuriam suam queri, quamvis  
Eury-

Eurybatus Chloridem laborum suorum præmium rapere cogitaret. Omnibus fraudationem prædæ & pecuniarum per pericula petitarum pro injuriis esset; mox si surgere ad ultionem properarent, illis solatium. Necessitatem impositi silentii manu redimerent. Daturum prælii signum, si se sequi destinassent, & vestigiis ad salutarem victoriam properantis insistere. Præmia virtutis geminata, spoliū cæsorū, & libertatem. Illud ante oculos esse: Hanc ab edicto Lippii peridē, quod latronum percussoribus postliminii jura dedisset. Periculum in mora esse; laudabile, si aggrederentur; securum, si occiderent.

Assensere milites loquenti, murmure, clamore, pulsu, sonituque, & affrictione clypeorum; Verum virum, ducemque, spreto alterius libidine ingenti laude efferentes.

Dum hæc agebantur, Alitophilus alligatus collo meo sine intermissione flebat. Ergo, inquiebat, non licebit mihi tecum mori? Nunquam ex animis fatorum discedet furor infœliciter pertinax? Relinques consuetos sinus, & æterno dissidio æternum amorem in te meum damnabis? Velut in solitudine squallebit amatum pectus, & nova face per calamitates & servitium subdita deflagrabit alienis flammis? Quidquid erit, crudeles Dii, forti viro licebit honeste mori. Ingemui: &, Ne, inquam ego, antiquam constantiam descivisse credas. In animi bona Fortuna nullum jus habet. Mens interna virtute freta rebus adversis opitulatur. Premitur, non opprimitur: imo fortior assurgit. Inter procellas, tot bellis domesticis, tot externis laceffita, extra turbam & tumultum est. Sibi semper vacat. Excitantur motibus ignes reciproci, & cum urendo clarescant, sortis ludibrium pro materia & alimento demorident. Constantius per miseras amor surgit, & fidelius corroboratur. Quidquid sit: nunquam me Atrax aut Eurybatus in thorum suum deducet.

*Ille meos, primus qui me sibi junxit, amores*

*Auferat, ille habeat secum, servetque sepulchro.*

**Iuvabit**

Iuvabit aliquando libertatem redditam experi-  
ri. Tristitiam, risus excipiunt. Ad defectum  
noctis, dies socialis properat, & ubi collisæ nu-  
bes inferunt obscuritatem, semper aliquis fulgor  
murmurantes undarum pulsus oculis navigan-  
tium ostendit. Maximum solatium est ferre sor-  
tem suam. Plerumq; auxilium ab abscondito tem-  
poris mora profert, semperque aliquis de Diis  
mortalium casus blandum dignatur aspicere, nec  
eos patitur ad occasum suum labi. Et si ista non  
sint, more scorpionum inter excitatas flammæ  
contorto ad pectus aculeo meo vulnere cadam.  
Apagæ istos qui amorem utilitate metiuntur, quæ  
sordidissima cauponatio est! Nunquam diluce-  
scet mihi nisi ante vultus tuos, quos monebo in  
silentio, non alias si removeris obscurata manes  
petam, & toto Acheronte delapsa, quam ad ortus  
tuos resumptura lumen.

Audiebamus murmur, removimus amplexus  
lacrymisque deterfis dissimilem malis nostris in-  
duebamus vultum, ad illorum vicem qui degu-  
statis Sardois herbis feruntur in morte ridere.  
Cum Atrax per funem ad nos relapsus, quæ pro  
incolumitate nostra peregerat sedulo narravit.  
Nam (inquebat) aut mutuis ictibus virtute nume-  
roque pares sternentur, aut lassos vulneratosque  
intacti bello adoriemur: cædem cæde, sanguinem  
sanguine expiabimus. Præbebunt vigentibus nu-  
tantia ad casum corpora, & apertis ad vindictam  
nostram pectoribus demergemus ultrices gla-  
dios, donec omnes vastis vulneribus perforati  
incertas diu qua exire velint animas ejiciant. Et  
ne nos tumultus irrepens, nox obscurior, casus-  
ve diffociaverint; proximum est quod solemni  
voto petebatis Veneris templum; illuc convenie-  
mus, seu nos idem dies dicto loco assignabit, seu  
mora tardior in aliam lucem distulerit congrega-  
tionem nostram.

Dum ejusmodi colloquiis tristissimam pro-  
ducimus noctem, Eurybatus ab aditu speluncæ  
jussit educi captivos. Evanescebant extrema

Lunæ



Lunæ cornua, & jam montium vertices ad Auroræ rosas rubebant. Ego cum Alitophilo assenseram Eurybati nuptiis, & post dilationes aliquot matrimonii solemnia celebrabantur. Præcipitata rursum dies tegebatur aquis, & ferales tenebræ ab iisdem surrexerant. Incepta est per Celadontem seditio, & omnia secundum narrationem matris tuæ subsequuta sunt, nisi quod adhuc vivo extra ludibrium mortis, & extremam vim Eurybati. Enimvero defectione Celadontis vulgata, crescente tumultu suspicatus Atrax cuncta in deterius lapsura si me præmium victoriæ & causam belli ante oculos rivalis superstitis reliquisset, tonso capillo, caligis, pallioque, & pileo, in masculam me reformavit faciem, præsentium calamitatum sociam, comitemque servi domini ferociam fugientis. Quis enim miser recuset periculum quod salutis spem ostendit? E diverso formosissimum adolescentem (quem licentia stupri Atracis fratrem fecerat) meas vestes induit. Et ut arbitror Eurybatus inter insultus hostiles, & proprios metus, mendacium non sensit. Deceptus noto habitu, ira, desperatione, & tenebris, cum omnia alia curat, præter vitam meam animum etiam perdidit, ut me perderet. Sic percussus & attonitus adolescentem pro conjuge, Orpheotelestam pro Chloride furori suo mactavit.

Ad hæc inquietatus piscator. Ergo, me, inquit, Atrax impune deluserit! ille filium meum, ille deficientis solatium, rapuerit, perdiderit! Vivit adhuc, & sceleratum animum scelerato corpore circumfert! Aliquando me totum vicerunt miseræ, & Dii malorum authores! Iam fractus dilabatur orbis, & si mortalibus licet beneficia Naturæ corrumpere, recedat vita, quæ calamitosus hominibus pro supplicio esse solet! Hac exclamatione lacerata rustica virgo, juravit relicturam se invidiosam narrationem, ne forte recentia mala novis augerentur, & hospites suos odio turbaret officio, ad quod se mente simplicissima,

& bo-

& bona fide faciliorem se futurorum nescia præbuiſſet. Renuntiare se male fidelibus armis, & nudas manus, pectusque inerme ad pœnam proferre. At ego qui in Chloride mea laborabam, hortari cœpi piscatorem ne perseveraret in super-vacuo gemitu. Temporis moram solere mentes doloribus exulceratas ad sanitatem revocare. Scenam muneribus gladiatoriiis frequenter diſtingui, ut voluptates nece & sanguine condian-tur. Cito subrepere infortunia. Bonam fortunam difficilem inventu, rectorem ducemque desidera-re, adversam venire ultro etiam contra misero-rum votum. Daret hoc extremo dolori ut ali-quantulum taceret, cum in summis calamitati-bus, silentium melius fletu, verbisque, affectus vere mœrentis exprimat. Evaporationes humidî splendorum tantum minaces citra sonum ictum-que movere. Exhalationes vero siccioreſ terra-rum, fulmina facere, & exprimere. Vbi consum-ferit aculeum suum recens dolor, & primus torpor reddiderit sensus, usurum illum ratione sua, & si tunc placeat dicturum in præsentem calamitatem quidquid animus dilatione remissior afflicto minus, minusque commotiori suggeret. Quod, inquit ille, expositionem calamitatis meæ in aliud tempus differo, præterquam quam sub recentis mali pondere lingua torpet, facit etiam reverentia sacratissimæ Veritatis quæ virgi-nis narrationem per totum comitatur. Bene est, inſit puella, jam recipiam cum voce interclu-sos tua confusione spiritus, & præter spem mi-ſericors indulgebo tibi, ubi de Atrææ ultionem ſumpſero injuriis tuis parem. Attendite itaque, & avidis auribus ebibite Chloridos sermonem reliquum, qui per miras calamitates veluti fractus saxi torrens in maligniorem impetum transibit, & per violentos fluctus crescet in speciem turbidi maris. Sic ergo sequuta est hiſtoriam suam.

Igitur inter nudos gladios & mortales ictus (quibus circumſtantis ſylvæ confraga resonabant)

intrepida, tantum pro salute Alitophili laborans qui certamini intererat, ingenio sicut habitu masculino omnes ærumnas sustinebam, parum semota ab illo loco in quo sine misericordia pugnabatur: quantumque plus spei ad refugium nox dabat, eo majorem animum ad extrema quæque fortiter ferendum faciebat. Ut vero rediit dies, & ad ingentis cladis spectaculum oculos vocavit; crevit audacia cum luce, & jam plus fortitudine quam vestibis foeminam virum ad jacentia cadavera pertraxit, ut scirem an inter mortuos latrones habitaret Alitophilus, eum simul & volens & timens per cruentum prælio campum reperire. Et quia barbari illi, & immanes homines, acceptis forti pectore vulneribus honesto morsu ad novissimos anhelitus tellurem præsserant, singula cadavera prensis capillis converti ad infamen exitus notam; qualis esse solet eorum qui rotis impositi, & universa membrorum fractura laniati, laborantes animas inter carnificum amplexus & aspectum cœli decutiunt. Frustra tot afferatos vultus aspexi. Non erat inter eos amata mihi multum facies, & quoniam non erat, insano pavore mortuum arbitrabar, quem tot corpora cruentis spiritibus spoliata vivere ostendebant. Adeo sollicitè timet quisquis bene amat. Quid scio (clamabam) an Alitophilus Euribati hostis eum extra hanc pugnam ad aliam compulerit. Ambo scilicet communem stragem vitavere, ut melius & honoratius perirent. Hunc igitur amorem meum virtus solaperemerit: ego, vidua, & extorris, & foemina, mihi metuens revocabo fessos ad vitam spiritus, ut inter speluncas ferarum, & cadaverum æcervos, delitescam.

Volebat Atrax parata oratione demulcere furentem, nisi vetuisset fortuna turbare aures meas invito sermone. Neve bellum tam vili cruore & inexplata cæde desineret, Dea illa misericors procuratorem illius provinciæ cum lictoribus & militum sequentium turba campo stitit, in quo victores simul & victi omnes indiscreto ordine

jace-

jacebant. Venerant illi ad famam pugnae, ut iu-  
perstites latrones vi domitos, victosque, carce-  
re, mox patibulo donarent. Cæterum Atrox de  
tot modo prædonibus solus sed non ignavos hæ-  
res, visis hominibus armatis confinium instantis  
periculi morte voluntaria prævertit. Sat se bea-  
tum dicens qui ante oculos meos virtutis suæ  
præcipuum & laudabile specimen præberet. Nol-  
le se supervivere fortissimis sociis, quos publicis  
patibulis mutuum robur abstulisset. Precari Mar-  
tem & Mercurium, suos Deos, ut me captivitate  
liberarent, & spontali parricidio satiati, abduce-  
rent à sævitia cælum, quod immerenti mihi in-  
jungeret æternas ærumnas. Ultima vox ejus hæc  
inter homines audita est, & statim cum magno  
sonitu animam per patens vulnus ebullit. Ac-  
currunt Melandrii, & ne mihi etiam violentas  
manus inferrem imminentis periculi metu, du-  
bitantem an mori aut vivere malletm catenis im-  
pediunt. Sic ad Liphippum deducta prudentissimi  
Regis venerata majestate (quam nimio fastu pro-  
fitebatur ad nauseam Gallicæ libertatis) quæ nunc  
intellexisti fideliter exponens, sævum factorum  
vultum ad aliquam clementiam reduxi, nisi quod  
aberat Alitophilus, & secum majorem mei par-  
tem deferebat.

Pependerant jam occisorum latronum cadave-  
ra, ad reliquorum horrorem: ne viderentur fa-  
to functi ignominiam omnem consumpsisse, &  
legum poenam voluntario parricidio fugisse, qui  
semel meruerant publice mori.

Humanarum rerum culmina constantiam non  
inveniunt, omnes felicitàti nostræ inimici su-  
mus ubi nulli sunt qui nos ab alto deiciant. Cum  
tantum lucet ignis, placet; ubi altius volumina  
sua detorsit, exurit trabes. & corruptis quæ su-  
perioribus firmamentum dabant, agitata diu ad  
ruinā fastigia divellit. Libera sub Apolidis nomine  
inter Melandrios fortunam meam non ingratis o-  
culis aspiciebam, eratque aliquid quod Alitophi-  
li leniret absentiam, Vbi Liphippus dignatus est

servitiū meū, & libertatem suam in ignotam fœminam exercuit : jam mihi gravis, jam impatiens exilii inexpectata beneficia pro suppliciis ducebam. Mentēs longa fœlicitate saginatę multum de natura stomachi sumunt, cui ciborum lautitia & abundantia fastidium inferunt : illę nauseant ad florentiorem statum, & iniquis luminibus ubertatem cernunt, quę alias earum fuit impudens votum. Ipsa corrupti fœlicitatem meam, & ne diutius beata inter gloriam & divitias dilectum meum ad injurias cœli & terrę relinquerem, ad fugam animum deliciis fessum commasculavi, & de nocte aulam Lippii deserui ut Alitophilum meum in templo quod Eleutheriam à Melandriis disternat, convenirem.

Trigesimus à pugna prædonum dies cum totidem noctibus spatium mensis compleverat, & nova Luna recurrebat ad orbem suum. Video fanum solerti fabrica constructum, valvasque ingentis populi frequentia laborantes; dona quoque cum titulis suis pendentia, qui litteris aureis testabantur cur singula Veneri sacrata forent. Tūc ego concito gradu per mediam turbam viam ad aram mihi facio, positoque genu uberi fletu simulacrum Deę rigans, notavi Pario marmori quod basim faciebat quę sequuntur minori characterelitterata. *Alitophilus solito huic Numini voto, ne ogeretur deferere sororem suam, proximum ingressus est xenodochium, quo includuntur hi qui insaniam suam Amori debent, ut mentita amentia, sibi liceret quod amat expostulare.* Cum petiissem ab uno supplicantium an ibi tuto habitarent qui mentem ab ictu Cupidinis amisissent, ubi narravit peregrinos per novem tantum dies sacris operari solitos, quibus præteritis cogerentur de templo discedere, pollicitus est rectoris officium si auderem præeuntis gressus premere; & illico præcessit.

Ædes pluribus fenestris conspicua tot aditibus accipit solem, quot ille diebus revolvit anni cursus, & tempestatum mutationes inchoat. Aëris mira libertas captivitatem animorum aliquo

quo modo reparat. Placidi fluctus inquietam domum grato circuitu coronant. Cerebri quoque calorem temperat arborum frigus, & certas cujusque spes aut desideria partiuntur varii flores, quos ad animos incolarum avertendos à perturbationibus ars solertior Natura patentibus pratis inseruit, ut interna vulnera gratus aspectus & odor suavis mitigarent. Ibi senex castigabat canitiem suam, quæ sibi fabricata fuerat repudium. Prope matrona intermoriente vultu querebatur hæreditates ætatis officio quæsitæ cito consumpsisse. Feralis zelotypia fuscabat adjacentis membra, & jam frontem ad desiderium necis contraxerat. Lugebat adolescentula virginitatis florem gratis extinxisse. Ille inconstantiam muliebrem damnabat. Alter perabat se ad desperationem, & de sinistris circumstantium lateribus cæca manu quærebat gladium ad quem confugeret. Puella contemni formam suam dolebat. Fugiebat Pigiciaca sacra candidus puer, & trucem dominam vocabat in auxilium suum. Adolescens exanimato similis audiebat alium commemorantem præterita gaudia, & in præsentia mala triste moerentem. Alloquebatur undas alter, & ruptis induciis quæ pugnam suspenderant irritata manu vellebat capillos qui foeminam inconstantem male tenuissent. Erant qui per dilucida furoris intervalla cantu & nervis dolorem suum fallerent. Qui lugubre carmen scriberent. Qui auras in vectiva in amicas exarata turpiter onerarent. Qui desilirent in fluctus. Qui præcipitia quærerent, quibus Sappho flammæ suas extinxit. Qui genas lacrymis madentes unguibus lacerarent, manibus vincirent collum, & de funesta cupressus fronde velut ab infami ligno penderent. Putares hæc supplicia Virgilium vidisse, dum ait :

*Hic quos durus Amor crudeli tabe peredit  
Campus habet : non hos cura cum mente relinquunt,  
Luctus & ultrices posuere cubilia morbi,  
Et metus, & durum redivivus funere lethum.*

*Cinctaque sanguineam demens discordia pallam.  
 Hinc exaudiri gemitus, & sava sonore  
 Verbera, tum stridor ferri, tractaque catena,  
 Iammanisque Dei fulmen, facundaque pænis  
 Pectora, non ullo requiem sumptura tumultu,  
 Non mihi si lingua centum sint, oraque centum,  
 Ferrea vox, omnes furiarum dicere causas,  
 Omnia pænarum comprehendere nomina possim.*

Atenim mortalibus de possessione rationis de-  
 jectis, & tanquam bello captis, liberum suppli-  
 ciorum arbitrium mastigophori denegabant, qui  
 amoris ægritudinem voce, & verberibus, & ob-  
 scuris carceribus miserantes, frangebant nobilem  
 amentiam, quam fecerat otium magister sceleris,  
 & malorum omnium ingeniosus artifex.

Inter eos qui curabant ne insanientes vel in-  
 somnio vel injuria ante diem suum præcipitata  
 morte decumberent, nescio quis benignioris vul-  
 tus petiit à me an aliquem eorum quos eadem in-  
 sania diversis motibus agebat, mercari destinasse,  
 qui laudabili furore, & grato mentis excessu,  
 mœstitiæ hominibus semper insidiantis rubi-  
 gine animum detergeret. Scis, inquam, unum-  
 quemque concivibus suis delectari, siue natus  
 sermo conciliet homines invicem, siue ejusdem  
 aëris haustus inducant paritatem morum. Sero  
 placebit ille quem non intellexeris. Horror trans-  
 pyrenæi sermonis Eleutherianorum faciles men-  
 tes turbat, cum isti simplicitatem & civilem mol-  
 litiem loquendo profiteantur, illi, quasi in impe-  
 randi sortem geniti, barbaris vocibus, & absurdis  
 in suam aut patriæ laudem laudibus effusi, cum  
 multo fastidio confodiant aures audientiū. Præ-  
 terea ubi nobis humanitas nostra satisfecit, quæ-  
 rimus in vicinia nostra quem in partem divitiarū  
 nostrarū vocemus, quem sine fūco dilectum in  
 distributionem beatitudinis nostræ arrogemus:  
 non specie rigidioris patris familias auspiciū ad-  
 optionis per servitutem adoptati inchoantis; sed  
 amicitiae jucunda familiaritate, & consuetudine  
 pulcherrima, qua senes lætis auguriis in jura sua  
 juven-



juventutem deducunt. Placet itaque, per Eleutherianum, si eorum aliquem locus hic habeat, voluptatem ridendi emptione parare, & innoxiiis jocis excutere tristitiam quam fecit longior peregrinatio. Subtulit ille onerosum supercilium, & Ne, inquit, tam barbari simus, ut nos nostrorum amentia delectet. Quis ferat hoc patriæ suæ ludibrium, ut eas delicias pretiosas existimemus quæ per concivium calamitates distributæ, graves animos lugubri & mœsto intuitu subducunt? Viscerales miseriæ melius nos movent, quam ut tristissimos rideamus casus quibus infœlix aliorum voluptas blanditur: Liceat Eleutherianis in omnibus delirare: dum Melandriis sufficiat non aliis quam Amoris spiculis de mente sua perire. Omnibus gentibus cœlestia sidera varias plagas intulerunt, multumque interest ad vitia quo cœlo soloque nascamur. Cum cœlestes causæ præter morum discrimina, morborum etiam animi pariter & corporis varias species inferant. Vtraque Græcia de cœlo suo masculorum amorem trahit. Melandria turbatur zelotypis ignibus, & tot montibus, tot æstibus Oceani, tot Tyrrheni maris littoribus ab hostibus tuta, in unius Cupidinis vulnera ad insaniam patet. Taceo reliquarum nationum collapsi, aut excisi cerebri vitia, dum in Eleutherianis omnia condemno quæ singula in omnibus sunt. Nos lamentis & miseratione tristi prosequimur in hoc xenodochio furescentes; illi ludibriis eisdem, tumultu quoque, & injuriis in publico, & frequentia. Vnde fit, ut in aulis Melandriorum magnatum non alii amantes frequentis familiæ subjiciantur opprobriis, quam quos Eleutheria ad nostros risus educat: quide mœsta sollicitudine, & gravi superbia nunquam exeunt, nisi antea arcanam sapientiam fregerint externa mala quæ jocus inconsultus facit, & pervicax reliquorum hominum insania. Neque mirum est vacuam hodie civibus illis domum quos Eleutheria infœlici genio ad voluptatem nostram gignit: cum ut quisque in has ædes venit,

statim in potentiorum numerosa servitia transcribatur, ut innocenti furore domino suo placeat. Sic nuper Axonius præfectus Parthenopes, & Insucriorum rector, Eleutherianum quemdam Alitophilum emotæ mentis inquietudine jucunda commendabilem satellitio suo cooptatum secum in imperium suum deduxit, qui nescio cujus Chloridis amore flagrans mentis salubritatem perdididerat. Quid facerem? nisi Divis irascerer qui ærumnas veteres tristioribus cumulant, aut non exaudire velle miserrimæ preces videbantur, aut contempsisse mortalitatem importunis vel intempestivis votis lassatam patientiam turbantem. Nimirum cœlestium vigilantia periculorum humanorum negligens esse cœpit, vel usu & assuetudine fatigata hebes, & detrita restat: Etiam mala Numina reliquistis terram? & senio sicut negotiorum mole fessa, stupida & incuriosa negligentia subsidium denegatis orbi, & mortalibus precarium spiritum inter miseras producentibus; adeo difficile est etiam infœlicibus mori. O calliditas futilis, calamitosum commentum, mendacium fallax: Per speciem violati Iudicii illulistis foelicitati meæ, & arcanis affectibus junctos interfuso mari dijunxistis. Nec plura; vere furens exero me de domo insana; & vagos gressus ad iter incertum compono. Iamque planitiem camporum provecta, sylvosi montis asperum jugum metiebar: obtulit sese mihi inertissimorum hominum tristissimum spectaculum. Armati juvenes ponè adolescentem stabant, qui catenis vinctus supposuerat candidum collum invisæ carnificinæ. Huc, inquam, conferto agmine socii concurrite, sceleratissimis latronibus mortem daturi, quam minantur. Dum accurro nec mea geminata sacrificium quod parabant, & sicariorum sitim sedatura insperato sanguine: credidere illi missum militum agmen in perniciem suam. Igitur distulere supplicium, & sacram victimam intactam relinquentes, spississima

simam querecum nocte fugam suam condidere.

*Ceu lupus aggressum quem nocte mapalia fidi*

*Latravit populere canes, vestigia retro*

*Pressa refert, nemora alte petens, candamque remulcet*

*Hirsutam, vacuoque dolet discedere victu.*

Simul adolescentem de funesta morte erutum ad salutarem libertatem ruptis vinculis remitto, Retexit ille jugulum quod lictoris manus nudaverat, & supplicii quod exierat causas blandissima voce in hunc sensum palam fecit.

Quoniam magnæ urbes & opulentæ in vitia sceleraque magis patent, vilesciente inter politiorem vitam infamia peccandi: recenti edicto Tarentini prohibuerunt, ne quis ante nuptiarum diem virginibus misceretur; quarum antea stupra tam grata licentia placebant hominibus, ut illi nihil minus probarent quam matrimonia & nuptias. Sed jam necessitate coacti ad conjugales leges eo libentius feruntur, quo vident eos qui nunquam uxores duxerunt omnibus commodis prohibitos, interque ignominiosos latitantes, excludi theatro, & illis honoribus ad quos militari gloria & eloquio indistincte quondam perveniebatur. His repagulis juvenes suos impetus coercerent, quibus non licet nisi cum timore infamis exitii peccare. Inveniuntur tamen puellæ quæ per pericula mortis alienæ ad vetitas delicias ardentius suspirent. Vtenim febricitantium sitim interdictus potus accendit, ut ignis aspergine modica lympharum ferocius augetur: Sic coacta probitas acuit aviditatem jejunæ mentis, & inconsultam juventutem ad mala furta imprudenter propellit: quæ ventura in maturitatis & prudentiæ adoptionem, illo tamen insolentis ætatis lubrico si non cadit, titubat.

Antequam vulgaretur edictum, assueveram Polinices amplexibus, quæ de summa regni nobilitate in ministerium Tarentinorum reginæ accita, præcipua erat à consiliis regalis formæ, ornatrix ingeniosa, quæ variis flexibus torquebat capillos, ornabat vestes, vultus componebat,

ne naturalem formam indecenti & affcetitio cultu excæcaret. Exasperat homines imperata correctio, & melius jubetur licentia. Enim ut flammæ suas ad interdictum vocari vidit, non contenta vulgari complexu ad alios etiam amores crescentes contra novum imperium flammæ sustulit, & statim in viro principe arsit, qui cælibis vitæ voluptatibus lassus, jam ad nuptias suspexerat.

Non puduit infelicem puellam mihi quoque furtivum dolorem credere: pollicita si ad Machimi matrimonium pervenisset, præter corporis sui continuatum usum, daturam se munera ultra meam spem, sortemque, quibus videri possem sibi gratissimi lenocinii officium magno emisse. His promissis inescatus, laxavi pectus venienti calamitati, quæ me ad hunc lucum perduxit, tristissima morte nimium laxæ bonitatis & imprudentis obedientiæ luiturum pœnas, nisi te in meam & Machimi salutem huic loco fors stetisset. Nam cum arcani incendii faces quibus Polinice deflagrabat Machimo detexissem, & ille quæsitum ardorem amore Aglajæ excusasset, quam petiturus erat à regina in connubium: addidissetque pœnam legis novæ quæ stupra ulciscébatur capite; turpissimo illa inhorruit odio, & totam ingenii solertiam ad crudelissimam vindictam convertit. Ea est natura mulierum, ut suas inimicitias dissimili vultu tegant, cum amicitias celare non possint. Scilicet infidelis sexus licet loquax esse amet, quoniam tamen facillime ad mala movetur, verborum occultorum viam, & secretas iras, improba faciei serenitate & robusto silentio tegit, constans in arcanum dolum.

Igitur ut me lateret feralium insidiarum deliberatio, Nihil magis, inquit, amentes oculos recreat, quam paria aut similia in alio intueri quæ in amato videntur, vel creduntur. Placebis mihi sigestibus, & voce, & vestibus ingrati Machimi effingere coneris imaginem. Hac nimirum similitudine velut pabulo saginatus amor statim cru-

desceat,

descet, hoc mendacio satiatus excitabit nauseam, & celeres animi æstuantis motus ad facilem tranquillitatem reducet. Sic bellariorum luxuria suaviore quã necesse est condimento consumunt famem, cum languentem gustum nihil magis excitet acri & solido cibo. Summa erit infelicitis consolatio esse miseram nec videri. Promisi quod volebat; nec secius illa opulentum ad fraudes ingenium in Aglajæ perniciem laxavit. Adiit amantem, & castigata ad hilaritatem fronte, fractoque in malignam contumeliam vultu, Non possum, inquit, simulationem intra me diutius sustinere. Fugandus est amor qui pectus tuum insana spe demulcet, & contumacissimo vulnere cicatrix inducenda. Pessimus ille Machimus, quem sacramentum solemne, quem reginæ consensus, quem corporum animorumque legitima mixtura fecere meum; insidiatur pudicitie tuæ, & infamiam tuam sub sterili nuptiarum titulo sollicitat. Si sapis ergo, de visceribus tuis luctantem cupidinem decuties, & famosum impudicæ quod imminet nomen natalium tuorum decori reddes.

Cum Aglaja negasset dicenti fidem, Peream, inquit, nisi & illos tuos oculos in testimonium delictiarum mearum vocem: si per tenebrarum secreta in furta nostra audeas inquirere, & in opprobrium tuum aperire vultus, quos ille decipit. Annuit illa, suo malo. Silebant cuncta, & nigræ nubes fulgorem siderum tegebant latebat Aglaja ad limen cubiculi quod ad amplexus nostros dudum elegarat Polinice. Quæ ubi me pari habitu, & voce in Machimi speciem effigiatum vidit, verum Machimum arbitrata, quem in Polinices osculo diutius hærentem conspexerat:

— illi.

*Poplite succiduo genua intremuere, fugitque  
Et color, & sanguis, Machimi ad crimina mæsta:  
Illaque quo propior sceleri est, magis horret, & ausi  
Pænitet. & visi testes sua lumina damnat,  
Armassetque suam contra sua viscera dextram,  
Ni vellet periisse simul quo flagrat, & edit.*

Initio

Initio nondum maturus dolor leni tractu ad requiem fertur, qui ubi frangitur velut fluvius occurrentibus saxis, per angustias eluctatus excitat sese, & jam dissimilis sibi, & in torrentis modum violentus, in alienam perniciem per malignos transitus profilit, cæco impetu, & tumultu impacato obstantia quæque convellens: & nisi vincitur, vincit. Hoc agitur Aglaja pacatis primum fluctibus: ubi tranquillitatem fregerenti, aut obvia rupes, in turbidi maris speciem volvit aquas, & occisas spes in tumultum secum tractura truculenta celeritate Machimum adhuc suum in jus vocat, postulat nomen ejus recipi, edit subscriptionem, & accusationem violentam de stupro movet.

Statim injecere lictores Machimo manum, & judices de tribunalibus pendentes, quia præter eam quæ accusaverat testes non erant, de vetere instituto Reipublicæ reo concessum est, ut innocentiam suam alieno gladio tutaretur, & nisi intra mensis terminum inveniret equitem qui se defenderet, ut in convictum secundum patrias leges animadversuros.

Verebatur Polinice ne tenera mens innocentis supplicio ad pietatem & misericordiam commota, fraudes suas vulgaret; placuit etiam sanguine meo maculare ferinas manus, perque cunctos qui ante te fugere sicarios insidiarum suatum solum testem subtrahere innocentiae Machimi, qui per te licet in meliorem fortunam surrecturus est, si generosissimi hominis salutem mei capitis periculo velis emere.

Talia divino decore venerabilis adolescens Choridi narrabat, illa mihi. Nunc vero quæ vidi ipsa, sub Apolidis nomine paucis accipite, ne suspendam diutius cupiditatem vestram, & nimiam auditionis patientiam inutili loquacitate frangam.

Vt in hanc causam cum illo adolescente venit Apolis, statim in Machimi libertatem intentus familia nostra subsequente Tarentum ingreditur,

tur, suscepturus innocentis defensionem. Afflig-  
 natus est itaque pugnæ locus, & educti in cam-  
 pum hinc Apolis, inde Aglaja. Non omnes Ama-  
 zones Phalidis ripas colunt, nec in totum vires  
 & animos mater natura muliebri sexui subtra-  
 xit. Plerisque puellarum tantum generositatis in  
 corde, quantum sanguinis & pudoris in ore: ubi  
 maxime contumaces in amorem aut odium ze-  
 lotypia succendit. Sæpius enim læsa ingenia in  
 periculum tam ferri quam ignium misit derisus  
 amor, ipsa gloriæ cupiditate. Virtus tamen hic  
 in parte est, quæ non patitur innocentem pro-  
 teri, & alienis injuriis gravis, quidquid obstat  
 ultore gladio prosternit. Cito deformitas expri-  
 mitur certis sui notis ad imitationem facilis:  
 ardua res est pulchritudo, & ipsa raritate diffi-  
 cilis; nunquam nisi lento sermone, & ab humi-  
 li stylo suscipitur. Sic quoque communis virtus  
 subtili calamo delineata invenit imaginem sui,  
 ubi vero sese ultra miraculum egit, non habet  
 nisi vilem & sordidum suarum laudum narrato-  
 rem: materia sua quam arte felicior. Faciam ita-  
 que quod historici etiam solent: ubi tenuitatem  
 suam ingentia facta excedunt, ad inventa Poëta-  
 rum animos & verba contorquent. Nec longe  
 est ab illo more, istud quod dico. Palluit ad tan-  
 tum certamen Thetis, & argenteum pedum co-  
 lorem deduxit in vultum. Ipseque Neptunus  
 alias inter tempestates intrepidus, ad tanto-  
 rum ictuum formidabiles auditus, permisit pa-  
 vidæ albidini undas suas, & ne oblivisceretur  
 imperium suum, ad Oceanum patrem descendit,  
 jura Nereidibus daturus. Sola Venus in mor-  
 tem pugnantium demiserat de cœlo in terras læ-  
 tos oculos, & ad cruoris mutuo vulnere crude-  
 liter manantis aspectum grata titillatione lubri-  
 cum corpus agitabat: timens nimirum ne suum  
 Martisque numen, cum mortalibus puellis par-  
 tiarium esset, cum venerationis suæ præcipuam  
 vultibus imaginem, & validis membris robur  
 Martis, utraque circumferret.



*Crodas ad Tanaim, feramque Phasis,*

*Thermodontiacas calere turmas.*

*Edunt vulnera, conferuntque dextras,*

*Et mortem sibi qua manus minantur*

*Ridet Mars pater, & cruenta Cypris.*

Vtramque tandem par rabies ad exitium usque temerasset, nisi adolescens ille qui Apolide suam vitam debebat, ante Reginæ pedes prolapsus, sustulisset duellum, & certantes ad querelam suam ab ictibus vocasset: qui ubi fraudem Polinices manifestam fecit, ingenuitate sua meruit veniam professi stupri, & in pœnam Machimi tradidit exosam Polinice, quæ de Senatus decreto cremata, ostendit non longe eos à naufragiis esse qui serenioris tranquillitate in altum propecti improvvisis turbinibus agitantur, ubi maxime timere desierunt.

Hoc eventu Machimus & Aglaja spiritum, & sanguinem, & libertatem recepere, quæ omnia recens calamitas utrisque per muliebres insidias abstulerat. Perfregit interim Apolis circumstantem turbam, & per obstructos aditus non secus ac per apertas planicies & invitantia limina rediit incognitus in hanc domum. Permanfitque in ea pauperis turgurii comes, donec eum obducta vulnera & liberior aër, & vicini maris commoditas, ad Alitophili quæsitonem revocarent.

Videbatur exiguam nubem fax componere, cujus lumen vespertinas epulas inchoaverat: & illico longiore patore vibrata flammula sub historiæ finem cecidit, donec tristissimis tenebris in somnum labentes obrueret. Tunc vero dejectis luminibus mœstus crebro in singultibus eram. Nunquam exegi noctem tam amaræ sollicitudinis, & nisi jamdudum fuisset à quo amare noveram, à corpore meo quæsissem valetudinem. Sed animus miris cogitationibus territus irrequietam cupiditatem augebat ad Chloridis vestigationem, & jam certum erat transmittere maria, & terras omnes circumire; cum in hoc cogitationum salo & mentis æstibus fluctuantem dies invenit. Su-

mo ser-

mo sarcinulas, & iter ingredior quod ad mare ducebat. Nec mora Vindocinus sequebatur desertorem. Ecce senex rusticæ anus maritus cum filio Tarento reversus querebatur de fuga nostra, hospitiumque suum tanto scelere pollui dolebat. Rediimus, & postquam ille largioribus epulis excepit fugitivos, absentiam suam à domo bonus paterfamilias sic nobis excusavit.

Recurrebat magnus ille annus qui sæculum novum incipit, & in urbe Tarentinorum Etæridio Iovi sacra fiebant quæ nullus hominum bis videt. Vitæ meæ tranquillitatem sollicitavit curiosâ pietas, ut & recalesceret per ferias pristinus labor, & ad rarissimum spectaculum rustica mens percussa ultra delicias ruris aliquantulum respiraret. Igitur ego & filius venimus in forum quod in altitudinem montis porrectum faciebat urbis umbilicum.

*Surgebat ab ortu*

*Lucifer, & pulsa Phæbo concesserat umbra  
Ithomes sublime jugum, simulataque magnis  
Flumina elepsydra vitrea pellucida lympha.  
Quæ per claustra ruens montis crepitante lapillo  
Ludebat, fluctusque suos miscebat amaris,  
Stabat & effigies Cretea robilis Ida  
Infanti reptata Iovi, quem Neda paternis  
Faucibus ereptum caco celaverat antro.  
Hoc super impositum, nascentis lumina Phæbi  
Spectabat templum, quod per miracula lassos  
Ducebat diversa oculos: seu gemma lapillis  
Intermissa novis, seu vultibus aris & auri  
Mixa simul, seu marmor erat, seu concolor alto  
Vena mari, Phrygiusve silex, aut durus jaspis.  
Huc oculis, huc mente trahor. Diversa figuris  
Viva metalla micant, fulget quoque picta per artes.  
Tellus partitas, & opes quas porrigit optat  
Calcari, & placida venientes luce salutat.  
Iupiter ipse alto celsum caput aere septus  
Templas perfulget, tanta sub pondere molis  
Ara gemit, pressusque tremat mons sub Iove tanto.  
Quantus erat cum Phlegreis Titæus in agris*

*Sublimi de nube tonans ad Tartara misit.*

*Mitior ille tamen blando spectare videtur*

*Intrantes visu : neque enim sua dextra minatur*

*Fulmina, nec saxum consurgit ab agide pectus,*

*It tergo demissa chlamys, dextraque quietam*

*Mulcet avem, gaudetque suo quo nubila pellit,*

*Pulcrrior aspectu fulgere, & ponere curas.*

Lignatores varia congerie ilicis & myrtus oneraverant Doricās aras. Aedituilectisternia fecerant. Pulvinaria struxerat curio. Simul virgines verno florentes coronamine, & humum flosculis sternentes æquali cum Musis numero ad musicos modos saltantes occupavere medium templi. Præibat intonsus juvenis Apollinis specie venustissimam puellarum turbam, ad cytharæ nervos tam blando concentu digitos infringens, ut eum patrem suum crederet Æsculapius si aut sagittas habuisset, aut arcum. Consumptis carminibus quæ celebris poëta Iovis laudibus impleverat intravere in templum virgines aliæ ministræ sacrorum invitante adstantes præcone ut facilem sacrificio viam darent. Hæc æneum vas exansatum præferebat. Illa simpulum dextra tenebat. Inferebat altera myrrhas, cassiam, crocum, & libanoton. Succedebat lectissima adolescentula bellaria vimine clausa capite sustinens. Erat quæ canistro hordeum cum sale deferret, quæ gereret acerram, quæ candelabrum, malleolum, secespitam, pateram, discum, enclabrin, dolabrum, vaginam, & ollam. Post hæc turbæ divinis sacris initiatæ sacrificuli, & sacerdotes, & flamines querneis frondibus evincti tempora, niveasque induti vestes gallum gallinaceum ad aram trahebant ornatum tenuis, vittisque diversi coloribus. Exornabat pompam regina eburneo curru vecta, tam grata forma, & læto habitu congruente formæ, ut eam pro vero numine coluisses, nisi quod suavissimo colloquio blandiebatur hominibus quod à Iovis statuis torpens marmor removerat. Iam Pont. Maximus ambabus manibus fluvialem aquam receperat, & extremis digi-

gitis avulsas de victimæ fronte plumulas merse-  
rat in rogam: annuerat quoque sacrificio gallus,  
& effusum supra se vinum fluctuante spinula, &  
capite suaviter commoto, passus, succincto popæ  
præbebat jugulum. Despumabat interim san-  
guis, & vividum corpus vario subsultu gestiebat  
in mortem. Creniata demum victima, vinoque  
& thure in flammâ profusis, continua mensa di-  
scubere sacrificantes. Epulum autem illud Phi-  
litium vocant, id est, sociale, sive amicum, Iovi  
Etæridio, qui & Philius dicitur, sacrum. Post  
hæc gratiis Deo peractis, receptisque novissimis  
verbis, singuli domum discessere, omnibus ta-  
men ante aqua cum sanguine victimæ in cherni-  
pem missa, lustratis, dimissisque.

Impleverat omnes sacrificii partes rusticus,  
cum ego adeum. Scis, inquam, pater, cur Iovi  
Etæridio mactetur gallus, quem non alias ad aras  
jugulatum legimus, quam ad eas, quas Æscula-  
pio, aut Somno, aut Morti, aut Mercurio, sacra-  
vit antiquitas? Et quid nî, inquit, sciam, cum ni-  
hil aliud magis in hac terrarû orâ iactetur, quam  
illa solemnâ sacri longæva pietas, & incorrupta  
tot seculis ceremoniarum observatio.

Erant in Tarentina civitate Rex & Regina,  
præcipualicet forma commendabiles, magis ta-  
men amore mutuo. Non satis fuit juveni regi  
amoris vinculis pari nexu cum amante conjugè  
copulari, quæsiivit inter subditos quem dilige-  
ret, & in strictioris consilii pertraheret arcana.  
Sed amicitia inter dispares contracta deformi  
exitio plerumque fœdatur, & nihil est tutius  
in societatibus æqualitate. Subditi in quorum  
auxilium foelicitas festinat familiaritate princi-  
pis male utentes aut capiuntur, aut capiunt. Et  
si quando Reges in eam humilitatem venere ut  
dignati fuerint impotentem amicitiam, statim  
eos aut perfidia malorum amicorum subvertit,  
aut invidia reliquorum qui ad eandem autho-  
ritatem suspirant, quos amant præmaturis fu-  
neribus involvunt. Quid vos ad exempla pro-  
positio-

positionis certissimæ mittam, quæ aut facilitatem regum oppresserunt ineluctabili fato, aut amatos subditos in vota paupertatis coëgerunt, & mortis extracalamitatem infamiæ? Inter alios placuit huic regi Apistum quemdam in familiaritatem suam devincire, partiri cum eo curas imperii, & crudeliter ingratum obligare secreto quo naturam etiam corrumpebat. Vt potè qui quoties vellet in omne animal intra momentum temporis reformatet sese, & extincto corpore suo in alieno viveret. Hunc itaque secum cubiculo includens, Age, inquit, aufer formidines pueriles, & amicum tuum suos spiritus alienis membris inducentem mirare. Simul extinxit passerem, & supinus in terram mortuæ avis rostrum inseruit ori suo. Iacuit regium corpus exanime, & redi-vivo tinnitu passer, vario subsultu Apistum repentinæ visionis stupore turbavit. Nunc insidebat mirantis capiti, nunc irrequieto volatu inter-turbans aërem huc atque illuc prosiliebat, nunc lasciviente pipillatione illudebat in horrorem de-fixo. Rediit tandem volucris ad humanum cada-ver, iterumque inserto pallidis labris rostro red-didit mutuatam animam, suisque spiritibus ja-centes venas implevit. Arrexerat animos ad tan-tum miraculum Apistus, herbulaque morfa, & alia pectori imposita tentavit scientiam regis. Nec mora spiritus sui sufflatione animavit passerem, & modo huc, modo illuc circumfiliens, ubi au-daci volatu lætatus est, rediit ad suum cadaver. Hujus secreti assiduitate regi carior indies factus, occultato sceleris quod parabat consilio amici fi-delissimi personam mentiebatur. Intus enim am-bitione regnandi & reginæ amore tenebatur ad desperationem salutis, si perfidiam neglexisset. Nova nimirum varietate morum, confusaque vi-tiorum temperie, ut idem est ferocissimus hostis, ita & mitissimus amicus.

Spectate quæso quo furiosæ libidinis, & insa-na regnandi desideria prorumpunt. Forte mole negotiorum pressum animum juvenis rex vena-tione

tione laxaturus assumpto Apisto in sylvas exierat.

*Ecce fera saxi dejecta vertice capra*

*Decurrere jugis, timidaque in caede patentes*

*Transiunt cursu campos, montesque relinquunt.*

Venatores ad latratus canum per avia sylvæ secesserant solus cum rege Apistus in fugitivam caprarum turbam spiculum contorsit. Hæc ore utriusque sagittæ fugientium pectoribus, & in certissimam necem vulneratas capras transfixere. Ille vero nactus fraudium opportunam occasionem, regem ad experientiam notissimi secreti compulit. Desiliit uterque ab equo ut alienæ cædi totus immineret: sed prior rex in perniciem suam super capræ quod fecerat cadaver porrectus, in momentariæ vitæ officia quam occiderat feram reduxit. Hebetes artus & pigra frigore membra recepto spiritu in antiquam celeritatem torquentur, & ad obsequium inexpugnabilis arboris de terra resultant. Ridet Apistus innocentiam regis, & de capra sua surgens regio corpori totus incumbit. Accepere fibræ indignum spiritum, & honestum pectus ad coactam arcani violentiam infelicitè surrexit. Dedignata est cadaver Apisti regalis capra, quæ eo miserius sensum retinebat humanum, ut sciret fera quantum homo peccaverat. Fugit per nemora quo natura ferialium exuviarum ducebat animam rationis compotem: & jam non suam manum timens ante suum cadaver celeri fuga pervolat.

At regina nescio quo infortunii sui præfagio pæne ad desperationem perterrita, mirari cœpit in corpore conjugis sui dissimilem mentem, & eo exploratius falsi regis sermones excipere quod dudum insidias Apisti senserat. Idem proditori gestus, eadem vox quæ quondam conjugii suo: Sed mentis actus, alloqui, & affectuum dissimilitudo augebant sollicitudinem quod erat suspicantis. Ecce peractis inferiis, & suo corpore ditissimis marioribus incluso, venit ad reginam Apistus, & veluti sedaturus dolorem, quem pro amici morte alieno vultu simulabat, amplexum

petit. Sed illa distulit desiderium petitoris ad nonum diem, quoad ultimum proclamatus Apistus mortuorum quieti concederet. Interim sylvestris capra necessitati succumbens contumeliæ suæ serviebat, & per solitudines nemorum discurrens, luctu ac mœrore carpebat animum virilem. Forte recenti ictu decussus ab arbore psittacus vitam amiserat, statim reliquit diram quadrupedis imaginem regius animus, & sese psittaci viduis calore membris inspiratione mirabili intrivit. Vix efflaverat humanum spiritum, sublimatur avis in cœlum, & expansis alis mutatum corpus puriori aëri credit. Tum visis desuper retiis quæ avibus auceps tetenderat, spontanea captura implicatus, prudenti loquela meruit benevolentiam magistri, qui ab auribus suis interioris hominis internum & purissimum quærebat sensum. Neque sapiens avis respuit aucupis amicitiam, sed promisit insperatas opes si se reginæ donasset. Certe illa cubiculo suo inclusa, te nebris imis abscondita, dies noctesque lamentis cum ancilla fidelissima ducebat: accepit aucupis donum, & silentem ad aspectum suum avempriorum dierum incuria pæne sepelivit in mortem. Tunc inter has moras blandissima voce infit psittacus. Corcule mi, quid affligas te, & sine alimento corpus trahis, cujus contrectandi desiderio flagrat Apistus sub illo meo vultu quem crudeliter induit. Depelle hostis ferocissimi nece feralem hanc faciem, redde me tibi, aut si quod offensum numen implacabili me furore premit, mori saltem liceat, si tecum non licet vivere. Noli, mi conjunx, thoro acquiescere cum Apisto illo qui amicitiam nostram per scelus violavit ut te frueretur; Quique patricidio meo nuptias tuas auspicatus, ab imagine mea quam male circumfert quærit insanis ignibus subsidium.

Horruit regina, & veluti fulmine icta decidit in terram: Sed intervallo revalescente corpore animam quoque repentino dolore obnubilatam reduxit ad lucem, Cum Apistus cubiculum ejus

ingre-



ingrediens pervicaci persequitur Regina quærit, quid doleat. At illa turbata se somnio simulans ne mœrorem suum exulceraret invisa narratione precabatur. Sed eo causas præsentis doloris instantius quærente, non tardata est Regina nocturnas imagines in hunc modum mentiri.

Videbatur mihi secundum quietem Venus dicere: Deridet rex cupidinem tuum, & jam perditam, tuis votis inexorabilis, mancipavit ingenium extraneæ pulchritudini. Quid importunis sacris sollicitas divinitatem meam? tibi præcipitium capeffendum est, aut venenum, aut laqueus, ne fidelibus oculis infidelem videas ad latus suum concubinam applicantem. Hujus vocis horrore commota, funesto somno pavens excussa sum. Sed nunquam impune ad mala mea turbatus animus de nocte miseras meas conspicatus est; suas ista causas habent: aut ex vitio meo, aut ex imperio factorum sæviunt: & istæ visiones certis eventibus corroboratæ, quod prædixerunt calamitosa divinatione sæpissime sanxerunt. Cumuletur precor prædicatum infortunium confessione tua. Si enim contempto castissimæ conjugis amore deliberasti de domo & thalamo tuo deturbare constanter amantem, parata sum imperiū crudele sequi, & per avias solitudines ferarum clementiam in meam mortem deprecari, Quod si falsa sint somporis infortunatissimi præsagia, & in meliorem sortem anxiatum spiritū Dii noctis præfides vocant: per ego hanc tuam dexteram cui sincerum osculum pono, in solatium meum placeat tibi experiri secretum, quo sæpius mutatus in alitem demulsisti sollicitudines meas. Reddes me mihi, tristitiem animi, corporis languorem avocabis, si mœstæ desiderio satisfeceris, quod à te solum hoc infracti cupidinis tui testimonium quærit. Neque enim reor in tam sancto pectore omnis prorsus exaruit miseratio, nec ingrata levitas caritatis antiquæ fœdus rupit.

Nunquam ardentius ad alienas preces succubuit simulatus rex, quam ad istas, quarum ope

non sui thori petitor & amabilis, reginæ odium suum dissimulantis irroget talibidine desideratos devorabat amplexus. Sed hominibus certa & perpetua sibi promittentibus Deus illudit; qui varietate tempestatum, æquoris inquietudine, elementorum conversione, ostendit etiam id omne quod supra nos est, stabile non esse; omnia in servitutem fati venire, & omnes mortales ad caducitatem nasci. Eliminantur ancillæ cubiculo, gallus infertur, & ille execrabilis parricida vigilem avem premendo suffocat. Delabitur in terram, & ut animam exhauriant consentiunt in voluntariam mortem regia membra, spiritusque proditoris Apisti de alieno corpore exiens generosæ volucris cadaveri gaudet inferi. Nec sequius de cavea sua psittacus erumpens alienatum per plures dies spiritum fibris suis reddidit. Tunc rex & regina apertis cubiculi foribus numerosissimum famulitium intro vocarunt. Latebat gallus exitii sui intelligens nunc hoc, nunc illo angulo; & timore diro frendens demissis in terram luminibus expectabat omnes injurias. Singuli sollicitati sententiam suam dicere, in execrandi mancipii necem judicium tulerant: Sed tam vario supplicio, ut neq; Perillus ingeniosior in poenam fuerit. Decretum tandem ut Iovi Etæridio (qui propitiis nutibus involuntarium regis & reginæ dissidium in melius vertisset) templum construeretur; mactaretur ad illius aram gallus; & Apisti anima illa quæ per fraudem insinuaverat se regalibus venis, in alieno sanguine funderetur, incertoque cursu erraret inter terram & cœlum, detracto nimirum è sepulchro suo fraudulentum hominis cadavere, ut inhumatis cineribus, animus circum littora stygiæ paludis annos centum volitaret. Vnde non ante renovatur sacrificium galli, quam Sol in sese per totidem annos rediens impleverit seculum.

Dum hæc diligentius audimus, filia rustici ad patrem. Homo, inquit, ante fores casam tuam pro diversorio petit, & puto ad lasitudinem pedibus

dibus æger, quærit humanitatem stabuli, quo assumptas per iter vires resumat. Subjecit rusticus: An etiam tu ignoras hanc casam viatoribus patere quo se omnium externorum fortuna conjiciat, quæque omnes divitias suas ultro peregrinis accommodat, ut cæteri mortales sciant, antiqui hospitii religionem terras nondum reliquisse. Hoc dicto regressa puella patefactis ædibus introduxit Theophilum, ita lurore & misera macie deformatum, ut rogare in triviis stipem putares: qui ubi super me contemplationem iniecit; Hem, inquit, Alitophile mi, fidelis ille comes & socius olim tuus, qui fortunæ bona maluit perdere, quam animi.

Audito Alitophili nomine variis gestibus in admirationem effictis omnes quærebant, quomodo in Chloridis historiatacuisssem, & tot exantillas ærumnas, tot labores lubricis ambagibus instabiles, tot vicissitudines malarum rerum mulieris amantissimæ liccis oculis audivisssem. Sed Theophilus aliarum miseriarum recens spectaculum scissili centunculo obvelavit faciem pudore & iracundia punicantem, uberique fletu ad miserationem compellens astantes, tenui & elisa jejuno voce, Alitophile, inquit, ne tu larvale simulacrum è nudis ossium compaginibus æstimes. Idē ingenium inter paupertatis incommoda subest, quod olim mihi inter opum luxuriam saginato ad terrorem improborum inevitabilia tela resignabat. Dulce est irasci vitiiis, & pro Veritatis defensione quærere hominum tutelam. Crescit per clades suas velox animus, & extranei odii sui que mali recognoscens in delicata satyræ voluptate corroboratur. Sive enim celebri carmine deto-neris in scelera, sive libera oratione læsæ Veritatis querelas exposueris, conciliata improborum quotquot ubique sunt invidia, & inutili pauperum laude defensus, jacebis potentiorum victima, & incertus salutis ut fugias mordaci stylo per strictam potentiam, conversatio amicorum relinquenda est, & patrimonium, & parentes,

ut in solitudinem eas, inter deformia paupertatis oscula, & infructuosum amplexum victurus.

Cæterum effervescit pulcherrimæ naturæ robur per injurias & vulnera, eoque acrius ad Interdicta torquetur quo amissis sortis bonis solius ingeniidivitias retinet. Macte animo, Alitophile, juvat immortale nomen mortalium inimicitiiis comparare, & certam solidamque posteritatis memoriam in admirationem constantiæ tuæ devincire. Sursum ingentia sunt, in quorum possessionem illitantum admittuntur qui sua conscientia contenti neglexerunt mendacium, & terro animo emicuerunt, ad conservationem veri. Ideo virtutis serio incumbere, & illa te vel ultra regum famam post obitum extollet, aut ultra tela instabilitatis, & temporum positum, consentiet te de tranquillo spectare reliquorum naufragia. Extrema mihi paupertas est, spiritus tamen alacer, & spontaneo eloquii flumine in suū decorem productus, eaque facilitatis gratia fluens, ut quicquid conceperit impetu vivido sine sudore perficiat. Sed infortunium meum auxit maxime Acigniorum invidia, qui fictæ sanctitatis induentes supercilium, in plenos innoxie jucunditatis versus totam Eleuteriam armavere, & pro sua Gephyriique potentia natalibus me pepulerunt terris, comminantes infamem mortem si quid postea lingua vel calamo in Deos hominesve peccarem. Adeo etiam vitiorum tenaces sumus; ut nolimus ea crimina reprehendi quæ leges sacratissimis sanctionibus puniri severe volūt. Videritis an hodie infelix sit virtus, quæ dudum amisit illum gloriæ titulum quem incastigata sibi scelera vendicant, dum virtutis gloriam intercipit sicut fortuita, sic & insolens felicitas. Igitur fruatur inimica fors illo suo trophæo quod ipsa de me fixit filebo mutus, & similis otioso mordebo fræna quæ libertati meæ & innocentie intrivit Acigniorum immortale in litteratos & Veritatem odium, quod omne studiorum genus paulo liberius & erectius servitute vel ne-

cecastigat. Neque ego in ista tempora atrocem ingrati actionem movebo. cum & præterita secula virtutibus inimica fuerint. Cernite nunc quantum impossibile sit bene nata ingenia deducere ad captivitatem. Nondum Veritatis amor ab hoc pectore per tot ludibria & calamitates evanuit: & licet ejus defensionem neque verbo neque scriptis audeam suscipere, est aliquid tamen melioris industriæ & laboriosæ artis, quo torpentibus lingua & manu, satisfaciam cupidini meo qui me contumaciis fatis ad scelera vindictam animavit.

Simul de tergo capsulam ligneam decussit, infraque insertis clavibus, ad internos motus funes tetendit. Hanc cum Theophilus abjecisset supra mensam, scissa in diversas partes capsula varias imagines ostendit. Percurrebat ingens fluvius immensam planiciem, & innumerabilem piscatorum turbam sustinebat scaphis. Saliebant circum littora pisces, ad quorum capturam omnis generis homines accurebant. Pars vestium sinus aquatili præda impleverat, pars canistris detinebat subulientes, alii de vimine pendulos imposuerant collo, sed omnes ad Geryonis statuam quæ in throno erat captos pisces reddebant. Ille in omnem partem vibrabat oculos, manusque ad tot divitias extendens, concatenationem mobili diversas figuras exprimebat. Tum ex parte altera, valvis excussis, de templo Ver exiit, & ad æquales numeros excitato saltu, ante Geryonem proVectum, corollis frondibusque & vario flore pedes ejus aspersit. Sequuta est Æstas saltitanis. Veris iter, & postquam vertebrarum tacito motu expressit plures gestus, flava messe exoneravit manum. Processit Autumnus quoque de templo, & vindemiam suam fructusque ante Geryonem abjecit. Tunc tardo passu, iisdem gradibus, exportata genialis Hyems pervenit ad adorationem, fertilemque dexteram laxavit ad ludum. Ridebat Geryon totius anni munera, sumptoq; inter hyemis dona fritillo ten-

tabat aleam. Cucurrit ad iactum lignea larva, & flexis retro brachiorum articulis in Geryonis necem falcem intendit. Scissum caput stridorem fecit: madebant proxima capita fraterno sanguine, & afflictum in uno vulnere triforme corpus ægre se sustinebat, amissa scilicet anima, cuius vix cætera membra stabant. Clausæ signa lætitiæ per vultus indices spectantium exhibant. Supra titulus erat, *Nihil tam utile, quam brevem potestatem esse, quæ magna sit.*

Post hæc, per nigras Stygis undas ludebant Heroum animæ quas ante diem Geryon ad Æacum miserat. Perire festinaverant, & se lethali-  
bus obtulerant vulneribus, ne servire cogerentur. Ut prospexere venientem tyrannum, exsonuit multiplicato per rupium amfractus clamore palus Cocyti, manusque & pedes ad prælium composuere: prior Typhon ad raucam & implicatam vocem stimulatus horrendum monstrum pugno coptudit. Hector, & Cæsar, & Paris, & Alexander, plebeios spiritus in vindictam suam incitavere, dedignati celebres tot triumphis dextras pulluere tam vili sanguine. Distrahebat servilis manus Geryonis spiritum Ixionis rotæ porrectum, & in omne supplicium lacerum ducebat: legebaturque ea parte carmen istud Virgilii.

*Discite Iustitiam moniti, & non temnere divos,*

Prope scribebat Clodovæo Gephyrius ut in Eleutherianorum rebellium poenam vocaret Melandrios, & Liphippum arrogaret. Sed ille qui quieti suæ & gloriæ studet, recusabat auxilium infame, & arrogationis male imitantis naturam consilium damnabat. Iamque suis comitatus, intrepido vultu palantem hostem sequebatur, mox calcata capita supervolans & consternatas gentes, docebat annorum cursum non expectandum in festinatione virtutis. Iuxta tellus instabilis, supernatante pingui luto fluctu, vestigia morientium fallebat: pars hostium inter ferrum & undas obruta, pars receptam mortem trahebat in vicinos lucos, pars deferebat in flumina semivivum corpus;

corpus; hi dolore vulnerum furoris sui admoniti in detestatione sceleris fundebant animas, aliqui sequebantur fugitivos, & integri eadem ruina mergebantur paludibus. Reliqui omnes morituri nisi reorū timorem decepisset clementia regis, qui de gravium armorum pondere blandos expediens, fidereos luminum ignes ad serenitarem contorsit. Hoc aspectu supplices conservati aliena pernicie sensere quæ fulmina Clodovæi juvenile brachium in inimicos suos torqueret. Io nunc cruentæ mortes, & quidquid ad miseras nostras contumacia rebellis invenit; redite ecce Mercurius, & caduceo suo potens iratas mentes ad blanditias reducit, quas inter miserat: temporis mœsti deformæ iustitiam. Vocem gaudentis opprimit miraculi magnitudo, quod tot cruentas incruentasque palmas Clodovæi fronti venerandæ congestit. Sequebātur triumphum, furor vinctus, cruenta crudelitas inani rugitu frendens, superbia debellata, arrogantia catenata, nexuque ferreo constricta rebellio. Sed nondum sævitiam omnem, & horrendas minas captivitas vicerat: clausum pectoribus incendium revelabat rubor vultus, & feroci ignominia furens oculus male demissus in terram. O sententia mirabilis, Nihil gloriosius est principe impune læso. Quis bene describet classem toto mari supernatantem? quis tot triremes per varios æquoris tractus remis ventisque volitantes? quis Oceani tranquillitatem tanto vectore stupefacti? quis contumacem irredivivo furore civitatem, quam non magis à nostris terris amnis & mare, quam ingeniorum diversi contrarii que motus dividunt? quis prætereaterrorem sese hostium mœnibus includentem, fugasque, & trepidationes, & vincula? Omitto regentis celeritatem occupatam etiam victoria; nimirum truces animos præsentia regis debilitat, & inter suos illud agit quod in primo momento mundi nascentis Amor, qui de tenebris excutiens sese, miti lumine tumultuantia elementorum officia pacavit. Hostium duces magna  
suorum



suorum clade rejecti in mœnia, aut incerti veniæ bellorum avidiores quam salutis sunt. Pars in montibus pendet sollicitaturaprocellas, nisi maturaverit Phœbus qui mala nubila tenui radio solet excutere. Reliqui melius consilium sequuti rediere ad tentoria Regis, & hodie strenue agentes notabili virtute abscondunt ignominiam præteritorum scelerum. Gaudet ab Olympo in Eleutheriam suam respiciens Protagon, & pridem vocatus ad beatitudinem, crescit etiam in filio, & tot victoriarum laudibus ingentia sua facta libenter accommodat. O vera Protagonis progenies; non magis sanguine quam trophæis æqualibus comprobata. Tu quidquid titubat in firmitatem reducis, si nutat, aut ruinam minatur, in medio periculi & hostium minantium improvvisus appares, & diligentiam magni parentis nescio magis imiteris, an vincas. Sed aliquando sit aliquid, ô felix anima, in quo filius tua gesta velit destituere, temperet fulmineæ dexteræ, & sanctissimum caput quo salus Eleutheriæ servatur de periculis tractum consiliis reservet: Cautius deinceps dubio se credat Marti, ne quem tot faciles victoriæ complexæ sunt, laborantes in unius incolumitate Eleutherianorum curas per incerta discriminabellorum juvenilis audacia traducat. Sit perpetuus hominum recreator, comes vero tardissimus Deorum.

Cum exclamarem, Theophilus machinator fabricæ astuta conversione tot expugnationes & pugnas absorbens, ad novas imagines spectantium oculos pertraxit. Stabat ad lances Tallicius, & ad momenta ponderum, trutinarumque motus, aurum exigebat, quod in militum stipendia contulerant provinciæ. Sed iste cum purpuratis nescio quibus partiebatur regni totius spoliis: Veniebantque ad lances bona eorum qui pro patria ceciderant, viduarum hæreditates, pupillorum pecuniæ, ornamenta matronarum, extractæ puerorum cervicibus bullæ, argentum domino-  
rum cruore perfusum, & magistratuum nobiliumque

liumque insignia. Pone centuncii milites, qui plus vulnerum quam stipendiorum acceperant, rogabant eleemosynam, & trunca membris corpora cum his literis ostendebant: Hac mercede calamitas placet.

Alii tentabant hostium patientiam, & apertis pectoribus inermes, fortem exitum precabantur, cum hac inscriptione, *Qui mori didicit, inter inopiam vivere dedidicit.* Hic mirari cœpi Eleutherianorum veram virtutem, quæ sine præmio tam altum esset, ut ne tum quidem post mortem memoriam sui speraret. Militum enim generosissimorum laus omnis intra diem unum sicut rosarum flos extinguitur, nec illi aut gloriam suorum inde referunt, nec mansurum in animo cujusquam desiderium sui, sed oblivionem facilem, & ducum ambitione nomen obscurum, etiam apud eos qui fortiter cadentes viderunt. Neque minus hi quod querantur, habent: quos virtutum & scientiarum splendore notabiles à magistratibus egestas exclusit. Vident nimirum ignominia celebri notatos, & inter angustias natalium fœda ingenia eluctantes, dignitates occupare licitationi patentes, eosque vincere pecunia, qui sibi in cæteris cedunt. Et isti plerunque dum in vitia seculi excalescunt, laudabilem alioquin sui famam includunt tumultis antequam ipsi ad veram notitiam sui descenderint. Igitur si in apparatu virtutis aurum & gemmæ non fuerint, arcebitur à magistratu quisquis altius suspexerit, & inertidiligentia veluti antiqua pictura ab annorum injuriis infecta jacebit in situ & pulvere, quo facilius appareat quibus gradibus animi dona fuerint diminuta.

Hæc indignatio pæne oculos meos condiderat in soporem, cum Torrentii & Ianicularis ligneolas figuras, & jam ad ruinam nutante gradu, juvenes de ponte dejecerunt qui novis suffragiis ambiebant facilitatem regis. Vtriusque casus, expressus arte mira, ita manus ad salutem corporum intenderat, ut putares posse adhuc vivere, quos tandem

tamdiu fata ad Eleutheriæ tutelam ultra solitos ætatis cursus servaverant. Iuxta, illinc Marcianus, hinc Rhetuscivile Eleutherianorum bellum damnabant, & surgentia ab obscuris recessibus propugnacula quæ Liphippum in possessionem orbis inducebant taciti mirabantur. Ac primo incrementis fallentibus apparebant fastigia turriū, mox in arduo montium munitissima castella regebant, quibus Europa veluti frænis coerceretur. Quaque deficiunt montes lacus, ingens loci munimentum objicitur, ubi profunditatis immensæ tristis aspectus inhorrescentes circa latera scopulos suscipit. Inde legatum rigore frigidi & venenati aëris extinctum efferebant pullati, & fastuosam pompam ad defuncti mores, assimilabant. Suscipiebant alienos cineres Alexandrini, & legatum olim suum in Hectoris famam per contemptum vitæ & solatium mortis æquabant: quoniam Melandriorum potentiam ad humanum imperium negligentia nostra properantem, & futuras clades non sustinuisset aspicere.

*Hunc patria incensa Rhetais montibus ælum  
Abstulit atra dies, & funere mersit acerbo  
Felicem ante alios, qui non hostilibus armis,  
Nec prece, nec pretio victus, virtute severa  
Maluit obscuras Acherontis visere ripas,  
Cernere quam savi funesta trophæa Liphippi.*

Claudebant scenam Geryonia, quæ de regia Alexandriæ depulsa Hermaphroditi consilio in Licinii connubium de nocte veniebat. Præsto erat ad ministerium dextera maritalis, & ille torta ad nutum cervice accipiebat uxorem. Supra caput Geryoniæ duo verba legebantur. *Equus Sejanus*. Nec longæ ab eo loco de ferrato carcere in libertatem exhibant Veritatis sacris per longas calamitates addicti. Inter eos, & Botris, & Capilupus, & Tamias, & quisquis in seditione Acigniana ut ictus effugeret saxeum robur invenit. Prope, vicini æquoris undis innatabat divulsa suis radicibus insula Veri, ad quam festinantibus remis navigabant illi omnes qui Geryonis carnifici-

nam

nam opportuna tyranni morte vitaverant. Et statim interno motu cessante, quietis totis, fidibusque per operta reductis, posuere signa concessam ad ludum vitam, & crescente tabulato obducta, in capsulam suam rediere.

Transierat in stuporem automatorum spectaculum, cum Theophilus; Quid agimus? inquit patet etiam elementum commune ausuris navigationem? expectat nos insula foelix, quam divortio suo totus Oceanus pro muris amplectitur ad incolarum tutelam? Occidit quidem Geryon, sed neque omnes placida indole crudelitatem eluctati, odium suum in cultores boni numinis deposuerunt. Hæc nostra tranquillitas, & à cædibus cessatio, omnino syrtibus similis est, quæ brevibus lymphis oppressæ solent in immensum subsidere ubi vestigium fugientibus arenis credideris, & absorbere calcantem. Quin igitur compositis sarcinulis ad amicam terram transimus, quæ sola omnium terrarum, feritatem mortalium fugientibus, pro asylo esse potest.

Hoc dicto, obversantis imagine periculi turbidus, præcessit nos, & statim cum illo, ego, piscator, & Vindocinus, in Tarentino littore adoratis sideribus, intravimus navigium, quæsituri Veritatis insulam, quo sese veluti ad securitatis portum implacabilis Fortuna conjiceret.

F I N I S,

SERIES

SERIES P A T E F A C T I  
D I V I N I T V S  
P A R R I C I D I I,  
I N

Ter maximum Regem regumque  
Britanniæ cogitati & instructi,  
Nonis IXbris M DC V,

*Illo ipso Novembri scripta, nunc  
denuum edita.*

*Auth. Argum.*

Sæpe divinitatis opera hæc sunt ut Fu-  
rias in ipso jam successu securas sub-  
ita ultio excipiat : ne vel umquam  
improbis timor , vel spes absit cala-  
mitosæ virtuti.

**D** Vbitatum jam olim ab Antiquitate est , utrum omni-  
bus sceleribus indicare pœnam , an omittere præsta-  
ret es quorum immanitatem natura refugit : Credo  
quod male ominari nollent plerique de genere humano , aut  
etiam admonere hæc fieri posse scelera quæ damparent. Sed  
hæc ætas & nefandum hujus diei parricidium dubitantibus  
scrupulum ademit ; ostendit corruptos animos licentiam sibi  
facere quantam rivuli crepidinibus ruptis , qui neque alvel  
meminerunt , nec nisi per montium insperatos obices casti-  
gantur. Ingens, atrox, horridum facinus, quale nec antiqui-  
tas vidit, & ægre posterī credent ; denique velut omnium  
flagitiorum compendium in hac diem fortuna contulit. Non  
ulciscar atrocitate verborum quod nulla unquam supplicia  
digne vindicarint, Bem aperiam tanta fide quanta perfidia  
gesta

gesta est. Populi Nationesque vel stupore damnabunt vel atrocioribus lacerabunt pœnis quam quas styli iracundia profunderet. Augustissimo *Jacob* tertium jam annum imperante agebat in alta pace *Britannia*; nihil tumultus domi, cum exteris foedus. Non videbatur posse tentari fundamentum tam bene vallati Imperii. Cujus ut certius securitas viveret, erant dictæ publicis *Comitiis Novembres*; incidit ille dies in 15. Novemb. Stylo novo: id est, vocati Ordines Regi quæ de negotiis publicis cognoscerent. *Westmonasterium* est oppidum ita *Londino* continuatis domibus annexum, ut ea sola appellatio disjungat. In eo, & Regia ad annem sita, & secundum eandem ripam paulo superius Curia quæ hos Regni *Conventus* accipit. Sacratissimis Regibus digna tanta Majestate sedes. Ad eorum pedes serevissimi liberi. Cum Rege sacrorum *Antistites*, & quos *Britannica* lingua *Dominos* appellamus, nempe *Duces*, *Marchiones*, *Comites*, *Vicecomites*, & *Barones*, purpureis vestibus, & capitibus ex antiquissima consuetudine tectis. Civium mox electi. *Judices* deinde ac *Magistratus*, & Regis beneficio exterarum Gentium legati. Regi etiam domesticis certa sedes. Iam reliqui discrimimbus confusis, quot capacissima sedes accipere potest: neque enim melioris notæ quisquam excluditur ab oratione Regis quo initium *Concilio* facit. Non est celebrior in orbe terrarum confessus. Igitur, quum jam instaret illius diei pompa, forte vir ipse celeritate ignotus *Nobilissimæ Baronis Montaquilii* puero literas porrigit: eas *Dominos* suo reddere jubet. Nec ulterius cunctatus quam ut *Epistolam* traderet, quod est facile in tam populosa urbe, præsertim nihil sollicitante puero, se per transeuntes hominum globos confudit. Servus, ut erat imperatum, *Montaquilio* literas tradit: quas aliquandiu neglectas tandem in hæc verba conscriptas legit.

**A** Micitia quæ mihi est cum tuorum aliquot, facit ut tuæ salutis curam habeam. Ideo monitum volo ut quo studio vitam amas, eo incumbas prætexendis excusationibus quæ te à publico Ordinum conventu eximant. Numen enim & homines conspirant in ultionem scelerum quæ hæc ætas tulit. Neque præcautionem spreveris, sed discede ab urbe ocyus in aliam regni partem, ubi rei exitum securus expectes. Etenim licet nulla mortuum iuvitia se prodant, dicoterribilis ictus in hunc *Conventum* incidet, neque erunt in lætorum conspectu hi qui lædent. Non est quod consilium temnas, quod prodesse tibi potest, nocere minime potest: quippe pericoli nihil erit his exussis literis. Eo te recte usurum spero beneficio *Numinis* cujus tutelæ te resigno.

Literæ istæ erant Anglico sermone scriptæ, eo charactere quem vulgo *Italicum* dicimus. *Montaquilius* rei novitæ percussus, epistolam ad nobilissimum *Salisburiensem Comitem* deferret, quid facto opus censeat, consultit. Hic fidelissimus & sagacissimus *Purpuratus*, agitare secum varia, Modo cogitare,

nihil inausum sceleris esse: impia facinora tam mirabiliter aperiri quam flagitiose concipiuntur: Nunc otiosas populi voces reputare & inanes vaticinantium metus, qui sæpe nullo argumento calamitates publicas portendant. Inter haec animorum iactationem pæne factum ut nullius fidei literæ haberentur. Tamen ne quid etiam tutum in tanto negotio continerent, placuit de ea re ad nonnullos sanctissimi Concilii referri. Lecta epistola in aliquorum coetu pluribus risum quam securitatem excussit. Evincebat opinio refutantium hos timores, quum in tanta tranquillitate rerum nec timendum censerent, nec excitandos divulgatis suspicionibus rumores qui distraherent populi mentes & ineptis terroribus consternerent. Quem enim jam in *Britannia* rebellare? quem habere comparatam in *Insula* manum? aut cuius vires iustar hybernici torrentis, ut in ipsa Satellitum turba *Regem* opprimat? Iterato tamen de eadem re actum Excussæ diligentius timoris causæ, tandemque decretum ut de eo negotio *Rex* ipse cognosceret. In perlectis diligenter literis, haud secus quam prope motus, se vero non contemnere, dixit, hanc vocem quam ipsa sceleris bona fortuna extorserat.

Voluerunt fata ut suorum quidem fidelitati suæ vero prudentiæ vitam *Rex* tantus deberet. Cum enim diligentius inhæreret illis literis, subito exclamavit, (diceres haec chartam plus illi quam cæteris dixisse) aut nihil se videre aut facinorosos destinasse sulphurei pulveris tormento grande scelus exequi: nec dubitare se quin ipsam *Cuviam* cum Purpuratis omnibus hoc fulmine humano velint de sedibus suis movere & *Regnum* in suis capitibus exterminare. Iam subita *Regis* divinatio omnibus incusserat merum, & quoniam illius constantiam noverant, & quia iis argumentis nitebatur quæ necdum alius adverterat. Quid enim, aiebat, quod scribunt non fore in læsorum conspectu hos qui lædent, quid est aliud quam has machinas & sulphuris violentiam minari? Quod deinde exustis literis cessare: periculum ajunt, nunquid obscure dictum est subitam fore flammam quam qui evaserint in securo consistent? Obstupescuntibus ad tantam solertiam cunctis, tamen factorum iniquitas præe tanti consilii prudentiam extinxit. Etenim cum pridie illius diei qui & publicis Conventibus & tanto sceleri erat indictus, *Rex* delegasset provinciam perscrutandi omnes latebras unde hæc tempestas posset erumpere, Nobilissimo Suffolcieusi Comiti Summo Regii Cubiculi Præfecto: Ipse investigatis diligenter omnibus, retulit, non esse certum tanti facinoris indicium, nec in inferiori sede ac velut subterranea quæ *Cuvia* subjacet, advertere aliud potuisse præter struem fascium quos in hyemem conductor reposuerat, in quibus tamen posset aliqua suspicio delitescere. Tum *Rex* generosum *Equestem* delegat, *Thomam* *Neveston* nomen est, qui excuteret suspectam fascium fidem, videreque ne quid insidiarum illa sedes reciperet: Ratus est



lidos homines sibi destinasse hanc ultimam noctem in qua sume nequitiæ instrumenta ad Regni interitum expedirent. Hic aliquando victa virtute impietas est, & mala Regni fortuna manus dedit. *Thomas Percius* erat Regi & naturæ jure & magnis beneficiis devinctus: Quippe etiam in *Pensionariorum* numerum receptus. Ita vocatus selectos ex amplissimis familiis ad illustrem & præcipuam *Britannicorum Regum* custodiam. Is cum immæue parricidium animo destinasset, admittis aliquot in tanti facinoris communionem id hæc ordine explicare decreverat. Accituserat ex *Belgio* vir qui in *Anglia* natus duodecimum jam annum *Hispanis* operam dabat. Hic conjurationis minister, ut melius falleret, se pro *Percij* dudum famulo gesserat. *Guido Faux* parricidæ nomen erat. Pæne à biennio conduxerat hæc *Curia* partem: cædo ne suspecta novitas, & ut tanti apparatus obscurius cogerentur. Ibi sceleris velut domicilium constitutum. Vin in eo ingentem sulphurei pulveris detruserat. Cum primo in diversis consciorum domibus sine suspitione duceretur: ac ut omnem scrutantium eluderetur curam, composito lignorum acervo supposuerat fatalem illam mercem. Sed illo demum tempore curatis diligenter omnibus, cum inde paulo post mediam noctem digrederetur, *Knevettus*, ut erat imperatum, hominem adöritur, & quid eo præcipue tempore ibi ageret, quærit. Ille nescio quæ mentitus se in crastinum usum adornasse, jubetur referre ostium, quod in illam sedem ducebat. Erat cum *Knevetto* & Magistratuum iracundus & satellitum. Fingebatur nescio quos Regios tapetes è proximo subtractos esse, eos hac diligentia quæri. Igitur quum amoveri cœpisset lignorum strues, occurrit primo dolium mediocre, mox vis tanta tormentarii pulveris ut non domum evertere sed corrumpere Civitatem posset. Dolia erant triginta duo, in iis electissimi pulveris pondo pæne millia novem. Super dolia ferreæ massæ, quæ flammæ viribus elatæ ultra fulminis impatientiam sævirent. Etiam lapides & ingentia velut rupium fragmina, quæ ædificii moras suo impetu tollerent. Sed in eam rem maxime intenderant curam ne Regem incolumem hæc tempestas ommitteret.

Infra Regiam cellam dolium erat positum multo cæteris capacius: quia etiam inermem Majestatem sine magno apparatu aggredi timebant. Nec dubitatum est quin si hoc scelus exitum habuisset, cecidissent ultra triginta millia mortalium, everfis compluribus ædificiis ne misera civitas unico clade deformaretur. Etiam periisset angustissima sedes (*Westmonasteria* appellant, unde & oppido nomen) tot Regum inaugurationibus solemnis, tot tumulis religiosa: Ibi Regni insignia: Ibi memorabile solium propter subjecti lapidis famam & de ea Patrum fidem. Templum; præter auri marmorisque præciū & *Henriciani* sacelli decus, quo elegantius Europa non habet, ipsa antiquitatis inæstimate spectabile. Ac ne perduelles sanctitati

armarum parcerent, quæta omnium pæne Regum offæa facinore laceſcebantur. Iacuiſſent everſa monumenta vetuſtatis, & prope pulcherrima memoriæ triumphorum. Huic templo vicinũ ararium & tot in eo arcana eadem clades petebat. Nec ſupervixiſſet incendio *Curia* ubi juſ populo dicitur, ne ſcelus & perſidiam poſſet ulciſci: ita compleſcebantur omnia anno facinore. Non reliquerant novo ſcleri locum, & ipſam *Furiarum* inventionem fatigaverant. Igitur, cum loquentibus rebus ille nefarius nihil amplius negaret, concubia adhuc nocte in Regiam ducitur. Is collecto ſpiritu auſoſus, Scio, inquit, & mihi iſtare mortem, nec quid ea gravius in me poſſe decerni. Itaque non expectabo ut tormenta confeſſionem exprimant. Etiam hoc cum laude dicendum eſt. Fuit mihi iſ animus quem ex tanto apparatu colligere poſuiſtis. Regem, Principem, optimates, una cædetolere volui: nec quaerite quid me ad illuſ conſilii magnitudinem extulerit. Sacrorum meorum amor & meriti gloria hunc animum immiſit, ut in adverſarios quacunque audacia ſævirem. Nec degenerabat à verborum conſtantia interritus vultus: credo, quoniam ſpes liberat ſcrupuloſæ trepidationis pareus. Et vero maximum in præcordiis dolore ſævire dicebat, quod non proceſſiſſet cogitatum facinus, & tam grande conſilium fortuna prodidiſſet.

Erat palam ab altiori fonte decurrere hanc conjurationis ſtygem. *Thomas Percius*, eo die qui noctem pæne fatalem præceſſerat, velut ad negotia excedens diverſis labyrinthis turbarer velliſigia fugæ ſux: cum ſubito eum in armis eſſe nunciatum eſt, & collecta conjuratorum manu, huc illuc diverſis voluminibus circumferre contemnendum agmen, ut quod vix ſexaginta equites imolebat; Peditem in iſ neminem eſſe: Generoſos aliquot *Nobiliffimi Harringtonii* equos rapuerant, ſures magis quam hoſtes. Et pæne parricidarum conſilium palam erat, voluiſſe ſublato Rege & confuſis miſerabili calamitate omnibus. Sereniſſimam *Elizabetham* Regiſ filiam quæ *Burton* educabatur, in poteſtate ſua eſſe, eam deinde collocare nuptui, prout rerum ſtatus & vel exteriorum exigere favor, vel merus urgeret. Sed populus ab eorum ſcelere averſus, quocunque ſe contulerant aut oppidorum aditu prohibebant, aut etiam inſeſtis armis abeuntes proſequebantur. Itaque tercio die, poſtquam aggregari coeperant in ipſo *Britannia* ſinu ingenti miraculo oppreſſi ſunt. Regionis quam inſeſtabant *Index*, quum necdum cinaſſet *Wæſtmonaſterienſis* ſcleris fama (quippe ultra centum millia paſſuum *Londino* aberant) tantumque audiret eſſe armatos qui homines publice ad Romanæ fidei profeſſionem vocarent: miſſo ad eos nuncio ſignificari juſſit, quia cædibus hætenus abſtinuerant, ſi recederent ab inſentia armaque ponerent, ultro ſe pro illis ſuppliciorum deprecatores fore. Mallent clementiam Regis expectari quam fortitudinem, illi quari præciſam ſpem veniæ magul-

magitudine facinoris, superbia etiam verbis cupientem iudicem exasperant. Neque se illo адвокато egere, & si ad eos veniret, aut hoc firma manu faceret, aut ipse damno fore. Sane videbantur majorum virum quam ut imperiti oppidanorum manu premerentur. Sed ibi etiam fortuna & Regi & *Britannia* vicit: Rusticus villæ familiaris, in quam se receperant, in pulverem sulphureum quem ipsi pluvio aere corruptum ad ignem siccabant scintillam imprudens immittit. Illa statim correpta flamma dominorum suorum scelus ulciscitur, in vultus invadit. Aliquorum frontes exustæ, aliquorum membra. Et invadendi facultatem & sustinendi hostis robur idem casus sustulit. Aliqui profugerunt, nocentiores resistenter velut ad supplicium. Interim villa, ubi se condiderant, oblato ab oppidanis incendio coepit ardere: duplici malo circumventi quum & arma foris & intus incendium urgeret, maluerunt ferro cadere quam solvi lentioribus flammis. Desperatione itaque pleni in medium prodeunt, non aliqua spe vitæ, sed tantum mortem mutaturi. Ibi primum omnes in gena procidunt cum *Percius Virginiam* imaginem promississet. Ea adorata ad prælium accenduntur. *Percius* & *Catsbeyus* juncto inter se dorso circumvenientem multitudinem subinvenit. Sed glâs plumbea transverberato *Catsbeyo* etiam *Percium* faciat. Necdum audiverant oppidani perfidiæ Authores ex Regio præcepto vivos capi oportere. *Catsbeyus* cecidit: *Percius* vivus quidem in manus venerat, sed biduo deinde ex vulnere consumptus est. Facile deinde profligati perduelles, mox alii ut quemque fuga & metu subulerant per diversa dissipati. Plurimi tamen capti, publicis custodiis & mox supplicii servabantur. Nec abstinerant hoc flagitio foeminae, quasi sequior sexus timeret esse innocens corrupto meliore; Illæ quoque detecto facinore in carceres missæ sunt, dignæ misericordia nisi omnes miseros esse voluissent.


Quid huic pars sceleri? aut quæ cum eo componenda crudelitatis atrocitas? *Mithridatis* furor una nocte in cives Romanos tota Asia sævit. Siculi suam vesperam cæde Gallica nobilitaverant. Vtrobique hominum genus quærebatur. Isti specie quidem partium, sed velut æquali odio id videntur quæsisse, ne quis esset qui non eos victos lætaretur. Sed præcipuam in hoc facto prudentiæ gloriam nec auferre homines Regi possunt, & videtur optimum *Numen* approbare omnibus voluisse eum suo fastigio dignissimum esse. Quum erupisset ex tanto incendio non tam scintilla quædam quam fumus & nebula, id est argumenta sed illa per obscura destinati facinoris, hæc omnibus pæne infra curam ponentibus solus Rex non contempsit. Iussit indagari sceleris vestigia ne aut sua culpa moreretur, aut fortunæ beneficio viveret. Quæ illic prudentia, quæ omnibus sceptris digna sagacitas? Quum deinde proditorum facinus ita esset ex tenebris extractum ut nondum periculi moles cervicibus depulsa videretur, solus ille cul

omnes

omnes maxime timebant, solus Rex inturbata fronte constitit: Quæ demum ista animi magnitudo, & digna *Heroum* virtus! Tibi Patriæ Imperiū quod hodie tua virtute vivit, fata diutissime sospiteant. Tibi vitam quam tot hominū millia immortalitati tuæ prudentiæ debent, omnes *Gallicæ* devotionis exemplo detestent, O *Auguste*, O *Britannice*, O Rex, cujus vitam in hoc seculum fata dispensarunt, ne periclitanti Patriæ ultimum esset.

O scelus! O veterum proles vesana Gigantum,  
 Iamne iuvat bellare Diis? jam turbine diro  
 Iam revocare hos? patriaque indicare mortem?  
 Sacula tot, stirpesque Deum, patrumque labores  
 Vna cade rapi? Furiaque Erebusque negarent  
 Hoc tantum dictare nefas. Exhorrui ather  
 Et fremituere Dii, stupuitque exterritus orbis.  
 Regem etiam vis illa petat quo sydere mundus  
 Purior, & nostras melior lux aspicit oras?  
 Hunc Regem vis illa petat, quem Marte secundo  
 Nunc iterum tegit ista dies! Quid perfida tela  
 Abdere, quid tanto componere sulphure fulmen,  
 Quid iuvat occulta tot semina condere flamma?  
 Ah miseri prohibete minas. Sua numina novit  
 Fulmen, & in magnum nescit peccare Tonantem:  
 Ergone consilium Civesque, Hominesque Britanni,  
 O dolor! hocineant? lacerumne per athera Regem  
 Spargere, quem melius calo feret ardua virtus?  
 Purpureosne Patres alio nunc tingitis ostro,  
 Sanguine, cade, rogis? cunctos discrimine nullo  
 Tollere decretum est? irascique omnibus annis?  
 Non est non hominum scelus hoc, ut Tartara cernas.  
 Id molita nefas, imo de pectore terra  
 Impetus, aque fero venisset flamma Barathro.

FINIS.











Handwritten text, possibly a signature or name, in dark ink.

A. M. Campione



